

BUKU TEKS KELAS PENGAJIAN ISLAM PERKIM

FEKAH TAHAP ASAS



PERTUBUHAN KEBAJIKAN ISLAM MALAYSIA (PERKIM)

Edisi Pertama

BUKU TEKS KELAS PENGAJIAN ISLAM PERKIM

FEKAH

TAHAP ASAS



PERTUBUHAN KEBAJIKAN ISLAM MALAYSIA (PERKIM)

Edisi Pertama

Cetakan Pertama, 2021
©Pertubuhan Kebajikan Islam Malaysia, 2021

Hak cipta terpelihara. Setiap bahagian daripada terbitan ini tidak boleh diterbitkan semula, disimpan untuk pengeluaran atau dipindah kepada bentuk lain sama ada dalam bentuk termasuk elektronik, mekanikal, gambar, fotokopi, rakaman atau lain-lain tanpa mendapat izin daripada Pertubuhan Kebajikan Islam Malaysia (PERKIM) terlebih dahulu.

Perpustakaan Negara Malaysia
Data Pengkatalogan-dalam-penerbitan

ISBN 978-967-26038-1-8

Dr. Aisyah Jami'an, S.Ag,
Prof. Madya Dr. Razaleigh Muhamat @ Kawangit, Prof. Madya Dr. A'dawiyah Ismail

1. Pengajian Untuk Mualaf
2. Pengajian Fekah Tahap Asas- Religious Aspects-Islam I.Judul

Penerbit

Pertubuhan Kebajikan Islam Malaysia (PERKIM)
Ibu Pejabat PERKIM Kebangsaan
Tingkat 4 & 6, Bangunan PERKIM
150, Jalan Sultan Azlan Shah (Jalan Ipoh)
51200 Kuala Lumpur

Laman sesawang: www.perkim.net.my
Tel: 03-40412482/ 03-40426224
Faks: 03-40427403
Website: <https://perkim.net.my>
Emel: info@perkim.net.my

Pencetak

Sarjana Media Sdn. Bhd.
No.38, Jalan Usahawan 7 Off Jalan Kilang
Taman Sri Rampai,Wilayah Persekutuan
53300 Kuala Lumpur
Tel 03 41417424

EDITORIAL

Penasihat

Y.Bhg. Tan Sri Dr. Mohd Yusof Noor

Ketua Editor

Tuan Haji Mamat Che Chik

Penolong Ketua Editor

Dr. Suariza@Hidayah Muhammad

Editor

Encik Muhammad Farhan Tee Abdullah

Encik Muhammad Jais Mariappan Abdullah

Puan Siti Munirah Sayed Mohd Hamdan

Puan Nur Syahirah Musa

Encik Abdul Qawi Navine Abdullah

Encik Mohd Yusoff Ahmad

Encik Ghazali Ismail

Encik Mohamad Nizam Abd Razak

Cik Zaatil Hidaayah Ahmad Bustaman

Puan Wan Zubaidah Wan Yusoff

Puan Rukiah Sungip

Encik Zafri Ismaiskandar Abdul Ghani

Encik Sh Muhammad Amiruddin Sh Sulaiman

Haji Khalid Mohd Noor

Encik Syed Azman Syed Ariffin

Puan Siti Nasryah Rosli

Encik Muhammad Faiz Md Yusoff

Haji Mohd Subri Jaafar

Puan Rosnaliza Ahmadiah

Puan Aishah Abdul Wahab

Encik Mohd Jogi Panjaitan Maruli

Dr. Mohd Faisal Mohamed

Encik Abdul Ghani Abdullah

Encik Ali Abdullah @ Lee Kin Hong

Puan Nur Habeebah Muniandi

Sidang Editorial

Prof. Madya Dr. Razaleigh Muhamat @ Kawangit
Prof. Madya Dr. A'dawiyah Ismail
Prof. Madya Dr. Mohd Afandi Mat Rani
Prof. Madya Dr. Mariam Abd. Majid
Dr. Muhammad Yusuf Marlon Abdullah
Dr. Nor Raudah Hj. Siren
Dr. Muhammad Ayman al-Akiti
Dr. Aisyah Jami'an, S.Ag
Dr. Azri Bhari
Dr. Mohd Izzat Amsyar Mohd Arif
Dr. Amiratul Munirah Yahaya
Dr. Nur A'thiroh Masyaa'il Tan Abdullah @ Tan Ai Pao
Dr. Faezy Adenan
Encik Ahmad A'toa' Mokhtar
Encik Kamarulzaman Kawi

Urusetia

Encik Firdaus Lokman Tah
Encik Ahmad Hasaidi Said
Encik Muhammad Hizam Abdul Rahim
Cik Nur Shazleen R. Samsul Bahari
Cik Umi Musfirah Abdul Ghani

PENDAHULUAN

Buku pengajian Islam Fekah Tahap Asas ini digunakan untuk membimbing mualaf yang baharu hendak mengenali Islam sebagai agama anutan atau orang bukan Islam yang berminat untuk memahami tentang Islam.

Dari segi bahasa Fekah berasal dari perkataan arab iaitu '*Fiqh*' yang bermaksud memahami. Pada asalnya ia bermaksud memahami agama secara keseluruhannya. Namun kemudiannya dikhususkan ulamak kepada memahami ajaran Islam yang berkaitan dengan hukum-hakam amali sahaja, iaitu percakapan, perbuatan dan hal ehwal luaran manusia tanpa menyentuh soal akidah dan akhlak.

Secara lebih jelas, ilmu Fekah ialah ilmu berkenaan hukum-hakam Syarak yang bersifat amali yang diperolehi dalil-dalilnya secara terperinci yang bersumberkan daripada al-Quran, hadis, ijmak dan kias.

Oleh itu, Pengajian Fekah sangat penting kerana didalamnya terkandung syariat-syariat Allah SWT yang wajib dipatuhi dan dilaksanakan oleh individu Muslim.

KANDUNGAN

PENGENALAN IBADAH.....1

BAHAGIAN 1 - TAHARAH

BAB 1 - KONSEP TAHARAH DALAM ISLAM

1.1	KONSEP TAHARAH DALAM ISLAM	3
1.1.1	Pengertian Taharah	3
1.1.2	Tujuan Taharah	3
1.1.3	Dalil Pensyariatan Taharah.....	4
1.1.4	Syarat-syarat Wajib Taharah	5

BAB 2 - TAHARAH DENGAN AIR

1.2	TAHARAH MENGGUNAKAN AIR	6
1.2.1	Air Mutlak	6
1.2.2	Air Mustakmal	14
1.2.3	Air Mutanajis	15
1.2.4	Air Musyammas	16

BAB 3 - ISTINJAK

1.3	ISTINJAK	17
1.3.1	Pengertian Istinja.....	17
1.3.2	Dalil dan Cara Beristinja.....	17
1.3.3	Syarat-syarat Beristinja	19
1.3.4	Larangan Ketika Beristinja	20

BAB 4 - NAJIS

1.4	NAJIS	22
1.4.1	Pengertian Najis	22
1.4.2	Kategori Najis	22
1.4.3	Jenis-jenis Najis	22

BAHAGIAN 2 – HADAS

BAB 1 - BERSUCI DARIPADA HADAS

2.1	BERSUCI DARIPADA HADAS	28
2.1.1	Pengertian Hadas	28
2.1.2	Dalil Wajib Bersuci daripada Hadas.....	29
2.1.3	Pembahagian Hadas.....	30

2.1.4	Perbezaan Antara Darah Haid, Darah Nifas, Darah Istihadah dan Darah Wiladah.....	31
2.1.5	Cara Menyucikan Hadas Besar dan Hadas Kecil	33
2.1.6	Perkara-perkara yang Haram Ketika Berhadas Kecil atau Berhadas Besar	33

BAB 2 - BERSUCI DENGAN WUDUK

2.2	BERSUCI DENGAN WUDUK.....	35
2.2.1	Pengertian Wuduk.....	35
2.2.2	Rukun Wuduk.....	35
2.2.3	Rukun-rukun Wuduk	37
2.2.4	Cara Berwuduk	37
2.2.5	Syarat Wajib Wuduk.....	43
2.2.6	Perkara-perkara Sunat Sewaktu Berwuduk.....	44
2.2.7	Perkara yang Membatalkan Wuduk.	45
2.2.8	Perkara Makruh Ketika Berwuduk	46
2.2.9	Ilustrasi Wuduk dengan Sempurna dari Anggota Rukun dan Anggota yang Sunat Adalah Seperti Berikut:	47
2.2.10	Khuf	57

BAB 3 - BERSUCI DENGAN MANDI

2.3	BERSUCI DENGAN MANDI.....	61
2.3.1	Pengertian Mandi	61
2.3.2	Sebab-sebab Mandi Wajib	61
2.3.3	Sebab-sebab Mandi Sunat.....	61
2.3.4	Perkara-perkara Rukun Ketika Mandi	62
2.3.5	Perkara-perkara Sunat Ketika Mandi	63

BAB 4 - BERSUCI DENGAN TAYAMUM

2.4	BERSUCI DENGAN TAYAMUM	64
2.4.1	Pengertian dan Dasar Hukum Tayamum.....	65
2.4.2	Dalil dan Hukum Tayamum.....	65
2.4.3	Sebab-sebab Dbolehkan Tayamum.....	67
2.4.4	Rukun Tayamum	68
2.4.5	Perkara-perkara Sunat Ketika Tayamum.....	68
2.4.6	Syarat Sah Melakukan Tayamum.....	69
2.4.7	Ilustrasi Bertayamum (Lelaki dan Perempuan)	71
2.4.8	Cara Tayamum dalam Kenderaan	78
2.4.9	Sebab Diharuskan Tayamum.....	78

2.4.10	Perkara Yang Membatalkan Tayamum	78
2.4.11	Hikmah Disyariatkan Tayamum	79

BAHAGIAN 3 - AZAN DAN IQAMAH

3.	AZAN DAN IQAMAT.....	80
3.1	Pengertian Azan	80
3.2	Pengertian Iqamat.....	81
3.3	Hukum Azan dan Iqamat	81
3.3.1	Hukum Azan	81
3.3.2	Hukum Iqamat	82
3.3.3	Hukum Azan dan Iqamat bagi Wanita	82
3.4	Syarat-syarat Melaungkan Azan dan Iqamat	83
3.5	Perkara-perkara Sunat Ketika Melaungkan Azan	84
3.6	Syarat Seorang <i>Muazin</i> (Orang yang Melaungkan Azan)	84
3.7	Lafaz Azan dan Iqamat.....	85
3.7.1	Lafaz dan Jawab Azan	85
3.7.2	Lafaz dan Jawab Iqamat.....	92

BAHAGIAN 4 - SOLAT

BAB 1 - KONSEP SOLAT DALAM ISLAM

4.1	KONSEP SOLAT DALAM ISLAM	98
4.1.1	Pengertian Solat.....	98
4.1.2	Syarat-syarat Wajib Solat.....	99
4.1.3	Syarat Sah Solat	101
4.1.4	Rukun Solat dan Pembahagiannya	102
4.1.5	Perkara-perkara Makruh dalam Solat	104
4.1.6	Perkara-perkara yang Membatalkan Solat	104
4.1.7	Aurat dalam Solat.....	105
4.1.8	Hukum Solat.....	105

BAB 2 - SOLAT FARDU (FARDU AIN)

4.2	SOLAT FARDU (FARDU AIN)	106
4.2.1	Jenis-jenis Solat Lima Waktu Sehari Sempadan	106
4.2.2	Dalil-dalil Solat Fardu	107
4.2.3	Perkara-perkara Sunat dalam Solat Fardu	108
4.2.4	Halangan Solat Fardu.....	110
4.2.5	Sujud Sahwi	111
4.2.6	Cara Pelaksanaan Solat dengan Betul	116

4.2.7	Solat Ketika Sakit	175
4.2.8	Tayamum bagi Orang Sakit	180
4.2.9	Solat Fardu Secara Jamak dan Qasar.....	185
4.2.10	SOLAT JUMAAT	205

BAB 3 - SOLAT FARDU (FARDU KIFAYAH)

4.3	SOLAT FARDU (FARDU KIFAYAH)	214
4.3.1	Solat Fardu Secara Berjemaah.....	214
4.3.2	Solat Jenazah	223

BAB 4 - SOLAT-SOLAT SUNAT

4.4	SOLAT-SOLAT SUNAT	242
4.4.1	Sunat Sunat <i>Muakkad</i>	242
4.4.2	Solat Sunat Ghairu Muakkad	260
4.4.3	Waktu-waktu yang Dimakruhkan untuk Melakukan Solat Sunat Mutlak	275

BAHAGIAN 5 - PUASA

BAB 1 - PUASA

5.1	PUASA	276
5.1.1	Pengertian Puasa.....	276
5.1.2	Hukum-hukum Berpuasa	277
5.1.3	Jenis-jenis Puasa Wajib	277
5.1.4	Syarat Wajib Puasa	277
5.1.5	Jenis-jenis Puasa Sunat.....	278
5.1.6	Puasa yang Makruh Dilakukan	278
5.1.7	Puasa yang Haram Dilakukan	279
5.1.8	Syarat Sah Berpuasa	279
5.1.9	Rukun Berpuasa	279
5.1.10	Kelebihan Berpuasa.....	280
5.1.11	Perkara-perkara Sunat Bagi Orang Berpuasa	280
5.1.12	Perkara-perkara Makruh Ketika Berpuasa.....	281
5.1.13	Perkara-perkara yang Membatalkan Puasa	281
5.1.14	Perkara-perkara yang Diharuskan Berbuka Puasa	282
5.1.15	Keistimewaan Bulan Ramadan.....	282
5.1.16	Niat Puasa Ramadan	283
5.1.17	Qada Puasa Ramadan.....	284

BAB 2 - FIDYAH

5.2 FIDYAH	287
5.2.1 Pengertian Fidyah	287
5.2.2 Dalil Pensyariatan Fidyah	287
5.2.3 Hukum Fidyah	288
5.2.4 Sebab-sebab Dikenakan Fidyah.....	288
5.2.5 Taksiran Fidyah.....	290
5.2.6 Kadar Bayaran Fidyah	290
5.2.7 Konsep Gandaan bagi Penentuan Bayaran Fidyah	290
5.2.8 Prosedur Membayar Fidyah di Majlis Agama Islam Negeri.....	291
5.2.9 Hikmah Pensyariatan Fidyah	291

BAB 3 - KAFARAH

5.3 KAFARAH	292
5.3.1 Pengertian Kafarah	292
5.3.2 Dalil Pensyariatan Kafarah.....	292
5.3.3 Hukum Membayar Kafarah	295
5.3.4 Perkara-perkara yang Menyebabkan Kafarah Dikenakan	295
5.3.5 Kadar Jenis-jenis Kafarah	297
5.3.6 Hikmah Pensyariatan Kafarah	298

BAHAGIAN 6 - ZAKAT

6. ZAKAT.....	299
6.1 Pengenalan	299
6.2 Pengertian Zakat.....	299
6.3 Dalil Wajib Zakat	300
6.4 Kepentingan Mengeluarkan Zakat	301
6.5 Syarat Wajib Zakat	302
6.6 Cara Membayar Zakat	302
6.7 Kesan Menangguhkan Zakat	303
6.8 Wakil Menangguhkan Pengagihan Zakat	303
6.9 Zakat yang Dikeluarkan Sebelum Waktu Wajib	304
6.10 Syarat Sah Zakat Sebelum Waktu Wajib	304
6.11 Berzakat Melalui Pemerintah	305
6.12 Golongan Asnaf (Penerima Zakat).....	306

6.13	Jenis-jenis Zakat	309
6.13.1	Zakat Fitrah.....	309
6.13.2	Zakat Pendapatan	312
6.13.3	Zakat Perniagaan	317
6.13.4	Zakat Wang Simpanan	323
6.13.5	Zakat Pelaburan (Saham)	327
6.13.6	Zakat KWSP (Kumpulan Wang Simpanan Pekerja).....	335
6.13.7	Zakat Emas dan Perak	340
6.13.8	Zakat Takafu.....	347
6.13.9	Zakat Pertanian.....	351
6.13.10	Zakat Ternakan.....	357
6.14	Institusi-institusi Zakat di Malaysia di Bawah Majlis Agama Islam Negeri-negeri	364
6.15	Hikmah Berzakat	365

BAHAGIAN 7 - HAJI DAN UMRAH

BAB 1 - HAJI

7.1	HAJI	366
7.1.1	Pendahuluan	366
7.1.2	Pengertian Haji.....	367
7.1.3	Dalil dan Hukum Haji.....	367
7.1.4	Jenis-jenis Haji	369
7.1.5	Syarat-syarat Wajib Haji.....	370
7.1.6	Rukun Haji.....	375
7.1.7	Wajib Haji	400
7.1.8	Perbezaan Rukun Dan Wajib Haji	403
7.1.9	Perkara-perkara Sunat Haji.....	403
7.1.10	Perkara yang Membatalkan Haji	410
7.1.11	Hukum Haji bagi Wanita.....	411
7.1.12	Hukum Menyegerakan Haji.....	412
7.1.13	Haji Mabrur.....	413
7.1.14	Proses pelaksanaan Ibadah Haji (Manasik Haji)	414

BAB 2 - UMRAH

7.2	UMRAH	419
7.2.1	Pengertian Umrah	419
7.2.2	Dalil dan Hukum Umrah	419
7.2.3	Syarat-syarat Wajib Umrah	420

7.2.4	Rukun Umrah	423
7.2.5	Wajib Umrah	424
BAB3 - JENIS DAM DAN KESALAHANNYA		
7.3	DAM HAJI DAN UMRAH	425
7.3.1	Pengertian Dam	425
7.3.2	Dalil Pensyariatan Dam.....	426
7.3.3	Perkara-perkara yang Menyebabkan Seseorang yang Menunaikan Haji atau Umrah Dikenakan Dam...428	
7.3.4	Jenis-jenis Dam.....	430
7.3.5	HIKMAH DAM	434
BAB 4 - RUMUSAN HAJI DAN UMRAH SERTA PERBEZAANNYA		
7.4	HAJI DAN UMRAH	435
7.4.1	Fadilat dan Hikmah Haji dan Umrah	435
7.4.2	Pengertian Haji dan Umrah.....	437
7.4.3	Rukun Haji dan Umrah Secara Ringkas	437
7.4.4	Wajib Haji dan Umrah	438
7.4.5	Perbezaan Haji dan Umrah Secara Umum.....	439
BAHAGIAN 8 - PENUTUP		
8.	PENUTUP	440

PENGENALAN IBADAH

Ibadat adalah pengabdian atau aktiviti yang dilakukan semata-mata hanya kerana Allah SWT untuk mencapai keredaan Allah SWT sama ada melalui perkataan atau perbuatan yang dilakukan secara terang atau tersembunyi.

Ibadah dari Segi Bahasa: Merendah diri, tunduk, taat dan patuh.

Ibadah dari Segi Istilah: Pengabdian kepada Allah SWT melalui perkataan, pengakuan hati dan perbuatan mengikut syariat Islam serta mengakui dan meyakini bahawa Allah SWT sahaja yang layak disembah dan mentaati kepada semua perintah-Nya.

Firman Allah SWT dalam Surah adz-Dzaariyaat (51) ayat 56:

وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ ﴿٥٦﴾

Maksudnya: *Dan (ingatlah) Aku tidak menciptakan jin dan manusia melainkan untuk mereka menyembah dan beribadat kepadaKu. (56)*

Kepentingan ibadat adalah dengan melakukan semua suruhan Allah SWT dan menjauhi semua larangan-Nya dengan penuh ikhlas. Ini adalah pembuktian kepada keabdián hamba kepada Allah SWT.

Lima Kedudukan Hukum dalam IBADAH

Dalam kaedah fekah ada lima kedudukan hukum yang menjadi sandaran amalan seorang individu Muslim untuk menentukan kedudukan amal ibadah yang dikerjakan. Lima kedudukan hukum tersebut adalah seperti berikut:

- 1) **Wajib:** Sesuatu hukum atau perintah yang mesti dilakukan, iaitu apabila dilakukan mendapat pahala dan apabila ditinggalkan berdosa. Contoh: Solat, puasa di bulan Ramadan haji dan berzakat.
- 2) **Sunat:** Sesuatu perintah yang boleh dilakukan atau tidak, iaitu jika dilakukan mendapat pahala, jika ditinggalkan tidak berdosa. Contoh: Solat sunat tarawih dan puasa sunat.
- 3) **Haram:** Sesuatu perintah atau aturan hidup yang tidak boleh dilakukan, iaitu jika dilakukan mendapat dosa dan jika ditinggalkan mendapat pahala. Contoh: Minum arak.
- 4) **Makruh:** Sesuatu perbuatan atau amalan jika dilakukan tidak berdosa dan jika ditinggalkan mendapat pahala. Contoh: Makan bawang atau petai yang menjadikan mulut berbau bagi orang yang hendak pergi solat berjemaah.
- 5) **Harus:** Sesuatu perkara yang harus untuk dilakukan. Jika dilakukan atau ditinggalkan tidak membuat orang itu mendapat pahala atau berdosa. Contoh: Makan, minum, menulis membawa kenderaan.

BAHAGIAN 1

TAHARAH

BAB 1

KONSEP TAHARAH DALAM ISLAM

1.1 KONSEP TAHARAH DALAM ISLAM

Islam telah mensyariatkan kepada setiap Muslim agar sentiasa menjaga kebersihan dan kesucian diri, terutama pada ketika hendak mengerjakan ibadah solat.

1.1.1 Pengertian Taharah

Pengertian dari Segi Bahasa: Suci dan bersih.

Pengertian dari Segi Istilah: Taharah bermaksud suci dan bersih daripada najis, hadas besar dan hadas kecil.

Di samping itu ada juga yang memberi maksud taharah sebagai suatu amalan bersuci yang bertujuan untuk mengangkat hadas dan menghilangkan najis dengan kaedah yang telah ditentukan oleh syarak. Kaedah utama dalam menjaga kesucian diri seorang Muslim adalah:

- 1) Menghilangkan najis.
- 2) Mandi.
- 3) Berwuduk.
- 4) Tayamum.

1.1.2 Tujuan Taharah

Taharah atau bersuci merupakan penentu sah atau tidaknya sesuatu iabadat. Contohnya solat, puasa dan haji memerlukan kepada proses taharah sebelum ia

dilaksanakan. Maka antara tujuan taharah adalah seperti berikut:

- 1) Membolehkan seseorang itu menunaikan solat dan ibadah-ibadah yang lain.
- 2) Menjaga kebersihan zahir dan batin supaya badan menjadi bersih, sihat dan jauh daripada penyakit serta mendatangkan kegembiraan kepada orang yang melaksanakannya.
- 3) Bukti bahawa Islam amat mementingkan kebersihan dan kesucian.

1.1.3 Dalil Pensyariatan Taharah

Taharah adalah wajib bagi muslim yang ingin menunaikan solat. Hal ini termaktub dalam firman Allah SWT dalam Surah al-Maidah (5) ayat 6:

يَأَيُّهَا الَّذِينَ ءَامَنُوا إِذَا قُمْتُمْ إِلَى الصَّلَاةِ فَاغْسِلُوْا
وُجُوهَكُمْ وَأَيْدِيکُمْ إِلَى الْمَرَافِقِ وَامْسَحُوا
بِرُءُوسِكُمْ وَأَرْجُلَكُمْ إِلَى الْكَعْبَيْنِ وَإِنْ كُنْتُمْ جُنَاحًا
فَأَطْهَرُوا وَإِنْ كُنْتُمْ مَرْضَى أَوْ عَلَى سَفَرٍ أَوْ جَاءَ أَحَدٌ
مِنْكُمْ مِنَ الْغَایِطِ أَوْ لَمْسُتُمُ النِّسَاءَ فَلَمْ تَجِدُوا مَاءً
فَنَعِمُوا صَعِيدًا طَبِيبًا فَامْسَحُوا بِوُجُوهِكُمْ
وَأَيْدِيکُمْ مِنْهُ مَا يُرِيدُ اللَّهُ لِيَجْعَلَ عَلَيْكُمْ مِنْ
حَرَجٍ وَلَكِنْ يُرِيدُ لِيُظْهِرَكُمْ وَلِيُتَمَّ نِعْمَتُهُ وَعَلَيْكُمْ

لَعَلَّكُمْ تَشْكُرُونَ



Maksudnya: Wahai orang-orang yang beriman, apabila kamu hendak mengerjakan sembahyang (padahal kamu berhadas kecil), maka (berwuduklah) iaitu basuhlah muka kamu, dan kedua belah tangan kamu meliputi siku, dan sapulah sebahagian dari kepala kamu, dan basuhlah kedua belah kaki kamu meliputi buku lali; dan jika kamu junub (berhadas besar) maka bersucilah dengan mandi wajib; dan jika kamu sakit (tidak boleh kena air), atau dalam pelayaran, atau salah seorang dari kamu datang dari tempat buang air, atau kamu sentuh perempuan, sedang kamu tidak mendapat air (untuk berwuduk dan mandi), maka hendaklah kamu bertayammum dengan tanah - debu yang bersih, iaitu: sapulah muka kamu dan kedua belah tangan kamu dengan tanah - debu itu. Allah tidak mahu menjadikan kamu menanggung sesuatu kesusahan (kepayahan), tetapi ia berkehendak membersihkan (mensucikan) kamu dan hendak menyempurnakan nikmatNya kepada kamu, supaya kamu bersyukur. (6)

1.1.4 Syarat-syarat Wajib Taharah

- 1) Orang Islam.
- 2) Orang yang berakal.
- 3) Orang yang sdah baligh.
- 4) Orang yang tidak lupa.
- 5) Orang yang tidak dipaksa.
- 6) Orang yang suci dari haid dan nifas.
- 7) Orang yang ada air atau debu tanah yang suci.
- 8) Bersuci dengan air yang suci atau air mutlak.

BAB 2

TAHARAH DENGAN AIR

1.2 TAHARAH MENGGUNAKAN AIR

Air yang boleh digunakan untuk taharah datang dari pelbagai sumber, ada yang daripada langit dan ada juga yang bersumber dari bumi serta air laut. Tidak semua air boleh digunakan untuk taharah, kerana air terbahagi kepada kepada empat jenis keadaan. Berikut adalah jenis-jenis air:

- 1) Air Mutlak.
- 2) Air Mustakmal.
- 3) Air Mutanajis.
- 4) Air Musyammas.

1.2.1 Air Mutlak

1.2.1.1 Pengertian Air Mutlak

Air yang suci dan bersih.

1.2.1.2 Hukum Air Mutlak

Air yang suci lagi menyucikan. Terdapat tiga kaadaan air yang suci lagi menyucikan seperti berikut:

- 1) Air mutlak iaitu air semata-mata tanpa disertakan dengan sesuatu tambahan atau sesuatu sifat. Air yang boleh diminum dan boleh pula dibuat bersuci sama ada beristinjak, berwuduk, mandi hadas, membasuh najis ataupun sebagainya.

- 2) Air mutlak iaitu air yang tulen (asli / asal) yang tidak bercampur dengan benda-benda lain, sama ada yang bersih seperti minyak wangi, kopi, susu atau sesuatu yang bercampur najis.
- 3) Air mutlak itu melebihi daripada dua kolah (216 liter) sekiranya dimasuki oleh sesuatu benda lain yang tidak mengubah sifat air, maka air itu masih lagi dianggap sebagai mutlak.

Tetapi sekiranya berubah sama ada bau, rasa atau warna, maka air itu tidak boleh lagi digunakan untuk bersuci. Sebagai contoh, memasukkan kopi ke dalam air mutlak maka air itu tidak lagi boleh digunakan untuk bersuci, tetapi hanya boleh diminum sahaja.

1.2.1.3 Jenis-jenis Air Mutlak

1) Air yang turun dari langit

Firman Allah SWT dalam Surah al-Furqan (25) ayat 48:

وَهُوَ الَّذِي أَرْسَلَ الرِّيحَ بُشْرًا بَيْنَ يَدَيِ
رَحْمَتِهِ وَأَنْزَلَنَا مِنَ السَّمَاءِ مَاءً طَهُورًا



Maksudnya: *Dan Dia lah Tuhan yang menghantarkan angin sebagai berita gembira sebelum kedatangan rahmatNya, dan Kami menurunkan dari langit: air yang bersih suci, (48)*

Contoh Air Mutlak bersumber dari langit:

(1) Air Hujan



Gambar 1: Air Hujan

Firman Allah SWT dalam Surah al-Anfal (8)
ayat 11:

إِذْ يُعَشِّيْكُمُ الْتَّعَاسَ أَمْنَةً مِنْهُ
وَيُنَزِّلُ عَلَيْكُم مِنَ السَّمَاءِ مَاءً
لِيُطَهِّرَكُم بِهِ وَيُذَهِّبَ عَنْكُمْ رِجْزَ
الشَّيْطَنِ وَلِيُرْبِطَ عَلَى قُلُوبِكُمْ
وَتُبَيَّنَتْ بِهِ الْأَقْدَامَ ﴿١١﴾

Maksudnya: (*Ingatlah*) ketika kamu diliputi perasaan mengantuk sebagai satu (pemberian) aman dari Allah (untuk menghapuskan kecemasan kamu). Dan (*ingatlah*

ketika) ia menurunkan kepada kamu hujan dari langit untuk mensucikan kamu dengannya dan menghapuskan dari kamu gangguan Syaitan, dan juga untuk menguatkan hati kamu dan menetapkan dengannya tapak pendirian (kamu di medan perjuangan). (11)

(2) Air Salji



Gambar 2: Air Salji

(3) Air Embun



Gambar 3: Air Embun

2) Air yang keluar dari bumi

Air yang keluar dari perut bumi seperti air telaga, air perigi, air sungai, air mata air dan air laut.

Menurut kesepakatan ulama, sekiranya berlaku keadaan air yang berubah disebabkan lama bertakung atau tidak mengalir, atau disebabkan bercampur dengan apa yang menurut kebiasaan tidak terpisah dari air takungan tersebut, maka air itu tetap dihukum air yang suci lagi menyucikan atau air mutlak. Contohnya: Air Lombok, Air Tasik.

Contoh Air Mutlak yang bersumber dari bumi:

(1) Air Telaga



Gambar 4: Air Telaga

(2) Air Sungai



Gambar 5: Air Sungai

(3) Air Mata Air



Gambar 6: Air Mata Air

3) Air yang berada di atas permukaan bumi

Dalam hadis riwayat Imam Tirmizi (69), daripada Abu Hurairah RA:

سَأَلَ رَجُلٌ رَسُولَ اللَّهِ صَلَّى اللَّهُ عَلَيْهِ وَسَلَّمَ فَقَالَ يَا رَسُولَ اللَّهِ إِنَّا نَرْكَبُ الْبَحْرَ وَنَحْمِلُ مَعَنَا الْقَلِيلَ مِنَ الْمَاءِ إِنَّمَا تَوَضَّأْنَا بِهِ عَطْشَنَا أَفَتَوَضَّأْنَا مِنْ مَاءِ الْبَحْرِ؟ فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ هُوَ الطَّهُورُ مَاءُهُ ، الْخُلُّ مَيْتُهُ

Maksudnya: “Seorang lelaki bertanya kepada Rasulullah: Ya Rasulullah, kami berlayar di lautan dan membawa yang air sedikit. Jika kami pakai untuk berwuduk, tidak ada air untuk kami minum, bolehkah kami berwuduk dengan air laut? Sabda Rasulullah SAW: “Laut itu airnya suci lagi menyucikan dan bangkainya halal dimakan.”

Contoh Air Mutlak yang berada di atas permukaan bumi:

(1) Air Laut



Gambar 7: Air Laut

1.2.2 Air Mustakmal

1.2.2.1 Pengertian Air Mustakmal

Air yang telah bercampur dengan sesuatu yang lain.

1.2.2.2 Hukum Air Mustakmal

Air suci tetapi tidak menyucikan. Terdapat empat kaadaan air yang suci tetapi tidak menyucikan (air mustakmal) seperti berikut:

- 1) Air yang berubah warna, atau rasa kerana bercampur dengan benda yang suci dan banyak perubahannya. Contoh, apabila air itu telah bercampur dan berubah menjadi air teh, air tersebut tidak boleh dibuat bersuci, atau air yang telah bercampur dengan gula atau garam (warna tidak berubah tetapi rasanya berubah kepada manis atau masin).
- 2) Air yang sedikit dan telah digunakan untuk berwuduk atau mandi walaupun tidak berubah sifatnya.
- 3) Air yang dikeluarkan dari tumbuh-tumbuhan atau buah-buahan. Misalnya air tebu dan kelapa.

Air-air yang tersebut adalah suci tetapi tidak dapat menyucikan sesuatu yang terkena najis dan tidak sah digunakan untuk wuduk atau mandi hadas.

Air ini hanya boleh dibuat minum, makan atau membasuh sesuatu yang terkena najis sahaja. Begitu juga sekiranya air basuhan yang menitis ke dalam air yang tidak sampai dua kolah, itu juga dikira mustakmal.

1.2.3 Air Mutanajis

1.2.3.1 Pengertian Air Mutanajis

Air yang bercampur atau terkena najis.

1.2.3.2 Hukum Air Mutanajis

Tidak suci dan tidak menyucikan. Terdapat tiga kaadaan air yang bernajis atau air yang telah terkena najis seperti berikut:

- 1) Air Mutanajis bermaksud air yang mengandungi atau dimasuki najis yang kurang daripada dua kolah, sama ada air itu berubah warna atau bau atau rasa ataupun tidak. Maka air itu dikenali sebagai Air Mutanajis dan tidak sah untuk bersuci.
- 2) Air melebihi dua kolah, tetapi air tersebut berubah warna atau bau atau rasa disebabkan najis. Maka air itu dinamakan Air Mutanajis dan tidak sah digunakan untuk bersuci.
- 3) Air Mutanajis tidak sah digunakan untuk berwuduk, mandi dan mencuci sesuatu yang terkena najis.

1.2.4 Air Musyammas

1.2.4.1 Pengertian Air Musyammas

Air yang tersimpan dalam satu bekas dan menjadi panas kerana terdedah kepada cahaya matahari.

1.2.4.2 Hukum Air Musyammas

Air yang suci dan menyucikan tetapi makruh hukumnya untuk digunakan. Dihukum makruh apabila memenuhi tiga keadaan berikut:

- 1) Air yang terjemur pada cuaca yang panas.
- 2) Air di dalam bekas selain bekas emas dan perak. Contohnya: Bekas yang diperbuat daripada besi, tembaga dan bahan galian yang boleh berkarat.
- 3) Air tersebut digunakan pada tubuh badan atau dijadikan minuman, walaupun tubuh badan mayat atau pada haiwan yang mana boleh menyebabkan penyakit sopak.

Namun tidak makruh digunakan untuk perkara lain seperti mencuci pakaian, membasuh kereta, pertanian dan sebagainya.

BAB 3

ISTINJAK

1.3 ISTINJAK

1.3.1 Pengertian IstinjaK

Pengertian dari Segi Bahasa: IstinjaK ialah cara bersuci selepas membuang air besar atau kecil.

Pengertian dari Segi Istilah: IstinjaK merujuk kepada penyucian seseorang daripada najis berikutan membuang air besar ataupun air kecil dengan cara menyucikan tempat keluarnya najis tersebut dengan menggunakan air ataupun lain-lain benda yang dibolehkan. Bahagian yang diistinjaK adalah pada sesuatu yang keluar daripada dua jalan iaitu qubul dan dubur.

1.3.2 Dalil dan Cara BeristinjaK

IstinjaK dapat dilakukan dengan salah satu daripada tiga cara seperti berikut:

- 1) Membasuh tempat keluar najis dengan air hingga bersih. Dalam hadais riwayat Imam al-Bukhari (217) bahawa Rasulullah SAW bersabda:

كَانَ النَّبِيُّ صَلَّى اللَّهُ عَلَيْهِ وَسَلَّمَ إِذَا تَبَرَّزَ حِاجَتُهُ
أَنْتَهُ مِنَ الْمَاءِ فَيَعْسِلُ بِهِ

Bermaksud: "Ketika Nabi SAW apabila ingin membuang hajatnya, aku datang kepadanya (Baginda SAW) dengan membawa setimba air, maka Baginda

SAW pun bersuci dengannya (bersuci menggunakan air tersebut)”.

- 2) Menyapu dengan batu hingga bersih sekurang-kurangnya menggunakan tiga biji batu atau sebiji batu yang berbeza sisinya. Sebagai pengganti batu, boleh menggunakan benda-benda yang kesat. Sebagaimana hadis riwayat Imam Ahmad (250) dan Imam Nasaie (44), bahawa Nabi SAW bersabda:

إِذَا ذَهَبَ أَحَدُكُمْ إِلَى الْعَائِطِ فَلَيَذْهَبْ مَعَهُ
بِشَلَاثَةٍ أَحْجَارٍ يَسْتَطِيبُ بِهِنَّ فَإِنَّمَا تُحْزِيُ عَنْهُ

Bermaksud: "Bila salah seorang di antara kamu pergi buang air, maka hendaklah membawa bersamanya tiga biji batu kerana demikian itu cukuplah untuknya (beristinjak)".

- 3) Menyapunya lebih dahulu dengan batu atau dengan benda-benda lain yang kesat, sesudah itu diharuskan membasuhnya dengan air.

Kaedah yang ketiga ini adalah pandangan yang disepakati Jumhur Ulama. Sebagaimana hadis riwayat Imam Ahmad (250) dan Imam Abu Daud (40), daripada Aisyah RA. bahawa Nabi SAW bersabda:

إِذَا ذَهَبَ أَحَدُكُمْ إِلَى الْعَائِطِ فَلَيَذْهَبْ مَعَهُ
بِشَلَاثَةٍ أَحْجَارٍ يَسْتَطِيبُ بِهِنَّ فَإِنَّمَا تُحْزِيُ عَنْهُ

Bermaksud: "Bila salah seorang di antara kamu pergi buang air, maka hendaklah membawa bersamanya tiga biji batu untuk

digunakan maka demikian itu cukuplah untuknya (beristinjak)".

Dalam hadis yang lain riwayat Imam al-Bukhari (162) dan Imam Muslim (237), Nabi SAW bersabda:

إِذَا تَوَضَّأَ أَحَدُكُمْ فَلْيَجْعَلْ فِي أَنفِهِ، ثُمَّ لَيْتَرْ
وَمَنِ اسْتَجْمَرَ فَلْيُوْتُرْ

Bermaksud: "Apabila salah seorang dari kalian berwuduk maka hendaklah memasukkan air ke dalam hidung, kemudian menghembusnya (mengeluarkan air dari hidung tersebut), dan barangsiapa beristinja' maka diganjilkan bilangan batu tersebut".

1.3.3 Syarat-syarat Beristinjak

Syarat istinjak dengan batu atau benda kesat, antaranya adalah:

- 1) Batu atau benda yang kesat yang digunakan sebagai alat istinjak itu hendaklah suci dan dapat menghilangkan najis.
- 2) Batu atau benda yang kesat tersebut bukan dari sesuatu yang dihormati. Contohnya, bukan daripada bahan makanan manusia atau batu masjid.
- 3) Menyapu sekurang-kurangnya dengan tiga kali sapuan di tempat keluar najis sehingga suci.
- 4) Jika masih belum suci dan bersih, maka hendaklah ditambah sapuannya.
- 5) Najis dalam keadaan yang belum kering.

- 6) Najis itu tidak beralih atau mengalir daripada qubul dan dubur.
- 7) Najis itu tidak bercampur dengan sesuatu yang lain walaupun dengan sesuatu yang suci seperti air dan debu.

1.3.4 Larangan Ketika Beristinjaq

- 1) Istinjak tidak boleh menggunakan sesuatu alat yang diketahui tidak suci.
- 2) Tidak boleh menggunakan bahan makanan seperti buah-buahan untuk beristinjaq.
- 3) Tidak boleh menggunakan tulang-tulang haiwan untuk beristinjaq.
- 4) Dilarang beristinjaq dengan kertas yang mempunyai tulisan ayat-ayat al-Quran dan ada nama Allah SWT.
- 5) Sunat beristinjaq menggunakan tangan kiri dan makruh menggunakan tangan kanan. Sebagaimana hadis riwayat Imam Abu Daud (7):

قِيلَ لَهُ لَقَدْ عَلِمْتُكُمْ كُلَّ شَيْءٍ حَتَّى الْخِرَاءَ،
 قَالَ : أَجَلْ لَقَدْ هَانَ أَصْلَى اللَّهِ عَلَيْهِ وَسَلَّمَ أَن
 نَسْتَقْبِلَ الْقِبْلَةَ بِغَائِطٍ أَوْ بَوْلٍ ، وَأَنْ لَا نَسْتَحْجِي
 بِالْيَمِينِ ، وَأَنْ لَا يَسْتَحْجِي أَحْدُنَا بِأَقْلَ مِنْ ثَلَاثَةِ
 أَحْجَارٍ ، أَوْ نَسْتَحْجِي بِرَجِيعٍ أَوْ عَظِيمٍ

Bermaksud: Telah berkata (bertanya seseorang) "Nabimu telah mengajar kamu

segala sesuatu hingga cara buang hajat?"
Salman berkata (menjawab), "Benar, Baginda SAW melarang kami menghadap kiblat saat buang air besar atau air kecil, dan tidak beristinjak dengan tangan kanan, dan tidak beristinjak dengan batu kurang dari tiga biji batu, atau beristinjak dengan menggunakan kotoran binatang atau tulang.

- 6) Dilarang menghadap kiblat

Sebagaimana hadis riwayat Imam Abu Daud (7):

...هَمَّا صَلَى اللَّهُ عَلَيْهِ وَسَلَّمَ أَن نَسْتَقْبِلَ الْقَبْلَةَ
بِغَائِطٍ أَوْ بَوْلٍ ...

Bermaksud: "...Baginda SAW melarang kami menghadap kiblat saat buang air besar atau air kecil ..."

- 7) Dilarang menggunakan sesuatu yang bernajis

Sebagaimana hadis riwayat Imam at-Tirmizi (18), daripada Ibnu Mas'ud bahawa Nabi SAW bersabda:

لَا تَسْتَنِجُوا بِالرَّوْثِ وَلَا بِالْعَظَامِ ، فِإِنَّمَا زَادُ إِخْوَانِكُم
مِنَ الْجِنِّ

Bermaksud: "Janganlah kamu beristinjak dengan tahi kering dan jangan pula dengan tulang-tulang, kerana sesungguhnya tulang-tulang itu makanan saudaramu dari bangsa jin"

BAB 4

NAJIS

1.4 NAJIS

1.4.1 Pengertian Najis

Pengertian dari Segi Bahasa: Segala sesuatu yang dianggap kotor dan jijik

Pengertian dari Segi Istilah: Kotoran yang menyebabkan solat serta ibadah lain tidak sah.

1.4.2 Kategori Najis

- 1) **Najis Aini** : Semua najis yang berjirim yang dapat dilihat atau mempunyai sifat zahir iaitu warna atau bau seperti tahi, kencing, dan darah.
- 2) **Najis Hukmi** : Semua najis yang telah kering dan kesannya telah hilang. Dengan kata lain, tiada lagi kesan warna atau bau najis padanya.

Oleh itu, penting bagi setiap umat Islam mengetahui jenis-jenis najis dan cara membersihkannya agar amal ibadah diterima oleh Allah SWT.

1.4.3 Jenis-jenis Najis

1.4.3.1 Najis Mukhaffafah (Najis Ringan)

(a) Pengertian

Air kencing bayi lelaki yang belum berumur dua tahun dan belum memakan sesuatu makanan yang mengenyangkan selain daripada susu ibunya.

Adapun tahinya adalah termasuk di dalam kategori najis Mutawassitah dan bukan Mukhaffafah.

(b) Cara Membersihkan Najis Mukhaffafah

- 1) Direnjiskan air ke atasnya dengan memastikan renjisan tersebut mengenai semua kawasan air kencing tersebut.
- 2) Disyaratkan air tersebut mestilah lebih banyak daripada air kencing walaupun tidak mengalir.

Sangat dianjurkan (jika tiada sebarang kesulitan), terlebih dahulu air kencing tersebut dilap dengan kain yang bersih. Kemudian, barulah memercikan air ke atasnya sehingga hilang 'ain najis dan sifat-sifatnya kerana ini cara yang lebih berhati-hati dan keluar daripada perbezaan pendapat.

Peringatan: Kanak-kanak atau bayi lelaki yang masih menyusu sebagai makanan utamanya tetapi telah diberi makan ubat atau kurma untuk bertahnik, selagi mana makanan tersebut tidak mengenyangkan, maka air kencingnya masih dikira sebagai najis Mukhaffafah.

- **Tahnik** bermaksud lelangit di dalam mulut. Secara umumnya tahnik ialah membelah mulut bayi dengan buah tamar yang dikunyah dan digosokkan ke lelangit bayi, dan sebahagiannya lagi masuk ke dalam perutnya.

1.4.3.2 Najis Mutawassitah (Najis Pertengahan)

(a) Pengertian

Najis Mutawassitah (Najis Pertengahan) ialah najis selain daripada Najis Mukhaffafah dan Najis Mughallazah seperti: arak, darah, nanah, muntah, darah haid dan bangkai (kecuali ikan dan belalang).

(b) Jenis Najis Mutawassitah

- 1) Najis Mutawassitah yang bersifat *Ainiyah* iaitu:

Najis yang dapat dilihat bentuknya oleh pandangan mata, rasa, dan terciumpa baunya. Proses membersihkan najis yang bersifat *Ainiyah* adalah:

- (1) Buang zahir najisnya.
- (2) Siram dengan air yang suci.
- (3) Gosok berulang kali sehingga diyakini hilang warna, bau dan rasa.
- (4) Kemudian siram dengan air yang mengalir.

- 2) Najis Mutawassitah yang bersifat *Hukmiyah* iaitu:

Najis yang tidak nampak rupa bentuknya seperti kesan kencing dan kesan tumpahan arak, di mana tiada lagi salah satu sifat najisnya (bau, warna dan rasa). Proses membersihkan Najis yang bersifat *Hukmiyah* memadai dengan mengalirkannya air pada tempat yang terkena najis tersebut.

1.4.3.3 Najis Mughallazah (Najis Berat)

(a) Pengertian

Najis Mughallazah ialah anjing dan babi serta keturunannya termasuk segala apa yang terkait dengannya seperti daging, kulit, air liur, peluh atau najisnya.

(b) Cara Membersih dan Menyucikan Najis Berat

- 1) Hendaklah dibuang atau hilangkan najisnya.
- 2) Basuhan yang pertama adalah menghilangkan kewujudan najis, walaupun beberapa basuhan diperlukan. Hendaklah dipastikan tiada tinggalan air daripada air basuhan yang pertama. sehingga diyakini hilang bau, warna dan rasa.
- 3) Siram dengan menggunakan air yang bercampur tanah pada bahagian yang terkena najis, sebanyak satu basuhan sebagai cucian pertama.
- 4) Siram dengan menggunakan air mutlak, sebanyak enam kali basuhan sebagai cucian seterusnya.

(c) Kadar dan Keadaan Tanah Serta Jenis Air yang Digunakan

a) Kadar Tanah

Kadar tanah yang digunakan memadai menjadikan air tersebut berkeladak dan

penggunaan bahan yang mempunyai kandungan tanah adalah dibenarkan.

b) Keadaan Tanah yang Hendak Digunakan:

- 1) Bebas daripada najis
- 2) Bukan tanah Mustakmal iaitu yang telah digunakan untuk tayamum. kecuali setelah hujan lebat.

c) Keadaan Air yang Hendak Digunakan:

- 1) Air Mutlak (air yang suci lagi menyucikan).
- 2) Bukan air Mustakmal iaitu air yang telah digunakan untuk bersuci.
- 3) Bebas daripada najis.

1.4.3.4 Najis yang Dimaafkan

- 1) Percikan air kencing yang tidak dapat dilihat dengan mata kasar sama ada yang terkena badan, pakaian atau tempat.
- 2) Air Liur.
Asal hukum air liur (keluar dari perut) yang keluar ketika tidur adalah najis, tetapi dimaafkan sekiranya sering terjadi kepada orang yang menghadapi masalah sentiasa keluar air liur tersebut (yang keluar dari perut).

Namun begitu jika tidak yakin sama ada air liur tersebut keluar dari mulut atau perut maka seloknya dibasuh baju atau pakaian yang terkena air liur tersebut sebagai langkah berhati-hati.

- 3) Air yang terkena najis ikan selagi mana air tersebut tidak berubah sifatnya.
- 4) Darah yang berbaki pada tulang dan daging dalam masakan.
- 5) Bangkai ulat pada buah dan cuka. Boleh makan buah tersebut dengan ulat itu.
- 6) Najis yang digunakan sebagai ubat sekiranya tidak ada ubat lain sebagai ganti
- 7) Bulu haiwan yang tidak halal dimakan yang jumlahnya sedikit dan terpisah dari badannya. Seperti 2-3 helai bulu.
- 8) Darah bisul, jerawat dan luka.
- 9) Darah berbekam walaupun banyak selagi masih di tempat yang dibekam.
- 10) Najis daripada kaki lalat dan darah binatang kecil seperti darah nyamuk.
- 11) Air banjir yang bercampur padanya najis serta berlaku perubahan salah satu sifatnya.

BAHAGIAN 2

HADAS

BAB 1

BERSUCI DARIPADA HADAS

2.1 BERSUCI DARIPADA HADAS

2.1.1 Pengertian Hadas

Pengertian dari Segi Bahasa: Sesuatu yang baru (mendatang), iaitu sesuatu yang sebelumnya tiada kemudian menjadi ada.

Pengertian dari Segi Istilah: Hadas adalah kotoran secara maknawi pada diri seseorang Muslim yang menentukan sahnya ibadah yang disyaratkan dengan bersuci seperti solat, puasa, tawaf dan lain-lain.

Orang yang berhadas tidak bersih di sisi Allah SWT, walaupun di sisi manusia kelihatan bersih. Oleh kerana itu setiap Muslim yang berhadas, wajib menyucikan diri mengikut cara yang telah ditetapkan, bagi memastikan ibadah yang dilakukan sah di sisi syariat Islam.

Bersuci daripada hadas adalah suatu amalan yang bertujuan untuk mengangkat atau bersuci daripada hadas kecil dan hadas besar dengan kaedah yang telah ditentukan oleh syarak. Setiap perintah ada dalil sebagai rujukan, ini sebagai isyarat bahawa setiap ketentuan dalam Islam bertujuan untuk memudahkan, bukan memudararatkan.

Kaedah menjaga kesucian diri seorang Muslim daripada hadas adalah seperti berikut:

- 1) Wuduk.
- 2) Mandi.
- 3) Tayamum.

2.1.2 Dalil Wajib Bersuci daripada Hadas

Dalil yang mewajibkan bersuci daripada hadas kecil dan besar sebelum menunaikan sesuatu ibadah termaktub dalam al-Quran, Surah al-Maidah (5) ayat 6:

يَأَيُّهَا الَّذِينَ ءَامَنُوا إِذَا قُمْتُمْ إِلَى الْصَّلَاةِ فَاغْسِلُوا
وُجُوهَكُمْ وَأَيْدِيكُمْ إِلَى الْمَرَاقِقِ وَامْسَحُوا
بِرُءُوسِكُمْ وَأَرْجُلَكُمْ إِلَى الْكَعْبَيْنِ وَإِنْ كُنْتُمْ
جُنْبًا فَاطَّهِرُوا وَإِنْ كُنْتُمْ مَرْضَى أَوْ عَلَى سَفَرٍ أَوْ
جَاءَ أَحَدٌ مِنْكُمْ مِنَ الْغَ�يِطِ أَوْ لَمْسُتُمُ النِّسَاءَ
فَلَمْ تَجِدُوا مَاءً فَتَيَمَّمُوا صَعِيدًا طَيْبًا فَامْسَحُوا
بِوُجُوهِكُمْ وَأَيْدِيكُمْ مِنْهُ مَا يُرِيدُ اللَّهُ لِيَجْعَلَ
عَلَيْكُم مِنْ حَرَجٍ وَلَكِنْ يُرِيدُ لِيُظْهِرَكُمْ وَلِيُتِمَّ
عِمَّتَهُ وَعَلَيْكُمْ لَعَلَّكُمْ تَشْكُرُونَ ﴿٦﴾

Maksudnya: Wahai orang-orang yang beriman, apabila kamu hendak mengerjakan sembahyang (padahal kamu berhadas kecil), maka (berwuduklah) iaitu basuhlah muka kamu, dan kedua belah tangan kamu meliputi

siku, dan sapulah sebahagian dari kepala kamu, dan basuhlah kedua belah kaki kamu meliputi buku lali; dan jika kamu junub (berhadas besar) maka bersucilah dengan mandi wajib; dan jika kamu sakit (tidak boleh kena air), atau dalam pelayaran, atau salah seorang dari kamu datang dari tempat buang air, atau kamu sentuh perempuan, sedang kamu tidak mendapat air (untuk berwuduk dan mandi), maka hendaklah kamu bertayamum dengan tanah - debu yang bersih, iaitu: sapulah muka kamu dan kedua belah tangan kamu dengan tanah - debu itu. Allah tidak mahu menjadikan kamu menanggung sesuatu kesusahan (kepayahan), tetapi ia berkehendak membersihkan (mensucikan) kamu dan hendak menyempurnakan nikmatNya kepada kamu, supaya kamu bersyukur. (6)

Di awal ayat, Allah SWT menyebutkan tentang pensyariatan wuduk, kemudian Allah SWT mengingatkan tentang mandi wajib dan di bahagian akhir Allah SWT mengingatkan tentang bertayamum.

2.1.3 Pembahagian Hadas

Hadas terbahagi kepada dua jenis, iaitu:

- 1) **Hadas Kecil:** Orang yang tiada wuduk, dinamakan berhadas kecil. Cara menyucikan diri dari hadas kecil dilakukan dengan berwuduk.
- 2) **Hadas Besar:** Orang yang berhadas besar, antaranya:
 - (a) **Orang yang bersetubuh.**
Persetubuhan antara pasangan suami dan isteri.

(b) **Orang yang keluar air mani.**

Lelaki atau perempuan yang keluar air mani samada dengan bermimpi atau tidak.

(c) **Perempuan yang haid atau nifas.**

2.1.4 Perbezaan Antara Darah Haid, Darah Nifas, Darah Istihadah dan Darah Wiladah

Setiap perempuan pada hakikatnya akan menghadapi tiga keadaan darah yang menyebabkan perempuan tersebut berhadas besar:

2.1.4.1 Darah Haid

Darah yang turun (keluar) tiap-tiap bulan dari rahim perempuan yang sudah baligh (9 hingga 12 tahun bagi perempuan dan 12 hingga 15 tahun bagi lelaki).

Ciri-ciri haid:

Perempuan mulai haid seawal berumur sembilan tahun. Haid itu biasanya datang pada setiap bulan.

- 1) Tempoh masa paling singkat adalah sehari semalam.
- 2) Tempoh paing lama adalah lima belas hari lima belas malam.
- 3) Tempoh kebiasaanya adalah enam hari atau tujuh hari.

Jika keluar darah haid itu kurang dari sehari semalam atau lebih dari lima belas hari lima belas malam, darah itu dikategorikan sebagai darah istihadah (darah penyakit).

2.1.4.2 Darah Istihadah

Darah penyakit wanita yang keluar daripada rahim selepas tempoh sebanyak-banyak haid atau selepas tempoh sebanyak-banyak nifas atau darah keluar berterusan selepas hari kebiasaan haid.

Ciri-ciri istihadah:

- 1) Keluar darah sebanyak dua kali yang diselangi oleh tempoh suci yang kurang 15 hari.
- 2) Keluar darah selepas tempoh 15 hari haid.
- 3) Keluar darah kurang daripada 24 jam.
- 4) Keluar darah sebelum umur 9 tahun.
- 5) Keluar darah selepas tempoh 60 hari nifas.

2.1.4.3 Darah Nifas

Darah yang keluar selepas melahirkan anak.

Ciri-ciri nifas ialah:

- 1) Tempoh minimum nifas ialah sedetik (لحظة).
- 2) Kadang-kadang ia berterusan hingga beberapa hari.
- 3) Kebiasaannya sehingga 40 hari.
- 4) Manakala tempoh maksimumnya pula ialah 60 hari.

Jika darah yang keluar melebihi tempoh 60 hari, darah itu dikategorikan sebagai darah istihadah (darah penyakit).

2.1.4.4 Darah Wiladah

Darah yang keluar sewaktu melahirkan anak atau mengalami keguguran janin walaupun berbentuk darah beku (*'alaqah'*) atau seketul daging

(*mudghah*) tetap dikira wiladah dan wajib mandi. Begitu juga kelahiran melalui pembedahan “caesarean”.

Ciri wiladah:

- 1) Sepanjang proses melahirkan anak walaupun mengalami keguguran janin.
- 2) Sepanjang proses melahirkan anak walaupun melalui pembedahan “caesarean”.

2.1.5 Cara Menyucikan Hadas Besar dan Hadas Kecil

1) Wuduk

Bertujuan untuk menyucikan/ mengangkat hadas kecil.

2) Mandi wajib

Bertujuan untuk menyucikan/ mengangkat hadas besar.

3) Tayamum

Iaitu jika kedua-duanya (wuduk dan mandi wajib) tidak dapat dilakukan kerana sakit, ketiadaan air atau sebagainya hendaklah diganti dengan tayamum.

2.1.6 Perkara-perkara yang Haram Ketika Berhadas Kecil atau Berhadas Besar

2.1.6.1 Berhadas Kecil

Haram bagi seorang lelaki dan perempuan yang berhadas kecil untuk:

- 1) Melakukan Ibadah Solat.
- 2) Melakukan Tawaf.
- 3) Menyentuh al-Quran.

2.1.6.2 Berhadas Besar

Haram bagi lelaki dan perempuan

Haram bagi seorang lelaki dan perempuan yang berhadas besar untuk:

- 1) Menyentuh dan membaca al-Quran.
- 2) Melakukan Ibadah solat.
- 3) Melakukan Tawaf.
- 4) Beriktiakaf di dalam masjid.

Haram bagi perempuan

Haram bagi perempuan haid dan nifas untuk:

- 1) Berpuasa.
- 2) Bersetubuh.
- 3) Berada atau duduk di dalam masjid kecuali sekadar melintasi atau melalui sekali lalu tanpa berulang-alik.

Setiap perempuan yang haid dan nifas tidak boleh mengerjakan solat dan tidak wajib menggantikannya, akan tetapi puasa ramadan wajib diqada mengikut bilangan yang tertinggal.

BAB 2

BERSUCI DENGAN WUDUK

2.2 BERSUCI DENGAN WUDUK

2.2.1 Pengertian Wuduk

Pengertian dari Segi Bahasa: Kebaikan dan kebersihan.
Pengertian dari Segi Istilah: Penggunaan air yang suci pada anggota tertentu (iaitu membasuh muka, dua belah tangan hingga ke siku, menyapu kepala dan membasuh kedua-dua belah kaki) dimulai dengan niat dan diakhiri dengan tertib.

Wuduk merupakan kewajipan bagi umat Islam ketika hendak melakukan ibadah solat. Tanpa berwuduk ibadah solat tidak sah. Setiap individu yang hendak berwuduk, wajib mengetahui cara melakukannya iaitu mengetahui basuhan yang wajib dan sunat.

2.2.2 Rukun Wuduk

Rukun wuduk adalah perkara-perkara yang wajib dilakukan ketika berwuduk supaya wuduk menjadi sempurna. Ia mengandungi empat anggota rukun untuk sahnya wuduk.

Sebagaimana firman Allah SWT dalam Surah al-Maa''idah (5) ayat 6:

يَأَيُّهَا الَّذِينَ ءَامَنُوا إِذَا قُمْتُمْ إِلَى الصَّلَاةِ فَاعْسِلُوا
وُجُوهَكُمْ وَأَيْدِيَكُمْ إِلَى الْمَرَاقِقِ وَامْسَحُوا
بِرُءُوسِكُمْ وَأَرْجُلَكُمْ إِلَى الْكَعْبَيْنِ وَإِنْ كُنْتُمْ
جُنْبًا فَاطْهَرُوا وَإِنْ كُنْتُمْ مَرْضَى أَوْ عَلَى سَفَرٍ أَوْ
جَاءَ أَحَدٌ مِنْكُمْ مِنَ الْغَابِطِ أَوْ لَمْسُتُمُ النِّسَاءَ
فَلَمْ تَجِدُوا مَاءً فَتَيَمِّمُوا صَعِيدًا طِيبًا فَامْسَحُوا
بِوُجُوهِكُمْ وَأَيْدِيَكُمْ مِنْهُ مَا يُرِيدُ اللَّهُ لِيَجْعَلَ
عَلَيْكُمْ مِنْ حَرَجٍ وَلَكِنْ يُرِيدُ لِيُظْهِرُكُمْ وَلِيُتِمَّ
عِمَّتَهُ وَعَلَيْكُمْ لَعَلَّكُمْ تَشْكُرُونَ (6)

Maksudnya: Wahai orang-orang yang beriman, apabila kamu hendak mengerjakan sembahyang (padahal kamu berhadas kecil), maka (berwuduklah) iaitu basuhlah muka kamu, dan kedua belah tangan kamu meliputi siku, dan sapulah sebahagian dari kepala kamu, dan basuhlah kedua belah kaki kamu meliputi buku lali; dan jika kamu junub (berhadas besar) maka bersucilah dengan mandi wajib; dan jika kamu sakit (tidak boleh kena air), atau dalam pelayaran, atau salah seorang dari kamu datang dari tempat buang air, atau kamu sentuh perempuan, sedang kamu tidak mendapat air (untuk berwuduk

(dan mandi), maka hendaklah kamu bertayamum dengan tanah - debu yang bersih, iaitu: sapulah muka kamu dan kedua belah tangan kamu dengan tanah - debu itu. Allah tidak mahu menjadikan kamu menanggung sesuatu kesusahan (kepayahan), tetapi ia berkehendak membersihkan (mensucikan) kamu dan hendak menyempurnakan nikmatNya kepada kamu, supaya kamu bersyukur. (6)

2.2.3 Rukun-rukun Wuduk

- 1) Niat (niat mengerjakan fardu wuduk).
- 2) Membasuh muka.
- 3) Membasuh kedua belah tangan hingga ke siku.
- 4) Menyapu sebahagian kepala dengan air.
- 5) Membasuh kedua belah kaki hingga buku lali.
- 6) Tertib (iaitu mengerjakannya mengikut turutannya).

2.2.4 Cara Berwuduk

1) Niat wuduk.

Niat yang wajib ialah lintasan dalam hati yang dihadirkan ketika mula membasuh muka. Lafaz niat dalam bahasa Arab yang diucapkan secara lisan hukumnya sunat. Lafaz niat wuduk adalah seperti berikut:


نَوَّيْتُ الْوُضُوءَ لِرَفْعِ الْحَدَثِ الْأَصْغَرِ فَرْضًا لِّلَّهِ تَعَالَى

*Nawaitul Wudhuu-a liraf'il hadatsil asghori fardhan
lilaahi ta'alaa*

Maksudnya: “Sahaja aku berwuduk untuk mengangkat hadas kecil fardu kerana Allah Taala”

2) Membasuh muka.

Membasuh dengan meratakan air ke seluruh muka meliputi bahagian anak rambut di dahi hingga ke bawah tulang dagu dan dari anak telinga kanan hingga ke anak telinga kiri. Sebaiknya dimulakan basuhan dari bahagian atas muka membawa ke bawah dagu.



Gambar 8: Membasuh dan Meratakan Air pada Seluruh Bahagian Muka, dari Sisi Kanan Muka



Gambar 9: Membasuh dan Meratakan Air pada Seluruh Bahagian Muka, dari Sisi Kiri Muka

3) Membasuh dua tangan hingga siku.

Meratakan air ke seluruh bahagian tangan dari hujung jari hingga siku. Sebaik-baiknya dimulakan dengan tangan kanan.



Gambar 10: Membasuh Tangan Kanan dari Hujung Jari hingga Siku



Gambar 11: Membasuh Tangan Kiri dari Hujung Jari hingga Siku

4) Menyapu sebahagian kepala.

Memadai menyapu air pada ubun-ubun, walaupun sekadar membasahkan sekurang-kurangnya tiga helai rambut asalkan rambut yang dibasahkan itu berada dalam had kepala. Seperti gambar dibawah:



Gambar 12: Membasuh Sebahagian Kepala

Sesetengah pendapat adalah lebih baik menyapu keseluruhan kepala daripada menyapu sebahagian kepala.

5) Membasuh kaki hingga ke buku lali.

Membasuh kaki dari hujung jari kaki hingga ke buku lali.



Gambar 13: Membasuh Kaki Kanan hingga Buku Lali



Gambar 14: Membasuh Kaki Kanan Sehingga Buku Lali

Sekiranya sebahagian kaki yang wajib dibasuh kedung, maka wajib dibasuh bahagian yang masih ada. Begitu juga jika seseorang itu terlupa membasuh kaki selepas beredara dari tempat wuduk, maka hanya perlu membasuh kaki selagi mana basuhan wuduk pada kepalanya belum kering. Tidak perlu diulang wuduk dari awal.

6) Tertib atau berturut-turut

Setiap rukun wuduk mesti dilakukan mengikut turutan sebagaimana hadis riwayat Imam Muslim (246), daripada Nu'aim bin Abdullah al-Mujmir berkata bahawa:

”رَأَيْتُ أَبَا هُرَيْرَةَ يَتَوَضَّأُ فَعَسَلَ وَجْهَهُ فَأَسْبَغَ الْوَضُوءَ، ثُمَّ عَسَلَ يَدَهُ الْيُمْنَى حَتَّى أَشْرَعَ فِي الْعَضْدِ، ثُمَّ يَدَهُ الْيُسْرَى حَتَّى أَشْرَعَ فِي الْعَصْدِ، ثُمَّ مَسَحَ رَأْسَهُ، ثُمَّ عَسَلَ رِجْلَهُ الْيُمْنَى حَتَّى أَشْرَعَ فِي السَّاقِ، ثُمَّ عَسَلَ رِجْلَهُ الْيُسْرَى حَتَّى أَشْرَعَ فِي السَّاقِ، ثُمَّ قَالَ: هَكَذَا رَأَيْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ يَتَوَضَّأُ ..“

Bermaksud: "Aku lihat Abu Hurairah RA berwuduk, maka dibasuhnya muka dan dilebihkan sedikit daripada had muka. Kemudian dibasuh dua tangannya kanan dan kiri masing-masing hingga ke siku. Kemudian menyapu kepalanya, kemudian membasuh dua kakinya kanan dan kiri masing-masing hingga ke betis. Kemudian berkata Abu Hurairah RA: "Begini aku lihat Rasulullah SAW berwuduk ..".

2.2.5 Syarat Wajib Wuduk

- 1) Beragama Islam.
- 2) Mumaiyiz
Iaitu kanak-kanak yang telah dapat membezakan antara perkara yang baik dan buruk. Lazimnya usia mumaiyiz seorang kanak-kanak adalah pada usia tujuh tahun.
- 3) Suci dari haid dan nifas.
- 4) Air Mutlak iaitu air yang suci lagi menyucikan.
- 5) Tiada sesuatu yang boleh menghalang air sampai ke anggota wuduk seperti cat, getah, pengilat kuku, lilin, kapur, bahan solekan, minyak atau daki tebal yang melekat di celah jari, di bawah kuku atau di celah rekahan pada tumit. Sekiranya benda-benda itu melekat pada tubuh, ia perlu dibersihkan terlebih dahulu sebelum berwuduk.
- 6) Tiada sesuatu yang boleh mengubah sifat-sifat air pada anggota wuduk.
- 7) Berubah sifat air wuduk akibat benda asing yang melekat pada anggota wuduk. Contohnya sabun, syampu, pembersih muka atau apa-apa sahaja yang melekat pada anggota wuduk hingga mengubah rasa, warna atau bau air wuduk ketika itu.
- 8) Mengetahui amalan wajib dalam berwuduk tanpa beranggapan perkara yang wajib itu sunat.

2.2.6 Perkara-perkara Sunat Sewaktu Berwuduk

- 1) Membaca Basmalah

بِسْمِ اللَّهِ الرَّحْمَنِ الرَّحِيمِ
(Bismillahirrohmaanirrohiim).

- 1) Bersiwak (memberus gigi atau bersugi).
- 2) Membasuh kedua belah tapak tangan sehingga pergelangan tangan.
- 3) Berkumur-kumur.
- 4) Istinsyak (memasukkan air ke dalam rongga hidung).
- 5) Menyilang-nyilangi janggut yang tebal.
- 6) Menyapu kedua belah telinga di bahagian luar dan dalam dengan air.
- 7) Menyilang-nyilangi jari tangan dan jari-jari kaki.
- 8) Mendahulukan anggota yang di sebelah kanan.
- 9) Melebihkan had basuhan muka, tangan dan kaki dari bahagian yang wajib dibasuh.
- 10) Membasuh anggota wuduk sebanyak tiga kali.
- 11) Berturut-turut, tidak lama antara mengerjakan yang satu dengan yang lain.
- 12) Membaca doa selepas berwuduk.

2.2.7 Perkara yang Membatalkan Wuduk

Terdapat enam perkara yang membatalkan wuduk iaitu:

- 1) Keluar sesuatu daripada qubul atau dubur.
- 2) Tidur yang tidak tetap punggungnya.
- 3) Hilang akal sebab mabuk, gila, pengsan dan sebagainya.
- 4) Bersentuh kulit tanpa berlapik antara lelaki dengan perempuan yang telah baligh dan bukan mahram bagi keduanya.
- 5) Bersentuh kulit tanpa berlapik antara suami dengan isteri.
- 6) Tapak tangan menyentuh qubul atau dubur.

2.2.8 Perkara Makruh Ketika Berwuduk

Terdapat beberapa makruh ketika berwuduk iaitu:

- 1) Menggunakan air yang telalu sejuk atau terlalu panas.
- 2) Menggunakan air musyammas (Air yang tersimpan dalam satu bekas dan menjadi panas kerana terdedah kepada cahaya matahari)
- 3) Berlebih-lebihan menggunakan air seperti membasuh anggota wuduk lebih daripada tiga kali.
- 4) Mengeringkan anggota wuduk tanpa sebarang keuzuran. Tidak makruh sekiranya ada keuzuran seperti dalam keadaan terlalu sejuk.
- 5) Berwuduk di dalam tandas.
- 6) Meminta pertolongan daripada orang lain untuk menjirus air ke anggota wuduk tanpa sebarang keuzuran kerana hal ini dikhawatir membawa kepada sifat sompong.
- 7) Mendahulukan anggota kiri daripada anggota kanan.
- 8) Berlebih-lebihan berkumur ketika berpuasa kerana dibimbangi air akan masuk ke dalam kerongkong dan membatakan puasa.
- 9) Menepuk air ke muka atau mengambil wuduk secara tergopoh-gapah.
- 10) Berbual-bual ketika berwuduk.

2.2.9 Ilustrasi Wuduk dengan Sempurna dari Anggota Rukun dan Anggota yang Sunat Adalah Seperti Berikut:

- 1) Terlebih dahulu membaca:

بِسْمِ اللَّهِ الرَّحْمَنِ الرَّحِيمِ
Bismillaahirrohmaanirrohiim

Setiap perbuatan yang baik, sunat dimulakan dengan Basmalah. Kemudian disunatkan untuk bersugi.

- 2) Membasuh kedua belah telapak tangan hingga pergelangan tangan sebanyak tiga kali



Gambar 15: Membasuh Kedua Belah Tapak Tangan Hingga Pergelangan Tangan

- 3) Berkumur-kumur dengan cara memasukkan air kedalam mulut diulangi sebanyak tiga kali.



Gambar 16: Berkumur-kumur

- 4) *Istinsyak* dan *istinsar*

Istinsyak dan *istinsar* iaitu memasukkan air ke dalam rongga hidung kemudian dikeluarkan semula dan dilakukan sebanyak tiga kali.



Gambar 17: Memasukkan air dalam hidung (*istinsyak*) kemudian mengeluarkan (*istinsar*)

5) Niat

Lafaz niat sebelum membasuh muka:

نَوْيِثُ الْوُضُوءَ لِرُفْعِ الْحَدَبِ الْأَصْغَرِ فَرْضًا لِّلَّهِ تَعَالَى

"Nawaitul Wudhuu-a liraf'il hadatsil asghori fardhan
lilaahi ta'aalaa"

Maksudnya: "Sahaja aku berwuduk untuk
mengangkat hadas kecil fardu kerana Allah Taala"



Gambar 18: Menadah Air di Tangan Serta Niat
Berwuduk

6) Membasuh muka

Membasuh muka dengan mengambil air di kedua belah tapak tangan dan disertakan niat di dalam hati. Basuhan dimulakan pada bahagian dahi dan turun perlahan-lahan ke anak telinga, hidung dan dagu.



Gambar 19: Membasuh Muka

Lalu muka dibasuh seluruhnya, iaitu bahagian yang di antara telinga kanan dengan telinga kiri dan di antara tepi rambut kepala dengan tulang rahang di bawah dagu, muka dibasuh rata tiga kali.

7) Membasuh tangan.

Membasuh dimulai dari hujung jari hingga ke siku. Sunat membasuh melebihi paras siku bagi kedua-dua tangan dan mendahulukan tangan kanan sebanyak tiga kali. Diikuti basuhan tangan kiri sebanyak tiga kali juga.



Gambar 20: Membasuh Tangan Kanan daripada
Hujung Jari Sehingga ke Siku



Gambar 21: Membasuh Tangan Kiri daripada
Hujung Jari Sehingga ke Siku

8) Menyapu kepala.

Menyapu sebahagian kepala dengan air sebanyak tiga kali.



Gambar 22: Menyapu Air di Sebahagian Kepala

9) Membasuh kedua-dua telinga luar dan dalam sebanyak tiga kali.

Membasuh kedua-dua telinga luar dan dalam sebanyak tiga kali dengan cara memasukkan jari telunjuk ke dalam lubang telinga dan ibu jari diletakkan di belakang telinga, kemudian ditolak keatas.



Gambar 23: Membasuh Telinga Kanan



Gambar 24: Membasuh Telinga Kiri

10) Membasuh kaki hingga ke buku lali atau lebih sedikit.

Membasuh kedua belah kaki hingga ke buku lali dan disunatkan membasuh melebihi paras buku lali dimulai dengan kaki kanan kemudian kaki kiri sebanyak tiga kali.



Gambar 25: Membasuh kaki Kanan dari Hujung Jari Kaki Sehingga Buku Lali



Gambar 26: Membasuh Kaki Kiri dari Hujung Jari Kaki Sehingga Buku Lali

11) Membaca doa selepas wuduk

Selepas selesai mengambil wuduk, disunatkan untuk membaca doa seperti berikut:



Gambar 27: Membaca Doa Selepas Selesai Berwuduk

أَشْهُدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ.
وَأَشْهُدُ أَنَّ مُحَمَّداً عَبْدُهُ وَرَسُولُهُ اللَّهُمَّ اجْعَلْنِي
مِنَ التَّوَّابِينَ وَاجْعَلْنِي مِنَ الْمُتَطَهِّرِينَ. وَاجْعَلْنِي
مِنْ عِبَادِكَ الصَّالِحِينَ.

Asyhadu allaa ilaaha illallahu wahdahu laa syariikalah. Wa asyhadu anna Muhammadan 'abduhu warasuuluh. Allahumma j'alni minat tawwaabiin, waj'alni minal mutathiriin, waj'alni min 'ibaadikas soolihin.

Maksudnya : “Aku bersaksi tidak ada Tuhan melainkan Allah Yang Maha Esa. Tidak ada sekutu untuk-Nya. Aku bersaksi juga bahawa Nabi Muhammad itu hamba dan utusan-Nya. Ya Allah jadikan aku daripada golongan orang yang bertaubat kepada-Mu. Dan jadikanlah aku daripada golongan orang yang bersih. Dan jadikan aku daripada golongan hamba-Mu yang soleh.”

Sekiranya tidak membaca doa di atas, wuduk tetap sah. Salah satu cara manjaga kebersihan yang boleh dilakukan adalah dengan melakukan cara berwuduk yang betul dan sempurna mengikut tuntutan syarak.

2.2.10 KHUF

2.2.10.1 Pengertian dan Hukum Menyapu Khuf

Pengertian Khuf: Khuf adalah sejenis sarung kaki atau kasut yang menutupi kaki hingga ke paras buku lali. Ia diperbuat daripada kulit yang kebiasaannya digunakan oleh mereka yang tinggal di kawasan sejuk atau panas juga bagi mereka yang musafir atau sakit.

Hukum menyapu khuf adalah sunat. Ia merupakan gantian perbuatan membasuh kaki kepada hanya menyapu air ke atas khuf ketika berwuduk dengan syarat-syarat tertentu.

Dalam hadis riwayat Imam al-Bukhari (1478) dan Imam Muslim (272), daripada Jarir bin Abdullah al-Bajli RA:

رَأَيْتُ النَّبِيًّا صَلَّى اللَّهُ عَلَيْهِ وَسَلَّمَ بَالْ ثِمَّ
تَوَضَّأَ، وَمَسَحَ عَلَى خَفْيَةِ

Bermaksud: *Aku melihat Nabi SAW selepas berhadas kecil (kencing), kemudian Nabi SAW berwuduk, dan menyapu (air) keatas khuf yang dipakainya.*

2.2.10.2 Syarat-syarat Sah Menyapu Khuf

- 1) Khuf menutupi anggota kaki sepenuhnya hingga ke buku lali walaupun bahagian atasnya sedikit terbuka.
- 2) Khuf yang tidak koyak, tidak berlubang dan dapat menahan air masuk ke dalam kasut.

- 3) Dipakai kedua belahnya sesudah suci dari hadas besar dan kecil.



Gambar 28: Khuf

2.2.10.3 Cara Menyapu Khuf

- 1) Dilakukan dengan menyapu khuf yang sebelah kanan sekali dan sebelah kiri sekali dengan tangan atau dengan sesuatu benda yang telah dibasahi.
- 2) Harus menyapu air pada bahagian sebelah atas khuf antara kawasan hujung jari kaki hingga ke paras buku lali.
- 3) Tidak wajib menyapunya rata tetapi memadai walaupun sedikit, namun menyapu pada tapaknya saja tidak sah.



Gambar 29: Pemakaian Khuf

2.2.10.4 Tempoh Masa Sah Menyapu Khuf

- 1) Bermukim: Sehari semalam bagi orang yang menetap dalam negerinya atau mukimnya.
- 2) Bermusafir: Tiga hari tiga malam bagi orang yang dalam perjalanan mengikut syarat musafir.

Dalam hadis yang lain, riwayat Imam Ahmad (18093), daripada Safwan bin Assal RA:

أَمْرَنَا أَنْ مُسْحَ عَلَى الْخُفَيْنِ إِذَا نَحْنُ أَدْخَلْنَاهُمَا
عَلَى طُهْرٍ ثَلَاثَةً إِذَا سَافَرْنَا ، وَيَوْمًا وَيَلْلَةً إِذَا
أَقْمَنَا ، وَلَا نَخْلُعُهُمَا مِنْ غَائِطٍ وَلَا بَوْلٍ وَلَا
نَوْمٍ ، وَلَا نَخْلُعُهُمَا إِلَّا مِنْ جَنَابَةٍ.

Bermaksud: (Nabi SAW) telah memerintahkan kami supaya menyapu di atas kedua khuf kami apabila kami

memakainya dalam keadaan bersih atau suci, selama tiga hari apabila kami dalam musafir dan sehari semalam jika kami dalam bermukim. Kami tidak perlu mencabutnya dengan sebab berak atau kencing atau tidur. Kami hanya perlu mencabutnya apabila berjunub.

Tempoh menyapu khuf setelah memakai kedua-duanya bermula apabila berhadas. Justeru seseorang yg berwuduk dan memakai khuf untuk solat subuh kemudian dia berhadas Ketika matahari terbit maka tempohnya bermula daripada terbitnya matahari.

Orang yang menyapu khuf ketika bermukim kemudian bermusafir.

Sesiapa yang menyapu khuf ketika bermukim kemudian dia bermusafir maka dia boleh menyapunya selama sehari semalam sahaja. Begitu juga sesiapa yang menyapu khuf ketika bermusafir kemudian bermukim maka dia hendaklah menamatkan tempoh sapuannya sebagaimana orang yang bermukim.

2.2.10.5 Perkara-perkara yang Membatalkan Menyapu Khuf

- 1) Tertanggal atau koyak khuf walaupun sebelah.
- 2) Berhadas besar.
- 3) Telah sempurna tempoh masa menyapu khuf.

BAB 3

BERSUCI DENGAN MANDI

2.3 BERSUCI DENGAN MANDI

2.3.1 Pengertian Mandi

Mandi ialah perbuatan mengalirkan air ke seluruh badan disertai dengan niat.

Mandi terbahagi kepada dua, iaitu:

- 1) Mandi Wajib.
- 2) Mandi Sunat.

2.3.2 Sebab-sebab Mandi Wajib

- 1) Bersetubuh.
- 2) Keluar air mani.
- 3) Berhenti darah haid.
- 4) Berhenti darah nifas.
- 5) Wiladah (melahirkan anak).
- 6) Meninggal dunia.

2.3.3 Sebab-sebab Mandi Sunat

- 1) Untuk mengerjakan solat Jumaat.
- 2) Untuk mengerjakan solat sunat Aidilfitri dan Aidiladha.
- 3) Untuk mendirikan solat sunat istisqa' (mohon hujan).

- 4) Untuk mengerjakan solat sunat gerhana matahari atau gerhana bulan.
- 5) Sesudah memandikan jenazah.
- 6) Memeluk Islam.
- 7) Sembuh dari gila, pengsan atau pitam.
- 8) Untuk memasuki Mekah atau Madinah.
- 9) Untuk berihram haji dan umrah.
- 10) Berwukuf di Arafah.
- 11) Bermalam di Muzdalifah.
- 12) Untuk melontar Jamrah.
- 13) Untuk bertawaf atau Sai.

2.3.4 Perkara-perkara Rukun Ketika Mandi

- 1) **Niat mandi.**

Berniat di dalam hati dan di bantu dengan lafaz.

Contoh: Niat Mandi Wajib

نَوَيْتُ رَفْعَ الْحَدَّثِ الْأَكْبَرِ فَرْضًا لِلَّهِ تَعَالَى

Nawaitu raf'al hadasil akbari lillaahi Ta'aala

Maksudnya: Sahaja aku mengangkat hadas besar kerana Allah Taala

2) **Meratakan air keseluruhan anggota badan.**

Mengalirkan dan meratakan air ke seluruh permukaan kulit, rambut dan kuku pada anggota badan.

2.3.5 Perkara-perkara Sunat Ketika Mandi

1) Membasuh kedua-dua belah tangan sebanyak tiga kali kemudian membasuh kemaluan dan kotoran-kotoran di badan dengan tangan kiri.

2) Berwuduk.

3) Membaca Basmalah:

بِسْمِ اللَّهِ الرَّحْمَنِ الرَّحِيمِ
(Bismillahirrohmaanirrohiim)

4) Memulakan membasuh kepala kemudian membasuh badan, (dahulukan anggota sebelah kanan dan selepas itu anggota belah kiri).

5) Menggosok anggota badan.

6) Menyilang rambut dengan air kemudian membasuh kepala sebanyak tiga kali.

7) Meratakan air di celahan rambut, bulu dan pelipat di seluruh badan.

8) Berturut-turut dan tidak diselangi dengan tempoh yang lama diantara basuhan sebahagian anggota dengan anggota yang lain.

BAB 4

BERSUCI DENGAN TAYAMUM

2.4 BERSUCI DENGAN TAYAMUM

Berdasarkan al-Quran Allah SWT berfirman dalam Surah al-Maidah (5) ayat 6:

يَأَيُّهَا الَّذِينَ ءَامَنُوا إِذَا قُمْتُمْ إِلَى الصَّلَاةِ فَاعْسِلُوا
وُجُوهَكُمْ وَأَيْدِيْكُمْ إِلَى الْمَرَاقِيقِ وَامْسَحُوا بِرُءُوسِكُمْ
وَأَرْجُلَكُمْ إِلَى الْكَعْبَيْنِ وَإِنْ كُنْتُمْ جُبْنًا فَأَطْهَرُوا وَإِنْ
كُنْتُمْ مَرْضَى أَوْ عَلَى سَفَرٍ أَوْ جَاءَ أَحَدٌ مِنْكُمْ مِنَ الْغَابِطِ
أَوْ لَمْسُتُمُ الْبِسَاءَ فَلَمْ تَجِدُوا مَاءً فَتَيَمَّمُوا صَعِيدًا طَيِّبًا
فَامْسَحُوا بِوُجُوهِكُمْ وَأَيْدِيْكُمْ مِنْهُ مَا يُرِيدُ اللَّهُ لِيَجْعَلَ
عَلَيْكُم مِنْ حَرَجٍ وَلَكِنْ يُرِيدُ لِيُظْهِرَكُمْ وَلِيُتِمَّ نِعْمَتَهُ وَ
عَلَيْكُمْ لَعَلَّكُمْ تَشْكُرُونَ ﴿٦﴾

Maksudnya : Wahai orang-orang yang beriman, apabila kamu hendak mengerjakan sembahyang (padahal kamu berhadas kecil), maka (berwuduklah) iaitu basuhlah muka kamu, dan kedua belah tangan kamu meliputi siku, dan sapulah sebahagian dari kepala kamu, dan basuhlah kedua belah kaki kamu meliputi buku lali; dan jika kamu junub (berhadas besar) maka bersucilah dengan mandi wajib; dan jika kamu sakit (tidak boleh kena air), atau dalam pelayaran, atau

salah seorang dari kamu datang dari tempat buang air, atau kamu sentuh perempuan, sedang kamu tidak mendapat air (untuk berwuduk dan mandi), maka hendaklah kamu bertayamum dengan tanah - debu yang bersih, iaitu: sapulah muka kamu dan kedua belah tangan kamu dengan tanah - debu itu. Allah tidak mahu menjadikan kamu menanggung sesuatu kesusahan (kepayahan), tetapi ia berkehendak membersihkan (mensucikan) kamu dan hendak menyempurnakan nikmatnya kepada kamu, supaya kamu bersyukur. (6)

2.4.1 Pengertian dan Dasar Hukum Tayamum

Pengertian dari Segi Bahasa: Tujuan.

Pengertian dari Segi Istilah: Menyapukan debu tanah yang suci ke muka dan dua tangan dengan niat dan cara yang tertentu.

Islam menetapkan bahawa syarat sah solat dan ibadah lainnya adalah dengan bersuci, iaitu berwuduk atau tayamum. Wuduk yang hanya dilakukan dengan air, mungkin mudah dilakukan oleh orang yang sihat dan dengan ketersedian air yang cukup. Namun sebaliknya, jika dalam kesulitan menggunakan air, atau ketidadaan air, atau kerana sakit, atau sebab-sebab lain, maka dibolehkan bertayamum sebagai pengganti wuduk.

2.4.2 Dalil dan Hukum Tayamum

Hukum tayamum adalah wajib ketika tidak menemukan air atau ada keuzuran dari menggunakan air bagi menggantikan wuduk atau mandi wajib. Tayamum adalah *rukhsah* (keringanan) yang dibenarkan oleh syarak, ini dinyatakan dalam al-Qur'an, Surah an-Nisaa' (4) ayat 43:

يَأَيُّهَا الَّذِينَ ءَامَنُوا لَا تَقْرَبُوا الْمَسْكُونَةَ وَإِنْتُمْ
 سُكَّرَى حَتَّىٰ تَعْلَمُوا مَا تَقُولُونَ وَلَا جُنْبًا إِلَّا
 عَابِرِي سَبِيلٍ حَتَّىٰ تَغْتَسِلُوْا وَإِنْ كُنْتُمْ مَرْضَى أَوْ
 عَلَىٰ سَفَرٍ أَوْ جَاءَ أَحَدٌ مِنْكُمْ مِنَ الْغَابِطِ أَوْ
 لِمَسْتُمُ الْمِسَاءَ فَلَمْ تَجِدُوا مَاءً فَتَيَمَّمُوا صَعِيدًا
 طَيْبًا فَإِمْسَحُوا بِرُوجُورِهِمْ وَأَيْدِيهِمْ إِنَّ اللَّهَ كَانَ

عَفُوا عَفُورًا

Maksudnya: Wahai orang-orang yang beriman, janganlah kamu hampiri sembahyang (mengerjakannya) sedang kamu dalam keadaan mabuk, hingga kamu sedar dan mengetahui akan apa yang kamu katakan. Dan janganlah pula (hampiri masjid) sedang kamu dalam keadaan Junub (berhadas besar) - kecuali kamu hendak melintas sahaja - hingga kamu mandi bersuci. Dan jika kamu sakit, atau sedang dalam musafir, atau salah seorang di antara kamu datang dari tempat buang air, atau kamu bersentuh dengan perempuan, kemudian kamu tidak mendapat air (untuk mandi atau berwuduk), maka hendaklah kamu bertayamum dengan tanah - debu, yang suci, iaitu sapukanlah ke muka kamu dan kedua tangan kamu. Sesungguhnya Allah Maha Pemaaf, lagi Maha Pengampun. (43)

Ayat tersebut menjelaskan sebab dibolehkan bertayamum, iaitu apabila dalam keadaan sakit yang tidak dibolehkan berwuduk. Begitu juga ketika dalam perjalanan, seperti di dalam pesawat atau kenderaan lain yang tidak mudah untuk berwuduk termasuk juga bagi mereka yang berjunub dan tidak menemui air untuk mandi hadas.

Dalam hadis riwayat Ibnu Abbas, Mujahid ibn Jabr, Qatadah ibn Di'amah, Ubay ibn Ka'b, 'Amar ibn Yasir, dan yang lain menegaskan bahawa tayamum bukan hanya boleh menggantikan wuduk, tetapi juga mandi hadas besar. Ini suatu petanda bahawa Islam membolehkan tayamum sebagai pengganti kepada kaedah bersuci dan taharah oleh sebab-sebab darurat dan kepayahan.

2.4.3 Sebab-sebab Dibolehkan Tayamum

1) Ketiadaan Air

Sekiranya seseorang itu tidak mempunyai air tetapi yakin ada air di kawasan sekitar, hendaklah dia mencarinya terlebih dahulu sejauh sekitar tidak kurang daripada 2.5km. Jika air masih tidak ditemui maka bolehlah bertayamum.

2) Ada air tetapi tidak mencukupi

Jika seseorang itu hanya mempunyai air yang sedikit dan air itu hanya cukup untuk keperluan minumannya dan binatang ternakan sahaja. Dalam keadaan ini dia dibolehkan bertayamum.

3) Sakit

Sakit yang tidak boleh menggunakan air sama ada menyebabkan penyakit lambat sembah atau bertambah sakit.

4) Cuaca terlalu Sejuk

Cuaca yang terlalu sejuk dan penggunaan air mungkin boleh memudaratkan.

2.4.4 Rukun Tayamum

1) Niat

Wajib berniat ketika permulaan tayamum di dalam hati dengan membaca Basmalah serta sunat melafazkan niat seperti berikut:

نَوَيْتُ التَّيَمُّمَ لِاسْتِبَاخَةِ الصَّلَاةِ فَرْضًا لِلَّهِ تَعَالَى

*Naiwaitut Tayammuma Listibaahatis
Solaati Fardhan Lillaahi Ta'aalaa*

Maksudnya: Sahaja aku melakukan tayamum untuk mengerjakan solat fardu kerana Allah Taala.

2) Menyapu muka

Dengan menekap tapak tangan pada debu tanah dan menepuknya sebanyak dua kali bagi menipiskan jumlah debu tanah di tangan sebelum disapu ke muka.

3) Menyapu kedua belah tangan hingga ke siku

Dengan menekap tapak tangan pada debu tanah dan menepuknya sebanyak dua kali bagi menipiskan jumlah debu tanah di tangan sebelum disapu ke kedua belah tangan.

4) Tertib

Melakukan mengikut turutannya, iaitu dengan mendahului niat serta mengambil debu dan menyapu muka, kemudian menyapu tangan.

2.4.5 Perkara-perkara Sunat Ketika Tayamum

1) Membaca Basmalah:

بِسْمِ اللَّهِ الرَّحْمَنِ الرَّحِيمِ
Bismillahirrohmaanirrohiim

- 2) Merenggangkan jari tapak tangan ketika menepuk debu tanah.
- 3) Menipiskan debu dengan melaga-lagakan kedua-dua tangan.
- 4) Menyapu muka dengan kedua-dua tapak tangan dimulai daripada bahagian atas muka.
- 5) Melebihkan sedikit sapuan dari sempadan muka.
- 6) Mendahulukan tangan sebelah kanan.
- 7) Melebihkan sedikit sapuan hingga melepassi paras siku.
- 8) Berturut-turut antara sapuan muka dengan tangan.
- 9) Berdoa.

2.4.6 Syarat Sah Melakukan Tayamum

Perlu diketahui bahawa bertayamum adalah sesuatu yang penting dalam menentu sahnya ibadah seseorang dalam keadaan darurat. Maka sebelum mempraktikkan kaedah tayamum ini, perlulah dipastikan terlebih dahulu setiap syarat bagi membolehkan tayamum dipenuhi.

Antara syarat sah tayamum seperti berikut:

1) Sukar atau tidak menemukan air.

Keadaan sukar untuk mendapatkan air seperti di musim kemarau, dalam perjalanan jauh, berada di gunung dan seumpama dengannya yang menyebabkan seseorang itu sukar untuk menemukan air.

2) Debu yang suci

Debu yang boleh digunakan untuk tayamum perlulah suci. Ini bermakna debu yang digunakan bebas daripada najis, kotoran haiwan dan sebagainya. Perlu juga dipastikan debu tersebut kering dan tidak bercampur dengan sebarang anasir seperti tepung, kapur, batu atau kotoran lainnya. Debu tanah yang telah digunakan untuk bertayamum juga tidak boleh digunakan semula.

3) Dilakukan pada waktu solat

Tayamum hanya boleh dilakukan setelah masuk waktu dan didapati tiada air untuk berhadas kecil ataupun besar.

4) Satu kali tayamum untuk satu kali solat fardu

Setiap tayamum hanya sah untuk menunaikan satu solat fardu yang tertentu sahaja. Tayamum perlu diulang untuk menunaikan solat fardu yang seterusnya. Namun tayamum tetap sah untuk menunaikan solat-solat sunat selepas solat fardu berkenaan.

5) Faham rukun tayamum

Bersuci dengan tayamum memiliki empat rukun, iaitu:

- (i) Niat dalam hati.
- (ii) Mengusap wajah.
- (iii) Mengusap kedua tangan.
- (iv) Tertib.

Berberbeza dengan wudhu yang memiliki enam rukun.

2.4.7 Ilustrasi Bertayamum (Lelaki dan Perempuan)


- 1) Mulakan dengan membaca بِسْمِ اللَّهِ الرَّحْمَنِ الرَّحِيمِ (*bismillaahirrohmaanirrahiim*) kemudian dibantu dengan lafaz iaitu:

نَوَيْتُ التَّيْمَمَ لِاسْتِبَاخَةِ الصَّلَاةِ فَرْضًا لِلَّهِ تَعَالَى

Naiwaitu Tayamuma Listibaahatis Solaati fardhan Lillaahi Ta'aalaa.

Maksudnya: Sahaja aku melakukan tayamum untuk mengerjakan solat fardu kerana Allah Taala.

- 2) Menepuk dua tapak tangan pada debu kali pertama untuk menyapu muka. Sunat menipiskan debu di tapak tangan dengan mengetuk-ngetuk kedua belah sisi tapak tangan.



Gambar 30: Menepuk Debu dengan Dua Tapak Tangan



Gambar 31: Menipiskan Debu yang berada di Tapak Tangan dengan Mengetuk-ngetuk Sisi Kedua belah Tangan Tanpa Menyentuh Debu yang Telah Melekat di Tapak Tangan.

- 3) Menyapu muka dengan debu yang melekat di tapak tangan (ini rukun tayamum).



Gambar 32: Kedua Tapak Tangan yang Berdebu Disapu ke Muka

4) Menyapu kedua belah tangan hingga ke siku dengan debu yang kedua (ini rukun tayamum).

(a) Tepuk tapak tangan atas debu



Gambar 33: Menepuk Debu dengan Dua Tapak Tangan Keatas Debu yang Tersedia (Kali Kedua)

(b) Meratakan debu tanah ke tangan kanan



Gambar 34: Menyapu Debu di Tapak tangan Kiri ke Tangan Kanan Sehingga ke Siku, Bermula dari Hujung Jari Tangan Kanan Bahagian Belakang



Gambar 35: Sapuan Debu Dipusingkan ke Bahagian Depan Lengan Tanpa Melepaskan Sapuan tersebut Serta Diteruskan Sapuannya hingga ke Hujung Pergelangan Tangan Kanan dan Sisi Tapak Tangan Hingga ke Hujung Jari Tanpa Menyentuh Tapak Tangan Kanan Tersebut

(c) Meratakan debu tanah ke tangan kiri



Gambar 36: Menyapu Debu di Tapak tangan Kanan ke Tangan Kiri Sehingga ke Siku, Bermula dari Hujung Jari Tangan Kiri Bahagian Belakang



Gambar 37: Sapuan Debu Dipusingkan ke Bahagian Depan Lengan Tanpa Melepaskan Sapuan tersebut Serta Diteruskan Sapuannya hingga ke Hujung Pergelangan Tangan Kiri dan Sisi Tapak Tangan Hingga ke Hujung Jari Tanpa Menyentuh Tapak Tangan Kiri Tersebut

- (d) Melekapkan kedua belah tapak tangan serta menyelati jari jemari bagi memastikan sapuan rata ke seluruh bahagian tangan.



Gambar 38: Melekapkan Kedua-dua Belah Tapak Tangan Serta Menyelati Jari Jemari Kedua-dua Tangan.

- 5) Membaca doa selepas bertayammum dengan doa yang sama ketika sesudah wuduk seperti berikut:

أَشْهُدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ.
وَأَشْهُدُ أَنَّ مُحَمَّداً عَبْدُهُ وَرَسُولُهُ. اللَّهُمَّ اجْعُلْنِي
مِنَ التَّوَّابِينَ وَاجْعُلْنِي مِنَ الْمُتَطَهِّرِينَ. وَاجْعُلْنِي
مِنْ عِبَادِكَ الصَّالِحِينَ.

Asyhadu allaa ilaaha illallahu wahdahu laa syariikalahu. Wa asyhadu anna Muhammadan 'abduhuu warasuuluh. Allahumma j'alni minat tawwaabiin, waj'alni minal mutatohhiriin, waj'alni min 'ibaadikas soolihin.

Maksudnya : “Aku bersaksi tidak ada Tuhan melainkan Allah Yang Maha Esa. Tidak ada sekutu untuk-Nya. Aku bersaksi juga bahawa Nabi Muhammad itu hamba dan utusan-Nya. Ya Allah jadikan aku daripada golongan orang yang bertaubat kepada-Mu. Dan jadikanlah aku daripada golongan orang yang bersih. Dan jadikan aku daripada golongan hamba-Mu yang soleh.”



Gambar 39: Membaca Doa Selepas Bertayamum

2.4.8 Cara Tayamum dalam Kenderaan

Seorang Muslim wajib menunaikan solat walau dalam apa keadaan sekalipun apabila telah masuk waktu solat.

bersuci dengan cara tayamum untuk menjalankan ibadah dapat dilakukan di mana sahaja sepanjang tidak mempunyai air untuk berwuduk termasuklah ketika di dalam kenderaan.

Cara tayamum di dalam kenderaan sama sahaja dengan cara tayamum biasa. Yang penting, di permukaan kenderaan terdapat debu yang suci, yang boleh digunakan untuk bertayamum. Begitu juga cara tayamum di dalam kapal terbang, ia boleh dilakukan jika ketiadaan air atau keadaannya tidak memungkinkan untuk berwuduk. Carilah permukaan di dalam kabin pesawat yang diyakini mengandungi debu yang suci yang boleh digunakan untuk bertayamum.

2.4.9 Sebab Diharuskan Tayamum

- 1) Tiada air atau air tidak mencukupi kerana keperluan lain seperti untuk dimakan dan diminum.
- 2) Keadaan sejuk yang boleh memudaratkan.
- 3) Tidak dapat menggunakan air kerana penyakit atau sakit seperti melecur dan lain-lain.
- 4) Air berada di tempat yang terlalu jauh.

2.4.10 Perkara yang Membatalkan Tayamum

- 1) Perkara yang membatalkan tayamum sama seperti perkara yang membatalkan wuduk. Contohnya seseorang yang sudah bersuci dengan cara tayamum, lalu dia berhadas, menyentuh kemaluan atau pengsan maka batal tayamumnya.

- 2) Menemui air sebelum memulakan solat. Setiap orang yang sudah bertayamum kemudian melihat air sebelum masuknya waktu solat, maka tayamumnya batal.
- 3) Boleh menggunakan air semula seperti sembah daripada penyakit yang menghalang penggunaan air.
- 4) Murtad juga salah satu dari perbuatan yang boleh membatalkan tayamum.

2.4.11 Hikmah Disyariatkan Tayamum

- 1) Menunjukkan Islam itu mudah dan ringan dalam melakukan ibadah dalam apa jua keadaan.
- 2) Tanda kasih sayang Allah SWT kepada hamba-Nya, Allah SWT memberi keringanan untuk melakukan ibadat dalam apa jua keadaan.
- 3) Menjaga kesucian dan memuliakan agama Islam.
- 4) Memelihara kesihatan tubuh badan.

BAHAGIAN 3

AZAN DAN IQAMAH

3. AZAN DAN IQAMAT

Azan dan Iqamat merupakan suatu panggilan bagi umat Islam untuk melaksanakan solat fardu lima waktu sehari semalam. Sejak zaman berzaman Azan dan Iqamat menjadi seruan utama dalam melaksanakan solat bagi orang Islam.

Menjadi seorang muazin atau orang yang bertugas mengumandangkan Azan dan Iqamat merupakan sesuatu yang istimewa. Terdapat banyak hadis yang menyatakan kelebihan melaungkan azan. Antaranya dalam hadis riwayat Imam al-Bukhari (615), Nabi SAW bersabda:

لَوْ يَعْلَمُ النَّاسُ مَا فِي النِّدَاءِ وَالصَّفَّ الْأَوَّلِ ثُمَّ لَمْ يَجِدُوا إِلَّا أَنْ
يَسْتَهِمُوا عَلَيْهِ لَا سَتَهُمْوا

Bermaksud: Kalauolah orang ramai tahu tentang kelebihan Azan dan berada di saf pertama, kemudian mendapati mereka (tiada ruang saf pertama bagi mereka) melainkan melalui mengundi nescaya mereka sanggup mengundi.

3.1 Pengertian Azan

Pengertian dari Segi Bahasa: Seruan atau pemberitahuan.

Pengertian dari Segi Istilah: Suatu gabungan perkataan tertentu untuk mengetahui waktu solat fardu atau dierangkan sebagai pemberitahuan tentang waktu solat dengan lafaz-lafaz khusus yang telah ditetapkan oleh syariat.

Maka boleh difahami bahawa Azan merupakan seruan atau panggilan untuk memberitahu waktu solat fardu telah tiba. Jika tanpa Azan, agak sukar untuk seseorang itu sedar bahawa telah masuknya waktu solat seterusnya bersedia untuk menunaikan solat di awal waktu.

3.2 Pengertian Iqamat

Pengertian dari Segi Bahasa: Bangun, berdiri atau mendirikan

Pengertian dari Segi Istilah: Pemberitahuan untuk menunaikan solat wajib dengan lafaz-lafaz khusus yang telah ditetapkan oleh syariat.

Maka boleh difahami bahawa Iqamat merupakan suatu panggilan untuk mengajak bagi mendirikan atau melaksanakan solat.

3.3 Hukum Azan dan Iqamat

3.3.1 Hukum Azan

Hukumnya adalah sunat pada setiap kali masuk waktu untuk menunaikan solat fardu. Kecuali solat jenazah kerana tiada ketetapan waktu bagi solat jenazah berbeza dengan solat lima waktu dalam sehari semalam.

Dalam hadis yang diriwayatkan Imam al-Bukhari (628), Nabi SAW bersabda:

..فَإِذَا حَضَرْتِ الصَّلَاةَ، فَلْيُؤْدِنْ أَحَدُكُمْ،
وَلْيُؤْمِنْكُمْ أَكْبَرُكُمْ.

Bermaksud: .. "Jika telah tiba (waktu) solat, maka hendaklah salah seorang dari kalian mengumandangkan azan untuk kalian. Dan

hendaklah yang paling tua di antara kalian mengimami kalian”.

Mengikut pandangan sebahagian ulama mengatakan Azan merupakan sunat muakkad. Dan sebahagian pandangan mengatakan hukum azan adalah fardu kifayah.

3.3.2 Hukum Iqamat

Sunat pada tiap-tiap solat fardu, dan tidak disunatkan pada ketika melakukan solat sunat yang disunatkan berjamaah, seperti solat sunat hari raya, sunat gerhana, solat sunat minta hujan dan solat sunat tarawih.

3.3.3 Hukum Azan dan Iqamat bagi Wanita

Azan hanya dikumandangkan khusus oleh kaum lelaki sahaja, wanita tidak dibenarkan azan kerana suara lantang menjadi aurat bagi wanita.

Dalam Kitab *Nihayah al-Muhtaj ila Syarh al-Minhaj* (1/406):

“Disunatkan bagi jemaah wanita untuk iqamah iaitu salah seorang jemaah wanita yang melakukan iqamah, sekiranya dia solat sendirian maka dia juga melakukan iqamah untuk dirinya. Sekiranya wanita melaungkan iqamah untuk lelaki atau khunsa maka hukumnya tidak sah (tidak ada azan bagi wanita menurut pendapat yang masyhur) pada keduanya. Hal ini kerana azan wanita yang dilaungkan pada kadar yang kuat dikhuatiri boleh mendatangkan fitnah dan iqamah dilaungkan bertujuan mengajak hadirin bangun, oleh itu tidak meninggikan suara seperti azan”

Kesimpulannya, wanita disunatkan iqamah sama ada secara bersendirian atau ketika berjemaah bersama dalam kalangan wanita. Kadar suara iqamah wanita tersebut hendaklah perlahan, ini kerana jika suara iqamah wanita tersebut lantang dan kuat dikhuatiri mendatangkan fitnah.

Selain itu, wanita tidak disunatkan melaungkan azan walaupun dalam kalangan jemaah wanita dan tidak sah iqamah dan azan wanita sekiranya terdapat jemaah lelaki.

3.4 Syarat-syarat Melaungkan Azan dan Iqamat

Syarat-syarat utama bagi membolehkan seseorang itu melaungkan Azan atau Iqamat adalah seperti berikut:

- 1) Beragama Islam.
- 2) Mumaiyiz.
- 3) Berakal.
- 4) Lelaki.
- 5) Telah masuk waktu.
- 6) Lafaz-lafaz yang diucapkan mesti berturutan.
- 7) Tidak diselangi waktu yang lama antara satu lafaz dengan lafaz yang lainnya.
- 8) Menguatkan atau melantangkan suara hingga mampu didengari oleh orang sekeliling, sedangkan iqamat hanya sekadar mampu didengari oleh Jemaah yang ada ketika itu.

- 9) Tidak menyambung azan atau iqamat orang lain. Tidak sah azan atau iqamat dilakukan oleh dua orang.
- 10) Dilafazkan dalam Bahasa Arab.

3.5 Perkara-perkara Sunat Ketika Melaungkan Azan

- 1) Menghadap kiblat.
- 2) Menghadap muka ke kanan waktu menyebut dua kali *Haiyya 'Alassolah* dan menghadap muka ke kiri sewaktu menyebut dua kali *Haiya 'alal falah*.
- 3) Dilaungkan oleh orang yang adil dan bukan fasik.
- 4) Orang yang sihat dan suara yang bagus.
- 5) Suci dari hadas besar dan kecil.
- 6) Berdiri pada tempat yang tinggi.

3.6 Syarat Seorang *Muazin* (Orang yang Melaungkan Azan)

- 1) Beragama Islam.
- 2) Berakal sihat.
- 3) Baligh.
- 4) Baik agamanya.
- 5) Bersuara lantang dan bagus.
- 6) Tahu dan amanah terhadap waktu solat fardu ketika ingin melaungkan azan dan iqamat.
- 7) Ikhlas mengharap redha Allah SWT.

3.7 Lafaz Azan dan Iqamat

3.7.1 Lafaz dan Jawab Azan

Turutan lafaz muazin dan menjawab azan adalah seperti berikut:

Muazin

الله أكْبَرُ الله أكْبَرُ (٢ كالي)

Allaahu Akbar Allaahu Akbar (2 kali)

Menjawab Azan:

الله أكْبَرُ الله أكْبَرُ (٢ كالي)

Allaahu Akbar Allaahu Akbar (2 kali)

Maksudnya: *Allah Maha Besar, Allah Maha Besar.*

Muazin

أَشْهُدُ أَنْ لَا إِلَهَ إِلَّا اللَّهُ (٢ كالي)

Asyhadu allaa ilaaha illallaah (2 kali)

Menjawab Azan:

أَشْهُدُ أَنَّ لَا إِلَهَ إِلَّا اللَّهُ (٢ كالي)

Asyhadu allaa ilaaha illallaah (2 kali).

Maksudnya: *Aku bersaksi bahawa tiada Tuhan selain Allah.*

Muazin

أَشْهُدُ أَنَّ مُحَمَّدًا رَسُولُ اللَّهِ (٢ كالي)

Asyhadu anna Muhammadar rasuulullah (2 kali)

Menjawab Azan:

أَشْهُدُ أَنَّ مُحَمَّدًا رَسُولُ اللَّهِ (٢ كالي)

Asyhadu anna Muhammadar rasuulullah (2 kali)

Maksudnya: *Aku bersaksi bahawa Nabi Muhammad itu adalah utusan Allah.*

Muazin

حَيَّ عَلَى الصَّلَاةِ (٢ كَالِيْ)

Hayya 'alassolaah (2 kali)

Maksudnya: Marilah mendirikan solat.

Menjawab Azan:

لَا حَوْلَ وَلَا قُوَّةَ إِلَّا بِاللَّهِ (٢ كَالِيْ)

La Hawla wa La Quwwata Illa Billah (2 kali)

Maksudnya: Tiada daya dan upaya melainkan dengan pertolongan Allah.

Muazin

حَيَّ عَلَى الْفَلَاحِ (٢ كَالِيْ)

Hayya 'alal falaah (2 kali)

Maksudnya: Marilah menuju kepada kejayaan.

Menjawab Azan:

لَا حَوْلَ وَلَا قُوَّةَ إِلَّا بِاللَّهِ (٢ كali)

La Hawla wa La Quwwata Illa Billah

Maksudnya: *Tiada daya dan upaya melainkan dengan pertolongan Allah.*

Muazin

الله أكْبَرُ الله أكْبَرُ (١ kali)

Allaahu Akbar Allaahu Akbar (1 kali).

Menjawab Azan:

الله أكْبَرُ الله أكْبَرُ (١ kali)

Allaahu Akbar Allaahu Akbar (1 kali).

Maksudnya: *Allah Maha Besar, Allah Maha Besar.*

Muazin

لَا إِلَهَ إِلَّا اللَّهُ (١ كali)

Laa ilaaha illallaah (1 kali)

Menjawab Azan:

لَا إِلَهَ إِلَّا اللَّهُ مُحَمَّدًا رَسُولُ اللَّهِ (١ كali)

Laa ilaaha illallaah, Muhammadar rasulullah (1kali)

Maksudnya: *Tiada Tuhan selain Allah.*

Penambahan di Azan Subuh

Untuk azan yang dikumandangkan ketika masuk waktu Solat Subuh, setelah lafaz:

Muazin

حَيٌّ عَلَى الْفُلَاحِ (۲ كَالِيٰ)

Hayya 'alal falaah (2 kali)

Maka ditambahkan lafaz seperti berikut:

Muazin

الصَّلَاةُ حَيْرٌ مِنَ النَّوْمِ (۲ كَالِيٰ)

As-solaatu khairum minan-nauum (2 kali).

Maksudnya: *Solat itu lebih baik daripada tidur.*

Menjawab Azan:

صَدَقْتَ وَبَرَرْتَ وَأَنَا عَلَى ذَلِكَ مِنَ الشَّهِيدِينَ (۲ كَالِيٰ)

Sodaqta Wabararta Wa Anaa 'Alaa Zaalika Minasy-syaahidiin (2 kali)

Maksudnya: *Benar dan baguslah ucapanmu itu dan aku pun atas yang demikian termasuk orang-orang yang menyaksikan.*

a) Doa Selepas Azan

اللَّهُمَّ رَبَّ هَذِهِ الدَّعْوَةِ التَّامَّةِ، وَالصَّلَاةِ الْقَائِمَةِ، آتِ
مُحَمَّدًا الْوَسِيلَةَ وَالْفَضِيلَةَ، وَابْعُنْهُ مَقَامًا مَحْمُودًا الَّذِي
وَعَدْتَهُ، إِنَّكَ لَا تُخْلِفُ الْمِيعَادَ.

Allaahumma rabba haazihid da'watit taammati
wassalaatil-qaaimah, aati Muhammadanil-wasiilata
walfadhiilah, wab 'ath-hu maqaamam-mahmuudanil-
lazii wa'adtah, innaka laa tukhliful-mi'aad.

Maksudnya: “Ya Allah, Tuhan yang telah mensyariatkan seruan Azan yang sempurna dan solat yang akan didirikan, kurniakanlah kepada Nabi Muhammad SAW keutamaan dan kelebihan, kemuliaan dan darjat yang tinggi serta limpahkanlah kepadanya kedudukan yang terpuji yang telah Engkau janjikan”.

3.7.2 Lafaz Iqamat dan Jawapan Iqamat

Turutan lafaz iqamat dan menjawab iqamat adalah seperti berikut:

Iqamat

الله أكْبَرُ الله أكْبَرُ

Allaahu Akbar Allaahu Akbar

Menjawab Iqamat:

الله أكْبَرُ الله أكْبَرُ

Allaahu Akbar Allaahu Akbar

Maksudnya: *Allah Maha Besar, Allah Maha Besar.*

Iqamat

أَشْهُدُ أَنْ لَا إِلَهَ إِلَّا اللَّهُ

Asyhadu allaa ilaaha illallaah

Menjawab Iqamat:

أَشْهُدُ أَنْ لَا إِلَهَ إِلَّا اللَّهُ

Asyhadu allaa ilaaha illallaah

Maksudnya: *Aku bersaksi bahawa tiada Tuhan selain Allah.*

Iqamat

أَشْهُدُ أَنَّ مُحَمَّدًا رَسُولُ اللَّهِ

Asyhadu anna Muhammadar rasuulullah

Menjawab Iqamat:

أَشْهُدُ أَنَّ مُحَمَّدًا رَسُولُ اللَّهِ

Asyhadu anna Muhammadar

Maksudnya: *Aku bersaksi bahawa Nabi Muhammad itu adalah utusan Allah.*

Iqamat

حَيٌّ عَلَى الصَّلَاةِ

Hayya 'alassolaah

Maksudnya: Marilah mendirikan solat.

Menjawab Iqamat:

لَا حَوْلَ وَلَا قُوَّةَ إِلَّا بِاللهِ

La Hawla wa La Quwwata Illa Billah

Maksudnya: Tiada daya dan upaya melainkan dengan pertolongan Allah.

Iqamat

حَيٌّ عَلَى الْفَلَاحِ

Hayya 'alal falaah

Maksudnya: Marilah menuju kepada kejayaan.

Menjawab Iqamat:

لَا حَوْلَ وَلَا قُوَّةَ إِلَّا بِاللهِ

La Hawla wa La Quwwata Illa Billah

Maksudnya: *Tiada daya dan upaya melainkan dengan pertolongan Allah.*

Iqamat

قَدْ قَامَتِ الصَّلَاةُ قَدْ قَامَتِ الصَّلَاةُ

Qad qaamatis-solaah, Qad qaamatis-solaah

Maksudnya: *Solat akan segera didirikan, solat akan segera didirikan.*

Menjawab Iqamat:

أَقَامَهَا اللَّهُ وَأَدَمَهَا مَا دَامَتِ السَّمَاوَاتُ وَالْأَرْضُ

AqaamahAllahu wa Adaamahaa Maadamatis Samaawaatu Wal Ardhoo

Maksudnya: *Semoga Allah SWT sentiasa menegakkan dan mengekalkan adanya (solat) selama langit dan bumi masih ada.*

Iqamat

الله أكْبَرُ الله أكْبَرُ

Allaahu Akbar Allaahu Akbar

Menjawab Azan:

الله أكْبَرُ الله أكْبَرُ

Allaahu Akbar Allaahu Akbar

Maksudnya: *Allah Maha Besar, Allah Maha Besar.*

Iqamat

لَا إِلَهَ إِلَّا اللَّهُ

Laa ilaaha illallaah

Menjawab Azan:

لَا إِلَهَ إِلَّا اللَّهُ مُحَمَّدًا رَسُولُ اللَّهِ

Laa ilaaha illallaah, Muhammadar rasulullah

Maksudnya: *Tiada Tuhan selain Allah.*

a) Doa Selepas Azan

اللَّهُمَّ رَبَّ هَذِهِ الدَّعْوَةِ التَّامَّةِ، وَالصَّلَاةِ الْقَائِمَةِ، آتِ
مُحَمَّدًا الْوَسِيلَةَ وَالْفَضِيلَةَ، وَابْعُنْهُ مَقَامًا مَحْمُودًا الَّذِي
وَعَدْتَهُ، إِنَّكَ لَا تُخْلِفُ الْمِيعَادَ.

Allaahumma rabba haazihid da'watit taammati
wassalaatil-qaaimah, aati Muhammadanil-wasiilata
walfadhiilah, wab 'ath-hu maqaamam-mahmuudanil-
lazii wa'adtah, innaka laa tukhliful-mi'aad.

Maksudnya: “Ya Allah, Tuhan yang telah mensyariatkan seruan Azan yang sempurna dan solat yang akan didirikan, kurniakanlah kepada Nabi Muhammad SAW keutamaan dan kelebihan, kemuliaan dan darjat yang tinggi serta limpahkanlah kepadanya kedudukan yang terpuji yang telah Engkau janjikan”.

BAHAGIAN 4

SOLAT

BAB 1

KONSEP SOLAT DALAM ISLAM

4.1 KONSEP SOLAT DALAM ISLAM

Solat ialah rukun Islam yang kedua sesudah seseorang bersyahadah. Solat menjadi ibadah praktikal yang pertama sebagai bukti keislaman seseorang. Maka solat menjadi penghubung utama secara langsung antara manusia dengan Allah SWT. Tidak ada ibadah lain yang lebih utama daripada solat dalam menghubungkan hamba dengan Tuhan.

4.1.1 Pengertian Solat

Pengertian dari Segi Bahasa: Doa.

Pengertian dari Segi Istilah: Solat ialah amalan yang mengandungi perkataan dan perbuatan tertentu yang dimulai dengan takbiratulihram dan disudahi dengan salam dengan syarat-syarat tertentu.

Oleh yang demikian ketika seseorang mendirikan solat, seluruh jasad sama ada zahir ataupun batin dihadapkan kepada Allah SWT. Lidah memuji-muji dan memohon kepada-Nya. Akal mengingati Allah SWT, selari dengan ucapan lidah. Hati pula berasa kebesaran dan kekuasaan Allah SWT sebagai Tuhan yang disembah.

Allah SWT berfirman, sebagaimana dalam al-Quran, Surah al-Ankabut (29) ayat 45:

اُتْلُ مَا اُوْحِيَ إِلَيْكَ مِنَ الْكِتَابِ وَأَقِمِ الصَّلَاةَ ۖ إِنَّ
الصَّلَاةَ تَنْهَىٰ عَنِ الْفَحْشَاءِ وَالْمُنْكَرِ وَلَذِكْرُ اللَّهِ
كَبِيرٌ ۗ وَاللَّهُ يَعْلَمُ مَا تَصْنَعُونَ ﴿٤٥﴾

Maksudnya: Bacalah serta ikutlah (wahai Muhammad) akan apa yang diwahyukan kepadamu dari Al-Quran, dan dirikanlah sembahyang (dengan tekun); sesungguhnya sembahyang itu mencegah dari perbuatan yang keji dan mungkar; dan sesungguhnya mengingati Allah adalah lebih besar (faedahnya dan kesannya); dan (ingatlah) Allah mengetahui akan apa yang kamu kerjakan. (45)

4.1.2 Syarat-syarat Wajib Solat

1) Islam.

Setiap orang Islam wajib menunaikan solat lima waktu. Tidak ada kewajipan solat kepada orang yang belum Islam. Mereka juga tidak perlu menggantikan solat semasa belum Islam sekiranya memeluk Islam.

2) Baligh.

Pengertian dari Segi Bahasa: “telah mencapai”.

Pengertian dari Segi Istilah: Seseorang yang mencapai tahap kematangan daripada segi umur dan cara berfikir.

Kesimpulannya, baligh ialah telah sampai cukup umur untuk seseorang itu menanggung kewajipan sesuai

dengan syariat Islam. Mereka akan mendapat pahala apabila melakukannya dan berdosa apabila meninggalkannya. Antara lelaki dan perempuan ada perbezaan tanda-tanda baligh.

Perbezaan tanda-tanda baligh antara lelaki dengan perempuan:

a) **Lelaki**

Bermimpi sehingga keluar air mani. Apabila tidak bermimpi keluar air mani dia dikira baligh pada usianya genap 15 tahun Qamariah.

b) **Perempuan**

Keluar darah haid seawal usia sembilan tahun. Jika masih belum keluar darah haid, dia dikira baligh pada usianya genap 15 tahun Qamariah.

3) **Berakal.**

Orang yang berakal wajib menunaikan solat. Walau bagaimanapun, kewajipan solat gugur ke atas orang yang hilang akal disebabkan gila, terencat akal, pitam dan pengsan. Demikian juga orang yang pengsan atau koma, sekiranya dia sedar dan masih ada lagi waktu solat, maka wajib baginya mendirikan solat seperti biasa.

4) **Suci Daripada Haid dan Nifas.**

Wanita yang dalam keadaan haid atau nifas diharamkan baginya solat dalam tempoh berkenaan. Mereka juga tidak perlu menggantikan semula solat yang ditinggalkan semasa haid dan nifas.

5) **Sempurna Pendengaran dan Penglihatan.**

Orang yang buta dan pekak sejak lahir atau sebelum mumaiyiz tidak wajib menunaikan solat. Hal ini disebabkan mereka tidak mampu menerima ilmu dan seruan dakwah, sama ada dengan mendengar pengajaran atau melihat contoh solat yang diajarkan.

Sekiranya hanya mengalami kecacatan pada salah satu daripadanya sama ada cacat pendengaran atau cacat penglihatan, solat tetap wajib dilaksanakan kerana masih ada kemampuan untuk menerima tunjuk ajar.

4.1.3 Syarat Sah Solat

- 1) Beragama Islam.
- 2) Mumaiyiz. Iaitu telah dapat membezakan antara perkara baik dan buruk ketika melakukan sesuatu tindakan.
- 3) Telah masuk waktu solat.
- 4) Mengetahui rukun-rukunnya yang fardu.
- 5) Suci daripada hadas besar dan kecil.
- 6) Suci badan, pakaian dan tempat solat daripada najis.
- 7) Menutup aurat.

Aurat ialah bahagian yang menjadi aib pada tubuh badan yang wajib ditutup dan haram dilihat oleh orang lain. Memakai pakaian yang menutup aurat ketika mengerjakan solat menjadi syarat solat diterima oleh Allah SWT.

Aurat berasal daripada perkataan Arab yang bermaksud keaiban. Menurut istilah fekah, aurat ialah bahagian tubuh badan yang wajib ditutup atau dilindungi daripada pandangan. Dinamakan aurat kerana mendedahkan dan melihatnya adalah sesuatu yang tercela.

Bagi lelaki, aurat wajib ditutup ialah kawasan di antara pusat dan lutut. Aurat perempuan pula meliputi seluruh tubuh kecuali muka dan tapak tangan.

- 8) Mengadap kiblat, kecuali solat sunat orang musafir. Orang yang musafir dibolehkan tidak menghadap kiblat sewaktu solat sunat.

4.1.4 Rukun Solat dan Pembahagiannya

Amalan yang termasuk dalam bahagian rukun, wajib dilakukan. Jika tidak dilakukan, solat akan terbatal dan tidak sah. Rukun Solat ada 13, iaitu:

- 1) Niat
- 2) Takbiratulihram.
- 3) Berdiri betul.
- 4) Membaca surah al-Fatihah
- 5) Rukuk (serta tumakninah).
- 6) Iktidal (serta tumakninah).
- 7) Sujud (serta tumakninah).
- 8) Duduk antara dua sujud serta tumakninah.
- 9) Duduk tahiyat akhir
- 10) Membaca tahiyat akhir.
- 11) Membaca selawat pada tahiyat akhir.
- 12) Memberi salam pertama.
- 13) Tertib (mengikut turutan).

Rukun-rukun solat ini terdiri daripada tiga pembahagian rukun. Pembahagiannya adalah seperti berikut:

- 1) Rukun *Qalbi*.
- 2) Rukun *Qouli*.
- 3) Rukun *Fi'li*.

4.1.4.1 Rukun Qalbi (Rukun yang berasaskan kepada hati)

- 1) Niat
- 2) tertib

4.1.4.2 Rukun Qauli (Rukun yang berasaskan sebutan dan bacaan)

- 1) Takbir
- 2) Fatihah
- 3) Baca tahiyat
- 4) Selawat
- 5) Salam

4.1.4.3 Rukun *Fi'li* (Rukun yang berasaskan pergerakan anggota badan)

- 1) Berdiri
- 2) Rukuk
- 3) Iktidal
- 4) Sujud
- 5) Duduk antara dua sujud
- 6) Duduk tahiyat

4.1.5 Perkara-perkara Makruh dalam Solat

- 1) Melihat ke atas atau melihat ke kanan dan ke kiri.
- 2) Menahan hadas kecil.
- 3) Bersandar pada sesuatu, jika sandaran itu dialihkan dia akan terjatuh.
- 4) Meletakkan kedua tangan di pinggang.
- 5) Menguatkan suara bacaan pada tempat yang perlahan dan memperlakhankan suara pada bacaan kuat.
- 6) Menyamai imam melakukan rukuk, sujud dan sebagainya.
- 7) Solat dalam keadaan mengantuk.
- 8) Bersolat berhampiran hidangan makanan.
- 9) Meletakkan kedua-dua lengan di atas lantai ketika sujud.

4.1.6 Perkara-perkara yang Membatalkan Solat

- 1) Berhadas.
- 2) Terkena najis kecuali najis yang kering dan dibuang segera dengan tidak memegang dan mengangkatnya.
- 3) Membiarkan aurat terbuka.
- 4) Berkata-kata dengan sengaja.
- 5) Makan atau minum walaupun sedikit.
- 6) Melakukan pergerakan yang bukan daripada pergerakan solat melebihi tiga kali berturut-turut.

- 7) Menambah rukun seperti rukuk dan sujud dengan sengaja.
- 8) Berniat keluar daripada solat atau menghentikan solat atas sesuatu sebab. Membelakangi kiblat.
- 9) Murtad.

4.1.7 Aurat dalam Solat

- 1) Aurat lelaki:
Wajib ditutup dari pusat hingga lutut.
- 2) Aurat perempuan:
Wajib ditutup seluruh anggota kecuali muka dan dua tapak tangan.

4.1.8 Hukum Solat

- 1) **Fardu Ain.**
Solat bagi kategori fardu ain ialah solat fardu lima waktu dalam sehari semalam.
- 2) **Fardu Kifayah.**
Solat bagi kategori fardu kifayah ialah solat jenazah.
- 3) **Sunat.**
Solat bagi kategori sunat banyak jenis solatnya dan ia akan diterangkan di bab solat-solat sunat.

BAB 2

SOLAT FARDU (FARDU AIN)

4.2 SOLAT FARDU (FARDU AIN)

Solat fardu ialah solat lima waktu dalam sehari semalam. Setiap orang Islam yang sudah mukallaf (baligh) lagi berakal wajib ke atasnya mengerjakan solat lima waktu sehari semalam.

Solat fardu didirikan mengikut syarat dan kaedah (kaifiyat) yang tertentu. Kefarduan solat tidak gugur walaupun dalam keadaan darurat bahkan Islam memberi kelonggaran dalam melaksanakannya.

4.2.1 Jenis-jenis Solat Lima Waktu Sehari Semalam

Lima solat fardu yang dilakukan sehari semalam ialah berdasarkan berikut:

- 1) **Solat Subuh:** Solat dilakukan dua rakaat.

Waktu untuk mendirikan Solat Subuh bermula dari terbit fajar sadik (cahaya putih yang mula terbit di ufuk timur) hingga terbit matahari.

- 2) **Zuhur:** Solat dilakukan empat rakaat.

Waktu untuk mendirikan solat Zuhur bermula dari gelincir matahari hingga bayang-bayang suatu objek sama panjang dengannya.

- 3) **Asar:** Solat dilakukan empat rakaat.

Waktu untuk mendirikan solat Asar bermula dari berakhirnya waktu Zuhur sehingga terbenam matahari.

4) Maghrib: solat dilakukan tiga rakaat.

Waktu untuk mendirikan solat Maghrib bermula dari terbenamnya matahari hingga hilang awan merah (syafak) di langit sebelah barat.

5) Isyak: Solat dilakukan empat rakaat.

Waktu untuk mendirikan solat Isyak bermula dari berakhirnya waktu Maghrib hingga terbitnya fajar sadik.

4.2.2 Dalil-dalil Solat Fardu

Allah SWT berfirman, sebagaimana dalam al-Quran, Surah al-Israa' (17) ayat 78:

أَقِمِ الصَّلَاةَ لِدُلُوكِ الشَّمْسِ إِلَى غَسِيقِ الْيَلِ وَقُرْءَانَ

الْفَجْرِ إِنَّ قُرْءَانَ الْفَجْرِ كَانَ مَشْهُودًا

Maksudnya: *Dirikanlah olehmu sembahyang ketika gelincir matahari hingga waktu gelap malam, dan (dirikanlah sembahyang subuh sesungguhnya sembahyang subuh itu adalah disaksikan (keistimewaananya). (78)*

4.2.3 Perkara-perkara Sunat dalam Solat Fardu

4.2.3.1 Sunat *Ab'ad*

Amalan yang termasuk dalam Sunat *Ab'ad* amat baik dikerjakan dan jika ditinggalkan sah solat tetapi disunatkan sujud sahwai.

Perkara-perkara Sunat *Ab'ad*:

- 1) Membaca tahiyat awal.
- 2) Membaca selawat pada tahiyat awal.
- 3) Membaca selawat keatas keluarga Nabi Muhammad SAW pada tahiyat akhir.
- 4) Membaca doa qunut pada Solat Subuh.

4.2.3.2 Sunat *Haiat*

Amalan yang termasuk dalam Sunat *Haiat* baik dikerjakan dan jika ditinggalkan sah solat dan tidak disunatkan sujud sahwai.

Perkara-perkara Sunat *Haiat*:

- 1) Mengangkat kedua tangan hingga setentang dengan kedua belah telinga:
 - (i) Mengangkat kedua tangan ketika takbiratulihram.
 - (ii) Mengangkat kedua tangan ketika rukuk.
 - (iii) Mengangkat kedua tangan ketika iktidal.
 - (iv) Mengangkat kedua tangan ketika berdiri sesudah bangun dari membaca tahiyat awal.

- 2) Meletakkan kedua tangan di bawah dada, tangan kanan memegang pergelangan tangan kiri, ketika berdiri membaca doa Iftitah, membaca Surah al-Fatihah dan membaca surah pilihan.
- 3) Membaca doa Iftitah sesudah takbiratulihram.
- 4) Membaca taawuz (*A'uzubillaahi minasy syaitoonir rojim*) ketika hendak membaca Surah al-Fatihah.
- 5) Menyebut “amin” selepas membaca Surah al-Fatihah.
- 6) Membaca surah atau ayat al-Quran pada rakaat yang pertama dan yang kedua.
- 7) Menguatkan suara bacaan al-Fatihah dan surah pada rakaat yang pertama dan yang kedua pada solat Maghrib, Isyak, dan Subuh selain makmum.
- 8) Mengucap takbir ketika beralih dari satu rukun ke satu rukun yang berupa perbuatan, seperti beralih dari berdiri kepada rukuk.
- 9) Mengucap “*sami'Allahu liman hamidah*” ketika bangkit dari rukuk dan membaca “*Rabbana lakal hamd*” setelah berdiri lurus.
- 10) Meletakkan kedua belah tangan di atas lutut ketika rukuk.
- 11) Membaca tasbih ketika rukuk dan sujud.
- 12) Meletakkan tangan kanan di atas paha kanan di lutut dan tangan kiri di atas paha kiri di lutut

ketika membaca tahiyyat, jari tangan kiri diluruskan dan jari tangan kanan digenggamkan selain jari telunjuk.

- 13) Jari telunjuk digerakkan sedikit ke atas ketika membaca "*illalAllah*" pada syahadah yang pertama.
- 14) Duduk Iftirasy pada setiap duduk solat iaitu duduk di atas telapak kaki kiri.
- 15) Duduk Tawaruk ketika duduk tahiyyat akhir iaitu duduk dgn kaki kiri di bawah kaki kanan dan telapak kaki kanan ditegakkan.
- 16) Memberi salam yang kedua.
- 17) Memalingkan muka sekali ke kanan dan ke kiri ketika memberi salam.

4.2.4 Halangan Solat Fardu

Solat fardu haram ditinggalkan kecuali ada halangan seperti berikut:

- 1) Tertidur.
- 2) Lupa.
- 3) Gila atau pengsan.
- 4) Haid atau nifas bagi perempuan.

4.2.5 Sujud Sahwi

4.2.5.1 Pengertian Sujud Sahwi

Sujud Sahwi bermaksud sujud yang perlu dilakukan oleh orang yang terlupa salah satu perbuatan dalam solat. Sujud sahwi dilakukan setelah tahiyyat akhir sebelum memberi salam dan hukumnya adalah sunat.

4.2.5.2 Sebab-sebab Sujud Sahwi

- 1) Terlupa menyempurnakan perkara-perkara sunat Ab'ad seperti doa qunut atau tahiyyat awal.
- 2) Meragui bilangan rakaat yang dilakukan.
- 3) Tidak sengaja melakukan perbuatan yang ditegah yang jika disengajakan akan membatalkan solat.
- 4) Memindahkan sesuatu perbuatan solat samada rukun atau sunat ab'ad atau surah yang dipindahkan kepada bukan tempatnya.

4.2.5.3 Cara Sujud Sahwi

Sujud 2 kali setelah selesai tahiyyat akhir sebelum salam.

1) Sujud pertama.

Selepas membaca selawat kepada baginda Nabi Muhammad SAW serta kepada Nabi Ibrahim AS pada tahiyyat akhir, maka sebelum memberi salam lakukan sujud sahwi yang pertama.

(i) **Sujud**



Gambar 40: Sujud Sahwi yang Pertama
Selepas Membaca Tahiyat Akhir dan
Sebelum Salam

(ii) **Baca doa seperti berikut:**

سُبْحَانَ مَنْ لَا يَنَامُ وَلَا يَسْنُهُوا (٣ كali)

*Subhana malla yanaamu walaa
yas-hu (3 kali)*

Bermaksud: *Maha Suci Tuhan yang tidak tidur dan tidak lupa*

Atau membaca seperti bacaan dalam sujud ketika solat:

سُبْحَانَ رَبِّي الْأَعْلَى وَبِحَمْدِهِ (٣ كali)

Subhana rabbiyal'ala wabihamdih (3 kali)

2) Duduk antara dua sujud.

Selepas sujud sahwı yang pertama hendaklah kita bangun daripada sujud tersebut dan duduk antara dua sujud.

(i) Duduk antara dua sujud



Gambar 41: Duduk Antara Dua Sujud
Selepas Sujud Sahwi yang Pertama

(ii) Baca doa seperti berikut:

رَبِّ اغْفِرْ لِي وَارْحَمْنِي وَاجْرُنِي وَارْفَعْنِي
وَارْزُقْنِي وَاهْدِنِي وَعَافِنِي وَاعْفُعْنِي

*Robbighfirli warhamni wajburni warfa'ni
warzuqni wahdini wa afini wa'fu'anni*

Bermaksud: “Tuhanku ampuni aku, dan kasihani aku, dan angkatlah darjatku, dan tutuplah aibku, dan berilah rezeki padaku, dan berilah petunjuk pada aku, dan maafkan aku.”

3) Sujud kedua.

Selepas duduk antara dua sujud hendaklah sujud kembali.

(i) Sujud



Gambar 42: Sujud Sahwi yang Kedua
Selepas Duduk Antara Dua Sujud dan
Sebelum Salam

(ii) Baca doa seperti berikut:

سُبْحَانَ مَنْ لَا يَنَامُ وَلَا يَسْهُوْا (٣ كali)

*Subhana malla yanaamu walaa
yas-hu” (3 kali)*

Bermaksud: *Maha Suci Tuhan yang tidak tidur dan tidak lupa*

Atau membaca seperti bacaan dalam sujud ketika solat:

سُبْحَانَ رَبِّيِ الْأَعْلَى وَبِحَمْدِهِ (۳ کali)

Subhana rabbiyal'ala wabihamdih
(3 kali)

4) Memberi salam.

Kemudian bangun dari sujud yang kedua dan seterusnya lakukan rukun solat yang ke-12 iaitu memberi salam.



Gambar 43: Memberi Salam

4.2.6 Cara Pelaksanaan Solat dengan Betul

Panduan ini disediakan secara ringkas tentang cara-cara mengerjakan solat dengan kaedah yang betul. Contoh yang akan dipaparkan adalah Solat Isyak dengan empat rakaat kerana dalam solat empat rakaat mengandungi Tahiyat Awal dan Tahiyat Akhir.

Tiada perbezaan yang ketara dalam pergerakan, perbuatan dan bacaan dalam solat sama ada Subuh, Zuhur, Asar, Maghrib atau Isyak. Perbezaannya hanya pada niat dan jumlah rakaat.

Hanya terdapat sedikit perbezaan pada Solat Maghrib iaitu pada Rakaat Ketiga selepas sujud yang kedua, hendaklah bangun dan terus melakukan rukun solat yang ke-sembilan iaitu tahiyat akhir.

Bagi Solat Subuh pula, terdapat penambahan semasa iktidal, iaitu penambahan bacaan doa Qunut yang akan dijelaskan di akhir penerangan.

Berikut adalah panduan yang disediakan secara ringkas tentang cara-cara mengerjakan solat dengan kaedah yang betul. Kesemua sebutan bacaan di dalam solat hendaklah dibaca hanya menggunakan sebutan di dalam Bahasa Arab. Segala terjemahan maksud ayat yang diberikan, adalah hanya sekadar memberi kefahaman tentang makna ayat yang telah dibaca:

Panduan Pelaksanaan Solat Isyak:

Rakaat Pertama

1) Berdiri betul



Gambar 44: Berdiri Tegak Menghadap Kiblat Sebelum Takbiratulihram, Pandangan Lurus Ketempat Sujud (Lelaki dan Perempuan Sama)



Gambar 45: Keadaan Kaki bagi Lelaki Direnggangkan



Gambar 46: Keadaan Kaki bagi Perempuan Dirapatkan

2) Niat

أُصَلِّي فَرْضَ الْعِشَاءِ أَرْبَعَ رَكْعَاتٍ أَدَاءً لِلَّهِ تَعَالَى

*Usalli Fardhal 'Isya'i Arba'a Raka'aatin Adaa-An Lillaahi
Ta'aala*

Maksudnya: Sahaja aku solat fardu isyak 4 rakaat tunai kerana Allah Taala.

3) Takbiratulihram

- Niat (*sahaja aku solat fardu isyak empat rakaat tunai kerana Allah Taala*) di dalam hati ketika mengangkat tangan sambil melafazkan Allahuakbar (Takbiratulihram).

Keterangan Gambar Berdiri Mengangkat Tangan bagi Takbiratulihram:

اللَّهُ أَكْبَرُ



Gambar 47: Cara angkat takbir bagi lelaki siku tidak rapat ke rusuk, maka cara mengangkat tangan ketika takbir (اللَّهُ أَكْبَرُ) ibu jari selari cuping telinga bahagian bawah



Gambar 48: Sedangkan bagi Perempuan Tangan Rapat Kerusuk, Maka Cara Mengangkat Tangan Ketika Takbir (اللَّهُ أَكْبَرُ) Hujung Jari Selari dengan Bahu

- 4) Berdiri Membaca Doa Iftitah, Membaca Surah Al-Fatihah dan Ayat atau Surah. Ilustrasinya lihat dalam gambar berikut:



Gambar 49: Berdiri Selepas Takbiratulihram dan Membaca Doa Iftitah pada Rakaat Pertama

a) **Bacaan doa Iftitah:**

اللَّهُ أَكْبَرُ كَيْرًا وَالْحَمْدُ لِلَّهِ كَثِيرًا وَسُبْحَانَ اللَّهِ بُكْرَةً
وَأَصِيلًا. وَجَهْتُ وَجْهِي لِلَّذِي فَطَرَ السَّمَاوَاتِ
وَالْأَرْضَ حَنِيفًا مُسْلِمًا وَمَا أَنَا مِنَ الْمُشْرِكِينَ. إِنَّ
صَلَاتِي وَشُكْرِي وَمُحْيَايَ وَمَمَاتِي لِلَّهِ رَبِّ الْعَالَمِينَ.
لَا شَرِيكَ لَهُ وَبِذِلِّكَ أُمِرْتُ وَأَنَا مِنَ الْمُسْلِمِينَ.

Maksudnya: Allah Maha Besar, segala puji bagi Allah. Maha Suci Allah pagi dan petang. Aku hadapkan mukaku kepada Tuhan yang menciptakan langit dan bumi, hal keadaannya

bersih dalam Islam. Tidaklah aku dari golongan orang-orang yang mensyirikkan Tuhan. Sesungguhnya sembahyangku, ibadahku, hidup dan matiku bagi Allah, Tuhan yang memiliki alam keseluruhannya. Tidak ada bersekutu denganNya sesuatu dan dengan demikian aku disuruh dan aku daripada golongan muslimin."

- b) Membaca surah al-Fatihah dan kemudiannya membaca surah pilihan ataupun ayat-ayat daripada surah di dalam al-Quran yang bersesuaian (bagi lelaki dan perempuan).

بِسْمِ اللَّهِ الرَّحْمَنِ الرَّحِيمِ ۝ أَلْحَمْدُ لِلَّهِ رَبِّ الْعَالَمِينَ
 الرَّحْمَنِ الرَّحِيمِ ۝ مَلِكِ يَوْمِ الدِّينِ ۝ إِيَّاكَ نَعْبُدُ
 وَإِيَّاكَ نَسْتَعِينُ ۝ أَهْدِنَا الصِّرَاطَ الْمُسْتَقِيمَ ۝ صِرَاطَ
 الَّذِينَ أَنْعَمْتَ عَلَيْهِمْ غَيْرِ الْمَغْضُوبِ عَلَيْهِمْ وَلَا الضَّالِّينَ



Maksudnya: Dengan nama Allah, Yang Maha Pemurah, lagi Maha Mengasihani. (1) Segala puji tertentu bagi Allah, Tuhan yang memelihara dan mentadbirkan sekalian alam. (2) Yang Maha Pemurah, lagi Maha Mengasihani. (3) Yang Menguasai pemerintahan hari Pembalasan (hari Akhirat). (4) Engkaualah sahaja (Ya Allah) Yang Kami sembah, dan kepada Engkaualah sahaja kami memohon pertolongan. (5) Tunjukilah kami jalan yang lurus. (6) Iaitu jalan orang-orang yang Engkau telah kurniakan nikmat kepada mereka, bukan (jalan) orang-orang yang Engkau telah murkai, dan bukan pula (jalan) orang-orang yang sesat. (7)

5) Rukuk Rakaat Pertama

- a) Bacaan takbir saat rukuk disebut *Takbiratul Intiqal* (takbir perpindahan atau pergerakan dalam solat). Takbir dengan lafaz (الله أكْبَرْ) dan terus rukuk seperti gambar berikut:



Gambar 50: Mengangkat Takbir Selepas Membaca Surah untuk Rukuk

- b) Sewaktu rukuk, bahagian belakang badan perlulah ditundukkan dengan lurus. Kedudukan siku pula lurus bagi lelaki. Manakala lengan dirapatkan ke rusuk bagi perempuan Kedudukan siku bagi perempuan.



Gambar 51: Keadaan Siku Tangan Ketika Rukuk Diluruskan bagi Lelaki



Gambar 52: Keadaan Siku Tangan Ketika Rukuk
Dirapatkan ke Rusuk bagi Perempuan

c) Membaca doa berikut (tiga kali):

سُبْحَانَ رَبِّ الْعَظِيمِ وَبِحَمْدِهِ

Subhaana robbiyal 'adziimi wabihamdih

Maksudnya: *Maha Suci Tuhan yang Maha Agung dan segala puji bagi-Nya*

6) Iktidal (Berdiri Semula Selepas Rukuk) Sambil Membaca Doa

- a) Berdiri dari rukuk dan angkat tangan (takbir). Ketika mengangkat kepala dari rukuk, sebutan (الله أكْبَرْ) digantikan dengan menyebut:

سَمِعَ اللَّهُ لِمَنْ حَمَدَهُ

Sami'allaahu liman hamidah

Maksudnya: Allah SWT Maha Mendengar orang yang memuji-Nya



Gambar 53: Bangun dari Rukuk Kemudian Mengangkat Takbir



Gambar 54: Bangun dari Rukuk (Iktidal) dan Diam Seketika (*Tumakniah*) Serta Arah Pandangan pada Tempat Sujud

- b) *Tumakniah* (Diam seketika) sebelum sujud serta membaca doa berikut:

رَبَّنَا وَلَكَ الْحَمْدُ

Robbanaa walakal hamdu

Maksudnya: *Wahai tuhan kami, dan segala puji hanya bagi-Mu.*

7) Sujud Rakaat Pertama Sambil Melafazkan Takbir *Intiqal*

اللَّهُ أَكْبَرُ

Sujud pertama di rakaat pertama. Bacaan ketika sujud adalah seperti berikut dan diulang tiga kali:

سُبْحَانَ رَبِّ الْأَعْلَمِ وَبِحَمْدِهِ

Subhaana robbiyal a'la wabihamdihi

Maksudnya: Maha Suci Tuhanku yang Maha tinggi dan segala puji bagi-Nya



Gambar 55: Hujung Jari Paras Mata Serta Siku Direnggangkan dari Badan bagi Sujud Lelaki



Gambar 56: Kedudukan Siku dan Tapak Tangan Dirapatkan ke Badan bagi Sujud Wanita

**8) Duduk Antara Dua Sujud Sambil Melafazkan Takbir
Intiqal** الله أكْبَرُ



Gambar 57: Duduk Antara Dua Sujud (Duduk Iftirasy)

Ketika Duduk *Iftirasy* hendaklah membaca doa berikut:

رَبِّ اغْفِرْ لِي وَارْحَمْنِي وَاجْبُرْنِي وَارْفَعْنِي وَارْزُقْنِي
وَاهْدِنِي وَعَافِنِي وَاعْفُعْنِي

*Robbighfirli warhamni wajburni warfa'ni
warzuqni wahdini wa afini wa'fu'anni*

Maksudnya : “Tuhanku ampuni aku, dan kasihani aku, dan angkatlah darjatku, dan tutuplah aibku, dan berilah rezeki padaku, dan berilah petunjuk pada aku, dan maafkan aku.”



Gambar 58: Duduk di Atas Tapak Kaki Kiri. Tapak Kaki Kanan Ditegakkan di Atas lantai dan Hujung Jari Kaki Menghadap ke Arah Kiblat



Gambar 59: Ketika Duduk, Tangan Diletakkan di Atas Peha dengan Hujung Jari Separas Lutut

9) Sujud yang Kedua Sambil Melafazkan Takbir Intiqal

اللَّهُ أَكْبَرُ

- (a) Sujud kedua di rakaat pertama didahului dengan takbir.



Gambar 60: Sujud Kedua Rakaat Pertama

- (b) Membaca doa seperti sujud pertama dan diulang tiga kali:

سُبْحَانَ رَبِّ الْأَعْلَىٰ وَبِحَمْدِهِ

Subhaana robbiyal a'la wabihamdih

Maksudnya: *Maha Suci Tuhanmu yang Maha tinggi dan segala puji bagi-Nya*

- (c) Bangun dari sujud kedua Sunat duduk seketika (*tumakninhah*) sebelum berdiri untuk meneruskan rakaat kedua. Berdiri sambil melafazkan Takbir :

الله أكْبَرُ



Gambar 61: Sunat Duduk Seketika (*Tumakninhah*) Sebelum Berdiri untuk Meneruskan Rakaat Kedua



Gambar 62: Berdiri Sambil Melafazkan Takbir dan Meneruskan Rakaat Kedua

Rakaat Kedua

10) Berdiri membaca Surah al-Fatiyah dan Surah lain selepasnya atau sebahagian ayat-ayat daripada surah di dalam al-Quran. Ilustrasinya lihat dalam gambar berikut:

(a) Berdiri rakaat kedua dan membaca Surah al-Fatiyah



Gambar 63: Berdiri bagi Meneruskan Rakaat Kedua

بِسْمِ اللَّهِ الرَّحْمَنِ الرَّحِيمِ ۖ ۱۰۱ الْحَمْدُ لِلَّهِ رَبِّ

الْعَالَمِينَ ۖ ۱۰۲ الْرَّحْمَنِ الرَّحِيمِ ۖ ۱۰۳ مَالِكِ يَوْمِ

الْقِيَامَ ۖ ۱۰۴ إِنَّا نَعْبُدُ وَإِنَّا نَسْتَعِينُ ۖ ۱۰۵

أَهْدِنَا الصِّرَاطَ الْمُسْتَقِيمَ ۖ ۱۰۶ صِرَاطَ الَّذِينَ

أَنْعَمْتَ عَلَيْهِمْ غَيْرِ الْمَغْضُوبِ عَلَيْهِمْ وَلَا

الضَّالِّينَ ۖ ۱۰۷

Maksudnya: *Dengan nama Allah, Yang Maha Pemurah, lagi Maha Mengasihani.* (1) Segala puji tertentu bagi Allah, Tuhan yang memelihara dan mentadbirkan sekalian alam. (2) Yang Maha Pemurah, lagi Maha Mengasihani. (3) Yang Menguasai pemerintahan hari Pembalasan (*hari Akhirat*). (4) Engkaulah sahaja (*Ya Allah*) Yang Kami sembah, dan kepada Engkaulah sahaja kami memohon pertolongan. (5) Tunjukilah kami jalan yang lurus. (6) Iaitu jalan orang-orang yang Engkau telah kurniakan nikmat kepada mereka, bukan (*jalan*) orang-orang yang Engkau telah murkai, dan bukan pula (*jalan*) orang-orang yang sesat. (7)

- (b) Kemudiannya membaca surah pilihan ataupun ayat-ayat daripada surah di dalam al-Quran yang bertepatan.

11) Rukuk Rakaat Kedua

- a) Bacaan takbir saat rukuk disebut *Takbiratul Intiqal* (takbir perpindahan atau pergerakan dalam solat). Takbir dengan lafaz (الله أكْبَرُ) dan terus rukuk seperti gambar berikut:



Gambar 64: Mengangkat Takbir Selepas Membaca Surah untuk Rukuk

- b) Sewaktu rukuk, bahagian belakang badan perlulah ditundukkan dengan lurus. Kedudukan siku pula lurus bagi lelaki. Manakala lengan dirapatkan ke rusuk bagi perempuan. Kedudukan siku bagi perempuan.



Gambar 65: Keadaan Siku Tangan Ketika Rukuk Diluruskan bagi Lelaki



Gambar 66: Keadaan Siku Tangan Ketika Rukuk Dirapatkan ke Rusuk bagi Perempuan

- c) Membaca doa berikut (tiga kali):

سُبْحَانَ رَبِّ الْعَظِيمِ وَبِحَمْدِهِ

Subhaana robbiyal ‘adziimi wabihamdih

Maksudnya: *Maha Suci Tuhanku yang Maha Agung dan segala puji bagi-Nya*

12) Iktidal (Berdiri Semula Selepas Rukuk) Sambil Membaca Doa

- a) Berdiri dari rukuk dan angkat tangan (takbir). Ketika mengangkat kepala dari rukuk, sebutan (الله أكْبَرْ) digantikan dengan menyebut:

سَمِعَ اللَّهُ لِمَنْ حَمَدَهُ

Sami'allaahu liman hamidah

Maksudnya: Allah SWT Maha Mendengar orang yang memuji-Nya



Gambar 67: Bangun dari Rukuk Kemudian Mengangkat Takbir



Gambar 68: Bangun dari Rukuk (Iktidal) dan Diam Seketika (*Tumakniah*) Serta Arah Pandangan pada Tempat Sujud

- b) *Tumakniah* (Diam seketika) sebelum sujud serta membaca doa berikut:

رَبَّنَا وَلَكَ الْحَمْدُ

Robbanaa walakal hamdu

Maksudnya: *Wahai tuhan kami, dan segala puji hanya bagi-Mu.*

13) Sujud Rakaat Pertama Sambil Melafazkan Takbir *Intiqal*

اللَّهُ أَكْبَرُ

Sujud pertama di rakaat pertama. Bacaan ketika sujud adalah seperti berikut dan diulang tiga kali:

سُبْحَانَ رَبِّ الْأَعْلَمِ وَبِحَمْدِهِ

Subhaana robbiyal a'la wabihamdihi

Maksudnya: Maha Suci Tuhan yang Maha tinggi dan segala puji bagi-Nya



Gambar 69: Hujung Jari Paras Mata Serta Siku
Direngangkan dari Badan bagi Lelaki



Gambar 70: Kedudukan Siku dan Tapak Tangan Dirapatkan ke Badan bagi Sujud Wanita

- 14) Duduk Antara Dua Sujud Sambil Melafazkan Takbir
Intiqal اللَّهُ أَكْبَرُ



Gambar 71: Duduk Antara Dua Sujud (Duduk Iftirasy)

Ketika Duduk *Iftirasy* hendaklah membaca doa berikut:

رَبِّ اغْفِرْ لِي وَارْحَمْنِي وَاجْبُرْنِي وَارْفَعْنِي وَارْزُقْنِي
وَاهْدِنِي وَعَافِنِي وَاعْفُعْنِي

*Robbighfirli warhamni wajburni warfa'ni
warzuqni wahdini wa afini wa'fu'anni*

Maksudnya : “Tuhanku ampuni aku, dan kasihani aku, dan angkatlah darjatku, dan tutuplah aibku, dan berilah rezeki padaku, dan berilah petunjuk pada aku, dan maafkan aku.”



Gambar 72: Duduk di Atas Tapak Kaki Kiri. Tapak Kaki Kanan Ditegakkan di Atas lantai dan Hujung Jari Kaki Menghadap ke Arah Kiblat



Gambar 73: Ketika Duduk, Tangan Diletakkan di Atas Peha dengan Hujung Jari Separas Lutut

15) Sujud yang Kedua Sambil Melafazkan Takbir Intiqal

اللَّهُ أَكْبَرُ

- (a) Sujud kedua di rakaat pertama didahului dengan takbir.



Gambar 74: Sujud Kedua Rakaat Kedua

- (b) Membaca doa seperti sujud pertama dan diulang tiga kali:

سُبْحَانَ رَبِّ الْأَعْلَىٰ وَبِحَمْدِهِ

Subhaana robbiyal a'la wabihamdih

Maksudnya: *Maha Suci Tuhanmu yang Maha tinggi dan segala puji bagi-Nya*

- (c) Bangun dari sujud kedua dan duduk tahiyyat awal sebelum berdiri untuk meneruskan rakaat ketiga. Bangun sambil melafazkan Takbir:

اللَّهُ أَكْبَرُ

16) Duduk Tahiyyat Awal

- a) Duduk Tahiyyat Awal selepas bangun dari sujud kedua dengan cara Duduk Iftirasy.



Gambar 75: Posisi Duduk Tahiyyat Awal Selepas Bangun dari Sujud Kedua dengan Cara Duduk *Iftirasy*



Gambar 76: Posisi Kaki bagi Duduk Antara Dua Sujud
(Duduk *Iftarsy*)

- b) Duduk di atas tapak kaki kiri. Tapak kaki kanan ditegakkan di atas lantai dan hujung jari kaki menghadap ke arah kiblat dan membaca lafaz Tahiyat Awal seperti berikut :

التَّحْيَاتُ الْمُبَارَكَاتُ الصَّلَوَاتُ الطَّيِّبَاتُ لِلَّهِ ،
السَّلَامُ عَلَيْكَ أَيُّهَا النَّبِيُّ وَرَحْمَةُ اللَّهِ وَبَرَكَاتُهُ ،
السَّلَامُ عَلَيْنَا وَعَلَى عِبَادِ اللَّهِ الصَّالِحِينَ ، أَشْهَدُ
أَنْ لَا إِلَهَ إِلَّا اللَّهُ ، وَأَشْهَدُ أَنَّ مُحَمَّدًا رَسُولُ اللَّهِ .

Attahiyyaatul Mubaarokaatus
Solawaatuth Thoyyibaatu Lillaah,
Assalaamu 'Alaika Ayyuhan Nabiyyu Wa
Rohmatullaahi Wa Barokaatuh,
Assalaamum 'Alainaa Wa 'Alaa
'Ibaadillaahis Soolihiin, Asyhadu Allaa
Ilaaha Illallah Wa Asyhadu Anna
Muhammadar Rosuulullah.

Maksudnya: Salam dan sejahtera, sembah bakti dan segala kebaikan bagi Allah. Salam atasmu wahai Nabi dan rahmat Allah dan keberkatanNya. Demikian pula mudah mudahan dianugerahkan kepada kita dan kepada segenap hamba-hambaNya yang soleh. Aku mengaku bahawa tidak ada Tuhan melainkan Allah. Dan aku mengaku bahawa Nabi Muhammad itu pesuruh Allah. Ya Allah berilah rahmat dan kesejahteraan kepada junjungan kita Nabi Muhammad

- c) Selepas membaca Tahiyat Awal, duduk seketika (*tumakninah*) sebelum berdiri untuk meneruskan rakaat ketiga. Bangun dengan disertakan lafadz Takbir:

اللَّهُ أَكْبَرُ



Gambar 77: Takbir bagi Lelaki Siku Tidak Rapat ke Rusuk, Maka Cara Mengangkat Tangan Ketika Takbir (اللَّهُ أَكْبَرُ)
Ibu Jari Selari Cuping Telinga Bahagian
Bawah



Gambar 78: Sedangkan bagi Perempuan Tangan Rapat Kerusuk, Maka Cara Mengangkat Tangan Ketika Takbir (الْحَمْدُ لِلّٰهِ رَبِّ الْعٰالَمِينَ) Hujung Jari Selari dengan Bahu

Rakaat Ketiga

- 17) Berdiri membaca Surah al-Fatihah. Ilustrasinya lihat dalam gambar berikut:



Gambar 79: Berdiri Selepas Takbiratulihram dan Membaca Doa Iftitah pada Rakaat Pertama

- a) Membaca surah al-Fatihah dan kemudiannya membaca surah pilihan ataupun ayat-ayat daripada surah di dalam al-Quran yang bersesuaian (bagi lelaki dan perempuan).

بِسْمِ اللَّهِ الرَّحْمَنِ الرَّحِيمِ ﴿١﴾ الْحَمْدُ لِلَّهِ رَبِّ

الْعَالَمِينَ ﴿٢﴾ الرَّحْمَنِ الرَّحِيمِ ﴿٣﴾ مَنِّا لِكَ يَوْمَ الدِّينِ

إِيَّاكَ نَعْبُدُ وَإِيَّاكَ نَسْتَعِينُ ﴿٤﴾ أَهْدِنَا الصِّرَاطَ

الْمُسْتَقِيمَ ﴿٥﴾ صِرَاطَ الَّذِينَ أَنْعَمْتَ عَلَيْهِمْ غَيْرِ

الْمَغْضُوبِ عَلَيْهِمْ وَلَا الضَّالِّينَ ﴿٦﴾

Maksudnya: Dengan nama Allah, Yang Maha Pemurah, lagi Maha Mengasihani. (1) Segala puji tertentu bagi Allah, Tuhan yang memeliha dan mentadbirkan sekalian alam. (2) Yang Maha Pemurah, lagi Maha Mengasihani. (3) Yang Menguasai pemerintahan hari Pembalasan (hari Akhirat). (4) Engkaulah sahaja (Ya Allah) Yang Kami sembah, dan kepada Engkaulah sahaja kami memohon pertolongan. (5) Tunjukilah kami jalan yang lurus. (6) Iaitu jalan orang-orang yang Engkau telah kurniakan nikmat kepada mereka, bukan (jalan) orang-orang yang Engkau telah murkai, dan bukan pula (jalan) orang-orang yang sesat. (7)

18) Rukuk Rakaat Ketiga

- a) Bacaan takbir saat rukuk disebut *Takbiratul Intiqal* (takbir perpindahan atau pergerakan dalam solat). Takbir dengan lafadz (أَكْبَرُ اللَّهُمَّ) dan terus rukuk seperti gambar berikut:



Gambar 80: Mengangkat Takbir Selepas Membaca Surah untuk Rukuk

- b) Sewaktu rukuk, bahagian belakang badan perlulah ditundukkan dengan lurus. Kedudukan siku pula lurus bagi lelaki. Manakala lengan dirapatkan ke rusuk bagi perempuan Kedudukan siku bagi perempuan.



Gambar 81: Keadaan Siku Tangan Ketika Rukuk Diluruskan bagi Lelaki



Gambar 82: Keadaan Siku Tangan Ketika Rukuk Dirapatkan ke Rusuk bagi Perempuan

- c) Membaca doa berikut (tiga kali):

سُبْحَانَ رَبِّ الْعَظِيمِ وَبِحَمْدِهِ

Subhaana robbiyal 'adziimi wabihamdih

Maksudnya: *Maha Suci Tuhanku yang Maha Agung dan segala puji bagi-Nya*

19) Iktidal (Berdiri Semula Selepas Rukuk) Sambil Membaca Doa

- a) Berdiri dari rukuk dan angkat tangan (takbir). Ketika mengangkat kepala dari rukuk, sebutan (الله أكْبَرْ) digantikan dengan menyebut:

سَمِعَ اللَّهُ لِمَنْ حَمَدَهُ

Sami'allaahu liman hamidah

Maksudnya: *Allah SWT Maha Mendengar orang yang memuji-Nya*



Gambar 83: Bangun dari Rukuk Kemudian Mengangkat Takbir



Gambar 84: Bangun dari Rukuk (Iktidal) dan Diam Seketika (*Tumakninaah*) Serta Arah Pandangan pada Tempat Sujud

- b) *Tumakninaah* (Diam seketika) sebelum sujud serta membaca doa berikut:

رَبَّنَا وَلَكَ الْحَمْدُ

Robbanaa walakal hamdu

Maksudnya: Wahai tuhan kami, dan segala puji hanya bagi-Mu.

20) Sujud Rakaat Pertama Sambil Melafazkan Takbir *Intiqal*

اللَّهُ أَكْبَرُ

Sujud pertama di rakaat pertama. Bacaan ketika sujud adalah seperti berikut dan diulang tiga kali:

سُبْحَانَ رَبِّ الْأَعْلَى وَبِحَمْدِهِ

Subhaana robbiyal a'la wabihamdihi

Maksudnya: Maha Suci Tuhanku yang Maha tinggi dan segala puji bagi-Nya



Gambar 85:Hujung Jari Paras Mata Serta Siku
Direngangkan dari Badan bagi Lelaki



Gambar 86: Kedudukan Siku dan Tapak Tangan Dirapatkan ke Badan bagi Sujud Wanita

21) Duduk Antara Dua Sujud Sambil Melafazkan Takbir Intiqal *اللَّهُ أَكْبَرُ*



Gambar 87: Duduk Antara Dua Sujud (Duduk *Iftirasy*)

Ketika Duduk *Iftirasy* hendaklah membaca doa berikut:

رَبِّ اغْفِرْ لِي وَارْحَمْنِي وَاجْبُرْنِي وَارْفَعْنِي وَارْزُقْنِي
وَاهْدِنِي وَعَافِنِي وَاعْفُعْنِي

*Robbighfirli warhamni wajburni warfa'ni
warzuqni wahdini wa afini wa'fu'anni*

Maksudnya : “Tuhanku ampuni aku, dan kasihani aku, dan angkatlah darjatku, dan tutuplah aibku, dan berilah rezeki padaku, dan berilah petunjuk pada aku, dan maafkan aku.”



Gambar 88: Duduk di Atas Tapak Kaki Kiri. Tapak Kaki Kanan Ditegakkan di Atas lantai dan Hujung Jari Kaki Menghadap ke Arah Kiblat



Gambar 89: Ketika Duduk, Tangan Diletakkan di Atas Peha dengan Hujung Jari Separas Lutut

22) Sujud yang Kedua Sambil Melafazkan Takbir Intiqal

اللَّهُ أَكْبَرُ

- (a) Sujud kedua di rakaat pertama didahului dengan takbir.



Gambar 90: Sujud Kedua Rakaat Pertama

- (b) Membaca doa seperti sujud pertama dan diulang tiga kali:

سُبْحَانَ رَبِّ الْأَعْلَىٰ وَبِحَمْدِهِ

Subhaana robbiyal a'la wabihamdih

Maksudnya: *Maha Suci Tuhanmu yang Maha tinggi dan segala puji bagi-Nya*

- (c) Bangun dari sujud kedua sunat duduk seketika (*tumakninhah*) sebelum berdiri untuk meneruskan rakaat kedua. Berdiri sambil melafazkan Takbir :

الله أكْبَرُ



Gambar 91: Sunat Duduk Seketika (*Tumakninhah*) Sebelum Berdiri untuk Meneruskan Rakaat Kedua



Gambar 92: Berdiri Sambil Melafazkan Takbir dan Meneruskan Rakaat Kedua

Rakaat Keempat

23) Berdiri membaca Surah al-Fatihah. Ilustrasinya lihat dalam gambar berikut:

(a) Berdiri rakaat keempat dan membaca Surah al-Fatihah



Gambar 93: Berdiri bagi Meneruskan Rakaat Keempat

بِسْمِ اللَّهِ الرَّحْمَنِ الرَّحِيمِ ﴿١﴾ أَلْحَمْدُ لِلَّهِ رَبِّ
الْعَالَمِينَ ﴿٢﴾ الرَّحْمَنِ الرَّحِيمِ ﴿٣﴾ مَنْ لِكَ يَوْمَ
الْدِينِ ﴿٤﴾ إِيَّاكَ نَعْبُدُ وَإِيَّاكَ نَسْتَعِينُ ﴿٥﴾
أَهْدِنَا الصِّرَاطَ الْمُسْتَقِيمَ ﴿٦﴾ صِرَاطَ الَّذِينَ
أَنْعَمْتَ عَلَيْهِمْ غَيْرَ الْمَغْضُوبِ عَلَيْهِمْ وَلَا
الْضَّالِّينَ ﴿٧﴾

Maksudnya: *Dengan nama Allah, Yang Maha Pemurah, lagi Maha Mengasihani. (1) Segala puji tertentu bagi Allah, Tuhan yang memelihara dan mentadbirkan sekalian alam. (2) Yang Maha Pemurah, lagi Maha Mengasihani. (3) Yang Menguasai pemerintahan hari Pembalasan (hari Akhirat). (4) Engkaulah sahaja (Ya Allah) Yang Kami sembah, dan kepada Engkaulah sahaja kami memohon pertolongan. (5) Tunjukilah kami jalan yang lurus. (6) Iaitu jalan orang-orang yang Engkau telah kurniakan nikmat kepada mereka, bukan (jalan) orang-orang yang Engkau telah murkai, dan bukan pula (jalan) orang-orang yang sesat. (7)*

24) Rukuk Rakaat Keempat

- a) Bacaan takbir saat rukuk disebut *Takbiratul Intiqal* (takbir perpindahan atau pergerakan dalam solat). Takbir dengan lafaz (الله أكْبَرُ) dan terus rukuk seperti gambar berikut:



Gambar 94: Mengangkat Takbir Selepas Membaca Surah untuk Rukuk

- b) Sewaktu rukuk, bahagian belakang badan perlulah ditundukkan dengan lurus. Kedudukan siku pula lurus bagi lelaki. Manakala lengan dirapatkan ke rusuk bagi perempuan. Kedudukan siku bagi perempuan.



Gambar 95: Keadaan Siku Tangan Ketika Rukuk Diluruskan bagi Lelaki



Gambar 96: Keadaan Siku Tangan Ketika Rukuk
Dirapatkan ke Rusuk bagi Perempuan

c) Membaca doa berikut (tiga kali):

سُبْحَانَ رَبِّ الْعَظِيمِ وَبِحَمْدِهِ

Subhaana robbiyal 'adziimi wabihamdih

Maksudnya: *Maha Suci Tuhanku yang Maha Agung dan segala puji bagi-Nya*

25) Iktidal (Berdiri Semula Selepas Rukuk) Sambil Membaca Doa

- a) Berdiri dari rukuk dan angkat tangan (takbir). Ketika mengangkat kepala dari rukuk, sebutan (الله أكْبَرْ) digantikan dengan menyebut:

سَمِعَ اللَّهُ لِمَنْ حَمَدَهُ

Sami'allaahu liman hamidah

Maksudnya: Allah SWT Maha Mendengar orang yang memuji-Nya



Gambar 97: Bangun dari Rukuk Kemudian Mengangkat Takbir



Gambar 98: Ilustrasi Bangun dari Rukuk (Iktidal) dan Diam Seketika (*Tumaknina*) Serta Arah Pandangan pada Tempat Sujud

- b) *Tumaknina* (Diam seketika) sebelum sujud serta membaca doa berikut:

رَبَّنَا وَلَكَ الْحَمْدُ

Robbanaa walakal hamdu

Maksudnya: Wahai tuhan kami, dan segala puji hanya bagi-Mu.

26) Sujud Rakaat Pertama Sambil Melafazkan Takbir *Intiqal*

اللَّهُ أَكْبَرُ

Sujud pertama di rakaat pertama. Bacaan ketika sujud adalah seperti berikut dan diulang tiga kali:

سُبْحَانَ رَبِّ الْأَعْلَى وَبِحَمْدِهِ

Subhaana robbiyal a'la wabihamdihi

Maksudnya: Maha Suci Tuhanku yang Maha tinggi dan segala puji bagi-Nya



Gambar 99: Hujung Jari Paras Mata Serta Siku
Direngangkan dari Badan bagi Lelaki



Gambar 100: Kedudukan Siku dan Tapak Tangan
Dirapatkan ke Badan bagi Sujud Wanita

**27) Duduk Antara Dua Sujud Sambil Melafazkan Takbir
Intiqal** الله أكْبَرُ



Gambar 101: Duduk Antara Dua Sujud (Duduk *Iftirasy*)

Ketika Duduk *Iftirasy* hendaklah membaca doa berikut:

رَبِّ اغْفِرْ لِي وَارْحَمْنِي وَاجْبُرْنِي وَارْفَعْنِي وَارْزُقْنِي
وَاهْدِنِي وَعَافِنِي وَاعْفُعْنِي

*Robbighfirli warhamni wajburni warfa'ni
warzuqni wahdini wa afini wa'fu'anni*

Maksudnya : “Tuhanku ampuni aku, dan kasihani aku, dan angkatlah darjatku, dan tutuplah aibku, dan berilah rezeki padaku, dan berilah petunjuk pada aku, dan maafkan aku.”



Gambar 102: Duduk di Atas Tapak Kaki Kiri. Tapak Kaki Kanan Ditegakkan di Atas lantai dan Hujung Jari Kaki Menghadap ke Arah Kiblat



Gambar 103: Ketika Duduk, Tangan Diletakkan di Atas Peha dengan Hujung Jari Separas Lutut

28) Sujud yang Kedua Sambil Melafazkan Takbir Intiqal

اللَّهُ أَكْبَرُ

- (a) Sujud kedua di rakaat keempat didahului dengan takbir.



Gambar 104: Sujud Kedua Rakaat Kedua

- (b) Membaca doa seperti sujud pertama dan diulang tiga kali:

سُبْحَانَ رَبِّ الْأَعْلَىٰ وَبِحَمْدِهِ

Subhaana robbiyal a'la wabihamdih

Maksudnya: *Maha Suci Tuhanmu yang Maha tinggi dan segala puji bagi-Nya*

- (c) Bangun dari sujud kedua dan terus duduk tahiyat akhir untuk meneruskan melaksanakan rukun solat yang kesembilan. Bangun sambil melafazkan Takbir :

اللَّهُ أَكْبَرُ

29) Duduk Tahiyat Akhir

- a) Posisi Duduk Tahiyat Akhir selepas bangkit dari sujud ke-2 daripada Rakaat Ke-4.
- b) Cara duduk adalah dengan Duduk *Tawaruk* iaitu: punggung didudukkan atas lantai.
- c) Kaki kiri di masukkan ke bawah kaki kanan.
- d) Kaki kanan ditegakkan di atas lantai.
- e) Hujung jari kaki kanan yang tegak itu menghadap kearah kiblat,



Gambar 105: Duduk Tahiyat Akhir dari Sisi Kanan



Gambar 106: Ilustrasi Tahiyat Akhir dan Punggung
Bahagian Kiri Rapat ke Lantai, Tapak Kaki Kiri
Ditegakkan

Posisi duduk tahiyat akhir yang disebut sebagai duduk *Tawaruk*.

Punggung duduk di atas lantai sementara kaki kiri dimasukkan ke bawah kaki kanan dan kaki kanan ditegakkan di atas lantai. Hujung jari kaki kanan menghadap kiblat sambil tangan diletakkan di atas peha dan jari selari dengan lutut.

30) Membaca Tahiyat Akhir

Bacaan Tahiyat Akhir:

الثَّحِيَّاتُ الْمُبَارَكَاتُ الصَّلَوَاتُ الطَّيِّبَاتُ لِلَّهِ . السَّلَامُ
عَلَيْكَ أَيُّهَا النَّبِيُّ وَرَحْمَةُ اللَّهِ وَبَرَكَاتُهُ، السَّلَامُ عَلَيْنَا
وَعَلَى عِبَادِ اللَّهِ الصَّالِحِينَ . أَشْهُدُ أَنْ لَا إِلَهَ إِلَّا اللَّهُ،
وَأَشْهُدُ أَنَّ مُحَمَّداً رَسُولَ اللَّهِ . اللَّهُمَّ صَلِّ عَلَى
مُحَمَّدٍ، وَعَلَى آلِ مُحَمَّدٍ . كَمَا صَلَّيْتَ عَلَى إِبْرَاهِيمَ،
وَعَلَى آلِ إِبْرَاهِيمَ وَبَارِكْ عَلَى مُحَمَّدٍ ، وَعَلَى آلِ
مُحَمَّدٍ . كَمَا بَارَكْتَ عَلَى إِبْرَاهِيمَ، وَعَلَى آلِ إِبْرَاهِيمَ.
فِي الْعَالَمِينَ إِنَّكَ حَمِيدٌ مَحِيدٌ.

Attahiyaatul mubaarakaaatus solawaatut thoyyibaatu Lillaah. Assalaamu 'alaika ayyuhan Nabiyyu wa rahmatullaahi wabarakaatuh, assalaamu 'alaina wa'alaa 'ibaadillaahis soolihiin. Asyhadu allaa ilaaha Illallaah, Wa asyhadu anna Muhammadar Rasuulullaah. Allaahumma Solli 'Alaa Muhammad, Wa 'Alaa Aali Muhammad. Kamaa sollaita alaa Ibraaheem, wa alaa Aali Ibraaheem. Wabaarik 'alaa Muhammad wa alaa Aali Muhammad. Kamaa baarakta alaa Ibraaheem, wa alaa Aali Ibraaheem. Fil 'aalamiina innaka hamiidum majiid.

Bermaksud: Salam dan sejahtera, sembah bakti dan segala kebaikan bagi Allah. Salam atasmu wahai Nabi dan rahmat Allah dan

keberkatanNya. Demikian pula mudah mudahan dianugerahkan kepada kita dan kepada segenap hamba-hambaNya yang soleh. Aku mengaku bahawa tidak ada Tuhan melainkan Allah. Dan aku mengaku bahawa Nabi Muhammad itu pesuruh Allah. Ya Allah berilah rahmat dan kesejahteraan kepada junjungan kita Nabi Muhammad dan keluarga Muhammad. Seperti apa yang telah Engkau anugerahkan kesejahteraan kepada Ibrahim dan keluarga Ibrahim. Dan berkatilah Muhammad dan keluarga Muhammad. Seperti yang Engkau berkat Ibrahim dan keluarga Ibrahim. Sesungguhnya Engkau Maha Terpuji lagi Maha Tinggi.

31) Memberi Salam dengan Mamalingkan Muka ke Kiri dan ke Kanan

- a) Memberi salam adalah penamat bagi pergerakan dan perbuatan dalam solat. Ia dilakukan sejurus selepas membaca tahiyyat akhir.



Gambar 107: Memberi Salam Pertama ke Kanan

- b) Ucapan ketika memberi salam ke kanan:

السَّلَامُ عَلَيْكُمْ وَرَحْمَةُ اللَّهِ

Assalaamu'alaikum Warohmatullaah

Bermaksud: *Semoga keselamatan dan rahmat Allah SWT limpahkan kepada kalian.*



Gambar 108: Memberi Salam Kedua ke Kiri

- c) Ucapan ketika memberi salam ke kiri:

السَّلَامُ عَلَيْكُمْ وَرَحْمَةُ اللَّهِ

Assalaamu'alaikum Warohmatullaah

Bermaksud: *Semoga keselamatan dan rahmat Allah SWT limpahkan kepada kalian.*

Demikian Ilustrasi solat fardu zuhur dalam format amali. Kesemua lima solat fardu adalah sama dari segi bacaan, pergerakan dan pengisian di setiap pergerakan, perbezaannya hanya pada niat bagi setiap solat fardu tersebut.

Pada solat fardu subuh penambahan bacaan Doa Qunut pada rakaat kedua yang dibaca selepas rukuk dalam posisi Iktidal.

32) Bacaan Doa Qunut dalam Solat Subuh

- a) Bacaan Qunut hanya terdapat pada Solat Subuh yang dibaca selepas bangun dari rukuk pada rakaat kedua. Tangan diangkat seperti berdoa ketika berdiri sebelum sujud seperti biasa.



Gambar 109: Berdiri Membaca Doa Qunut

Bacaan Doa Qunut yang Dimaksudkan adalah seperti berikut:

اللَّهُمَّ اهْدِنِي فِيمَنْ هَدَيْتَ، وَعَافِنِي فِيمَنْ عَافَيْتَ،
وَتَوَلَّنِي فِيمَنْ تَوَلَّتَ، وَبَارِكْ لِي فِيمَا أَعْطَيْتَ، وَقِنِي
شَرَّمَا قَضَيْتَ، فَإِنَّكَ تَقْضِي وَلَا يُقْضَى عَلَيْكَ،
وَإِنَّهُ لَا يَذِلُّ مَنْ وَالَّيْتَ، وَلَا يَعْزُزُ مَنْ عَادَيْتَ،
بَارِكْ رَبَّنَا وَتَعَالَيْتَ، فَلَكَ الْحَمْدُ عَلَى مَا
قَضَيْتَ، وَاسْتَغْفِرُكَ وَاتُّوبُ إِلَيْكَ، وَصَلَّى اللَّهُ
عَلَى سَيِّدِنَا مُحَمَّدٍ النَّبِيِّ الْأَمِيِّ وَعَلَى آلِهِ وَصَحْبِهِ
وَسَلَّمَ

Maksudnya: Ya Allah, berilah petunjuk kepadaku sebagaimana orang yang engkau beri petunjuk. Berikan kesihatan kepadaku sebagaimana orang yang telah Engkau beri kesihatan. Dan peliharakanlah aku seperti mana orang yang telah Engkau peliharakan. Berilah keberkatan dalam setiap perkara yang Engkau berikan. Dan selamatkanlah aku dari bahaya yang telah Engkau tentukan. Maka sesungguhnya, Engkaulah yang menghukum dan bukannya yang dihukum. Dan sesungguhnya tidak hina orang yang Engkau pimpin. Dan tidak mulia orang yang Engkau musuhi. Maha suci Engkau wahai Tuhan kami dan Maha Tinggi. Maka bagi Engkau segala pujian diatas apa yang Engkau hukumkan. Aku memohon ampun dari Mu dan aku

bertaubat kepada Mu. Dan semoga Allah mencurahkan rahmat dan sejahtera ke atas junjungan kami Nabi Muhammad SAW, dan ahli keluarganya, dan Sahabatnya,

Setelah selesai membaca Qunut, teruskan dengan lafaz takbir dan sujud untuk rakaat kedua yang juga rakaat terakhir bagi Solat Subuh.



Gambar 110: Mengangkat Tangan Ketika Membaca Doa Qunut

4.2.7 Solat Ketika Sakit

Solat ketika sakit adalah solat orang yang tidak mampu melakukan solat dengan *tamam* (sempurna) disebabkan masalah-masalah dan situasi keadaan tertentu yang dihadapi oleh pesakit.

4.2.7.1 Dalil Diwajibkan Solat Ketika Sakit

Ini berdasarkan sebuah hadis riwayat Imam al-Bukhari (1066) daripada Imran bin Husain RA beliau berkata: *Aku menghidap penyakit buasir lalu aku bertanya kepada Rasulullah S.A.W tentang solat. Baginda bersabda :*

صَلِّ قَائِمًا، فَإِنْ لَمْ تَسْتَطِعْ فَقَاعِدًا، فَإِنْ لَمْ
سَتَطِعْ فَعَلَى جُنْبٍ

Bermaksud: *Bersolatlah secara berdiri, jika tidak mampu lakukanlah secara duduk dan jika tidak mampu juga lakukanlah secara mengiring.*

4.2.7.2 Sebab Diwajibkan Solat Ketika Sakit

- 1) Solat Fardu merupakan Rukun Islam yang kedua.
- 2) Solat merupakan Syiar Islam (tiang agama).
- 3) Solat dapat mencegah seseorang daripada melakukan kemungkaran.
- 4) Solat sebagai penawar dan dapat membersihkan hati.

- 5) Merupakan kewajipan dan doa bagi memohon pertolongan Allah SWT ketika senang dan susah.
- 6) Supaya hidup dan mati dalam Iman.

4.2.7.3 Pengertian Rukhsah

Rukhsah ialah kemudahan atau keringanan atau kelonggaran atau keistimewaan yang dikurniakan Allah SWT kepada hamba-hamba-Nya dalam mengerjakan ibadat.

4.2.7.4 Perkara-perkara yang Menyebabkan Rukhsah dalam Solat Dapat Dilakukan.

Merujuk kepada kitab-kitab fekah para ulama terdahulu, terdapat beberapa perkara yang dianggap sebagai masyaqqah (kepayahan) yang membolehkan seseorang itu melaksanakan solat dengan keadaan dan situasi tertentu. Berikut dinyatakan beberapa contohnya:

- 1) Tidak mampu untuk berdiri betul.
- 2) Mempunyai penyakit yang akan bertambah teruk sekiranya dia bersolat secara *tamam* (sempurna).
- 3) Seseorang yang berada di atas kapal, sampan, ataupun perahu, yang berasa khuatir akan tenggelam sekiranya dia melakukan solat secara *tamam* (sempurna) di atas kenderaan tersebut.
- 4) Seseorang yang berasa pening kepala.
- 5) Sakit yang boleh mengganggu khusyuk di dalam solat.

4.2.7.5 Keadaan-keadaan yang Dibenarkan Solat untuk Orang Sakit

a) Solat sambil duduk.

- 1) Keadaan duduk adalah seperti duduk antara dua sujud.
- 2) Mengadap kiblat.
- 3) Niat, takbir, sujud dan duduk tahiyyat awal/akhir adalah sama seperti solat biasa.
- 4) Rukuk dilakukan dengan menundukkan kepala sehingga kedudukannya bertentangan dengan tempat sujud.
- 5) Iktidal pula dilakukan dengan mengangkat kepala tegak semula.
- 6) Sujud seperti biasa. Namun, jika tak mampu, bolehlah dengan menundukkan kepala rendah sedikit daripada tunduk ketika rukuk.
- 7) Orang yang solat duduk menjadi imam.

Seseorang yang melaksanakan solat secara duduk boleh menjadi imam, jika situasi keluarga melibatkan seorang ayah yang solat dalam keadaan duduk, dan dua orang lagi adalah isteri dan anak perempuan, maka boleh untuk ayah ini memimpin solat sebagai imam.

Meskipun begitu, sekiranya ada lelaki lain dalam keluarga seperti anak lelaki, maka yang lebih afdal adalah anak lelaki ini yang

menjadi imam solat kerana dia mampu untuk mendirikannya secara berdiri.

b) **Solat baring mengiring.**

- 1) Mengiring di atas rusuk kanan.
- 2) Muka dan dada mengadap kiblat.
- 3) Rukuk dan sujud dilakukan dengan cara menunjukkan isyarat kepala. Tundukkan kepala semasa rukuk, sementara sujud dilakukan dengan menundukkan kepala lebih rendah daripada ketika rukuk.
- 4) Jika tidak mampu, bolehlah menggunakan isyarat kelopak mata bagi rukuk, manakala sujud dengan isyarat menutup mata.

c) **Solat baring melentang.**

- 1) Baring melentang dan kakinya diluruskan ke arah kiblat.
- 2) Tinggikan sedikit kepala dengan menggunakan bantal (atau seumpamanya) supaya muka mengadap kiblat.
- 3) Rukuk dan sujud dengan isyarat kelopak mata seperti dalam suasana solat mengiring di atas.
- 4) Jika tidak terdaya, bolehlah rukuk dan sujud dengan cara lintasan (niat) di hati dengan mengingati setiap perbuatan dalam solat.
- 5) Tangan diangkat seperti biasa ketika takbir. Jika tidak berdaya, memadai dengan ucapan “*Allahu Akbar*” sahaja.

- d) **Solat secara melakukan isyarat kelopak mata.**
- 1) Berada dalam keadaan berbaring sambil terlentang.
 - 2) Kaki menghala ke arah kiblat.
 - 3) Rukuk dilakukan dengan menggerakkan kelopak mata, manakala sujud pula dilakukan dengan memejamkan mata.
- e) **Solat secara ingat di dalam hati.**

Melintaskan ingatan di dalam hati menurut tertib solat.

4.2.8 Tayamum bagi Orang Sakit

Mana-mana pesakit atau OKU yang tidak boleh bergerak sama ada disebabkan oleh sakit yang keterlaluan, sedang dalam rawatan atau mengalami kelumpuhan sedangkan pada ketika itu tiada orang yang boleh membantunya untuk berwuduk atau tayamum, maka mereka tetap dikehendaki untuk melakukan sembahyang menghormati waktu tanpa berwuduk atau tayamum, tanpa mengikut arah kiblat serta pergerakan sembahyang mengikut kemampuan.

4.2.8.1 Beberapa keadaan bagi tayamum untuk orang sakit

- a) **Bagi pesakit atau OKU (Orang Kurang Upaya) yang sebahagian muka yang tidak boleh kena air.**

Kaedah Pertama:

- 1) Berniat mengambil wuduk.
- 2) Membasuh pada kawasan muka yang boleh kena air manakala kawasan yang bertampal atau berbalut perlulah disapukan air di atasnya.
- 3) Melakukan tayamum untuk menggantikan kawasan muka yang tidak boleh kena air.
- 4) Membasuh kedua-dua tangan hingga ke siku, menyapu kepala dan membasuh kedua-dua kaki hingga ke buku lali dengan air.

Kaedah Kedua:

- 1) Bertayamum dahulu.
- 2) Berwuduk seperti biasa pada anggota yang boleh kena air manakala kawasan yang bertampal atau berbalut perlulah disapukan air di atasnya.

- b) **Bagi pesakit atau OKU (Orang Kurang Upaya) yang keseluruhan mukanya tidak boleh kena air dan debu.**

Kaedah Pertama:

Niat melakukan tayamum semasa mengangkat tangan untuk menyapu debu ke anggota tangan. Menyapu debu ke anggota tangan sehingga selesai.

Kaedah Kedua:

Niat melakukan wuduk ketika membasuh tangan. Membasuh kedua-dua tangan hingga ke siku, menyapu kepala serta membasuh kedua-dua kaki hingga ke buku lali.

- c) **Bagi pesakit atau OKU (Orang Kurang Upaya) yang tangannya tidak boleh kena air.**

Kaedah pertama:

- 1) Niat mengambil wuduk ketika membasuh muka.
- 2) Membasuh kawasan tangan yang boleh kena air manakala kawasan tangan yang berbalut atau bertampal perlulah disapu air diatasnya.
- 3) Melakukan tayamum.
- 4) Menyambung semula wuduk dengan menyapukan air ke kepala.
- 5) Membasuh kedua-dua kaki hingga ke buku lali.

Kaedah kedua:

- 1) Niat berwuduk ketika membasuh muka.
- 2) Melakukan tayamum dengan menyapu debu ke muka dan menyapu debu ke kedua-dua tangan hingga selesai.

3) Menyambung semula wuduk dengan membasuh kawasan tangan yang boleh kena air manakala kawasan tangan yang bertampal atau berbalut hendaklah di sapu air diatasnya.

4) Menyapu air ke kepala

5) Membasuh kedua-dua kaki hingga ke buku lali.

d) **Bagi pesakit atau OKU (Orang Kurang Upaya) yang kepalanya berbalut**

1) Berniat wuduk terlebih dahulu ketika membasuh muka.

2) Membasuh muka.

3) Membasuh kedua-dua tangan hingga ke siku.

4) Jika tiada sedikit pun ruang di kawasan kepala yang boleh disapu air, maka hendaklah dilakukan tayamum.

5) Menyambung semula wuduk dengan menyapu air di atas pembalut kepala.

6) Membasuh kedua-dua kaki hingga ke buku lali.

e) **Bagi pesakit atau OKU (Orang Kurang Upaya) yang kakinya berbalut atau tidak boleh kena air**

Kaedah pertama:

1) Berniat wuduk ketika membasuh muka.

2) Membasuh kedua-dua tangan hingga ke siku.

3) Menyapu kepala.

4) Melakukan tayamum.

5) Menyambung semula wuduk dengan membasuh kawasan kaki tidak berbalut/boleh kena air manakala kawasan

kaki yang berbalut hendaklah disapukan air di atasnya.

Kaedah kedua:

- 1) Berniat wuduk ketika membasuh muka.
- 2) Membasuh kedua-dua tangan hingga ke siku
- 3) Menyapu kepala
- 4) Membasuh kawasan kaki yang tidak berbalut/boleh kena air manakala kawasan kaki yang berbalut hendaklah disapukan air diatasnya.
- 5) Melakukan tayamum.

4.2.8.2 Situasi Qada Solat bagi Orang Sakit

- 1) **Solat menghormati waktu wajib dilakukan semula (Qada)** sebaik sahaja telah sembuh atau terdapat pembantu yang boleh membantu melakukan solat mengikut sebagaimana disyaratkan.
Sekiranya pesakit atau OKU (Orang Kurang Upaya) tersebut meninggal dunia sebelum mendapat peluang mengqada solat, maka ia dikira telah menunaikan kewajipan serta tidak berdosa.
- 2) Bagi pesakit atau OKU (Orang Kurang Upaya) yang **mukanya tidak boleh kena air**:
Sembahyang wajib diqadakan kerana muka adalah anggota tayamum yang tidak dapat disempurnakan.
- 3) Bagi pesakit atau OKU (Orang Kurang Upaya) yang **tangannya tidak boleh kena air**:
Sembahyang wajib diqada' kerana tangan adalah anggota wuduk dan tayamum yang tidak dapat disempurnakan.

- 4) Bagi pesakit atau OKU (Orang Kurang Upaya) yang **kepalanya tidak boleh kena air**:
Sembahyang tidak wajib diqada jika pembalutnya tidak meliputi had kepala yang memadai disapu.
- 5) Bagi pesakit atau OKU (Orang Kurang Upaya) yang **kakinya berbalut atau tidak boleh kena air**:
Sembahyang tidak wajib diqada jika pembalut itu tidak melebihi had yang diperlukan.
- 6) **Pesakit yang terbakar teruk atau sebahagiannya yang tidak boleh untuk berwuduk atau bertayamum** untuk menunaikan solat, ia terbahagi kepada dua:

Pertama:

Jika tempoh masanya panjang dan lama, wajib bagi dirinya untuk menunaikan solat tetapi tidak perlu untuk diqadakan. Ini adalah bersandarkan kepada pendapat yang dipilih oleh Imam Nawawi yang bersetuju kepada kata-kata daripada Imam al-Muzani yang menyatakan tidak perlu qada bagi mereka yang sakit kerana terhalang daripada bersuci (Kitab Taqrirat Sadidah).

Kedua:

Jika tempoh masanya adalah singkat, maka wajib bagi dirinya untuk menunaikan solat dan mengqadakannya semula, sebagaimana pendapat mu'tamad di dalam Mazhab Syafie.

4.2.9 Solat Fardu Secara Jamak dan Qasar

Solat fardu adalah tanggungjawab dan kewajipan bagi seseorang Muslim. Seperti yang diketahui bahwa solat fardu merupakan Rukun Islam yang kedua malah diumpamakan sebagai tiang agama. Islam diturunkan di muka bumi sebagai rahmat bagi semesta alam.

Hukum solat fardu secara jamak dan qasar adalah harus. Allah SWT telah memberikan kemudahan bagi umat Islam dalam menunaikan ibadah solat fardu. Contohnya adalah saat kita sedang bermusafir, setiap muslim telah diberikan keringanan dalam menjalankan solat fardu iaitu dengan menggabungkan (jamak) dan meringkaskan (qasar) solat fardu sehingga kita dapat bermusafir dengan tenang tanpa meninggalkan solat fardu tersebut.

4.2.9.1 Solat Jamak

Solat jamak ialah mengumpulkan dua solat fardu dalam satu waktu. Contoh menjamakkan solat fardu adalah seperti menghimpunkan solat fardu zuhur dengan solat fardu asar atau sebaliknya dan solat fardu maghrib dengan solat fardu isyak atau sebaliknya. Solat fardu subuh tidak dibenarkan untuk dijamak dengan mana-mana solat fardu lain. Hukum menjamak solat **adalah harus**.

Sebagaimana dalam hadis riwayat Imam al-Bukhari (1056), daripada Ibn Abbas RA berkata:

كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ يَجْمِعُ
بَيْنَ صَلَاةِ الظُّهُرِ وَالعَصْرِ إِذَا كَانَ عَلَى
ظُهُورِ سَيِّرٍ، وَيَجْمِعُ بَيْنَ الْمَغْرِبِ وَالْعِشَاءِ

Bermaksud: “Rasulullah SAW menjama’kan solat Zuhur dengan Asar ketika perjalanan (yakni bermusafir) dan menjama’kan solat Maghrib dengan Isya’.”

Solat secara jamak terbahagi kepada dua iaitu Jamak Takdim dan Jamak Takhirk.

a) Jamak Takdim

Jamak Takdim bermaksud menghimpunkan dua solat pada waktu solat pertama. Contoh solat fardu secara Jamak Takdim:

- 1) Solat Fardu Zuhur dijamakkan dengan solat fardu asar dalam waktu Solat Zuhur.
- 2) Solat fardu maghrib dijamakkan dengan solat Fardu Isyak dalam waktu Solat Maghrib.

Syarat-syarat sah melakukan solat fardu secara Jamak Takdim:

1) Niat

Jamak Takdim diniatkan pada waktu solat yang pertama.

2) Muwalah atau bergegera.

Solat Jamak antara dua solat tersebut tidak diselangi dengan waktu yang terlalu lama atau dengan sebarang solat sunat yang lain. Oleh itu, selepas sahaja salam, teruskan sahaja solat yang kedua dengan hanya diselangi oleh iqamat sahaja. (solat jamak dengan satu kali azan dan dua kali iqamat).

3) Masih menjadi musafir dan masih dalam perjalanan.

Solat Jamak boleh dilakukan apabila perjalanan yang dilakukan adalah dengan tujuan yang diharuskan oleh syarak. Apabila seseorang itu bermusafir untuk tujuan maksiat, maka ia tidak diharuskan untuk solat jamak dan qasar.

4) Tertib (Berturutan).

Jika musafir melakukan solat Jamak Takdim, maka perlulah dilaksanakan solat waktu yang pertama terlebih dahulu. Contohnya solat Jamak Takdim Zuhur dan Asar dalam waktu Zuhur, maka solat yang perlu didirikan dahulu adalah solat Zuhur. Begitu juga jika mengerjakan solat Jamak Takdim Magrib dan Isyak dalam waktu Maghrib, maka solat yang perlu didirikan dahulu adalah solat Maghrib.

**Lafaz Niat Solat Fardu Secara
Jamak Takdim:**

**Niat Jamak Takdim Solat Zuhur
dengan Solat Asar**

- 1) Lafaz niat Solat Zuhur:

أَصْلِي فَرْضَ الظُّهُرِ أَرْبَعَ رَكْعَاتٍ مَجْمُوعًا إِلَيْهِ الْعَصْرُ اللَّهُ تَعَالَى

*Usollii fardhoz zuhri arba'a roka'aatin majmuu'an ilaihi 'asri
Lillaahi Ta'aalaa.*

Bermaksud: "Sahaja aku solat fardu zuhur empat rakaat dihimpunkan Asar kepadanya kerana Allah Taala".

- 2) Lafaz niat Solat Asar:

أَصْلِي فَرْضَ الْعَصْرِ أَرْبَعَ رَكْعَاتٍ مَجْمُوعًا إِلَى الظُّهُرِ اللَّهُ تَعَالَى

*Usollii fardhol 'asri arba'a roka'aatin majmuu'an ilaz zuhri
Lillaahi Ta'aalaa.*

Bermaksud: "Sahaja aku solat fardu asar empat rakaat dihimpunkan kepada Zuhur kerana Allah Taala".

Niat Jamak Takdim Solat Maghrib dengan Solat Isyak

- 1) Lafaz niat Solat Jamak Maghrib:

أُصَلِّي فَرْضَ الْمَعْرِبِ ثَلَاثَ رَكْعَاتٍ مُجْمُوعًا إِلَيْهِ الْعِشَاءُ لِلَّهِ تَعَالَى

Usollii fardhol maghribi tsalaatsa roka'aatin majmuu'an ilaihil 'isyaa-i Lillaahi Ta'aalaa.

Bermaksud: "Sahaja aku solat fardu Maghrib tiga rakaat dihimpunkan isyak kepadanya kerana Allah Taala".

- 2) Lafaz niat Solat Jamak Isyak:

أُصَلِّي فَرْضَ الْعِشَاءِ أَرْبَعَ رَكْعَاتٍ مُجْمُوعًا إِلَى الْمَعْرِبِ لِلَّهِ تَعَالَى

Usollii fardhol 'isyaa-i arba'a roka'aatin majmuu'an ilal maghribi Lillaahi Ta'aalaa.

Bermaksud: "Sahaja aku solat fardu isyak empat rakaat dihimpunkan kepada maghrib kerana Allah Taala".

b) Jamak Takhir

Jamak Takhir bermaksud menghimpunkan dua solat pada waktu solat kedua. Contoh Solat fardu secara Jamak Takhir:

- 1) Solat fardu zuhur dijamakkan dengan solat fardu asar dalam waktu Solat Asar.
- 2) Solat fardu maghrib dijamakkan dengan Solat fardu isyak dalam waktu Solat Isyak.

Syarat-syarat sah melakukan solat fardu secara Jamak Takhir

- 1) **Telah Berniat Melakukan Jamak Takhir.**
Jamak Takhir diniatkan ketika masuk waktu solat yang pertama. Jika tidak berniat untuk solat Jamak Takhir ketika masuk waktu solat pertama, maka tidak sah solat Jamak Takhirknya. Contohnya jika ingin melakukan solat Jamak Takhir Zuhur dan Asar dalam waktu Asar, maka perlu diniatkan Jamak Takhir ketika waktu Zuhur.
- 2) **Muwalah atau bersegera.**
Solat Jamak antara dua solat tersebut tidak diselangi dengan waktu yang terlalu lama atau dengan sebarang solat sunat yang lain. Oleh itu, selepas sahaja salam, teruskan sahaja solat yang kedua dengan hanya diselangi oleh iqamat sahaja. (solat jamak dengan satu kali azan dan dua kali iqamat).

3) Masih menjadi musafir dan masih dalam perjalanan.

- (i) Solat Jamak boleh dilakukan apabila perjalanan yang dilakukan adalah dengan tujuan yang diharuskan oleh syarak. Apabila seseorang itu bermusafir untuk tujuan maksiat, maka ia tidak diharuskan untuk solat jamak dan qasar.
- (ii) Hendaklah berkekalan musafirnya itu sehingga diselesaikan solat yang kedua pada jamak takhirnya, tetapi sekiranya seseorang itu telah tiba di kawasan mukimnya semula sebelum selesai solat yang kedua jamak takhirnya, maka solat yang pertama dalam jamak takhirnya tadi, menjadi solat qada.

4) Tertib (Berturutan).

Jika musafir melakukan solat Jamak Takhir, maka perlulah dilaksanakan solat waktu yang kedua terlebih dahulu. Contohnya solat Jamak Takhir Zuhur dan Asar dalam waktu Asar, maka solat yang perlu didirikan dahulu adalah solat Asar. Begitu juga jika mengerjakan solat Jamak Takhir Magrib dan Isyak dalam waktu Isyak, maka solat yang perlu didirikan dahulu adalah Solat Isyak.

**Lafaz Niat Solat Fardu Secara
Jamak Takhir:**

**Niat Jamak Takhir Solat Asar
dengan Solat Zuhur**

- 1) Lafaz niat Solat Asar:

أُصَلِّي فِرْضَ الْعَصْرِ أَرْبَعَ رَكْعَاتٍ مُجْمُوعًا إِلَيْهِ الظَّهَرُ اللَّهُ تَعَالَى

*Usollii fardhol 'asri arba'a roka'aatin majmuu'an ilaihiz zuhri
Lillaahi Ta'aalaa.*

Bermaksud: "Sahaja aku solat fardu asar empat rakaat dihimpunkan zuhur kepadanya kerana Allah Taala".

- 2) Lafaz niat Solat Zuhur:

أُصَلِّي فِرْضَ الظَّهَرِ أَرْبَعَ رَكْعَاتٍ مُجْمُوعًا إِلَيَّ الْعَصْرِ اللَّهُ تَعَالَى

*Usollii fardhoz zuhri arba'a roka'aatin majmuu'an ilal 'asri
Lillaahi Ta'aalaa.*

Bermaksud: "Sahaja aku solat fardu zuhur empat rakaat dihimpunkan kepada asar kerana Allah Taala".

Niat Jamak Takhir Solat Isyak dengan Solat Maghrib

- 1) Lafaz niat Solat Jamak Isyak:

أَصَلِّي فَرْضَ الْعِشَاءِ أَرْبَعَ رَكَعَاتٍ مُّجْمُوعًا إِلَيْهِ الْمَعْرِبِ لِلَّهِ تَعَالَى

Usollii fardhol 'isyaa-i arba'a roka'aatin majmuu'an ilaihil maghribi Lillaahi Ta'aalaa.

Bermaksud: "Sahaja aku solat fardu isyak empat rakaat dihimpunkan maghrib kepadanya kerana Allah Taala".

- 2) Lafaz niat Solat Jamak Maghrib:

أَصَلِّي فَرْضَ الْمَعْرِبِ ثَلَاثَ رَكَعَاتٍ مُّجْمُوعًا إِلَى الْعِشَاءِ لِلَّهِ تَعَالَى

Usollii fardhol maghribi tsalaatsa roka'aatin majmuu'an ilal 'isyaa-i Lillaahi Ta'aalaa.

Bermaksud: "Sahaja aku solat fardu Maghrib tiga rakaat dihimpunkan kepada isyak kerana Allah Taala".

4.2.9.2 Solat Qasar

Solat Qasar bermaksud meringkaskan atau memendekkan rakaat solat fardu dari empat rakaat kepada dua rakaat seperti Solat Zuhur, Solat Asar dan Solat Isyak.

Tiada Solat fardu Qasar bagi Solat Subuh dan Solat Maghrib dan orang yang melakukan solat qasar tidak boleh berimamkan orang yang solat sempurna (*tamam*).

Hukum solat secara qasar adalah harus. Firman Allah SWT dalam Surah an-Nisaa' ayat 101:

وَإِذَا ضَرَبْتُمْ فِي الْأَرْضِ فَلَيْسَ عَلَيْكُمْ
جُنَاحٌ أَنْ تَقْصُرُوا مِنَ الْصَّلَاةِ إِنْ خِفْتُمْ
أَنْ يَفْتَنَكُمُ الَّذِينَ كَفَرُوا إِنَّ الْكُفَّارِينَ
كَانُوا لَكُمْ عَدُوًّا مُّبِينًا



Maksudnya: Dan apabila kamu musafir di muka bumi, maka kamu tidaklah berdosa "mengqasarkan" (memendekkan) sembahyang jika kamu takut diserang oleh orang-orang kafir. Sesungguhnya orang-orang kafir itu adalah musuh yang amat nyata bagi kamu. (101)

Dalam hadis riwayat Imam al-Bukhari (1081), daripada Anas bin Malik RA:

خَرَجْنَا مَعَ النَّبِيِّ صَلَّى اللَّهُ عَلَيْهِ وَسَلَّمَ مِنَ
الْمَدِينَةِ إِلَى مَكَّةَ فَكَانَ يُصَلِّي رَكْعَتَيْنِ
رَكْعَتَيْنِ حَتَّى رَجَعْنَا إِلَى الْمَدِينَةِ

Bermaksud: "Kami keluar bersama Nabi SAW dari Madinah ke Mekah, dan kami bersolat 2 rakaat, 2 rakaat, sehingga kami kembali ke Madinah"

Syarat-syarat solat fardu secara qasar:

- 1) Hendaklah pelayaran atau perjalanan itu diharuskan oleh syarak.
- 2) Jauh pelayaran atau perjalanan itu tidak kurang daripada dua marhalah (90)
- 3) Berniat qasar di dalam takbiratulihram.
- 4) Tidak berimam dengan orang yang solat tamam (sempurna)
- 5) Hendaklah solat yang diqasarkan itu terdiri dari solat empat rakaat.

**Lafaz Niat Solat Fardu Secara
Qasar:**

**Niat Qasar Solat Zuhur, Solat
Asar dan Solat Isyak**

- 1) Lafaz niat Solat Zuhur:

أَصَلِّي فَرْضَ الظُّهُرِ رَكْعَتَيْنِ قَصْرًا لِلَّهِ تَعَالَى

Usollii fardhoz zuhri rok'ataini qosron Lillaahi Ta'aalaa.

Bermaksud: "Sahaja aku solat fardu zuhur dua rakaat qasar kerana Allah Taala".

- 2) Lafaz niat Solat Asar:

أَصَلِّي فَرْضَ الْعَصْرِ رَكْعَتَيْنِ قَصْرًا لِلَّهِ تَعَالَى

Usollii fardhol 'asri rok'ataini qosron Lillaahi Ta'aalaa.

Bermaksud: "Sahaja aku solat fardu asar dua rakaat qasar kerana Allah Taala".

- 3) Lafaz niat Solat Isyak:

أَصَلِّي فَرْضَ الْعِشَاءِ رَكْعَتَيْنِ قَصْرًا لِلَّهِ تَعَالَى

Usallii fardol 'isyaa-i rok'ataini qosron lillaahi ta'aala

Bermaksud: "Sahaja aku solat fardu isyak dua rakaat qasar kerana Allah Taala".

4.2.9.3 Solat Jamak dan Qasar

Solat Jamak dan Qasar ialah menghimpunkan dua solat fardu dalam satu waktu disamping memendekkannya (memendekkan bilangan solat fardu empat rakaat menjadi dua rakaat).

**Lafaz Niat Solat Fardu Secara
Jamak Takdim dan Qasar:**

**Niat Jamak Takdim dan Qasar
Solat Zuhur dengan Solat Asar**

- 1) Lafaz niat Solat Zuhur:

أُصَلِّي فِرْضَ الظُّهُرِ رَكْعَتَيْنِ قَصْرًا مَجْمُوعًا إِلَيْهِ الْعَصْرُ لِلَّهِ تَعَالَى

*Usollii fardhoz zuhri rok'ataini qosron majmuu'an ilaihi 'asri
Lillaahi Ta'aalaa.*

Bermaksud: "Sahaja aku solat fardu zuhur dua rakaat qasar dihimpunkan Asar kepada kerana Allah Taala".

- 2) Lafaz niat Solat Asar:

أُصَلِّي فِرْضَ الْعَصْرِ رَكْعَتَيْنِ قَصْرًا مَجْمُوعًا إِلَى الظُّهُرِ لِلَّهِ تَعَالَى

*Usollii fardhol 'asri rok'ataini qosron majmuu'an ilaz zuhri
Lillaahi Ta'aalaa.*

Bermaksud: "Sahaja aku solat fardu asar dua rakaat qasar dihimpunkan kepada Zuhur kerana Allah Taala".

Niat Jamak Takdim dan Qasar Solat Maghrib dengan Solat Isyak

- 1) Lafaz niat Solat Maghrib:

أَصْلِي فَرْضَ الْمَعْرِبِ ثَلَاثَ رَكَعَاتٍ مُجْمُوعًا إِلَيْهِ الْعِشَاءِ لِلَّهِ
تَعَالَى

*Usollii fardhol maghribi tsalaatsa roka'aatin majmuu'an ilaihi
'isyaa-i Lillaahi Ta'aalaa.*

Bermaksud: "Sahaja aku solat fardu maghrib tiga rakaat dihimpunkan isyak kepadanya kerana Allah Taala".

- 2) Lafaz niat Solat Isyak:

أَصْلِي فَرْضَ الْعِشَاءِ رَكْعَتَيْنِ قَصْرًا مُجْمُوعًا إِلَى الْمَعْرِبِ لِلَّهِ تَعَالَى

*Usollii fardhol 'isyaa-i rok'ataini qosron majmuu'an ilal
maghribi Lillaahi Ta'aalaa.*

Bermaksud: "Sahaja aku solat fardu isyak dua rakaat qasar dihimpunkan kepada maghrib kerana Allah Taala".

**Lafaz Niat Solat Fardu Secara
Jamak Takhir dan Qasar:**

**Niat Jamak Takhir dan Qasar
Solat Asar dengan Solat Zuhur**

- 1) Lafaz niat Solat Asar:

أَصْلِي فِرْضَ الْعَصْرِ رَكْعَتَيْنِ قَصْرًا مُجْمُوعًا إِلَيْهِ الظَّهَرُ لِلَّهِ تَعَالَى

*Usollii fardhol 'asri rok'ataini qosron majmuu'an ilaihiz zuhri
Lillaahi Ta'aalaa.*

Bermaksud: "Sahaja aku solat fardu asar dua rakaat qasar dihimpunkan Zuhur kepadanya kerana Allah Taala".

- 2) Lafaz niat Solat Zuhur:

أَصْلِي فِرْضَ الظَّهَرِ رَكْعَتَيْنِ قَصْرًا مُجْمُوعًا إِلَيَّ الْعَصْرِ لِلَّهِ تَعَالَى

*Usollii fardhoz zuhri rok'ataini qosron majmuu'an ilal 'asri
Lillaahi Ta'aalaa.*

Bermaksud: "Sahaja aku solat fardu zuhur dua rakaat qasar dihimpunkan kepada Asar kerana Allah Taala".

**Niat Jamak Takhir dan Qasar
Solat Isyak dengan Solat
Maghrib**

- 1) Lafaz niat Solat Isyak:

أَصَلِّي فَرْضَ الْعِشَاءِ رَكْعَتَيْنِ قَصْرًا مَجْمُوعًا إِلَيْهِ الْمَغْرِبِ لِلَّهِ تَعَالَى

Usollii fardhol 'isyaa-i rok'ataini qosron majmuu'an ilaihi maghribi Lillaahi Ta'aalaa.

Bermaksud: "Sahaja aku solat fardu isyak dua rakaat qasar dihimpunkan maghrib kepadanya kerana Allah Taala".

- 2) Lafaz niat Solat Maghrib:

أَصَلِّي فَرْضَ الْمَغْرِبِ ثَلَاثَ رَكْعَاتٍ مَجْمُوعًا إِلَيْهِ الْعِشَاءِ لِلَّهِ
تَعَالَى

*Usollii fardhol maghribi tsalaatsa roka'aatin majmuu'an ilal
'isyaa-i Lillaahi Ta'aalaa.*

Bermaksud: "Sahaja aku solat fardu maghrib tiga rakaat dihimpunkan kepada isyak kerana Allah Taala".

4.2.9.4 Jarak Solat Jamak dan Qasar

- 1) Perjalanan seseorang musafir itu hendaklah ditentukan dan diketahui destinasi tujuannya. Jika tidak di ketahui destinasi perjalanan tersebut, maka tidak dibolehkan melakukan jamak atau qasar.
- 2) Solat Jamak dan Qasar boleh dilakukan apabila perjalanan seorang musafir tidak kurang daripada 60 batu atau 92 kilometer.

Secara amnya, Ukuran 1 marhalah = 2 barid = 24 mil hasyimi (8 farsakh). 1 mil = 1000 depa . Satu depa = empat hasta. Satu hasta = 46.656 cm. Ini bermakna satu depa = 186.624 cm (46.656×4). Maka 1 mil = 6000 ribu hasta bersamaan 186.624 cm (1866.24 meter atau 1.866 km) atau 24 jari melintang. Oleh itu, satu marhalah = 24 mil = 44789.76 meter atau bersamaan 44.790 km. maka dua marhalah = 89580 meter (lebih kurang 89-90 km).

- 3) Apabila seseorang itu kembali semula ke kawasan permulaan musafirnya, maka tidak lagi dibolehkan untuk mengerjakan solat secara jamak dan qasar.

TEMPOH SOLAT JAMAK & QASAR



Rajah 111: Jarak dan Tempoh Perjalanan yang Membolehkan Solat Fardu Secara Jamak dan Qasar

4.2.9.5 Perkiraan Sebagai Musafir

Permulaan musafir dikira setelah seseorang itu keluar dari kawasan, sama ada melepas sungai, parit, kota sempadan atau melalui kawasan yang tidak ada bangunan lagi. Akhir musafir ialah apabila seseorang itu kembali semula ke kawasan permulaan musafirnya.

Apabila seseorang itu bermusafir dan berniat berhenti pada satu tempat selama tiga hari, maka dibolehkan melakukan jamak dan qasar. Tiga hari itu tidak termasuk hari sampai dan hari keluar tetapi sekiranya dia hendak berhenti di situ selama 4 hari atau lebih maka putuslah permusafirannya.

4.2.9.6 Persoalan Berkaitan Solat Jamak dan Qasar

- 1) Jika berlaku kes maknum tidak mengetahui niat imam sama ada qasar atau tamam.**

Terdapat tiga pilihan:

- (i) Maknum berniat qasar, kemudian jika didapati imam solat tamam, maknum hendaklah menukar niat kepada niat tamam dan niat qasarnya menjadi lagha (tidak terpakai).
- (ii) Maknum berniat tamam, jika didapati imam solat qasar, maknum hendaklah menambah bilangan rakaat yang tidak cukup bagi mencukupkannya.
- (iii) Maknum melakukan taklik niat, iaitu seperti berikut, “Jika imam ini solat qasar, maka aku solat qasar, jika dia solat tamam maka

aku solat tamam". Niat yang ditaklikkan ini adalah sah menurut pendapat paling sahih dalam Mazhab Syafie. Makmum hendaklah solat seperti mana yang dia niatkan berdasarkan kepada apa yang dipastikan daripada perbuatan imamnya (sama ada qasar atau tamam).

2) Terlupa Rakaat ketika Solat Qasar dan Bangun untuk Rakaat Ketiga.

Jika dia teringat yang dia telah tertambah rakaat ketiga, maka dia hendaklah segera turun dan duduk semula ke rakaat kedua dan sujud sahwai pada akhir solat sebelum memberi salam kerana terlupa. Masalah ini sama seperti orang yang solat tamam (zuhur) yang terlupa dan menambah rakaat hingga ke rakaat kelima.

3) Tempoh berturut-turut (muwalat) dalam Jamak Takdim atau Jamak Takhir

Jika jarak waktu antara dua solat itu pendek (berdasarkan adat kebiasaan atau uruf), ia tidak membatalkan jamak. Contohnya jangka masa yang diambil untuk azan, iqamat, bersuci, mengambil wuduk, mencari air yang tidak lama dan sebagainya.

4) Jarak waktu yang membatalkan muwalat.

Contohnya seperti pengsan, lupa yang lama (dari segi uruf). Manakala ada yang menyatakan jarak waktu yang tidak membatalkan muwalat adalah tidak lebih daripada dua rakaat solat.

4.2.10 SOLAT JUMAAT

4.2.10.1 Pengenalan

- 1) Solat Jumaat ditunaikan pada hari Jumaat menggantikan Solat Zuhur.
- 2) Solat Jumaat dikerjakan di masjid dan wajib dikerjakan secara berjemaah dengan sekurang-kurangnya 40 orang yang tinggal secara tetap di kawasan itu.
- 3) Solat Jumaat mestilah didahului dengan dua khutbah dan diikuti dengan solat dua rakaat.
- 4) Solat Jumaat wajib bagi setiap lelaki Muslim yang sudah baligh dan tidak wajib ke atas perempuan.
- 5) Solat Jumaat juga tidak wajib sekiranya dalam keadaan musafir.

4.2.10.2 Hukum dan Dalil Pensyariatan Solat Jumaat

Hukum menghadiri solat jumaat adalah wajib bagi lelaki sekiranya tiada sebarang keuzuran. Manakala bagi wanita pula, tidaklah diwajibkan menurut kesepakatan ulama.

Sebagaimana dalam hadis riwayat Imam Muslim (438), daripada Abdullah bin Umar RA dan Abu Hurairah RA:

أَكْتُمَا سَمِعًا رَسُولَ اللَّهِ صَلَّى اللَّهُ عَلَيْهِ وَسَلَّمَ ، يَقُولُ عَلَى أَعْوَادِ مِنْبَرِهِ :
الَّيَتَتَهِيَّئُنَّ أَقْوَامٌ ، عَنْ وَدْعِهِمُ الْجُمُعَاتِ ،
أَوْ لَيَخْتِمَنَّ اللَّهُ عَلَى قُلُوبِهِمْ ، ثُمَّ لَيَكُونُنَّ
مِنَ الْغَافِلِينَ ."

Bermaksud: Bahawasanya mereka berdua mendengar Rasulullah SAW bersabda di atas anak tangga mimbarnya, "Hendaklah para jemaah berhenti dari meninggalkan solat jumaat atau Allah benar-benar mengunci (menutup) hati-hati mereka, kemudian mereka benar-benar termasuk dalam kalangan orang yang lalai".

4.2.10.3 Cara Mengerjakan Solat Jumaat

Setelah selesai khatib membaca dua khutbah, maka didirikan Solat Jumaat dengan dua rakaat secara berjemaah.

(1) Rakaat Pertama

1) Niat

Lafaz niat Solat Jumaat sebagai maknum:

أُصَلِّي فَرْضَ الْجُمُعَةِ رَكْعَتَيْنِ (إِمَامًا / مَأْمُومًا) لِلَّهِ تَعَالَى

*Usalli Fardhal Jum'ati Rak'ataini
(Imaan/Makmuuman) Lillaahi Ta'aala*

Maksudnya: "Sahaja aku solat fardu Jumaat dua rakaat sebagai (imam/maknum) kerana Allah Ta'ala"

- 2) Mengangkat takbiratulihram beserta niat di dalam hati.
- 3) Baca doa iftitah, selesai doa tersebut, maknum diam seketika sehingga imam habis membaca surah al-Fatihah.
- 4) Maknum mengucapkan amin secara serentak setelah imam selesai membaca surah alfatihah.
- 5) Maknum membaca Surah al Fatihah dengan suara yang perlahan sementara imam membaca surah pilihan.
- 6) Setelah imam selesai membaca surah pilihan dan maknum selesai membaca surah alfatihah, maka diteruskan solat

dengan mengikut pergerakan imam bermula dari rukuk, iktidal, sujud, duduk antara dua sujud, dan sujud kedua.

Perlu diingatkan sebagai makmum tidak dibolehkan untuk mendahului pergerakan imam di dalam solat.

(2) Rakaat Kedua

- 1) Selepas bangun dari rakaat pertama, makmum berdiri dan mendengar bacaan Surah al-Fatihah oleh imam.
- 2) Makmum mengucapkan amin secara serentak setelah imam selesai membaca Surah al-Fatihah.
- 3) Makmum membaca Surah al Fatihah dengan suara yang perlahan sementara imam membaca surah pilihan.
- 4) Setelah imam selesai membaca surah pilihan dan makmum selesai membaca Surah al-Fatihah, maka diteruskan solat dengan mengikut pergerakan imam bermula dari rukuk, iktidal, sujud, duduk antara dua sujud, dan sujud kedua.
- 5) Bangun dari sujud kedua dan duduk tahiyyat akhir
- 6) Setelah imam memberi salam, makmum juga perlu turut memberi salam.

Setelah selesai solat dengan sempurna, amat digalakkan makmum kekal duduk dan mengikuti imam bertasbih, bertahmid, bertakbir dan berdoa bersama.

4.2.10.4 Syarat Wajib Solat Jumaat

Berikut adalah beberapa syarat yang mewajibkan seseorang itu untuk mengerjakan Solat Jumaat:

- 1) Beragama Islam.
- 2) Baligh.
- 3) Merdeka.
- 4) Berakal.
- 5) Lelaki.
- 6) Tiada keuzuran atau halangan.
- 7) Bermukim atau bermastautin di kawasan yang didirikan Solat Jumaat. (tidak wajib bagi orang yang bermusafir)

4.2.10.5 Syarat Sah Solat Jumaat

- 1) Tempat mendirikan Solat Jumaat hendaklah disuatu tempat yang telah ditetapkan oleh pihak berkuasa seperti masjid, dewan, padang dan sebagainya.
- 2) Didirikan pada waktu Zuhur pada hari Jumaat.
- 3) Mestilah secara berjemaah dengan sekurang-kurangnya 40 orang yang bermastautin (tinggal tetap) di kawasan itu.
- 4) Tidak ada kumpulan lain yang mendahului atau melakukan Solat Jumaat di dalam

kawasan yang sama. Maksudnya, tidak boleh mendirikan dua Solat Jumaat dalam satu kawasan, walaupun di masjid yang berlainan, kecuali jika mendapat ketetapan oleh pihak berkuasa.

- 5) Didahului dengan dua khutbah.

4.2.10.6 Amalan Sunat pada Hari Jumaat

Antara amalan sunat untuk mereka yang menunaikan Solat Jumaat iaitu:

- 1) Mandi Sunat sebelum pergi ke masjid, sebaik-baiknya ketika hendak berangkat ke masjid.
- 2) Memakai pakaian yang bersih, elok dan kemas, seeloknya berwarna putih.
- 3) Memakai wangi-wangian.
- 4) Memotong kuku, merapikan misai, mencabut bulu ketiak, mencukur bulu ari-ari dan bersugi.
- 5) Hadir awal ke masjid dengan tujuan mendapatkan saf hadapan.
- 6) Perbanyakkan berselawat, berzikir, bersedekah dan berdoa. Pada hari Jumaat terdapat waktu mustajab untuk berdoa iaitu berdoa diantara dua khutbah (antara khutbah pertama dan khutbah kedua).

4.2.10.7 Adab Ketika Mendengar Khutbah

Memberi perhatian pada khutbah yang disampaikan oleh khatib. Makruh menggunakan telefon bimbit atau benda-benda lain termasuk tasbih ketika khatib sedang berkhutbah.

Berdasarkan hadis yang diriwayatkan oleh Imam al-Bukhari RA (934), daripada Abu Hurairah RA, bahawa Nabi SAW bersabda:

إِذَا قُلْتَ لِصَاحِبِكَ يَوْمَ الْجُمُعَةِ:
أَنْصِتْ، وَإِلَيْهِمْ يَنْخُطُبُ، فَقَدْ لَغَوْتَ

Bermaksud: “Jika kamu berkata kepada sahabatmu pada hari Jumaat: Diam dan ketika itu imam sedang berkhutbah, maka sesungguhnya kamu telah lagha (melakukan perkara yang sia-sia)”.

Dalam hadis riwayat Imam Muslim (857), daripada Abu Hurairah RA, bahawa Nabi SAW bersabda:

وَمَنْ مَسَّ الْحَصَى فَقَدْ لَغَ

Bermaksud: “Barangsiapa yang memegang (bermain) batu maka sesungguhnya dia telah lagha”.

Makna lagha adalah perbuatan atau percakapan yang sia-sia atau tidak ada faedah.

4.2.10.8 Golongan yang Tidak Wajib Solat Jumaat

- 1) Wanita.
- 2) Kanak-kanak yang belum baligh.
- 3) Orang yang bermusafir sebelum terbit fajar hari Jumaat. Tetapi sekiranya mereka ingin mengerjakannya maka Solat Jumaat mereka sah dan tidak perlu lagi mendirikan Solat Zuhur pada hari itu.
- 4) Hamba.
- 5) orang yang sakit atau tidak waras.

4.2.10.9 Permasalahan Berkaitan Solat Jumaat

Berikut adalah antara permasalahan yang lazim berlaku ketika Solat Fardu Jumaat:

1) Solat Jumaat untuk orang yang musafir.

Apabila bermusafir selepas terbit fajar hari Jumaat, wajib untuknya menunaikan Solat Jumaat sama ada ketika masih dalam perjalanan atau sudah tiba di tempat yang dituju. Sebaliknya apabila musafir sebelum terbit fajar hari Jumaat, maka tidak wajib untuknya menunaikan Solat Jumaat. Bagaimanapun, sekiranya mereka mengerjakannya, itu adalah lebih utama.

2) Solat Jumaat untuk orang yang bermukim.

Orang yang bermukim ialah orang yang tinggal di suatu tempat lebih dari tempoh musafir iaitu empat hari empat malam, tetapi

tidak berniat untuk menetap di situ. Seperti orang yang datang kerana bermula, belajar dan sebagainya. Mereka wajib menunaikan Solat Jumaat, tetapi tidak boleh dikira sebagai bilangan ahli Jumaat. Iaitu mereka dikecualikan dari bilangan 40 orang ahli Jumaat yang diwajibkan.

3) Solat Jumaat untuk orang yang bermastautin.

Orang yang bermastautin ialah orang yang tinggal tetap di sesuatu tempat, sama ada dilahirkan di situ atau sudah membeli tanah atau rumah atau menyewa rumah dan menetap di tempat itu. Mereka wajib Solat Jumaat dan mereka dikira sebagai bilangan ahli Jumaat.

4) Makmum masbuk dalam Solat Jumaat.

Untuk makmum masbuk, perlu mengikut imam sekurang-kurangnya sempat membaca surah al-Fatihah dan rukuk bersama imam dalam rakaat kedua. Sekiranya tidak sempat rukuk bersama Imam dalam rakaat kedua, dikira tidak dapat bersolat Jumaat pada hari itu.

5) Hukum solat ketika Khutbah Jumaat.

Apabila khatib sedang berkhutbah di atas mimbar, maka diharamkan untuk solat walaupun solat itu adalah solat qada kecuali solat sunat tahiyyatul masjid dan diwajibkan untuk meringankan (mempercepatkan) solat tahiyyatul masjid itu dan tidak boleh menambah dua rakaat lagi selain daripada solat sunat tahiyyatul masjid.

BAB 3

SOLAT FARDU (FARDU KIFAYAH)

4.3 SOLAT FARDU (FARDU KIFAYAH)

4.3.1 Solat Fardu Secara Berjemaah

4.3.1.1 Pengertian Solat Jemaah

Pengertian dari Segi Bahasa: Solat secara berkumpul atau bersama-sama.

Pengertian dari Segi Istilah: Solat secara berkumpul atau bersama-sama yang dilakukan oleh dua orang atau lebih yang diketuai oleh seorang imam dan diikuti oleh maknum dengan mengikut syarat-syarat tertentu.

4.3.1.2 Dalil-dalil Solat Secara Berjemaah

Firman Allah SWT dalam al-Quran, Surah an-Nisaa' (4) ayat 102:

وَإِذَا كُنْتَ فِيهِمْ فَأَقِمْتَ لَهُمُ الصَّلَاةَ ...



Maksudnya: Dan apabila engkau (wahai Muhammad) berada dalam kalangan mereka (semasa perang), lalu engkau mendirikan sembahyang dengan (menjadi imam) mereka ... (102)

Dalam Kitab *Mughni Al-Muhtaj Ila Ma'rifah Alfaz al-Minhaj* (1/350), Imam al-Khatib asy-Syarbini menyatakan :

"Perintah ini diturunkan ketika waktu perang, maka sudah semestinya lebih utama dilakukan ketika dalam keadaan aman."

Dalil lain akan hal itu adalah sunat berdasarkan hadis riwayat Imam al-Bukhari (613)

عَنْ عَبْدِ اللَّهِ بْنِ عُمَرَ ، أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ قَالَ : "صَلَاةُ الْجَمَاعَةِ تَفْضُلُ صَلَاةَ الْفَدِّيْعِ بِسِعْيٍ وَعِشْرِينَ دَرَجَةً ."

Bermaksud: Daripada 'Abdullah bin 'Umar, bahawasanya Rasulullah SAW bersabda: "Solat jemaah lebih afdal daripada solat bersendirian dengan dua puluh tujuh darjah (bagi orang yang solat berjemaah)".

Dalam hadis lain riwayat Imam Muslim (1504):

صَلَاةُ الْجَمَاعَةِ أَفْضَلُ مِنْ صَلَاةِ أَحَدِكُمْ وَحْدَهُ
بِخَمْسَةِ وَعِشْرِينَ جُرْعَاءً

Bermaksud: "Solat secara berjemaah lebih baik daripada solat kalian yang secara bersendirian sebanyak 25 bahagian."

4.3.1.3 Hukum Solat Fardu Secara Berjemaah

Hukum solat berjemaah ialah Fardu Kifayah ke atas lelaki yang merdeka, bermukim dan tiada uzur syarie (yang dibenarkan syarak).

Demikian itu, wajib mendirikan solat berjemaah sekurang-kurangnya di sebuah masjid di dalam sesuatu kariah untuk menzahirkan syiar Islam dalam kalangan ahli kariah di kawasan tersebut.

Sekiranya telah mendirikan solat berjemaah sekurang-kurangnya di sebuah masjid dalam sebuah kariah oleh sebahagian penduduk, maka telah memadai dan terselamat ahli kariah yang lain daripada menanggung dosa.

Walau bagaimanapun, tuntutan solat berjemaah tidak gugur ke atas sebilangan penduduk (yang meninggalkannya) dan hukumnya makruh bagi mereka meninggalkan solat berjemaah.

4.3.1.4 Kedudukan Imam dan Makmum Ketika Solat Berjemaah



Gambar 112: Kedudukan Solat Secara Berjemaah

4.3.1.5 Niat Solat Fardu Secara Berjemaah

1) Solat Fardu Subuh

أُصَلِّي فَرْضَ الصُّبْحِ رَكْعَتَيْنِ (إِمَامًا/مَأْمُومًا) لِلَّهِ تَعَالَى

*Usolli fardhos subhi rok'ataini
(imaaman/makmuuman) Lillaahi Ta'aalaa*

Bermaksud: Sahaja aku solat fardu subuh dua rokaat (Imam/Maknum) kerana Allah Taala.

2) Solat Fardu Zuhur

أُصَلِّي فَرْضَ الظُّهِيرَ أَرْبَعَ رَكْعَاتٍ (إِمَامًا/مَأْمُومًا) لِلَّهِ تَعَالَى

*Usolli fardhoz zuhri arba'a roka'aatin
(imaaman/makmuuman) Lillaahi Ta'aalaa*

Bermaksud: Sahaja aku solat fardu zuhur empat rokaat (Imam/Maknum) kerana Allah Taala.

3) Solat Fardu Asar

أُصَلِّي فَرْضَ الْعَصْرِ أَرْبَعَ رَكْعَاتٍ (إِمَامًا/مَأْمُومًا) لِلَّهِ تَعَالَى

*Usolli fardhol 'asri arba'a roka'aatin
(imaaman/makmuuman) Lillaahi Ta'aalaa*

Bermaksud: Sahaja aku solat fardu asar empat rokaat (Imam/Makmum) kerana Allah Taala.

4) **Solat Fardu Maghrib**

أَصْلَى فَرْضَ الْمَعْرِبِ ثَلَاثَ رَكْعَاتٍ (إِمَامًا/مَأْمُومًا)
لِلَّهِ تَعَالَى

*Usolli fardhol maghribi tsalaatsa roka'aatin
(imaaman/makmuuman) Lillaahi Ta'aalaa*

Bermaksud: Sahaja aku solat fardu maghrib tiga rokaat (Imam/Makmum) kerana Allah Taala.

5) **Solat Fardu Isyak**

أَصْلَى فَرْضَ الْعِشَاءِ أَرْبَعَ رَكْعَاتٍ (إِمَامًا/مَأْمُومًا) لِلَّهِ
تَعَالَى

*Usolli fardhol 'isyaa-i arba'a roka'atin
(imaaman/makmuuman) Lillaahi Ta'aalaa*

Bermaksud: Sahaja aku solat fardu subuh dua rokaat (Imam/Makmum) kerana Allah Taala.

4.3.1.6 Jenis Makmum Muafik

a) Makmum Muafik

- 1) Makmum yang mempunyai masa yang cukup bersama imam membaca Surah al-Fatihah.

b) Situasi Makmum Muafik

- 1) Imam telak rukuk. Disamping itu, makmuk muafik hendaklah menghabiskan dahulu bacaan Surah al-Fatihah.
- 2) Jika belum habis bacaan Surah al-Fatihah, makmum diberikan uzur sehingga tiga rukun yang panjang (untuk menghabiskan bacaan Surah al-Fatihah):
 - (1) Rukuk
 - (2) Sujud Pertama
 - (3) Sujud Kedua

Iktidal dan duduk antara dua sujud (duduk *iftirasy*) adalah rukun pendek.

- 3) Jika makmum masih belum rukuk dan imam sudah melepassi tiga rukun yang panjang tersebut, maka makmum tersebut boleh memilih:
 - (1) Mengikut perbuatan imam pada waktu itu, rakaat tersebut tidak dikira, namun perlu ditambah rakaat tersebut (kerana rakaat tersebut tidak dikira) selepas imam memberi salam.

- (2) Makmum tersebut perlu niat mufaraqah (berpisah iaitu tidak lagi mengikut imam)
- 4) Jika makmum tidak memilih salah satu dari dua pilihan tersebut, maka batallah solat makmum tersebut.

Ketahuilah bahawa cara ini tidak terpakai kepada makmum yang waswas dan makmum yang berada dalam Solat Fardu Jenazah.

4.3.1.7 Jenis Makmum Masbuk

- a) **Makmum Masbuk**
- 1) Makmum yang ketinggalan, tidak mendapat masa yang cukup untuk membaca al-fatihah bersama-sama imam.
 - 2) Menurut Mazhab Syafie, situasi masbuk boleh berlaku dalam setiap rakaat.

b) **Situasi Makmum Masbuk**

- 1) Imam sedang rukuk. Disamping itu, makmum terus mengangkat takbir serta niat
- 2) Kemudian Berdiri sebentar (kadar bacaan *subhanallah*) dan terus rukuk bersama-sama imam.

c) **Bacaan Surah al-Fatihah bagi Makmum Masbuk**

1) **Makmum dapat berhenti bersama imam semasa rukuk**

Tidak perlu membaca Surah al-Fatihah kerana bacaan Surah al-Fatihahnya ditanggung oleh imam.

2) **Makmum dapat berdiri bersama imam (tempoh masa singkat)**

Bacalah Surah al-Fatihah sekadar yang sempat dan terus mengikut imam dengan syarat dapat berhenti bersama imam dalam rukuk rakaat tersebut.

d) **Cara Duduk Tahiyat**

Hendaklah duduk mengikut rakaat yang dia berada ketika itu. Jika rakaat kedua atau ketiga, hendaklah dia duduk dalam keadaan duduk *iftirasy* (duduk tahiyat awal) walaupun imam sedang duduk *tawaruk* (duduk tahiyat akhir).

e) **Bacaan Tahiyat**

Berkenaan bacaan tahiyat, makmum masbuk boleh membaca sehingga akhir bacaan tahiyat.

4.3.2 Solat Jenazah

4.3.2.1 Pendahuluan

Jenazah orang Islam yang telah sempurna dimandikan dan dikafankan wajib disolatkan sebelum dikebumikan. Rasulullah SAW pernah mengarahkan sahabat-sahabatnya untuk solat jenazah apabila ada kematian.

Solat jenazah dilakukan oleh orang hidup ke atas orang yang sudah meninggal dunia untuk meringankan bebananya. Ini kerana dalam solat ini mengandungi banyak doa yang kesemuanya kembali untuk kebaikan arwah.

Ambillah pengajaran daripada setiap kematian yang berlaku. Jangan hanya melihat dengan pandangan kosong, pandanglah dengan penuh keinsafan dan carilah hikmah disebaliknya kerana cepat atau lambat semua yang hidup sudah harus bersedia mengikut jejaknya.

Oleh sebab itu apabila berlaku kematian dituntut kepada kita untuk menguruskannya, terutamanya jika si mati adalah saudara-mara terdekat. Dirikanlah dengan ikhlas, penuh khusyuk serta berharap pengampunan Allah SWT kepada arwah. Inilah sebenarnya tujuan utama Solat Jenazah dilakukan.

4.3.2.2 Hukum Solat Jenazah

Hukum Solat Jenazah adalah Fardu Kifayah bagi umat Islam. Solat Jenazah sunat dilakukan secara berjemaah dan sah apabila dibuat seorang diri.

Hal ini diceritakan dalam hadis riwayat Imam Muslim (944), daripada Abu Hurairah RA bahawa Rasulullah SAW bersabda:

أَسْرِعُوا بِالْجَنَازَةِ فَإِنْ تَكُنْ صَالِحَةً فَخَيْرٌ
تُفَدِّمُونَهَا عَلَيْهِ وَإِنْ تَكُنْ عَيْرُ ذَلِكَ فَشَرٌّ
تَضَعُونَهُ عَنْ رِقَابِكُمْ

Bermaksud: Segerakanlah dengan jenazah. Sekiranya dia merupakan jenazah yang soleh, nescaya dia merupakan suatu kebaikan yang kamu hantarkan ia padanya. Namun sekiranya dia tidak soleh, maka itu suatu keburukan yang kamu pikul di atas bahu-bahu kamu.

Dalam hadis riwayat Imam Muslim (948), daripada Ibn Abbas RA beliau berkata bahawa Rasulullah SAW bersabda:

مَا مِنْ رَجُلٍ مُسْلِمٍ يَمُوتُ فَيُقُومُ عَلَى
جَنَازَتِهِ أَرْبَعُونَ رَجُلًا لَا يُشْرِكُونَ بِاللَّهِ شَيْئًا
إِلَّا شَعْعَمُ اللَّهُ فِيهِ

Bermaksud: *Tidak ada seorang lelaki muslim yang meninggal dunia, kemudian terdapat empat puluh orang lelaki yang tidak mensyirikkan Allah dengan sesuatu pun mendirikan solat jenazah ke atasnya, melainkan Allah akan memberikan syafaat dari mereka buat dirinya (jenazah tersebut).*

4.3.2.3 Rukun Solat Jenazah

- 1) Niat
- 2) Berdiri tegak (bagi yang mampu). Solat Jenazah dilakukan tidak ada rukuk dan sujud. Tidak ada azan dan iqamat sebelum memulakan Solat Jenazah.
- 3) Takbir empat kali termasuk takbiratulihram.
- 4) Membaca surah al-Fatihah selepas takbir yang pertama.
- 5) Selawat kepada Nabi SAW selepas takbir kedua.
- 6) Berdoa untuk jenazah selepas takbir yang ketiga.
- 7) Memberi salam selepas takbir keempat.

4.3.2.4 Perkara Sunat Dalam Solat Jenazah

- 1) Mengangkat kedua-dua belah tangan ketika bertakbir.
- 2) Membaca semua bacaan dengan suara rendah.
- 3) Membahagikan ahli jemaah sekurang-kurangnya kepada tiga saf.

4.3.2.5 Kedudukan Jenazah dalam Solat

- a) Kedudukan jenazah bagi lelaki:
 - 1) Jenazah perlu diletakkan melintang di hadapan Imam.
 - 2) Imam dan maknum menghadap kiblat.
 - 3) Kedudukan kepala jenazah disebelah kiri.
 - 4) Imam berada di hadapan pada kedudukan bahu kanan jenazah.
- b) Kedudukan jenazah bagi perempuan:
 - 1) Jenazah perlu diletakkan melintang di hadapan Imam.
 - 2) Imam dan maknum menghadap kiblat.
 - 3) Kedudukan kepala jenazah disebelah kanan.
 - 4) Imam berada di hadapan pada kedudukan pinggang kiri jenazah.

KEDUDUKAN SOLAT JENAZAH



Gambar 113: Kedudukan Imam, Maknum dan Jenazah Ketika Solat Jenazah

4.3.2.6 Orang yang Layak (*afdal*) Menjadi Imam Solat Jenazah

Menurut Mazhab Syafie waris kepada si mati lebih utama menjadi imam untuk solat jenazah, kerana solat jenazah adalah doa untuk si mati. Doa kaum kerabat dan waris adalah lebih mudah dimakbulkan Allah SWT.

Susunannya bagi orang yang layak (*afdal*) menjadi Imam Solat Jenazah seperti berikut:

- 1) Bapa.
- 2) Datuk dan ke atas.
- 3) Anak lelaki.
- 4) Cucu dan ke bawah.
- 5) Saudara lelaki seibu sebapa.
- 6) Saudara lelaki sebapa.
- 7) Anak lelaki saudara seibu sebapa.
- 8) Anak lelaki saudara seibu.
- 9) Seterusnya mengikut tertib *asobah* (waris) dalam ilmu faraid.

4.3.2.7 Solat Jenazah Ghaib

Dalam hadis riwayat Imam al-Bukhari (1188) dan Imam Muslim (951), daripada Abu Hurairah RA:

أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ نَعَى
النَّجَاشِيَّ فِي الْيَوْمِ الَّذِي مَاتَ فِيهِ، حَرَجَ
إِلَى الْمُصَلَّى، فَصَفَّ بِهِمْ وَكَبَرَ أَرْبَعًا

Bermaksud: “Sesungguhnya Rasulullah SAW memberitahu akan berita kematian al-Najasyi ketika hari kematianya. Baginda SAW keluar ke ruang solat, membuat saf dan bertakbir sebanyak empat kali.”

Dalam hadis riwayat Imam al-Bukhari (1317), daripada Jabir bin Abdillah RA berkata:

أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ صَلَّى
عَلَى النَّجَاشِيِّ، فَكُنْتُ فِي الصَّفَّ الْثَّانِي
أَوِ الْثَّالِثِ

Bermaksud: “Bahawa Rasulullah SAW solat ke atas al-Najashi dan aku berada pada saf kedua atau ketiga”.

b) Waktu dibolehkan Solat Jenazah Ghaib.

Menurut Imam Ibn Hajar al-Asqalani, solat jenazah ghaib boleh dilakukan bermula dari saat berita kematian dan berlanjutan selama tiga hari.

Ini kerana tiga hari itu adalah tempoh bertakziah menurut yang maklum dari kitab-kitab fiqh. Namun pendapat yang muktamad adalah harus solat jenazah ghaib selama mana beliau adalah ahli solat ketika kematian berlaku.

c) Antara syarat solat jenazah ialah:

- 1) Solat jenazah ghaib dilakukan di negeri yang berlainan dengan keberadaan mayat.
- 2) Solat jenazah ghaib tersebut dilaksanakan setelah dimandikan mayat tersebut.

4.3.2.8 Hal Solat Jenazah oleh Wanita Tanpa Lelaki

Harus bagi Wanita solat jenazah, bahkan disyariatkan kepada kaum wanita melakukan solat jenazah sebagaimana disyariatkan kepada kaum lelaki, boleh dilakukannya sama ada dirumah atau di masjid.

Dalam hadis riwayat Imam Muslim (973), daripada Aisyah RA:

أَنَّهَا لَمَّا تُؤْفَىٰ سَعْدُ بْنُ أَبِي وَقَاصٍ أَرْسَلَ
أَزْوَاجُ النَّبِيِّ صَلَّى اللَّهُ عَلَيْهِ وَسَلَّمَ، أَنْ يَمْرُوا
بِجَنَازَتِهِ فِي الْمَسْجِدِ، فَيُصَلِّيَنَّ عَلَيْهِ، فَفَعَلُوا
فَوَقَفَ بَهْ عَلَىٰ حُجْرَهُنَّ يُصَلِّيَنَّ عَلَيْهِ

Bermaksud: Tatkala Saad bin Abi Waqqas RA meninggal dunia, isteri-isteri Nabi SAW mengutuskan mereka (kaum lelaki) membawa jenazah ke dalam masjid supaya mereka (para isteri Nabi SAW) melakukan solat jenazah, lalu jenazah diberhentikan di bilik-bilik mereka untuk mereka turut solat ke atasnya.

Ia menunjukkan harus bagi wanita untuk melakukan solat jenazah sama ada di rumah atau di masjid. Selain daripada itu, jenazah Rasulullah turut disolatkan oleh sahabat lelaki dan wanita. Ia didahulukan oleh lelaki kemudian wanita dan kanak-kanak.

Majlis Fatwa al-Azhar mengharuskan kaum wanita melakukan solat jenazah, sama ada bersendirian atau berjemaah kerana tiada dalil yang melarang.

4.3.2.9 Cara Niat Solat Jenazah

Lafaz Niat untuk Solat Jenazah Lelaki

أَصَلِّي عَلَى هَذَا الْمَيِّتِ أَرْبَعَ تَكْبِيرَاتٍ فَرْضَ الْكِفَائِيَةِ
(إِنَّمَا/مَأْمُومًا) لِلَّهِ تَعَالَى

*Usalli 'Ala Haazal Mayyiti Arba'a Takbiiraatin
Fardhal Kifaayati (Imaan / Makmuuman)
Lillaahi Ta'alaa*

Bermaksud: “Sahaja aku solat ke atas jenazah lelaki ini empat kali takbir fardu kifayah (menjadi imam / makmum) kerana Allah Taala”.

Lafaz Niat untuk Solat Jenazah Perempuan

أَصَلِّي عَلَى هَذِهِ الْمَيِّتَةِ أَرْبَعَ تَكْبِيرَاتٍ فَرْضَ الْكِفَائِيَةِ
(إِنَّمَا/مَأْمُومًا) لِلَّهِ تَعَالَى

*Usalli 'Ala Haazihil Mayyitati Arba'a Takbiiraatin
Fardhal Kifaayati (Imaan / Makmuuman)
Lillaahi Ta'alaa*

Bermaksud: “Sahaja aku solat ke atas jenazah perempuan ini empat kali takbir fardu kifayah (menjadi imam / makmum) kerana Allah Taala”.

Lafaz Niat untuk Solat Jenazah Kanak-kanak Lelaki

أَصَّلِي عَلَى هَذَا الْمُبْتَدِي الطِّفْلِ أَرْبَعَ تَكْبِيرَاتٍ فَرِضَ
كِفَايَةً (إِمَامًا/مَأْمُومًا) لِلَّهِ تَعَالَى

*Usalli 'Ala Haazal Mayyiti Thifli Arba'a
Takbiiraatin Fardhal Kifaayati (Imaaman /
Makmuuman) Lillaahi Ta'aalaa*

Bermaksud: “Sahaja aku solat ke atas jenazah kanak lelaki ini empat kali takbir fardu kifayah (menjadi imam / makmum) kerana Allah Taala”.

Lafaz Niat untuk Solat Jenazah Kanak -kanak Perempuan

أَصَّلِي عَلَى هَذِهِ الْمُبْتَدِي الطِّفْلَةِ أَرْبَعَ تَكْبِيرَاتٍ فَرِضَ
كِفَايَةً (إِمَامًا/مَأْمُومًا) لِلَّهِ تَعَالَى

*Usalli 'Ala Haazihil Mayyitatit Thiflati Arba'a
Takbiiraatin Fardhal Kifaayati (Imaaman /
Makmuuman) Lillaahi Ta'aalaa*

Bermaksud: “Sahaja aku solat ke atas jenazah kanak perempuan ini empat kali takbir fardu kifayah (menjadi imam / makmum) kerana Allah Taala”.

Lafaz Niat Solat untuk Jenazah yang Ramai (Lelaki/Perempuan)

أُصْلَى عَلَى هُؤُلَاءِ الْمَوْتَى أَرْبَعَ تَكْبِيرَاتٍ فَرْضَ الْكِفَايَةِ
(إِمَامًا / مَأْمُومًا) لِلَّهِ تَعَالَى

*Usalli 'Ala Haa-ulaa-il Mauta Arba'a Takbiiraatin
Fardhal Kifaayati (Imaaman / Makmuuman)
Lillaahi Ta'aalaa*

Bermaksud: “Sahaja aku solat ke atas jenazah-jenazah ini empat kali takbir fardu kifayah (menjadi Imam / maknum) kerana Allah Taala”.

Lafaz Niat Solat untuk Jenazah Ghaib Lelaki

أُصْلَى عَلَى الْمَيِّتِ (فُلَان) الْعَائِبِ أَرْبَعَ تَكْبِيرَاتٍ فَرْضَ
كِفَايَةِ (إِمَامًا / مَأْمُومًا) لِلَّهِ تَعَالَى

*Usalli 'Alal Mayyiti (sebut nama) Algha-ibi
Arba'a Takbiiraatin Fardhal Kifaayati (Imaaman
/ Makmuuman) Lillaahi Ta'aalaa*

Bermaksud: “Sahaja aku solat ke atas jenazah lelaki (sebut nama) empat kali takbir fardu kifayah (menjadi Imam / maknum) kerana Allah Taala”.

Lafaz Niat Solat untuk Jenazah Ghaib Perempuan

أُصْلَى عَلَى الْمَيِّتَةِ (فَلَان) الْعَائِيَةِ أَرْبَعَ تَكْبِيرَاتٍ فَرْضَ
كِفَايَةٍ (إِمَامًا / مَأْمُومًا) لِلَّهِ تَعَالَى

*Usalli 'Alal Mayyitati (sebut nama) Algha-ibati
Arba'a Takbiiraatin Fardhal Kifaayati (Imaaman
/ Makmuuman) Lillaahi Ta'aalaa*

Bermaksud: “Sahaja aku solat ke atas jenazah lelaki (sebut nama) empat kali takbir fardu kifayah (menjadi Imam / makmum) kerana Allah Taala”.

Lafaz Niat Solat untuk Jenazah Ghaib yang Ramai (Lelaki/Perempuan)

أُصْلَى عَلَى هَؤُلَاءِ الْأَمْوَاتِ الْعَائِيَنَ أَرْبَعَ تَكْبِيرَاتٍ
فَرْضَ الْكِفَايَةِ (إِمَامًا / مَأْمُومًا) لِلَّهِ تَعَالَى

*Usalli 'Ala Haa-ulaa-il Amwaatil Ghaa-ibiina
Arba'a Takbiiraatin Fardhal Kifaayati (Imaaman
/ Makmuuman) Lillaahi Ta'aalaa*

Bermaksud: “Sahaja aku solat ke atas semua jenazah Ghaib ini empat kali takbir fardu kifayah (menjadi Imam / makmum) kerana Allah Taala”.

4.3.2.10 Cara Mengerjakan Solat Jenazah

- 1) **Niat Solat Jenazah.**
- 2) **Berdiri tegak (bagi yang mampu).**
- 3) **Mengangkat takbiratulihram** (Beserta Niat Solat Jenazah).

اللَّهُ أَكْبَرُ

Allahu Akbar

Bermaksud: Allah Maha Besar.

- 4) **Membaca Surah al-Fatiyah selepas takbir yang pertama.**

بِسْمِ اللَّهِ الرَّحْمَنِ الرَّحِيمِ ﴿١﴾ الْحَمْدُ لِلَّهِ رَبِّ
الْعَالَمِينَ ﴿٢﴾ الرَّحْمَنِ الرَّحِيمِ ﴿٣﴾ مَلِكِ يَوْمَ الدِّينِ
إِيَّاكَ نَعْبُدُ وَإِيَّاكَ نَسْتَعِينُ ﴿٤﴾ أَهْدِنَا الصِّرَاطَ
الْمُسْتَقِيمَ ﴿٥﴾ صِرَاطَ الَّذِينَ أَنْعَمْتَ عَلَيْهِمْ غَيْرِ
الْمَغْضُوبِ عَلَيْهِمْ وَلَا الضَّالِّينَ ﴿٦﴾

Maksudnya: Dengan nama Allah, Yang Maha Pemurah, lagi Maha Mengasihani. (1) Segala puji tertentu bagi Allah, Tuhan yang memelihara dan mentadbirkan sekalian alam. (2) Yang Maha Pemurah, lagi Maha Mengasihani. (3) Yang Menguasai

*pemerintahan hari Pembalasan (hari Akhirat).
(4) Engkaulah sahaja (Ya Allah) Yang Kami
sembah, dan kepada Engkaulah sahaja kami
memohon pertolongan. (5) Tunjukilah kami
jalan yang lurus. (6) Iaitu jalan orang-orang
yang Engkau telah kurniakan nikmat kepada
mereka, bukan (jalan) orang-orang yang
Engkau telah murkai, dan bukan pula (jalan)
orang-orang yang sesat. (7)*

5) Takbir kedua.

اللَّهُ أَكْبَرُ

Allahu Akbar

Bermaksud: Allah Maha Besar

6) Selawat kepada Nabi SAW selepas takbir kedua.

اللَّهُمَّ صَلِّ عَلَى سَيِّدِنَا مُحَمَّدٍ

Allahumma Solli 'Alaa Saiyidina Muhammad

Bermaksud: Selawat dan salam keatas (junjungan besar) Nabi Muhammad SAW

7) Takbir ketiga.

اللَّهُ أَكْبَرُ

Allahu Akbar

Bermaksud: Allah Maha Besar

- 8) Berdoa untuk jenazah selepas takbir yang ketiga.

اللَّهُمَّ اغْفِرْ لَهُ، وَارْحَمْهُ، وَعَافِهِ، وَاعْفُ عَنْهُ

*Allahummaghfir Lahu, Warhamhu, Wa'aafihu,
Wa'fu 'Anhu*

Bermaksud: “Ya Allah ampunilahnya, kasihanilahnya, sejahterakanlahnya dan maafkan(hapuskan) dosanya”.

- 9) Takbir keempat

اللَّهُ أَكْبَرُ

Allahu Akbar

Bermaksud: Allah Maha Besar

- 10) Berdoa

(a) Bila jenazah lelaki:

اللَّهُمَّ لَا تَحْرِمْنَا أَجْرَهُ وَلَا تَقْنِنَا بَعْدَهُ وَاغْفِرْ لَنَا وَلَهُ

Allahumma laa tahrimna ajrahu wa laa taftinna ba'dahu waghfir lanaa wa lahu.

Bermaksud: “Ya Allah, jangan Engkau haramkan kami mendapat pahalanya dan jangan beri fitnah (cubaan) kepada kami sesudahnya, ampunilah kami dan ampunilah dia”.

(b) Bila jenazah perempuan:

اللَّهُمَّ لَا تُخْرِجْنَا أَجْرَبْهَا وَلَا تَفْتَنْنَا بَعْدَهَا وَاغْفِرْ لَنَا وَلَهَا

Allaahumma laa tahrimnaa ajrahaa wa la taftinna ba'dahaa waghfir lanaa wa lahaa

Bermaksud: “Ya Allah, jangan Engkau haramkan kami mendapat pahalanya dan jangan beri fitnah (cubaan) kepada kami sesudahnya, ampunilah kami dan ampunilah dia”.

11) Memberi salam.

السَّلَامُ عَلَيْكُمْ وَرَحْمَةُ اللَّهِ

Assalaamu'alaikum warohmatullaah

Bermaksud: ”Semoga keselamatan dan rahmat Allah limpahkan kepada kalian”

4.3.2.11 Doa Selepas Solat Jenazah

Selepas selesai memberi salam, maka disunatkan membaca doa ini:

بِسْمِ اللَّهِ الرَّحْمَنِ الرَّحِيمِ
الْحَمْدُ لِلَّهِ رَبِّ الْعَالَمِينَ . وَالصَّلَاةُ وَالسَّلَامُ عَلَىٰ
أَشْرَفِ الْأَنْبِيَاءِ وَالْمُرْسَلِينَ وَعَلَىٰ أَلِيهِ وَأَصْحَابِهِ
أَجْمَعِينَ . اللَّهُمَّ يَحْقِّي مُحَمَّدًا أَلَا تُعَذِّبَ هَذَا
(الْمَيِّتَ / الْمَيْتَةِ) . اللَّهُمَّ اجْعَلْ (قَبْرَهُ / قَبْرَهَا)
رَوْضَةً مِنْ رِيَاضِ الْجَنَّةِ وَلَا تَجْعَلْ (قَبْرَهُ / قَبْرَهَا)
حُفْرَةً مِنْ حُفَرِ النَّيْرَانِ . وَصَلَّى اللَّهُ عَلَى سَيِّدِنَا
مُحَمَّدٍ وَعَلَىٰ أَلِيهِ وَأَصْحَابِهِ أَجْمَعِينَ . وَالْحَمْدُ لِلَّهِ
رَبِّ الْعَالَمِينَ .

Bismillaahir rahmaanirrahiim

Alhamdulillahi robbil 'aalamiin. Wassolaatu wassalaamu 'ala asyrafil 'anbiya'i wal mursalin wa 'ala aalihi wa sohibi ajma'in. Allahumma bihaqqi muhammadin alaa tu'azziba haazal (mayyiti / mayyitati). Allahummaj 'al (qobrohu / qobraha) raudhotan min riyadhil jannati walaa taj'al (qobrohu / qobraha) hufratan min hufarin niiran. WasollAllahu 'ala sayyidina muhammadin wa 'alaa Aalihi wa ashaabihu ajma'in walhamdulillahi robbil 'aalamiin.

Bermaksud: "Dengan nama Allah yang Maha Pengasih lagi Maha Penyayang. Segala puji bagi Allah, Tuhan semesta alam. Selawat dan salam ke atas Junjungan kami Nabi Muhammad SAW semulia-mulia rasul dan ke atas kaum keluarga serta para sahabat sekaliannya. Ya Allah, dengan kemuliaan Nabi Muhammad SAW, janganlah Engkau siksa jenazah (lelaki / perempuan) ini. Ya Allah, jadikan kuburnya (lelaki / perempuan) sebagai taman daripada taman-taman syurga dan janganlah Engkau jadikan kuburnya (lelaki / perempuan) sebagai lubang daripada lubang neraka. Selawat dan salam ke atas junjungan kami Muhammad SAW, dan ke atas keluarganya serta para sahabat sekaliannya. Segala puji bagi Allah Tuhan semesta alam".

BAB 4

SOLAT-SOLAT SUNAT

4.4 SOLAT-SOLAT SUNAT

Selain ibadah wajib solat 5 waktu dalam sehari, terdapat juga ibadah solat sunat yang boleh dilakukan untuk mendapatkan pahala yang lebih, atau dilakukan sesuai dengan keadaan dan keperluan seseorang itu.

Solat Sunat (Solat Nafilah) terbahagi kepada dua jenis:

- 1) Solat Sunat *Muakkad*.
- 2) Solat Sunat *Ghairu Muakkad*.

4.4.1 Sunat Sunat *Muakkad*

Solat Sunat *Muakkad* ialah solat sunat yang hukumnya hampir kepada wajib, ertinya pelaksanaannya sangat ditekankan dan solat tersebut adalah seperti berikut:

4.4.1.1 Solat Sunat Tarawih

Solat Tarawih bermaksud beristirehat yang dilaksanakan berselang-seli dengan berehat seketika.

Ibadah tambahan yang dilakukan dalam keadaan tenang, tidak tergopoh gapah, sabar bagi menunjukkan tanda ikhlas dan taat kepada Allah SWT.

Sekiranya tidak mampu dilaksanakan 20 rakaat maka memadai dengan lapan rakaat serta dibenarkan secara duduk.

a) Hukum Solat Sunat Tarawih

Hadis riwayat Imam al-Bukhari (37) dan Imam Muslim (759) daripada Abu Hurairah RA:

مَنْ قَامَ رَمَضَانَ إِيمَانًا وَاحْتِسَابًا، عُفِرَ

لِهِ مَا تَقَدَّمَ مِنْ ذَنْبٍ

Bermaksud: Daripada Abu Hurairah RA bahawa Rasulullah SAW telah bersabda: “Sesiapa yang mendirikan solat (Tarawih) pada malam bulan Ramadhan dengan penuh keimanan dan keikhlasan, maka Allah ampunkan segala dosanya yang lalu...”

Hukumnya sunat Muakkad (yang sangat dituntut) dikerjakan oleh orang-orang Islam lelaki dan perempuan pada tiap-tiap malam bulan Ramadhan sama ada secara berseorangan atau berjemaah.

Sunat dikerjakan di masjid, surau dan lain-lain tempat solat orang-orang Islam.

b) Waktu Solat Sunat Tarawih

Ditunaikan selepas menunaikan solat Fardhu Isyak dan sunat ba'diah dua rakaat.

c) Rakaat Solat Sunat Tarawih

1) Pada umumnya masyarakat Islam di Malaysia mendirikan solat sunat Tarawih

sebanyak 20 rakaat, tetapi ada juga yang hanya menunaikan sekadar 8 rakaat sahaja.

- 2) Pada zaman Rasulullah SAW solat Tarawih dikerjakan sebanyak 8 rakaat sahaja supaya tidak menimbulkan keberatan. Walau bagaimanapun terdapat juga hadith yang meriwayatkan bahawa Nabi Muhammad SAW pernah mengerjakan sebanyak 20 rakaat.
- 3) Pada zaman Khalifah Umar bin al-Khattab RA pula beliau melaksanakannya sebanyak 20 rakaat kerana beliau berpendapat bahawa orang-orang Islam pada zamannya itu tidak keberatan lagi menunaikan solat sebanyak itu.
- 4) Solat Sunat Tarawih hendaklah ditunaikan dua rakaat pada tiap-tiap satu kali takbiratul ihram, kemudianya dilakukan lagi sehingga genap rakaat yang dikehendaki. Boleh dilaksanakan empat rakaat dengan 4 rakaat dengan 2 tahiyat atau empat rakaat sekaligus.
- 5) Lafaz niat solat sunat Tarawih:

أَصَلِّنِي سُنَّةَ التَّرَوِيْحِ رَكْعَتَيْنِ (إِمَامًا / مَأْمُومًا) لِلَّهِ
تَعَالَى

*Usalli Sunnatat Tarawiihi rok'ataini
(imaaman/ma'muuman) Lillaahi Ta'alaa*

Bermaksud: "Sahaja aku Solat Sunat Tarawih dua rakaat (imam/makmum) kerana Allah Taala".

- 6) Sahaja aku solat sunat Tarawih dua rakaat imam/ makmum (mengikut imam) kerana Allah Taala.

d) Rukun Solat Sunat Tarawih

Rukun solat sunat Tarawih ini samalah dengan rukun solat yang lain juga.

e) Kaifiyat Solat Sunat Tarawih 20 Rakaat

Bacaan Surah

Selepas membaca surah al-Fatihah pada tiap-tiap rakaat solat sunat Tarawih ini, dibaca pula surah-surah yang tertentu:

- Dari malam 1 hingga 15 Ramadhan:

Pada tiap-tiap rakaat yang pertama dibaca satu surah yang bermula dari surah al-Takathur hingga surah al- Masad. Susunan surah-surah adalah seperti berikut:

- (1) Surah at-Takaatsur.
- (2) Surah al-'Asr.
- (3) Surah al-Humazah.
- (4) Surah al-Fiil.
- (5) Surah Quraisy.
- (6) Surah al-Maa'uun.
- (7) Surah al-Kautsar.
- (8) Surah al-Kaafiruun.
- (9) Surah an-Nasr.
- (10) Surah al-Masad.

- Dari malam 16 hingga akhir Ramadhan:
 - (1) Pada tiap-tiap rakaat yang pertama dibaca surah al-Qadr.
 - (2) Pada tiap-tiap rakaat yang kedua dibaca satu surah seperti yang dibaca pada rakaat yang pertama bagi malam-malam 1 hingga 15 Ramadhan iaitu bermula dari surah al-Takathur hingga kepada surah al-Masad.
- Setelah kita selesai mengerjakan solat tarawih sebanyak lapan rakaat diikuti pula dengan solat witir sebanyak tiga rakaat.

4.4.1.2 Solat Sunat Witir

Solat Sunat Witir merupakan ibadah solat sunat muakkad atau sangat dianjurkan dan lazimnya dikerjakan sebanyak 3 rakaat. Sebagaimana hadis riwayat Imam al-Bukhari (1981), daripada Abu Hurairah RA berkata:

أَوْصَانِي حَلِيلِي صَلَّى اللَّهُ عَلَيْهِ وَسَلَّمَ
 بِثَلَاثَةِ: صِيَامٍ ثَلَاثَةَ أَيَّامٍ مِنْ كُلِّ شَهْرٍ،
 وَرُكْعَةٍ الضُّحَى، وَأَنْ أُوتَرَ قَبْلَ أَنْ أَنَامَ

Bermaksud: "Kekasihku (Rasulullah SAW) berwasiat kepadaku supaya melakukan tiga perkara iaitu: Berpuasa tiga hari pada setiap bulan, dua rakaat Dhuya dan melakukan solat witir sebelum tidur."

Dalam bulan Ramadan, solat witir dikerjakan setelah solat tarawih. Meskipun dianjurkan dikerjakan tiga rakaat, solat witir juga dapat dilakukan sebanyak satu rakaat sehingga sebelas rakaat.

Lafaz Niat Solat Witir:

أَصَلَّى سُنَّةُ الْوِتْرِ رَكْعَتَيْنِ لِلَّهِ تَعَالَى

Usalli Sunnatah Witri rok'ataini Lillaahi Ta'aalaa

Bermaksud: "Sahaja aku Solat Sunat Witir dua rakaat kerana Allah Taala".

أَصَلَّى سُنَّةُ الْوِتْرِ رَكْعَةً لِلَّهِ تَعَالَى

Usalli Sunnatah Witri rok'atan Lillaahi Ta'aalaa

Bermaksud: "Sahaja aku Solat Sunat Witir satu rakaat kerana Allah Taala".

atau

أَصَلَّى سُنَّةُ الْوِتْرِ ثَلَاثَ رَكْعَاتٍ لِلَّهِ تَعَالَى

Usalli Sunnatah Witri tsalaasa roka'aatin Lillaahi Ta'aalaa

Bermaksud: "Sahaja aku Solat Sunat Witir tiga rakaat kerana Allah Taala".

Cara melaksanakan solat witir adalah sama dengan cara pelaksanaan solat-solat yang lain. Perbezaannya hanya pada niat, jumlah rakaat dan waktu melaksanakannya.

Bagi Solat Witir yang dilakukan tiga rakaat satu salam, tiada tahiyyat awal pada rakaat kedua. Maka selepas sahaja sujud yang kedua pada rakaat kedua hendaklah bangun, terus berdiri melakukan rakaat ketiga.

4.4.1.3 Solat Sunat Fajar

Solat sunat fajar atau solat sunat subuh ialah solat sunat dua rakaat yang dilakukan sebelum Solat Subuh setelah terbitnya fajar sadik (masuk waktu Solat Subuh). Pelaksanaannya adalah sama seperti mengerjakan solat-solat yang lain dan hanya berbeza pada niat sahaja.

Dalam hadis riwayat Imam Muslim (725), daripada Aisyah RA, Nabi Muhammad SAW bersabda:

رَكِعْتَا الْفَجْرِ حَيْزٌ مِنَ الدُّنْيَا وَمَا فِيهَا

Bermaksud: "Dua rakaat fajar lebih baik daripada dunia seisinya."

Lafaz Niat Solat Fajar:

أَصَلَّى سُنَّةَ الْفَجْرِ رَكْعَيْنِ لِلَّهِ تَعَالَى

Usalli Sunnata Fajri rok'ataini Lillahi Ta'alaa

Bermaksud: "Sahaja aku Solat Sunat Fajar dua rakaat kerana Allah Taala".

4.4.1.4 Solat Sunat Hari Raya Aidilfitri dan Aidiladha

Solat sunat Aidilfitri dan Aidiladha adalah solat sunat dua rakaat yang dilakukan pada kedua-dua hari raya iaitu pada 1 Syawal bagi Aidilfitri dan pada 10 Zulhijah bagi Aidiladha serta diakhiri dengan khutbah hari raya. Ia didirikan dengan tujuh kali takbir dirakaat pertama dan lima kali takbir dirakaat kedua. Solat ini afdal dilakukan di kawasan tanah lapang.

Lafaz Niat Solat Hari Raya Aidilfitri:

أَصَلَّى سُنَّةً عِيدِ الْفِطْرِ رَكْعَتَيْنِ (إِمَامًا/مَأْمُومًا) لِلَّهِ تَعَالَى

*Usalli sunnatan ‘iidilfitri rok'ataini
(imaaman/ma'muuman) Lillaahi Ta'aalaa*

Bermaksud: “Sahaja aku Solat Sunat Aidilfitri dua rakaat (imam/makmum) kerana Allah Ta'ala”.

Lafaz Niat Solat Hari Raya Aidiladha:

أَصَلَّى سُنَّةً عِيدِ الْأَضْحَى رَكْعَتَيْنِ (إِمَامًا/مَأْمُومًا) لِلَّهِ تَعَالَى

*Usalli sunnatan ‘iidiladha rok'ataini
(imaaman/ma'muuman) Lillaahi Ta'aalaa*

Bermaksud: “Sahaja aku Solat Sunat Aidiladha dua rakaat (imam/makmum) kerana Allah Taala”.

Kaifiat Solat Sunat Hari Raya:

1) Lafaz Niat

2) Doa Iftitah dan takbir

Selepas membaca Doa Iftitah, hendaklah bertakbir sebanyak 7 kali dengan diselangi bacaan tasbih bagi rakaat pertama dan 5 kali takbir yang juga diselangi dengan tasbih bagi rakaat kedua.

Lafaz tasbih:

سُبْحَانَ اللَّهِ وَالْحَمْدُ لِلَّهِ، وَلَا إِلَهَ إِلَّا اللَّهُ، وَاللَّهُ أَكْبَرُ
لَا حَوْلَ وَلَا قُوَّةَ إِلَّا بِاللَّهِ

Subhaanallaahi Walhamdulillaahi, wa la ilaaaha Illallaah, Wallahu Akbaru laa hawla walaa quwwata illaa Billaah

Bermaksud: "Maha suci Allah dan segala puji bagi Allah, dan tiada Tuhan melainkan Allah, dan Allah Maha Besar tiada ke kekuatan melainkan kekutan Allah".

3) Membaca Surah al Fatihah & surah

Imam sunat menyaringkan suara ketika membaca fatihah dan surah.

4) Meneruskan solat hingga selesai 2 rakaat

Solat diteruskan dengan rakaat kedua sehingga salam.

5) Khutbah

Selepas salam dan selesai solat, imam atau khatib hendaklah berkhutbah (membaca dua khutbah).

4.4.1.5 Solat Sunat Gerhana Bulan (*Khusuf*) atau Matahari (*Kusuf*)

Solat sunat gerhana bulan atau matahari ini dilaksanaan dengan dua rakaat dan setiap rakaat dua kali rukuk. Ia dilaksanakan ketika berlakunya gerhana bulan atau matahari. Disunatkan membaca khutbah setelah selesai solat seperti khutbah hari raya.

Lafaz Niat Solat *Khusuf* (Gerhana Bulan):

أُصَلِّيْ سُنَّةَ الْخُسُوفِ رَكْعَتَيْنِ لِلَّهِ تَعَالَى

*Usalli sunnatal khusuufi rok'ataini Lillaahi
Ta'aalaa*

Bermaksud: “Sahaja aku Solat Sunat Gerhana Bulan dua rakaat kerana Allah Taala”

Lafaz Niat Solat *Kusuf* (Gerhana Matahari):

أُصَلِّيْ سُنَّةَ الْكُسُوفِ رَكْعَتَيْنِ لِلَّهِ تَعَالَى

Usalli sunnatal kusufi rok'ataini Lillaahi Ta'aalaa

Bermaksud: “Sahaja aku Solat Sunat Gerhana Matahari dua rakaat kerana Allah Taala”.

4.4.1.6 Solat Sunat *Istisqa*

Solat Sunat *Istisqa* adalah solat sunat dua rakaat yang dilakukan untuk memohon diturunkan hujan kerana kemarau panjang dari Allah SWT.

Dalam hadis riwayat Imam Ibn Majah (1268), daripada Abu Hurairah RA, katanya:

حَرَجَ رَسُولُ اللَّهِ صَلَّى اللَّهُ عَلَيْهِ وَسَلَّمَ يَوْمًا
يَسْتَسْقِي فَصَلَّى بِنَا رَكْعَتَيْنِ بِلَا أَذَانٍ وَلَا
إِقَامَةٍ ثُمَّ خَطَبَنَا وَدَعَا اللَّهَ وَحْوَلَ وَجْهَهُ تَحْوِي
الْقُبْلَةَ رَافِعًا يَدَيْهِ ثُمَّ قَلَبَ رِدَاءَهُ فَجَعَلَ
الْأَمْيَنَ عَلَى الْأَيْسَرِ وَالْأَيْسَرَ عَلَى الْأَمْيَنِ

Bermaksud: “Pada suatu hari Rasulullah SAW keluar untuk melakukan solat *Istisqa*. Kemudian Baginda bersolat bersama-sama kami sebanyak dua rakaat tanpa azan dan iqamah. Seterusnya Baginda berkhutbah dan berdoa kepada Allah sambil memalingkan mukanya ke kiblat dan mengangkat kedua-dua belah tangan tangannya. Kemudian Baginda membalikkan selendangnya yang kanan ke kiri dan yang kiri ke kanan.”

Kaifiat Solat Sunat *Istisqa*

1) Lafaz Niat

Lafaz Niat Solat Sunat *Istisqa* :

اُصَلِّيْ سُنَّةَ الْإِسْتِسْقَاءِ رَكْعَتَيْنِ اللَّهُ تَعَالَى

*Usalli sunnata istisqaa-i rok'ataini Lillaahi
Ta'aalaa*

Bermaksud: “Sahaja aku Solat Sunat *Istisqa* dua rakaat kerana Allah Taala”.

6) Doa Iftitah dan takbir

Seperti solat hari raya, selepas membaca Doa Iftitah, hendaklah bertakbir sebanyak 7 kali dengan diselangi bacaan tasbih bagi rakaat pertama dan 5 kali takbir yang juga diselangi dengan tasbih bagi rakaat kedua.

Lafaz tasbih:

سُبْحَانَ اللَّهِ وَالْحَمْدُ لِلَّهِ، وَلَا إِلَهَ إِلَّا اللَّهُ، وَاللَّهُ أَكْبَرُ
لَا حَوْلَ وَلَا قُوَّةَ إِلَّا بِاللَّهِ

*Subhaanallaahi Walhamdulillaahi, wa la ilaha illallaah, Wallahu Akbaru laa hawla
walaa quwwata illaa Billaah*

Bermaksud: ”Maha suci Allah dan segala puji bagi Allah, dan tiada Tuhan melairkan Allah, dan Allah Maha Besar tiada ke kekuatan melainkan kekutan Allah”.

7) Membaca Surah al Fatihah & surah

Imam sunat menyaringkan suara ketika membaca fatihah dan surah.

Selepas membaca Surah al-fatihah, disunatkan membaca Surah al-A'la bagi rakaat pertama dan surah al-Ghasyiah bagi rakaat kedua.

8) Meneruskan solat hingga selesai 2 rakaat

Solat diteruskan dengan rakaat kedua sehingga salam.

9) Khutbah

Selepas salam dan selesai solat, imam atau khatib disunatkan berkhutbah (membaca dua khutbah).

10) Berdoa

Sebelum membaca doa istisqa, Rasulullah terlebih dahulu membaca doa kurab yang merupakan doa saat berada dalam kesusahan, kemudian disambung doa memohon hujan.

Doa selepas Solat Sunat *Istisqa* adalah seperti berikut:

بِسْمِ اللَّهِ الرَّحْمَنِ الرَّحِيمِ。 لَا إِلَهَ إِلَّا اللَّهُ الْعَظِيمُ الْخَلِيلُ،
لَا إِلَهَ إِلَّا اللَّهُ رَبُّ الْعَرْشِ الْعَظِيمِ، لَا إِلَهَ إِلَّا اللَّهُ رَبُّ
السَّمَاوَاتِ وَرَبُّ الْأَرْضِ وَرَبُّ الْعَرْشِ الْكَرِيمِ

Bismillaahirrohmaanirrohiim. Laa ilaaha illallaahul 'azhiimul haliimu, laa ilaaha illallaahu rabbul 'arsyil 'azhiimi, laa ilaaha illallaahu rabbus samaawaati wa rabbul ardhi wa rabbul 'arsyil kariim

Bermaksud: “Tiada Tuhan selain Allah yang agung dan santun. Tiada Tuhan selain Allah, Tuhan Arasy yang megah. Tiada Tuhan selain Allah, Tuhan langit, bumi, dan Arasy yang mulia.”

اللَّهُمَّ أَسْقِنَا عَيْنًا مُغِيْنًا مَرِيْنًا مَرِيْعًا، نَافِعًا غَيْرَ ضَارٍّ،
عَاجِلًا غَيْرَ آجِلٍ

Allaahumma asqinaa ghaitsan mughiitsan marii-an marii'a, naafi'an ghaira dhoor, 'aajilan ghaira aaajil

Bermaksud: “Ya Allah, turunkan kepada kami air hujan yang menolong, mudah, menyuburkan, yang lebat, banyak, merata, menyeluruh, dan bermanfaat abadi.”

اللَّهُمَّ اسْقِنَا الْعَيْثَ وَلَا جَعَلْنَا مِنَ الْقَاطِنِينَ

Allaahummasqinal ghaitsa, wa laa taj'alnaa
minal qoonithiin

Bermaksud: “Ya Allah, turunkan kepada kami air hujan. Jangan jadikan kami termasuk orang yang berputus harapan .”

اللَّهُمَّ إِنَّ بِالْعِبَادِ وَالْبَلَادِ وَالْبَهَائِمِ وَالْخَلْقِ مِنَ الْبَلَاءِ
وَالْجُهْدِ وَالضَّنْكِ مَا لَا نَشْكُو إِلَّا إِلَيْكَ

Allaahumma inna bil 'ibaadi wal bilaadi wal
bahaa-imi wal khalqi minal balaa-i wal juhdi
wad dhanki maa laa nasykuu illaa ilaika

Bermaksud: “Ya Allah, sungguh banyak hamba, negeri, dan jenis hewan, dan segenap makhluk lainnya mengalami bencana, paceklik, dan kesempitan di mana kami tidak mengadu selain kepada-Mu .”

اللَّهُمَّ أَغِنْنَا، اللَّهُمَّ أَغِنْنَا، اللَّهُمَّ أَغِنْنَا

Allahumma aghitsnaa, allahumma aghitsnaa,
allahumma aghitsnaa.

Bermaksud: “Ya Allah! Berilah kami hujan. Ya Allah, turunkan hujan pada kami. Ya Allah! Hujanilah kami”.

اللَّهُمَّ اسْقِ عِبَادَكَ وَهَائِمَكَ، وَانْشُرْ رَحْمَتَكَ، وَأَخْبِرْ
بِلَدَكَ الْمَيِّتَ

Allahummasqi 'ibaadaka wabahaa-imaka,
wansyur rahmataka, wa ahyi baladakal
mayyita

Bermaksud: “Ya Allah! Berilah hujan kepada hamba-hamba-Mu, hewan ternak, berilah rahmat-Mu dengan merata, dan suburkan bumi-Mu yang tandus.”

Allahaahumma Aamiin.

4.4.1.7 Solat Sunat Tahajud

Solat Sunat Tahajud ialah solat yang dikerjakan pada malam hari.

Waktunya: Selepas Solat Isyak hingga sebelum masuk waktu Solat Subuh. Lebih utama dikerjakan pada dua pertiga malam.

Jumlah rakaatnya: Jumlah rakaat sekurang-kurangnya 2 rakaat dan sebanyak-banyaknya tidak terbatas.

Dalam hadis riwayat Imam al-Bukhari (1145), daripada Abu Hurairah RA, sabda Rasulullah SAW:

يَنْزُلُ رَبُّنَا تَبَارَكَ وَتَعَالَى كُلَّ لَيْلَةٍ إِلَى السَّمَاءِ
الْدُّنْيَا حِينَ يَبْقَى ثُلُثُ اللَّيْلِ الْآخِرُ يَقُولُ:
مَنْ يَدْعُونِي، فَأَسْتَحِيبَ لَهُ مَنْ يَسْأَلُنِي
فَأُعْطِيهُ، مَنْ يَسْتَغْفِرُنِي فَأَغْفِرَ لَهُ

Bermaksud: Tuhan yang Maha Berkah dan Maha Tinggi turun setiap malam ke langit dunia sewaktu masa berbaki sepertiga malam terakhir dan berfirman: Barangsiapa yang berdoa kepada-Ku, nescaya Aku perkenankan baginya. Barangsiapa yang meminta kepada-Ku nescaya aku akan memberikan (apa yang dipinta) kepadanya. Barangsiapa yang meminta pengampunan daripada-Ku, nescaya Aku akan mengampuninya.

Lafaz Solat Sunat Tahajud:

أَصَلِّيْ سُنَّةَ التَّهَجُّدِ رَكْعَتَيْنِ لِلَّهِ تَعَالَى

*Usalli Sunnatat Tahajjudi rok'ataini Lillaahi
Ta'aalaa*

Bermaksud: “Sahaja aku Solat Sunat Tahajud
dua rakaat kerana Allah Taala.”

4.4.2 Solat Sunat Ghairu Muakkad

Solat Sunat *Ghairu Muakkad* ialah solat sunat biasa atau disebut dengan solat nafilah. Solat Sunat *Ghairu Muakkad* berbeza dengan Solat Sunat *Muakkad*, sebagaimana yang tersebut diatas. Antara solat nafilah adalah seperti berikut:

4.4.2.1 Solat Sunat Rawatib

Solat sunat rawatib ialah solat sunat (solat nafilah) yang mengawali atau mengiringi solat fardu. Contohnya solat sunat dua rakaat sebelum dan sesudah solat zuhur dan sebagainya.

Terdapat dua jenis solat rawatib, iaitu solat *rawatib qabliyah* yang dikerjakan sebelum solat fardu, atau solat *rawatib bakdiyah* yang dikerjakan selepas solat fardu.

Lafaz Niat Solat Sunat Rawatib (sebelum Solat Fardu):

أَصْلَنِي سُنَّةً (الصُّبْحِ / الظَّهَرِ / الْعَصْرِ /
الْمَغْرِبِ / الْعِشَاءِ) رَكْعَتَيْنِ قَبْلَيْهِ لِلَّهِ تَعَالَى

Usalli (Sunnatas Subhi/ Sunnataz Zuhri/ Sunnatal 'Asri/ Sunnatal Maghribi/ Sunnatal 'Isyaa-i) rok'ataini qobliyatani Lillaahi Ta'aalaa

Bermaksud: "Sahaja aku Solat Sunat sebelum (Subuh/ Zohor/ Asar/ Maghrib/ Isyak) dua rakaat kerana Allah Taala".

Lafaz Niat Solat Sunat Rawatib (selepas Solat Fardu):

أَصَّلَّى سُنَّةً (الظَّهَرِ / الْمَغْرِبِ / الْعِشَاءِ)
رَكْعَتَيْنِ بَعْدِيَّةً لِلَّهِ تَعَالَى

Usalli (Sunnataz Zuhri/ Sunnata Maghribi/ Sunnata 'Isyaa-i) rok'ataini ba'diyatan Lillaahi ta'aalaa

Bermaksud: "Sahaja aku Solat Sunat selepas (Zuhur/Maghrib/Isyak) dua rakaat kerana Allah Taala".

4.4.2.2 Solat Sunat Wuduk (*Tuhur*)

Solat sunat wuduk ialah solat yang dilaksanakan setelah berwuduk dengan jumlah dua rakaat.

Dalam hadis riwayat Imam al-Bukhari (1149) sebuah hadis Rasulullah SAW bersabda:

يَا بِلَالُ حَدَّثَنِي بِأَرْجَحِي عَمَلٌ عَمِلْتُهُ فِي
الْإِسْلَامِ، فَإِنِّي سَمِعْتُ دَفَّ نَعْلَنِكَ بَيْنَ
بَدَيَّ فِي الْجَنَّةِ. قَالَ: مَا عَمِلْتُ عَمَلاً
أَرْجَحِي عِنْدِي: أَنِّي لَمْ أَنْظَهُرْ طَهُورًا، فِي
سَاعَةِ لَيْلٍ أَوْ هَارِ، إِلَّا صَلَّيْتُ بِذَلِكَ
الطُّهُورَ مَا كُتِبَ لِي أَنْ أُصَلِّي

Bermaksud: “Wahai Bilal!
Khabarkan kepadaku amalan yang paling utama telah kamu lakukan sejak memeluk Islam. Ini kerana, aku mendengar gerakan kaki di sisiku di dalam Syurga. Bilal menjawab: Tidak ada amalan utama yang aku amalkan kecuali aku akan berwudhuk pada waktu malam atau siang melainkan aku akan solat dengan wudhuk tersebut di samping solat-solat yang diwajibkan ke atasku”.

Dalam hadis riwayat Imam al-Bukhari (1934), daripada Usman bin Affan RA beliau berkata bahawa Rasulullah SAW bersabda:

مَنْ تَوَضَّأَ وُضُوئِي هَذَا، ثُمَّ يُصَلِّي رَكْعَتَيْنِ،
لَا يُحِدِّثُ نَفْسَهُ فِيهِمَا بِشَيْءٍ، إِلَّا عُفِرَ لَهُ
مَا تَقَدَّمَ مِنْ ذَنْبٍ

Bermaksud: Sesiapa yang berwuduk seperti wuduk aku ini, kemudian dia menunaikan solat dua rakaat, yang mana dia tidak lalai di dalamnya, maka akan diampunkan dosa-dosa (kecilnya) yang terdahulu.

Lafaz Niat Solat Sunat Wuduk:

أَصَلِّي سُنَّةَ الْوُضُوءِ رَكْعَتَيْنِ لِلَّهِ تَعَالَى

Usalli Sunnatai Wuduui rok'ataini Lillahi Ta'aalaa

Bermaksud: "Sahaja aku Solat Sunat Wuduk dua rakaat kerana Allah Taala."

Hukum menunaikan solat dua rakaat sesudah wuduk adalah sunat dan tsabit pensyariatannya berdasarkan nas. Afdalnya ia dilakukan sebaik sahaja seseorang itu selesai berwuduk.

Perlu juga dijelaskan bahawa sekiranya seseorang yang baru lepas mengambil wuduk masuk ke dalam masjid, lalu dia mendirikan Solat Fardu Zohor sebagai contoh, atau Solat Sunat Tahiyatul Masjid atau Solat Sunat Rawatib Qabliyyah, maka kesemuanya itu telah memadai ke atas dua rakaat solat sesudah wuduk.

4.4.2.3 Solat Sunat Tahiyatul Masjid

Solat sunat tahiyatul masjid ialah solat untuk menghormati masjid. Ia dilakukan setelah masuk masjid sebelum duduk. Jumlah rakaat solat Tahiyatul Masjid adalah dua rakaat .

Sebagaimana hadis riwayat Imam al-Bukhari (444), sabda Rasulullah SAW:

إِذَا دَخَلَ أَحَدُكُمُ الْمَسْجِدَ فَلْيَرْكُعْ قَبْلَ أَنْ يَتَلَسَّمَ

Bermaksud: "Apabila salah seorang masuk ke masjid maka janganlah duduk sebelum ia solat dua rakaat."

Lafaz Niat Solat Sunat Tahiyatul Masjid:

أَصَّلَّى سُنَّةَ تَحْيَيَةِ الْمَسْجِدِ رَكْعَتَيْنِ لِلَّهِ تَعَالَى

*Usalli Sunnata Tahiyyatu masjidi rok'ataini
Lillaahi Ta'aalaa*

Bermaksud: "Sahaja aku Solat Sunat Tahiyatul Masjid dua rakaat kerana Allah Taala".

4.4.2.4 Solat Dhuha

Solat sunat Dhuha ialah solat sunat yang dilakukan sekurang-kurangnya 2 rakaat, 4 rakaat, 6 rakaat atau 8 rakaat. Waktunya sekitar jam 8 pagi hingga gelincir matahari sebelum masuk waktu Zuhur.

Sebagaimana hadis riwayat Imam Ahmad (16749), sabda Rasulullah SAW:

يَا ابْنَ آدَمَ أُنْهِنِي أَوَّلَ النَّهَارِ بِأَرْبَعِ رَكَعَاتٍ
أَكُفِّكَ هِنَّ آخِرَ يَوْمِكَ

Maksudnya: "Wahai Anak Adam cukupkanlah kepadaku pada awal hari dengan (solat) empat rakaat, nescaya Aku akan mencukupimu dengannya di akhir harimu".

Lafaz Niat Solat Sunat Dhuha:

أُصَلِّيْنِ سُنَّةَ الصُّبْحِيِّ رَكْعَتَيْنِ لِلَّهِ تَعَالَى

Usalli Sunnata Dhuha rok'ataini Lillaahi Ta'aalaa

Bermaksud: "Sahaja aku Solat Sunat Dhuha dua rakaat kerana Allah Taala."

4.4.2.5 Solat Sunat Taubat

Solat sunat taubat ialah solat dua rakaat yang dilakukan untuk bertaubat setelah melakukan dosa dan maksiat. Waktunya tidak ditentukan, tetapi disaat pelakunya sedar dan insaf dari berbuat dosa dan ingin bertaubat.

Sebagaimana sebuah hadis riwayat Imam Abu Daud (1521) daripada Abu Bakr as-Siddiq RA berkata:

سَمِعْتُ رَسُولَ اللَّهِ صَلَّى اللَّهُ عَلَيْهِ وَسَلَّمَ
يَقُولُ مَا مِنْ عَبْدٍ يُذْنِبُ ذَبْنًا فَيُحْسِنُ
الظُّهُورَ ثُمَّ يَقُومُ فَيُصَلِّي رَكْعَتَيْنِ ثُمَّ يَسْتَغْفِرُ
اللَّهَ إِلَّا غَفَرَ اللَّهُ لَهُ ثُمَّ قَرَأَ هَذِهِ الْآيَةَ (وَالَّذِينَ
إِذَا فَعَلُوا فَاحِشَةً أَوْ ظَلَمُوا أَنفُسَهُمْ ذَكَرُوا
اللَّهَ) إِلَى آخِرِ الْآيَةِ.

Bermaksud: "Aku mendengar Rasulullah SAW bersabda, "Tidaklah seorang hamba melakukan dosa kemudian dia bersuci, kemudian berdiri untuk melakukan solat dua rakaat kemudian meminta ampun kepada Allah, kecuali Allah akan mengampuninya." Kemudian beliau membaca ayat ini, (Dan (juga) orang-orang yang apabila mengerjakan perbuatan keji atau menganiaya diri sendiri, mereka ingat akan Allah, lalu memohon ampun terhadap dosa-

dosa mereka dan siapa lagi yang dapat mengampuni dosa selain daripada Allah? Dan mereka tidak meneruskan perbuatan kejinya itu, sedang mereka mengetahui) Surah Ali Imran (135) hingga akhir ayat”.

Lafaz Niat Solat Sunat Taubat:

أَصَلَّى سُنْنَةَ التَّوْبَةِ رَكْعَتَيْنِ لِلَّهِ تَعَالَى

Usalli Sunnatat Taubati rok'ataini Lillaahi Ta'aalaa

Bermaksud: “Sahaja Aku Solat Sunat Taubat dua rakaat kerana Allah Taala”.

4.4.2.6 Solat Sunat Safar

Solat sunat Safar ialah solat dua rakaat ketika hendak bermusafir atau sebelum memulakan perjalanan untuk bermusafir.

Lafaz Niat Solat Sunat Safar:

أَصَلَّى سُنْنَةَ السَّفَرِ رَكْعَتَيْنِ لِلَّهِ تَعَالَى

Usalli Sunnatas Safari rok'ataini Lillaahi Ta'aalaa

Bermaksud: “Sahaja aku Solat Sunat Musafir dua rakaat kerana Allah Taala.”

4.4.2.7 Solat Sunat Istikhara

Solat Sunat Istikhara ialah solat dua rakaat untuk meminta petunjuk daripada Allah SWT. Waktunya tidak ditentukan, asalkan tidak pada waktu-waktu yang dilarang. Dianjurkan berdoa dengan doa *makthur* (doa-doa yang berasal dari al-Quran dan amalan Nabi Muhammad SAW). Dalam hadis daripada Jabir bin Abdullah RA (1162), Rasulullah SAW bersabda:

كَانَ رَسُولُ اللَّهِ صَلَّى اللَّهُ عَلَيْهِ وَسَلَّمَ يُعَلِّمُنَا
الإِسْتِخَارَةَ فِي الْأُمُورِ كُلِّهَا كَمَا يُعَلِّمُنَا السُّورَةَ مِنَ
الْقُرْآنِ؛ يَقُولُ: إِذَا هَمَ أَحَدُكُمْ بِالْأُمْرِ، فَلْيَرْكَعْ
رَكْعَتَيْنِ مِنْ غَيْرِ الْفَرِيضَةِ، ثُمَّ لِيَقُلْ: اللَّهُمَّ إِنِّي
أَسْتَخِيرُكَ بِعِلْمِكَ، وَأَسْتَقْدِرُكَ بِقُدْرَتِكَ، وَأَسْأَلُكَ
مِنْ فَضْلِكَ الْعَظِيمِ؛ فَإِنَّكَ تَقْدِرُ وَلَا أَقْدِرُ، وَتَعْلَمُ
وَلَا أَعْلَمُ، وَأَنْتَ عَلَامُ الْغُيُوبِ، اللَّهُمَّ إِنْ كُنْتَ
تَعْلَمُ أَنَّ هَذَا الْأُمْرَ حَيْرٌ لِي فِي دِينِي وَمَعَاشِي
وَعَاقِبَةِ أُمْرِي - أَوْ قَالَ: عَاجِلٌ أُمْرِي وَآجِلُهُ -
فَأَقْدُرُهُ لِي وَيَسِّرُهُ لِي، ثُمَّ بَارِكْ لِي فِيهِ، وَإِنْ كُنْتَ
تَعْلَمُ أَنَّ هَذَا الْأُمْرَ شَرٌّ لِي فِي دِينِي وَمَعَاشِي
وَعَاقِبَةِ أُمْرِي - أَوْ قَالَ: فِي عَاجِلٍ أُمْرِي وَآجِلُهُ
- فَاصْرِفْهُ عَنِّي وَاصْرِفْنِي عَنْهُ، وَاقْدُرْ لِي الْخَيْرَ
حَيْثُ كَانَ، ثُمَّ أَرْضِنِي قَالَ: وَيُسَمِّي حَاجَتَهُ

Bermaksud: "Rasulullah SAW pernah mengajarkan kami tentang memohon pilihan bagi semua perkara (istikhharah) seperitimana Baginda mengajarkan kami surah daripada al-Quran. Baginda bersabda: Jika salah seorang dari kalian gusar tentang satu perkara maka rukuklah dua rakaat selain dari yang fardu. Kemudian katakanlah: Ya Allah, aku memohon pilihan dengan ilmu-Mu, aku memohon kekuatan dengan kekuatan-Mu, Aku juga memohon daripada limpahan-Mu yang Agung. Engkau mampu sedangkan aku tidak. Engkau Maha Mengetahui sedangkan aku tidak tahu. Engkau Maha Tahu tentang perkara yang ghaib. Ya Allah, jika Engkau mengetahui bahawa perkara ini baik untuk untuk agamaku, kehidupanku dan penghujungku. Ataupun Nabi bersabda: sama ada perkara yang segera atau yang lambat. Maka permudahkanlah urusanku dan berkatilah aku dalam urusan tersebut. Jika Engkau tahu bahawa perkara ini buruk bagiku pada agamaku, kehidupanku dan penghujung hidupku. Ataupun Baginda bersabda : sama ada yang segera atau yang lambat. Maka, jauhkanlah ia dariku dan jauhkan aku darinya. Dan tentukan bagiku yang terbaik kemudian redhailah aku dengannya. Kemudian Baginda bersabda: Orang itu (boleh) menyatakan hajatnya."

Lafaz Niat Solat Sunat Istikharah:

أَصَلِّي سُنَّة الْإِسْتِخَارَةِ رَكْعَتَيْنِ لِلَّهِ تَعَالَى

*Usalli Sunnata Istikhooroti rok'ataini Lillaahi
Ta'aalaa*

Bermaksud: “Sahaja aku Solat Sunat Istikharah dua rakaat kerana Allah Taala.”

4.4.2.8 Solat Sunat Hajat

Solat sunat hajat ialah solat dua rakaat untuk memohon sesuatu hajat daripada Allah SWT.

Waktunya tidak ditentukan, disesuaikan dengan hajat seseorang, Solat sunat ini dilakukan minima dua rakaat dan maksima 12 rakaat dengan salam setiap 2 rakaat.

Lafaz Niat Solat Sunat Hajat:

أَصَلِّي سُنَّة الْحَاجَةِ رَكْعَتَيْنِ لِلَّهِ تَعَالَى

Usalli Sunnata Haajati rok'ataini Lillaahi Ta'aalaa

Maksudnya: “Sahaja aku Solat Sunat Hajat dua rakaat kerana Allah Taala”.

4.4.2.9 Solat Sunat Tasbih

Solat sunat tasbih ialah solat empat rakaat. Dilakukan dua rakaat dua salam atau empat rakaat satu salam. Bilangan bacaan tasbih yang dibaca adalah sebanyak 300 kali bacaan tasbih.

Cara melaksanakannya:

- 1) Dalam setiap rakaat selepas membaca Surah al-Fatiyah dan surah selepasnya, hendaklah bertasbih dengan membaca: “*Subhanallah walhamdulillah wala ilaha illallah wallahu akbar*” sebanyak 15 kali
- 2) Bertasbih ketika rukuk 10 kali
- 3) Bertasbih ketika Iktidal 10 kali
- 4) Bertasbih ketika sujud yang pertama 10 kali
- 5) Bertasbih ketika duduk antara dua sujud 10 kali
- 6) Bertasbih pada sujud kedua 10 kali
- 7) Bertasbih ketika duduk Iftirasy 10 kali

Jumlah bacaan tasbih tersebut semuanya 75 kali dalam 1 rakaat.

Lafaz Niat Solat Sunat Tasbih:

- 1) **Niat Solat Sunat Tasbih dua rakaat:**

أَصَلَّى سُنَّةَ التَّسْبِيحِ رَكْعَتَيْنِ لِلَّهِ تَعَالَى

*Usalli Sunnatat Tasbiihi rok'ataini Lillaahi
Ta'alaa*

Bermaksud: “Sahaja aku Solat Sunat Tasbih dua rakaat kerana Allah Taala.”

Atau

2) Niat Solat Sunat Tasbih empat rakaat:

أَصْلَى سُنَّةَ التَّسْبِيحِ أَرْبَعَ رَكْعَاتٍ لِلَّهِ تَعَالَى

*Usalli Sunnatat Tasbiihi arba'a roka'aatin
Lillaahi Ta'aalaa*

Bermaksud: “Sahaja aku Solat Sunat Tasbih empat rakaat kerana Allah Taala.”

Dalam hadis riwayat Imam Abu Daud (1105), Imam Ibnu Majah (1377) dan Imam at-Tirmizi (479), daripada Ibnu Abbas RA bahawa Rasulullah SAW bersabda:

يَا عَبَاسُ يَا عَمَّا هُوَ أَكْبَرُ أَلَا
أَعْطِيَكَ أَلَا أَخْبُوكَ أَلَا أَفْعَلُ لَكَ عَشْرَ
خِصَالٍ إِذَا أَنْتَ فَعَلْتَ ذَلِكَ غَفَرَ اللَّهُ
لَكَ ذَنْبَكَ أَوْلَهُ وَآخِرُهُ وَقَدِيمُهُ وَحَدِيثُهُ
وَحَطَّاهُ وَعَمْدَاهُ وَصَغِيرُهُ وَكِبِيرُهُ وَسَرَّهُ
وَعَلَانِيَتُهُ عَشْرُ خِصَالٍ أَنْ تُصَلِّيَ أَرْبَعَ
رَكْعَاتٍ تَقْرُأً فِي كُلِّ رَكْعَةٍ بِفَاتِحَةِ
الْكِتَابِ وَسُورَةٍ فَإِذَا فَرَغْتَ مِنْ الْقِرَاءَةِ
فِي أَوَّلِ رَكْعَةٍ قُلْتَ وَأَنْتَ فَائِمٌ سُبْحَانَ
اللَّهِ وَالْحَمْدُ لِلَّهِ وَلَا إِلَهَ إِلَّا اللَّهُ أَكْبَرُ

حَمْسَ عَشْرَةَ مَرَّةً ثُمَّ تَرْكُعُ فَتَقْبُلُ وَأَنْتَ
 رَاكِعٌ عَشْرًا ثُمَّ تَرْفَعُ رَأْسَكَ مِنْ الرُّكُوعِ
 فَتَقْبُلُهَا عَشْرًا ثُمَّ تَحْوِي سَاجِدًا فَتَقْبُلُهَا
 وَأَنْتَ سَاجِدٌ عَشْرًا ثُمَّ تَرْفَعُ رَأْسَكَ مِنْ
 السُّجُودِ فَتَقْبُلُهَا عَشْرًا ثُمَّ تَسْجُدُ
 فَتَقْبُلُهَا عَشْرًا ثُمَّ تَرْفَعُ رَأْسَكَ مِنْ
 السُّجُودِ فَتَقْبُلُهَا عَشْرًا فَدَلِيلُ حَمْسَةٍ
 وَسَبْعُونَ فِي كُلِّ رُكْعَةٍ تَفْعَلُ فِي أَرْبَعٍ
 رَكْعَاتٍ إِنْ اسْتَطَعْتَ أَنْ تُصَلِّيَهَا فِي
 كُلِّ يَوْمٍ مَرَّةً فَافْعَلْ فَإِنْ لَمْ تَسْتَطِعْ فَفِي
 كُلِّ جُمُعَةٍ مَرَّةً فَإِنْ لَمْ تَفْعَلْ فَفِي كُلِّ
 شَهْرٍ مَرَّةً فَإِنْ لَمْ تَفْعَلْ فَفِي عُمْرِكَ مَرَّةً

Bermaksud: "Wahai pakcikku Abbas, Aku ingin memberikan engkau. Aku sangat mencintai engkau. Aku ingin engkau melakukan sepuluh sifat yang mana jika engkau melakukannya Allah akan mengampunkan dosa engkau yang pertama dan terakhir, yang terdahulu dan yang terkemudian,yang sengaja dan yang tidak sengaja serta (dosa) yang rahsia dan yang terang-terangan. Sepuluh sifat tersebut

adalah engkau solat sebanyak empat rakaat.. Engkau baca pada setiap rakaat al-Fatiyah dan surah. Apabila engkau sudah selesai membacanya di rakaat pertama, dan ketika itu engkau masih berdiri maka ucapkanlah: Subhanallah Walhamdulillah Walaa Ilaha Illallah Wallahuakbar 15 kali kemudian engkau ruku' dan bacalah (zikir tersebut) sebanyak 10 kali. Kemudian engkau bangkit dari ruku' dan bacalah sebanyak 10 kali. Kemudian engkau sujud dan bacalah 10 kali. Kemudian engkau bangkit dari sujud bacalah sebanyak 10 kali. Kemudian engkau sujud semula,bacalah sebanyak 10 kali. Kemudian engkau bangkit dari sujud bacalah ia sebanyak 10 kali. Kesemuanya adalah 75 kali yang engkau lakukan sebanyak 4 rakaat. Kalau engkau mampu untuk menunaikannya maka lakukanlah sehari sekali. Jika tidak mampu maka lakukan pada setiap hari Jumaat.Kalau tidak mempu juga lakukanlah sebulan sekali. Jika tidak mempu lakukanlah setahun sekali.”

4.4.3 Waktu-waktu yang Dimakruhkan untuk Melakukan Solat Sunat Mutlak

- 1) Selepas Solat Subuh.
- 2) Waktu syuruk.
- 3) Semasa matahari berada tegak di atas kepala.
- 4) Selepas menunaikan Solat Asar sehingga matahari terbenam.
- 5) Ketika matahari kelihatan kekuningan sehingga ia terbenam .

Harus melakukan Solat Sunat Wuduk dan Solat Sunat Tahiyatul Masjid walaupun dalam lima keadaan di atas. Ini kerana Solat Sunat Wuduk bukanlah dalam kategori solat sunat mutlak atau solat sunat tanpa sebab. Sebaliknya, ia termasuk dalam kategori solat-solat sunat yang bersebab. Antara solat sunat yang lain kategori bersebab adalah melaksanakan qada solat bagi Solat Sunat Rawatib yang ditinggalkan yang dia telah menjadikan perkara tersebut sebagai kelaziman.

Manakala keharusan melakukan Solat Sunat Tahiyatul Masjid adalah sebagaimana dalam hadis riwayat Imam al-Bukari (433) dan Imam Muslim (714)

إِذَا دَخَلَ أَحَدُكُمُ الْمَسْجِدَ فَلَا يَمْلِسْ حَتَّىٰ يُصَلِّي
رَجُلَتَيْنِ

Bermaksud: “Apabila seseorang daripada kamu masuk ke dalam masjid, janganlah duduk sehingga dia bersolat sebanyak dua rakaat”.

BAHAGIAN 5

PUASA

BAB 1

PUASA

5.1 PUASA

5.1.1 Pengertian Puasa

Pengertian dari Segi Bahasa: Menahan diri daripada melakukan sesuatu.

Pengertian dari Segi Istilah: Puasa bermaksud menahan diri dari makan dan minum serta dari segala perbuatan yang boleh membatalkan puasa mulai dari terbit fajar hingga terbenam matahari.

Menahan diri daripada makan, minum, bersetubuh, bermula dari terbit fajar (Subuh) sehingga matahari terbenam (Maghrib) dengan niat puasa. Firman Allah SWT dalam Surah al-Baqarah (2) ayat 183:

يَأَيُّهَا الَّذِينَ ءامَنُوا كُتِبَ عَلَيْكُمُ الصِّيَامُ كَمَا
كُتِبَ عَلَى الَّذِينَ مِن قَبْلِكُمْ لَعَلَّكُم تَتَّقُونَ
١٨٣

Maksudnya: Wahai orang-orang yang beriman! Kamu diwajibkan berpuasa sebagaimana diwajibkan atas orang-orang yang dahulu daripada kamu, supaya kamu bertaqwa. (183)

5.1.2 Hukum-hukum Berpuasa

- 1) Wajib.
- 2) Sunat.
- 3) Makruh.
- 4) Haram.

5.1.3 Jenis-jenis Puasa Wajib

- 1) Puasa di bulan Ramadan.
- 2) Puasa Qada yang tertinggal di bulan Ramadan.
- 3) Puasa *Kifarah*.
- 4) Puasa *Nazar*.

5.1.4 Syarat Wajib Puasa

- 1) Islam.
- 2) Baligh.
- 3) Berakal.
- 4) Tiada keuzuran.
- 5) Bermukim.
- 6) Suci daripada haid dan nifas bagi wanita.

5.1.5 Jenis-jenis Puasa Sunat

- 1) Puasa dalam bulan Syaaban.
- 2) Puasa 6 hari dalam bulan Syawal.
- 3) Puasa Arafah pada 9 zulhijah.
- 4) Puasa hari Tasu'a dan Asyura pada 9 dan 10 Muharam.
- 5) Puasa pada hari Isnin dan Khamis.
- 6) Puasa tiga hari daripada tiap-tiap bulan Qamariah pada 13,14 dan 15 haribulan (*Yaumul Bidh*)
- 7) Puasa satu hari dan berbuka satu hari.
- 8) Puasa lapan hari daripada bulan Zulhijah sebelum hari Arafah bagi orang yang sedang mengerjakan haji atau tidak mengerjakan haji.
- 9) Puasa dalam bulan-bulan haram iaitu bulan Zulkaedah, Zulhijah, Muhamram dan Rejab.

5.1.6 Puasa yang Makruh Dilakukan

- 1) Menetapkan hari untuk berpuasa seperti hari Jumaat atau Sabtu atau Ahad sahaja.
- 2) Berpuasa sepanjang tahun.
- 3) Berpuasa pada 15 hingga 30 Syaaban kecuali bagi mereka yang melazimkan puasa Isnin Khamis, puasa nazar atau puasa qada. Larangan berpuasa selepas pertengahan Syaaban hanyalah terpakai bagi mereka yang tidak melazimi puasa sunat.

5.1.7 Puasa yang Haram Dilakukan

- 1) Puasa sunat seorang perempuan tanpa izin suaminya.
- 2) Puasa pada hari syak iaitu pada hari 30 Syaaban.
- 3) Puasa pada hari Raya Aidilfitri Hari Raya Aidiladha dan hari-hari Tasyrik.
- 4) Puasa perempuan haid dan nifas.
- 5) Puasa bagi orang yang bimbang berlakunya mudarat ke atas dirinya kerana berpuasa.

5.1.8 Syarat Sah Berpuasa

- 1) Islam.
- 2) Berakal.
- 3) Bersih daripada haid dan nifas sepanjang hari.
- 4) Niat.

5.1.9 Rukun Berpuasa

- 1) Niat.
- 2) Menahan diri dari perkara-perkara yang membatalkan puasa.

5.1.10 Kelebihan Berpuasa

- 1) Melahirkan perasaan belas kasihan terhadap golongan miskin.
- 2) Mendidik nafsu dan jiwa ke arah kebaikan.
- 3) Dapat merasai apa yang ditanggung oleh golongan miskin.
- 4) Puasa merupakan perbuatan taat kepada Allah SWT.
- 5) Mendidik budi pekerti untuk memiliki sifat-sifat terpuji.
- 6) Puasa mengajar seseorang supaya beramanah terhadap diri sendiri.
- 7) Puasa mengajar kesabaran dan berperaturan.
- 8) Puasa menyebarkan perasaan kasih sayang dan persaudaraan dalam jiwa manusia.
- 9) Berpuasa dapat menjadikan fizikal dan jiwa menjadi sihat.

5.1.11 Perkara-perkara Sunat Bagi Orang Berpuasa

- 1) Melambatkan bersahur.
- 2) Menyegerakan berbuka puasa dan berbuka dengan buah kurma atau makanan yang manis.
- 3) Menjamu orang-orang yang berbuka puasa.
- 4) Mandi junub, haid, dan nifas sebelum fajar.
- 5) Memperbanyakkan ibadah dan berbuat kebaikan.
- 6) Membaca al-Quran.

7) Beriktiakat terutama 10 hari terakhir bulan Ramadan.

5.1.12 Perkara-perkara Makruh Ketika Berpuasa

- 1) Mengeluarkan darah seperti berbekam, derma darah, dialisis atau ujian darah sehingga memudaratkan.
- 2) Berkucup (mukadimah jimak).
- 3) Merasa makanan.
- 4) Bersugi selepas gelincir matahari.
- 5) Mencium wangian.
- 6) Bercakap perkara yang sia-sia.

5.1.13 Perkara-perkara yang Membatalkan Puasa

- 1) Memasukkan sesuatu ke dalam rongga badan dengan sengaja kecuali terlupa.
- 2) Makan atau minum dengan sengaja di siang hari.
- 3) Muntah dengan sengaja.
- 4) Bersetubuh atau keluar mani dengan sengaja.
- 5) Keluar darah haid dan nifas.
- 6) Gila.
- 7) Pitam, mabuk atau pengsan sepanjang hari.
- 8) Murtad.

5.1.14 Perkara-perkara yang Diharuskan Berbuka Puasa

- 1) Musafir.
- 2) Sakit.
- 3) Ibu yang mengandung atau yang menyusukan. anak.
- 4) Orang tua yang tidak mampu berpuasa..
- 5) Orang yang tersangat lapar dan dahaga sehingga kalau diteruskan akan mendatangkan mudarat.

5.1.15 Keistimewaan Bulan Ramadan

- 1) Bulan yang mulia, berkat dan setiap doa akan dimakbulkan.
- 2) Nuzul al-Quran atau al-Quran diturunkan dalam bulan ini.
- 3) Syaitan dibelenggu sepetimana yang disebutkan dalam hadis riwayat al-Bukhari (1899), daripada Abu Hurairah RA, bahawa Nabi SAW bersabda:

إِذَا دَخَلَ شَهْرُ رَمَضَانَ فُتَحَتْ أَبْوَابُ السَّمَاءِ،
وَعُلِقَتْ أَبْوَابُ جَهَنَّمَ، وَسُلْسِلَاتُ الشَّيَاطِينِ

Bermaksud: “Apabila datangnya Ramadhan maka dibuka pintu-pintu syurga, ditutup pintu-pintu neraka dan dibelenggu syaitan-syaitan.”

- 4) Terdapat malam yang mulia iaitu Lailatulqadar.
- 5) Solat sunat tarawih dan zakat fitrah dilaksanakan.

5.1.16 Niat Puasa Ramadan

Niat merupakan perbuatan hati, sedangkan lafaz ucapan lisan untuk membantu hati. Contoh lafaz niat puasa fardu Ramadan adalah seperti berikut:

نَوَيْتُ صَوْمَ غَدِ عَنْ آدَاءِ فَرْضِ شَهْرِ رَمَضَانَ هَذِهِ
السَّنَةِ لِلَّهِ تَعَالَى

*Nawaitu sauma ghadin 'an adaa-i fardi Syahri
Romadoona haazihiis sanati Lillaahi Ta'aala*

Bermaksud: Sahaja aku berpuasa esok hari
bagi menunaikan fardu Bulan Ramadan
tahun ini kerana Allah Taala

5.1.17 Qada Puasa Ramadan

5.1.17.1 Pengertian Qada Puasa Ramadan

Pengertian dari Segi Bahasa: Melaksanakan atau ganti.

Pengertian dari Segi Istilah: Qada Puasa Ramadan bermaksud mengerjakan semula atau menggantikan ibadat puasa ramadan yang tidak sah, tertinggal, atau sengaja ditinggalkan pada hari yang lain.

5.1.17.2 Hukum Qada Puasa Ramadan

Wajib menggantikan puasa Ramadhan bagi yang membatalkan puasa Ramadannya sama ada kerana kezuruan ataupun tanpa sebarang kezuruan. Firman Allah Taala dalam Surah al-Baqarah (2) ayat (184):

أَيَّامًا مَعْدُودَاتٍ فَمَنْ كَانَ مِنْكُمْ
مَرِيضًا أَوْ عَلَى سَفَرٍ فَعِدَّةٌ مِنْ أَيَّامٍ أُخْرَى
وَعَلَى الَّذِينَ يُطِيقُونَهُ فِدْيَةٌ طَعَامٌ
مِسْكِينٌ فَمَنْ تَطَوَّعَ خَيْرًا فَهُوَ خَيْرٌ لَهُو
وَإِنْ تَصُومُوا خَيْرٌ لَكُمْ إِنْ كُنْتُمْ

تَعْلَمُونَ 

Maksudnya: (Puasa yang diwajibkan itu ialah beberapa hari yang tertentu; maka sesiapa di

antara kamu yang sakit, atau dalam musafir, (bolehlah ia berbuka), kemudian wajiblah ia berpuasa sebanyak (hari yang dibuka) itu pada hari-hari yang lain; dan wajib ke atas orang-orang yang tidak terdaya berpuasa (kerana tuanya dan sebagainya) membayar fidyah iaitu memberi makan orang miskin. Maka sesiapa yang dengan sukarela memberikan (bayaran fidyah) lebih dari yang di tentukan itu, maka itu adalah suatu kebaikan baginya; dan (walaupun demikian) berpuasa itu lebih baik bagi kamu (daripada memberi fidyah), kalau kamu mengetahui.

5.1.17.3 Golongan yang Wajib Qada Puasa Ramadan

- 1) Orang sakit yang ada harapan sembuh.
- 2) Orang yang bermusafir (bukan kerana maksiat) melebihi dua marhalah.
- 3) Perempuan yang meninggalkan puasa kerana haid dan nifas.
- 4) Orang yang meninggalkan niat puasa.
- 5) Orang yang sengaja melakukan perkara-perkara yang membatalkan puasa.
- 6) Orang yang pitam/mabuk sewaktu bulan Ramadan.
- 7) Perempuan yang mengandung dan bimbangkan kesihatan dirinya sahaja.

5.1.17.4 Niat Qada Puasa Ramadan

Berniat di dalam hati. Adapun hukum melafazkan niat dengan lisan adalah **sunat** supaya dapat membantu untuk menetapkan niat di dalam hati. Manakala bagi lafaz niat puasa ganti pula hendaklah ditukarkan lafaz أَدَا (adaan) dengan lafaz قَضَاءٌ (qadaan). Oleh yang demikian, lafaz niat bagi puasa ganti ialah seperti berikut:

نَوَيْتُ صَوْمَمْ عَلِيٍّ عَنْ قَضَاءٍ فَرْضِ شَهْرٍ
رمضانَ لِللهِ تَعَالَى

*Nawaitu sauma ghadin 'an qadaa-i
Syahri Romadoona Lillaahi
Ta'ala*

Bermaksud: “Sahaja aku berpuasa esok hari qada menunaikan fardu Bulan Ramadan kerana Allah Taala”.

BAB 2

FIDYAH

5.2 FIDYAH

5.2.1 Pengertian Fidyah

Fidyah ialah sesuatu yang dibayar untuk menebus diri, sama ada dalam bentuk harta atau perbuatan. Ia dilakukan kerana terdapat kekurangan dalam salah satu amal ibadah tertentu.

5.2.2 Dalil Pensyariatan Fidyah

Firman Allah SWT dalam Surah al-Baqarah (2) ayat (184):

أَيَّامًا مَعْدُودَاتٍ فَمَنْ كَانَ مِنْكُمْ مَرِيضًا أَوْ عَلَىٰ
سَفَرٍ فَعِدَّةٌ مِنْ أَيَّامٍ أُخْرَىٰ وَعَلَى الَّذِينَ يُطِيقُونَهُ وَ
فِدْيَةٌ طَاعُمٌ مِسْكِينٌ فَمَنْ تَطَوَّعَ خَيْرًا فَهُوَ خَيْرٌ
لَهُ وَأَن تَصُومُوا حَيْرٌ لَكُمْ إِن كُنْتُمْ تَعَامِلُونَ
١٨٤

Maksudnya: (*Puasa yang diwajibkan itu ialah beberapa hari yang tertentu; maka sesiapa di antara kamu yang sakit, atau dalam musafir, (bolehlah ia berbuka), kemudian wajiblah ia berpuasa sebanyak (hari yang dibuka) itu pada hari-hari yang lain; dan wajib ke atas orang-orang yang tidak terdaya berpuasa (kerana tuanya dan sebagainya) membayar fidyah iaitu memberi makan orang miskin. Maka sesiapa yang*

dengan sukarela memberikan (bayaran fidyah) lebih dari yang di tentukan itu, maka itu adalah suatu kebaikan baginya; dan (walaupun demikian) berpuasa itu lebih baik bagi kamu (daripada memberi fidyah), kalau kamu mengetahui. (184)

5.2.3 Hukum Fidyah

Hukum membayar fidyah adalah WAJIB. Fidyah adalah satu bentuk ibadah *niyabah* (gantian) yang diberi pahala kepada pelakunya.

Ia wajib disempurnakan mengikut bilangan hari yang ditinggalkan. Dengan membayar fidyah tidak bermaksud mereka tidak perlu lagi menggantikan puasanya kerana puasa tersebut tetap wajib digantikan mengikut bilangan hari yang telah ditinggalkannya. Ia juga menjadi satu tanggungan (hutang) kepada Allah SWT sekiranya tidak dilaksanakan.

5.2.4 Sebab-sebab Dikenakan Fidyah

1) Meninggalkan puasa kerana tua.

Orang tua yang tidak mampu berpuasa dan jika mereka berpuasa akan memudaratkan dirinya sendiri dan kesihatan tubuh badannya.

2) Meninggalkan puasa kerana sakit kronik.

Orang yang sakit berpanjangan dan tidak diharapkan boleh sembah berdasarkan pengesahan doktor perubatan.

3) Meninggalkan puasa kerana hamil.

Wanita yang bimbang akan keselamatan ke atas bayi yang dikandungnya seperti dikhawatir berlaku keguguran. Mereka hendaklah membayar fidyah dan juga menggantikan (qada') puasa yang ditinggalkan.

4) Meninggalkan puasa kerana menyusukan anak.

Ibu yang merasa bimbang akan memudaratkan bayi yang disusuinya seperti kurang air susu atau menjelaskan kesihatan bayinya itu. Mereka hendaklah membayar fidyah dan juga menggantikan (qada') puasa yang ditinggalkan.

5) Meninggalkan puasa kerana musafir atau sakit dan tidak qada' puasa pada tahun ia ditinggalkan.

Musafir dan Pesakit yang tidak menggantikan (qada') puasa pada tahun ia ditinggalkan wajib menggantikan (qada'). Sekiranya tidak menggantikan (qada') puasanya sehingga telah memasuki Ramadan berikutnya, ia diwajibkan untuk membayar fidyah dan kekal menggantikan (qada') puasanya.

6) Melambatkan ganti puasa (qada).

Mereka yang melambat-lambatkan ganti (qada') puasanya hingga telah melangkah tahun yang berikutnya (bulan Ramadan) dikenakan denda membayar fidyah dan juga wajib menggantikan (qada') puasa yang ditinggalkan.

7) Orang yang telah meninggal dunia.

Hutang puasa bagi mereka yang telah meninggal dunia hendaklah disempurnakan bayaran fidyahnya oleh waris-warisnya mengikut bilangan hari yang ditinggalkan sebelum pembahagian pusaka dibuat.

5.2.5 Taksiran Fidyah

(Hari yang ditinggalkan) X (Tahun gandaan) X (1 Cupak)
= FIDYAH

5.2.6 Kadar Bayaran Fidyah

- **Contoh Kadar Bayaran Fidyah Majlis Agama Islam Wilayah Persekutuan**

Kadar bayaran fidyah bagi satu hari puasa yang ditinggalkan ialah satu cupak beras yang boleh dibuat zakat fitrah (1/4 gantang Baghdad).

Dalam bentuk nilaiang matawang adalah berdasarkan kepada kadar semasa yang ditetapkan oleh Majlis Agama Islam Wilayah Persekutuan sehingga tahun 2019, secupak beras bersamaan dengan 600 gram dinilai dengan kadar RM 4.00.

5.2.7 Konsep Gandaan bagi Penentuan Bayaran Fidyah

- **Contoh Konsep Gandaan bagi Penentuan Bayaran Fidyah Majlis Agama Islam Wilayah Persekutuan**

Apabila seseorang yang meninggalkan puasa dan tidak menggantikan puasa tersebut, tidak perlu menggandakan fidyah tersebut kecuali bagi mereka yang berkemampuan.

Contoh:

Jika seseorang meninggalkan puasa selama 3 hari dan tidak menggantikan puasanya sehingga 3 kali Bulan Ramadan, maka kadar fidyahnya ialah:

RM 4.00 (1 cupak) X 3 hari X 3 tahun = RM 36.00.

5.2.8 Prosedur Membayar Fidyah di Majlis Agama Islam Negeri

- **Contoh Prosedur Pembayaran Fidyah di Majlis Agama Islam Wilayah Persekutuan**

Cara perkiraan dan jumlah bayaran fidyah boleh dibuat di Unit Sumber Am Bahagian Baitulmal manakala bayaran boleh dibuat secara tunai atau melalui cek/pos berdaftar atas nama MAJLIS AGAMA ISLAM WILAYAH PERSEKUTUAN

Kadar bayaran fidyah berubah mengikut harga yang ditetapkan oleh pemerintah di sesuatu tempat manakala pengiraan kadar fidyah berdasarkan kadar harga beras (makanan asasi penduduk). Beras fidyah tersebut hendaklah diagihkan kepada fakir atau miskin oleh Baitulmal.

5.2.9 Hikmah Pensyariatan Fidyah

- 1) Sebagai bentuk penebusan terhadap ketidaksempurnaan dalam melakukan sesuatu ibadah yang menyebabkan pelakunya berdosa;
- 2) Sebagai jalan keluar yang disediakan oleh Islam bagi mereka yang menghadapi masalah dalam melakukan ibadah; dan
- 3) Sebagai rukhsah (keringanan) bagi mereka yang tidak mampu melaksanakan ibadah secara *badaniyyah* (perbuatan) dengan menggantikannya dalam bentuk *maliyyah* (harta)

BAB 3

KAFARAH

5.3 KAFARAH

5.3.1 Pengertian Kafarah

Pengertian dari Segi Bahasa: Menutup dosa dan diberikan keringanan oleh Allah SWT.

Pengertian dari segi istilah syarak: Kafarah adalah menunaikan kewajipan berbentuk harta atau tubuh badan disebabkan meninggalkan sesuatu tanggungjawab atau kewajipan hukum syarak.

Ia boleh dirumuskan sebagai satu tindakan yang boleh menghapuskan dosa sama ada dengan membebaskan hamba, bersedekah atau berpuasa dengan syarat-syarat tertentu.

5.3.2 Dalil Pensyariatan Kafarah

Dalam Al-Quran, Firman Allah SWT dalam Surah al-Maidah (5) ayat 89:

لَا يُؤَاخِذُكُمُ اللَّهُ بِاللَّغْوِ فِي أَيْمَانِكُمْ وَلَكِنْ
يُؤَاخِذُكُمْ بِمَا عَقَدْتُمُ الْأَيْمَانَ فَكَفَرْتُهُ إِطْعَامٌ
عَشَرَةَ مَسَكِينٍ مِّنْ أَوْسَطِ مَا تُطْعِمُونَ أَهْلِيكُمْ
أَوْ كِسْوَتُهُمْ أَوْ تَحْرِيرُ رَقَبَةٍ فَمَنْ لَمْ يَجِدْ فَصِيَامُ
ثَلَاثَةَ أَيَّامٍ ذَلِكَ كَفَرَةُ أَيْمَانِكُمْ إِذَا حَلَفْتُمْ

وَاحْفَظُوا أَيْمَنَكُمْ كَذَلِكَ يُبَيِّنُ اللَّهُ لَكُمْ
 ٨٩
 إِيمَانَهُ لَعَلَّكُمْ تَشْكُرُونَ

Maksudnya: Kamu tidak dikira salah oleh Allah tentang sumpah-sumpah kamu yang tidak disengajakan (untuk bersumpah), akan tetapi kamu dikira salah olehNya dengan sebab sumpah yang sengaja kamu buat dengan bersungguh-sungguh. Maka bayaran dendanya ialah memberi makan sepuluh orang miskin dari jenis makanan yang sederhana yang kamu (biasa) berikan kepada keluarga kamu, atau memberi pakaian untuk mereka, atau memerdekan seorang hamba. Kemudian sesiapa yang tidak dapat (menunaikan denda yang tersebut), maka hendaklah ia berpuasa tiga hari. Yang demikian itu ialah denda penebus sumpah kamu apabila kamu bersumpah. Dan jagalah - peliharalah sumpah kamu. Demikianlah Allah menerangkan kepada kamu ayat-ayatNya (hukum-hukum ugamaNya) supaya kamu bersyukur. (89)

Firman Allah SWT dalam Surah al-Mujaadalah (58) ayat 3-4:

وَالَّذِينَ يُظْلِمُونَ مِن نَّسَاءِهِمْ ثُمَّ يَعُودُونَ لِمَا قَالُوا
 فَتَحْرِيرُ رَقَبَةٍ مِّنْ قَبْلِ أَنْ يَتَمَاسَّ ذَلِكُمْ
 ۝
 ثُوَعْظُونَ بِهِ وَاللَّهُ بِمَا تَعْمَلُونَ حَسِيرٌ

فَمَنْ لَمْ يَجِدْ فَصِيَامُ شَهْرَيْنِ مُتَّابِعَيْنِ مِنْ قَبْلِ أَنْ
يَتَمَاسَّاً فَمَنْ لَمْ يَسْتَطِعْ فِإِطْعَامُ سِتِّينَ مِسْكِينًا
ذَلِكَ لِتُؤْمِنُوا بِاللَّهِ وَرَسُولِهِ وَتِلْكَ حُدُودُ اللَّهِ
وَلِلْكُفَّارِينَ عَذَابٌ أَلِيمٌ

Maksudnya: Dan orang-orang yang "ziharkan" isterinya, kemudian mereka berbalik dari apa yang mereka ucapkan (bahawa isterinya itu haram kepadanya), maka hendaklah (suami itu) memerdekaan seorang hamba sebelum mereka berdua (suami isteri) bercampur. Dengan hukum yang demikian, kamu diberi pengajaran (supaya jangan mendekati perkara yang mungkar itu). Dan (ingatlah), Allah Maha Mendalam PengetahuanNya akan apa yang kamu lakukan. (3) Kemudian, sesiapa yang tidak dapat (memerdekaan hamba), maka hendaklah ia berpuasa dua bulan berturut-turut sebelum mereka (suami isteri) itu bercampur. Akhirnya sesiapa yang tidak sanggup berpuasa, maka hendaklah ia memberi makan enam puluh orang miskin. Ditetapkan hukum itu untuk membuktikan iman kamu kepada Allah dan RasulNya (dengan mematuhi perintahNya serta menjauhi adat Jahiliyah). Dan itulah batas-batas hukum Allah; dan bagi orang-orang yang kafir disediakan azab seksa yang tidak terperinci sakitnya. (4)

Hadis riwayat Imam Muslim (1650), daripada Abu Hurairah RA bahawa Rasulullah SAW bersabda:

مَنْ حَلَفَ عَلَىٰ يَمِينٍ، فَرَأَىٰ عَيْرَهَا خَيْرًا مِّنْهَا،
فَلْيُكَفِّرْ عَنِ الْيَمِينِ، وَلْيُعْلَمْ

Bermaksud: “Sesiapa yang bersumpah (untuk melakukan sesuatu), kemudian dia berpendapat bahawa keadaan (perkara) sebaliknya lebih baik daripada melakukan sumpah itu, maka hendaklah dia membayar kafarah sumbahnya dan bolehlah dilakukan (apa yang dianggapnya lebih baik itu)”.

5.3.3 Hukum Membayar Kafarah

Hukum membayar kafarah adalah wajib. Semua bentuk kesalahan yang melibatkan kafarah wajib ditunaikan mengikut ketetapan bagi setiap kesalahan.

Ini kerana semua kesalahan tersebut telah dinyatakan oleh nas mutawatir daripada al-Quran dan al-Hadis jika dilakukan akan menyebabkan pihak yang bersalah dikenakan kafarah.

5.3.4 Perkara-perkara yang Menyebabkan Kafarah Dikenakan

- 1) Membatalkan puasa Bulan Ramadan dengan bersetubuh.

Orang yang melakukan persetubuhan pada siang hari bulan Ramadan dikenakan kafarah iaitu berpuasa selama dua bulan berturut-turut atau jika tidak mampu berpuasa hendaklah memberi makan kepada 60 orang fakir miskin.

2) Zihar.

Seorang suami yang melakukan zihar iaitu melafazkan sesuatu yang menyamakan mana-mana anggota zahir isteri dengan anggota wanita yang mahram secara kekal (*mu'abbad*) wajib dikenakan kafarah. Hukum zihar adalah haram dan haram bagi suami menyetubuhi isterinya kecuali setelah ditunaikan kafarah. Kafarah zihar berpuasa selama dua bulan berturut-turut atau jika tidak mampu berpuasa hendaklah memberi makan 60 orang fakir miskin.

3) Melanggar sumpah.

Orang yang melanggar sumpah adalah berdosa dan wajib membayar kafarah. Kafarah melanggar sumpah adalah dengan memberi makan 10 orang fakir miskin atau memberi pakaian kepada 10 orang fakir miskin.

4) Tidak menunaikan nazar.

Orang yang tidak menunaikan nazarnya wajib membayar kafarah. Kafarah nazar adalah dengan memberi makan 10 orang fakir miskin atau memberi pakaian kepada 10 orang fakir miskin.

5) *Ila'*

Seorang suami yang melakukan *ila'* iaitu bersumpah untuk tidak menyetubuhi isterinya selama tempoh lebih dari empat bulan atau tanpa menyebutkan tempoh atau selama-lamanya wajib membayar kafarah. Kafarahnnya adalah sama dengan kafarah sumpah dan nazar iaitu memberi makan kepada 10 orang fakir miskin atau memberi pakaian kepada 10 orang fakir miskin.

6) Persetubuhan isteri ketika haid.

Bersetubuh dengan tidak sengaja kerana tidak tahu bahawa isteri dalam keadaan haid atau tidak, dimaafkan.

Manakala bersetubuh dengan sengaja dan mengetahui bahawa isteri dalam keadaan haid adalah haram. Kafarah bagi mereka yang melakukan persetubuhan ketika haid secara sengaja adalah sunat sahaja. Sekiranya, yang melakukan persetubuhan ini adalah daripada golongan yang berkemampuan, kami galakkan untuk membayar kafarah sebanyak satu dinar emas, mengikut nilai harga semasa. Selain itu, hendaklah memohon keampunan kepada Allah SWT kerana melanggar larangan syariat.

5.3.5 Kadar Jenis-jenis Kafarah

Jenis-jenis kafarah yang berkaitan dengan memberi makan kepada fakir miskin (bersedekah) ialah:

- a) **Kafarah kerana membatalkan puasa bulan ramadan dengan bersetubuh dan zihar.**
 - 1) Kafarah yang dikenakan: Wajib memberi makan 60 orang fakir miskin.
(Anggaran Kadar kafarah semasa: RM 10.00 x 60 orang = RM 600.)
 - 2) Sekiranya tidak mampu berpuasa 2 bulan berturut-turut.
- b) **Kafarah melanggar sumpah, tidak menunaikan nazar dan melakukan *ila'*.**
 - 1) Kafarah yang dikenakan: Memberi makan sehingga kenyang 10 orang fakir miskin.

(Anggaran kadar kafarah semasa: RM 10.00 x 10 orang = RM 100).

atau

- 2) Kafarah yang dikenakan: Memberi pakaian kepada fakir miskin.

(Anggaran kadar kafarah semasa: RM 60.00 x 10 orang = RM 600).

- c) **Kafarah persetubuhan isteri ketika haid.**

Tidak diwajibkan membayar kafarah.

- 1) Walaubagaimanapun sekiranya pelaku ingin membayarnya sebagai langkah berjaga-jaga ialah dengan kadar satu (1) Dinar* atau $\frac{1}{2}$ Dinar mengikut harga semasa.
- 2) Satu (1) Dinar bersamaan 4.25 g emas sebagaimana yang dinyatakan Dr. Wahbah Az-Zuhaili di dalam kitab *Al-Fiqhul Islami Wa Adillatuhu*.

5.3.6 Hikmah Pensyariatan Kafarah

- 1) Menjadi penyebab bagi pesalah untuk bertaubat.
- 2) Meringankan bebanan rasa bersalah kerana melakukan maksiat.
- 3) Mengingatkan agar manusia tidak boleh mengambil mudah dengan peraturan dan hukum-hukum-Nya.

BAHAGIAN 6

ZAKAT

6. ZAKAT

6.1 Pengenalan

Zakat merupakan salah satu pengabdian diri terhadap Allah SWT dengan cara mengeluarkan harta untuk diberikan kepada orang lain yang kurang bernasib baik seperti fakir miskin agar dapat turut bersama dalam mengecapai nikmat Allah SWT. “Seumpama tangan yang memberi itu lebih baik daripada yang menerima”. Zakat juga membersihkan harta benda daripada perkara-perkara yang boleh merosakkan.

6.2 Pengertian Zakat

Pengertian dari Segi Bahasa: Bertambah dan subur.

Berdasarkan firman Allah SWT,dalam Surah asy-Syams (91) ayat 9:

فَذُلِّلَ مَنْ زَكَّاهَا ﴿٩﴾

Maksudnya: Sesungguhnya berjayaalah orang yang menjadikan dirinya - yang sedia bersih - bertambah-tambah bersih (dengan iman dan amal kebajikan), (9)

Pengertian dari Segi Istilah: Zakat adalah mengeluarkan harta tertentu dengan kadar tertentu mengikut syarat-syarat tertentu untuk diagihkan kepada golongan tertentu.

Mengeluarkan zakat juga bererti membersihkan harta daripada syubhab. Dengan kata lain, ia akan mengeluarkan hak orang lain yang ada dalam harta berkenan terutamanya hak orang yang benar-benar berhajat dan memerlukannya.

6.3 Dalil Wajib Zakat

Firman Allah SWT, dalam Surah at-Taubah (9) ayat 103:

خُذْ مِنْ أَمْوَالِهِمْ صَدَقَةً تُظَهِّرُهُمْ وَتُرْكِيْهِمْ بِهَا وَصَلِّ
عَلَيْهِمْ إِنَّ صَلَوةَكَ سَكُونٌ لَّهُمْ وَاللَّهُ سَمِيعٌ عَلِيمٌ
١٠٣

Maksudnya: Ambilah (sebahagian) dari harta mereka menjadi sedekah (zakat), supaya engkau membersihkan mereka (dari dosa) dan mensucikan mereka (dari akhlak yang buruk); dan doakanlah untuk mereka, kerana sesungguhnya doamu itu menjadi ketenteraman bagi mereka. Dan (ingatlah) Allah Maha Mendengar, lagi Maha Mengetahui. (103)

Dalam hadis yang diriwayatkan Imam al-Bukhari (25) dan Imam Muslim (22):

عَنْ ابْنِ عُمَرَ رَضِيَ اللَّهُ عَنْهُمَا أَنَّ رَسُولَ اللَّهِ صَلَّى اللَّهُ عَلَيْهِ وَسَلَّمَ قَالَ : أَمْرَتُ أَنْ أُقَاتِلَ النَّاسَ حَتَّى يَشْهَدُوا أَنْ لَا إِلَهَ إِلَّا اللَّهُ وَأَنَّ مُحَمَّداً رَسُولُ اللَّهِ، وَيُؤْكِلُوا الصَّلَاةَ وَيُؤْتُوا الزَّكَاةَ، فَإِذَا فَعَلُوا ذَلِكَ عَصَمُوا مِنِّي دِمَاءَهُمْ وَأَمْوَالَهُمْ إِلَّا بِحَقِّ الْإِسْلَامِ وَحِسَابُهُمْ عَلَى اللَّهِ تَعَالَى

Bermaksud: Dari Ibnu Umar RA, bahawa Rasulullah SAW bersabda: Aku diperintahkan untuk memerangi manusia hingga mereka bersaksi bahawa tidak ada Tuhan selain Allah dan sesungguhnya Muhammad itu adalah pesuruh Allah, melaksanakan solat, menunaikan zakat. Jika mereka melakukan hal itu maka darah dan harta mereka akan dilindungi kecuali dengan hak Islam dan perhitungan mereka ada pada Allah Taala.

6.4 Kepentingan Mengeluarkan Zakat

- 1) Mengeluarkan hak orang lain yang dalam harta berkenaan terutamanya hak orang yang benar-benar berhajat dan memerlukan.
- 2) Amalan berzakat boleh membiasakan diri pengeluaranya bersifat pemurah dan suka berkorban.
- 3) Amalan berzakat juga boleh membuang, menghakis atau mengikis sifat kedekut dan bakhil. Hakikat ini akan dirasai oleh pengeluar zakat tersebut dan memberikan kesedaran bahawa berzakat tidak mengurangkan harta bahkan akan menambahnya.
- 4) Zakat boleh menguatkan hubungan persaudaraan dan kasih sayang antara pengeluar zakat dengan orang lain. Apabila kesedaran ini wujud dalam masyarakat, setiap orang Islam mampu menunaikan kewajipan mengeluarkan zakat kepada pihak yang berhak menerimanya. Ianya dapat dilihat betapa eratnya jalinan kasih sayang sesama individu di kalangan orang Islam dan masyarakat keseluruhannya.
- 5) Zakat berperanan untuk memastikan sesebuah masyarakat itu menjadi lebih sempurna. Terdapat pelbagai keadaan dan unsur-unsur yang mewujudkan jurang perbezaan taraf sosial masyarakat. Perbezaan taraf sosial menambahkan bilangan orang yang memerlukan bantuan serta golongan

fakir. Maka zakat berfungsi untuk memelihara masyarakat daripada jurang perbezaan taraf sosial yang ketara ini.

- 6) Zakat berperanan bagi menangani masalah kemiskinan. Antara faktor utama yang menyumbang kepada kemiskinan ialah tiada punca pendapatan. Maka zakat adalah antara instrumen yang boleh membantu mewujudkan peluang pekerjaan melalui bidang perniagaan dan sebagainya.
- 7) Zakat merupakan cara yang dapat membersihkan hati daripada sifat-sifat keji yang memberi kesan kepada masyarakat, iaitu sifat berdendam, iri hati dan hasad dengki.

6.5 Syarat Wajib Zakat

- 1) Islam (bukan Islam tidak diwajibkan berzakat)
- 2) Merdeka (golongan hamba tidak wajib mengeluarkan zakat)
- 3) Sempurna pemilikan harta.
- 4) Cukup nisab.
- 5) Cukup haul.
- 6) Harta yang berkembang atau memberi pulangan.

6.6 Cara Membayar Zakat

Apabila sesuatu harta cukup nisabnya atau lebih, dan genap setahun, zakat wajib dikeluarkan kepada mereka yang berhak menerimanya sekiranya terdapat dua syarat berikut:

- 1) Pemiliknya mampu mengeluarkan zakat tersebut iaitu apabila harta berkenaan ada bersama-sama. Tetapi jika harta itu tidak ada bersama-sama sama ada di tempat lain atau ada yang berhutang kepadanya, zakat tersebut tidak wajib disegearkan kecuali dia memiliki wang sebanyak kadar zakat piutangnya itu.

- 2) Ada golongan yang berhak menerima zakat tersebut atau ada pihak berkuasa yang diberi tugas mengutipnya. Akan tetapi jika yang berhak menerimanya tidak ada, iaitu lapan golongan seperti yang disebut dalam al-Quran atau tiada orang yang menguruskan kutipan bagi pihak mereka, dia boleh menangguhkan zakat tersebut sehingga didapati penerima penerima yang berhak atau pihak yang menguruskan kutipannya wujud.

6.7 Kesan Menangguhkan Zakat

1) Berdosa.

Perbuatan menangguhkan zakat adalah berdosa kerana ia menahan hak mereka yang memerlukan harta tersebut. Akan tetapi sekiranya kelewatannya tersebut disebabkan oleh kerana dia mengutamakan keluarga, jiran atau sesiapa sahaja di sekelilingnya, maka kelewatannya dibolehkan.

2) Menjadi Tanggungan.

Hak penerima zakat yang ada dalam harta berkenaan akan menjadi beban tanggungan pemiliknya. Pemilik harta bertanggungjawab menggantikan hak penerima sekalipun semua hartanya rosak binasa.

Hal ini demikian kerana kecuaian melengah-lengahkan pemberian zakat tanpa halangan. Kesannya pemilik harta terpaksa menanggung akibat kecuaian itu demi memelihara kepentingan hak penerima zakat sekalipun kelewatannya tersebut disebabkan menunggu kedatangan penerima zakat.

6.8 Wakil Menangguhkan Pengagihan Zakat

Pihak yang diwakilkan untuk membahagikan zakat tidak harus melengahkan pengagihan zakat kepada para asnaf.

6.9 Zakat yang Dikeluarkan Sebelum Waktu Wajib

Sekiranya seseorang itu mengeluarkan zakat sebelum cukup nisabnya, ia tidak dikira sebagai zakat. Ini bermakna apabila hartanya mencukupi nisab dan genap setahun, dia wajib mengeluarkan zakat tanpa mengambil kira harta yang telah dikeluarkan sebelum itu. Hal ini kerana nisab yang menjadi sebab wajibnya zakat tidak wujud sebelum itu.

Manakala zakat yang dikeluarkan setelah cukup nisab tetapi belum cukup tempoh setahun ia dikira sebagai zakat. Ini bermakna dia tidak wajib mengeluarkan zakat hartanya lagi apabila tempoh nisabnya cukup setahun nanti.

6. 10 Syarat Sah Zakat Sebelum Waktu Wajib

- 1) Pemilik harta masih berkelayakan wajib berzakat hingga akhir tempoh setahun.**

Jika dia hilang kelayakan tersebut, umpamanya mati sebelum cukup tempoh setahun maka harta yang dikeluarkan sebelum waktu wajib itu, tidak dikira zakat. Justeru, para waris boleh menuntut harta zakat itu semula sekiranya penerima mengetahui bahawa harta tersebut adalah sebelum waktu wajib

- 2) Keadaan harta masih kekal hingga akhir tempoh setahun.**

Jika harta itu rosak atau harta itu dijual tetapi bukan untuk diniagakan, maka harta yang dikeluarkan sebelum waktu wajib itu tidak dikira zakat, dan dia boleh menuntut semula sekiranya penerima mengetahui bahawa harta tersebut ialah zakat sebelum waktu wajib.

3) Penerima harta zakat sebelum waktu wajib itu masih berhak hingga akhir tempoh setahun.

Jika dalam tempoh setahun berlaku keadaan yang menjadikan orang yang tidak berhak, seperti menjadi kaya bukan dengan sebab zakat yang diberikan kepadanya atau murtad. Maka zakat harta yang dikeluarkan sebelum waktu wajib itu tidak dikirakan sebagai zakat.

6.11 Berzakat Melalui Pemerintah

1) Harta batin.

Seperti emas dan perak, barang-barang perniagaan dan harta galian. Pemilik harta tersebut boleh mengeluarkan zakat terus kepada golongan yang berhak tanpa perantaraan pihak pemerintah. Malah pemerintah tidak harus menuntutnya kerana harta itu adalah harta batin yang pemiliknya lebih mengetahui keadaan dan jumlahnya.

2) Harta zahir.

Seperti binatang ternakan, tanam-tanaman dan buah-buahan. Pemilik harta ini wajib menyerahkan zakatnya kepada pihak pemerintah sekiranya dia dituntut berbuat demikian. Jika pemerintah tidak menuntut untuk berbuat demikian, dia boleh memilih sama ada memberikan sendiri zakat hartanya kepada golongan yang berhak, atau memilih untuk menyerahkan kepada pemerintah. Ini kerana pemerintah lebih mengetahui dan mampu mengagihkan kepada golongan yang berhak.

3) Berwakil zakat.

Pemilik harta juga boleh berwakil kepada orang lain mengeluarkan zakat hartanya. Semua pelaksanaan tanggungjawab yang berkaitan dengan harta harus diwakilkan kepada orang lain.

4) Berniat zakat.

Wajib berniat ketika mengeluarkan zakat untuk membezakan daripada kafarah dan sedekah yang lain.

Hal ini berdasarkan hadis riwayat Imam al-Bukhari (54), daripada Umar bin al-Khattab RA:

الأَعْمَالُ بِالنِّيَّةِ،

Bermaksud: “Segala perbuatan (amalan) itu adalah dengan niat,”

Pemilik harta yang mengeluarkan zakatnya sendiri hendaklah berniat ketika menyerahkan kepada penerimanya, atau mengasingkan kadar yang hendak dikeluarkan daripada baki hartanya. Begitu juga dengan pemilik harta yang berwakil dan ketika menyerahkan zakatnya kepada pihak pemerintah, niatnya itu memadainya. Namun adalah afdal, sekiranya wakil turut berniat ketika melakukan pengagihan. Sekiranya, pemilik harta tidak berniat ketika menyerahkan zakat, maka niat oleh wakil dan pemerintah tidak memadai.

6.12 Golongan Asnaf (Penerima Zakat)

Sebagaimana firman Allah SWT dalam Surah at-Taubah (9) ayat 60:

إِنَّمَا الْصَّدَقَاتُ لِلْفُقَرَاءِ وَالْمَسَاكِينِ وَالْعَمِيلِينَ عَلَيْهَا
وَالْمُؤْلَفَةُ قُلُوبُهُمْ وَفِي الرِّقَابِ وَالْغَرِيمَينَ وَفِي سَبِيلِ اللَّهِ
وَأَبْنَى السَّبِيلِ فَرِيضَةٌ مِّنَ اللَّهِ وَاللَّهُ عَلِيمٌ حَكِيمٌ



Bermaksud: Sesungguhnya sedekah-sedekah (zakat) itu hanyalah untuk orang-orang fakir, dan orang-orang miskin, dan amil-amil yang mengurusnya, dan orang-orang muallaf yang dijinakkan hatinya, dan untuk hamba-hamba yang hendak memerdekaan dirinya, dan orang-orang yang berhutang, dan untuk (dibelanjakan pada) jalan Allah, dan orang-orang musafir (yang keputusan) dalam perjalanan. (Ketetapan hukum yang demikian itu ialah) sebagai satu ketetapan (yang datangnya) dari Allah. Dan (ingatlah) Allah Maha Mengetahui, lagi Maha Bijaksana. (60)

Antara golongan-golongan yang layak menerima zakat berdasarkan ayat al-Quran tersebut adalah seramai lapan golongan, lapan golongan tersebut adalah seperti berikut:

1) **Fakir.**

Fakir ialah golongan yang tidak mempunyai harta yang dapat menampung keperluan makanan, pakaian dan kediamannya. Sebagai contoh, dia hanya mendapat tiga ringgit sehari daripada sepuluh ringgit yang diperlukan.

2) **Miskin.**

Miskin ialah orang yang mempunyai harta tetapi tidak cukup untuk menampung keperluannya. Sebagai contoh, dia memerlukan sepuluh ringgit sehari tetapi pendapatannya lapan ringgit sahaja.

3) **Amil.**

Amil ialah pekerja yang berjawatan dan pemungut zakat yang ditugaskan oleh pemerintah untuk mengumpul dan mengagihkan zakat. Mereka ini diberikan ganjaran yang setimpal dengan tugas yang dilakukan dan tidak boleh lebih daripada itu.

4) Mualaf.

Mereka yang baru memeluk Islam. Diharap dengan pemberian zakat akan menguatkan pegangan mereka terhadap Islam.

5) Hamba (*Al-Riqab*).

Hamba yang layak menerima zakat ialah orang yang ingin memerdekaan dirinya daripada perhambaan iaitu membuat perjanjian dengan tuannya yang akan memerdekaannya apabila dia dapat memberikan sejumlah harta kepada tuannya.

6) Golongan yang berhutang (*Gharimin*).

Orang yang berhutang bermaksud mereka yang dibebani hutang dan tidak mampu melunaskannya. Mereka diberikan harta zakat yang mencukupi untuk melunaskan hutang yang telah sampai tempohnya dan menampung keperluan makan minum, pakaian dan tempat kediaman dengan syarat mereka berhutang untuk tujuan yang halal. Zakat tidak boleh diberikan kepada mereka yang berhutang untuk tujuan yang tidak halal kecuali mereka bertaubat dan dipercayai mereka benar-benar bertaubat.

7) Untuk jalan Allah (*Fi Sabillillah*).

Jalan Allah bermaksud sukarelawan yang sedang berjuang mempertahankan umat Islam tanpa imbuhan dan gaji. Mereka dan tanggungannya layak diberikan zakat yang mencukupi selama ketiadaannya sehingga mereka kembali ke pangkuhan keluarga sekalipun mereka kaya.

8) Musafir (*Ibnu Sabil*).

Musafir ialah orang yang dalam perjalanan yang harus atau yang ingin bermusafir untuk tujuan yang diharuskan oleh syarak sekalipun untuk melancong.

6.13 Jenis-jenis Zakat



Gambar 114: Pembayaran Zakat Melalui Amil Pelantikan Pusat Zakat

6.13.1 Zakat Fitrah

6.13.1.1 Pengertian Zakat Fitrah

Zakat Fitrah ialah zakat diri yang difardhukan ke atas setiap individu lelaki dan perempuan muslim yang berkemampuan dengan syarat-syarat yang ditetapkan.

6.13.1.2 Syarat Wajib Zakat Fitrah

Orang Islam yang wajib mengeluarkan zakat fitrah untuk diri dan keluarga atau tanggungannya ialah:

- 1) Individu yang mempunyai lebihan makanan atau hartanya dari keperluan tanggungannya pada malam dan pagi hari raya.

- 2) Anak yang lahir sebelum matahari jatuh pada akhir bulan Ramadhan dan hidup selepas terbenam matahari.
- 3) Memeluk Islam sebelum terbenam matahari pada akhir bulan Ramadhan dan berkekalan Islamnya.
- 4) Seseorang yang meninggal selepas terbenam matahari akhir Ramadhan.

6.13.1.3 Kaedah Pembayaran Zakat Fitrah

Kaedah pembayaran zakat fitrah yang ditentukan ialah makanan asasi daripada jenis yang mengenyangkan. Perkara ini dijelaskan melalui hadis riwayat Imam al-Bukhari (1503), daripada Abdullah binUmar RA:

فَرِضَ رَسُولُ اللَّهِ صَلَّى اللَّهُ عَلَيْهِ وَسَلَّمَ
 رِغَةً الْفِطْرِ صَاعًا مِنْ تَمْرٍ، أَوْ صَاعًا
 مِنْ شَعِيرٍ عَلَى الْعَبْدِ وَالْخِرْ، وَالذَّكَرِ
 وَالْأُنْثَى، وَالصَّغِيرِ وَالكَبِيرِ مِنَ
 الْمُسْلِمِينَ، وَأَمْرَ بِهَا أَنْ تُؤَدَّى قَبْلَ
 خُرُوجِ النَّاسِ إِلَى الصَّلَاةِ.

Bermaksud: “Rasulullah SAW telah mewajibkan Zakat Fitrah [sempena berakhirnya] Ramadan [dengan kadar]

secupak tamar atau secupak bijirin ke atas [setiap] hamba, orang yang merdeka, lelaki dan perempuan, sama ada kanak-kanak atau orang dewasa dalam kalangan orang-orang Islam, da telah menyuruh menunaikat Zakat Fitrah tersebut sebelum orang keluar ke masjid (tunaikan Solat Aidilfitri)".

6.13.1.4 Kadar Zakat Fitrah

Kadar fitrah ialah satu gantang Baghdad bersamaan 2.70 kg beras atau senilai dengannya. Kadar ini berdasarkan ketentuan oleh Pihak Berkuasa Agama Negeri-Negeri.

6.13.1.5 Waktu Menunaikan Zakat Fitrah

Waktu menunaikan zakat fitrah terbahagi kepada lima:

- 1) **Waktu wajib.**
Apabila terbenam matahari akhir Ramadhan sehingga terbit matahari satu Syawal.
- 2) **Waktu afdal.**
Sebelum sembahyang Hari Raya
- 3) **Waktu sunat.**
Sepanjang bulan Ramadhan
- 4) **Waktu makruh.**
Selepas sembahyang hari raya sehingga terbenam matahari satu Syawal.
- 5) **Waktu haram.**
Selepas terbenam matahari satu Syawal.

6.13.2 Zakat Pendapatan

6.13.2.1 Pengertian Pendapatan (*al-Mal al-Mustafad*)

Harta pendapatan bermaksud semua jenis upah, imbuhan, bayaran atau hasil yang diperolehi daripada kerja atau usaha yang dilakukan sama ada secara tetap atau sekali sekala.

6.13.2.2 Dalil Wajib Zakat

Firman Allah SWT dalam Surah al-Baqarah (2) ayat 267:

يَأَيُّهَا الْذِينَ ءَامَنُوا أَنفِقُوا مِنْ
طَبِيعَتِ مَا كَسَبْتُمْ وَمِمَّا أَخْرَجْنَا
لَكُمْ مِنَ الْأَرْضِ وَلَا تَيْمِمُوا
الْحَسِيبَ مِنْهُ تُنْفِقُونَ وَلَسْتُمْ
بِإِخْدِيهِ إِلَّا أَنْ تُعْمِضُوا فِيهِ
وَاعْلَمُوا أَنَّ اللَّهَ عَنِ الْحَمْدِ
۝

Maksudnya: Wahai orang-orang yang beriman! Belanjakanlah (pada jalan Allah) sebahagian dari hasil usaha kamu yang baik-baik, dan sebahagian dari apa yang Kami keluarkan dari bumi untuk kamu. Dan janganlah kamu sengaja memilih yang buruk

daripadanya (lalu kamu dermakan atau kamu jadikan pemberian zakat), padahal kamu sendiri tidak sekali-kali akan mengambil yang buruk itu (kalau diberikan kepada kamu), kecuali dengan memejamkan mata padanya. Dan ketahuilah, sesungguhnya Allah Maha Kaya, lagi sentiasa Terpuji. (267)

Allah SWT menjelaskan bahawa segala hasil usaha yang baik itu adalah diwajibkan zakat. Oleh itu, bagi sesiapa yang menjadikan makan gaji itu sebagai satu profesion, maka itu juga termasuk dalam ‘hasil usaha’ yang wajib dizakat.

6.13.2.3 Jenis-Jenis Harta Pendapatan

Ulama’ mutaakhirin membahagikan Mal al-Mustafad kepada kategori berikut:

- a) **Zakat Harta Penggajian dan Upah Kerja** (كَسْبُ الْعَمَلِ وَالرَّوَاتِبِ وَالْأُجُورِ)

Ia bermaksud “Harta yang diperolehi oleh seseorang hasil daripada pekerjaan yang dilakukannya untuk pihak lain sama ada kerajaan, swasta atau individu dengan melakukan sebarang usaha dalam bentuk fizikal, sumbangan idea atau kedua-duanya dalam tempoh yang dipersetujui bersama, sama ada secara tahunan, bulanan, mingguan, harian atau jam.” Contoh :

1) Gaji, upah, bonus, tuntukan kerja lebih masa, gratuity, pampasan, pencen, hadiah , anugerah & insentif, hasil ESOS (Skim pilihan sahan pekerja) dan sebagainya.

2) Apa-apa hasil yang diperolehi dengan sebab pekerjaan atau pengajian.

b) **Zakat Harta Pemberian atau Sumbangan (العطية)**

Ia bermaksud “Harta yang diperolehi oleh seseorang bukannya hasil daripada pekerjaan yang dilakukannya. Ia merupakan pemberian yang diterima samada daripada individu atau institusi dalam tahun semasa ” dalam berbentuk harta *zakawi* yang bukan dalam bentuk harta tetap (*al ‘aqar*) dan bukan merupakan nafkah wajib.” Contoh :

- 1) Hibah, hadiah, saguhati, pencen pasangan, sedekah
- 2) Pampasan, harta pusaka, mahar perkahwinan

c) **Zakat Harta Kerja Bebas (المَهْنُ الْأُخْرَى)**

Iaitu harta yang diperolehi oleh seseorang hasil daripada pekerjaan yang dilakukannya sendiri tanpa ada kaitan dengan pihak lain dalam bentuk kerja bebas atau perkhidmatan profesional.

Contoh zakat harta kerja bebas (الجهنُونُ الْخَرَّةُ)

- 1) Bayaran perkhidmatan konsultansi profesional seperti peguam, arkitek, doktor klinik atau hospital swasta dan sebagainya.
- 2) Bayaran projek yang diterima oleh kontraktor dan keuntungan projek bermusim.
- 3) Komisyen dan pendapatan sampingan - pendapatan dari jualan insurans, takaful, unit *trust* dan seumpamanya.
- 4) Bayaran royalti atau komisyen yang diterima hasil penulisan, penerbitan, aktiviti seni dan sebagainya.
- 5) Hasil tunai sekali sekala seperti hasil pembiayaan semula aset atau hasil jualan aset tetap atau pinjaman bank yang tiada tujuan dan lain-lain.

d) **Zakat Harta al-Mustaghallat** (المُسْتَغَلَّاتُ)

ialitu segala harta yang diperolehi daripada harta yang tidak diwajibkan zakat tetapi mendatangkan pulangan atau pendapatan dengan cara sewaan atau jualan hasilnya. Contoh:

- 1) Hasil sewaan rumah, bangunan, kilang, premis, perniagaan dan sebagainya.
- 2) Hasil sewaan kenderaan, pengangkutan, peralatan, aset atau sebagainya.

3) Hasil yang dikeluarkan oleh binatang ternakan seperti susu, telur, madu dan sebagainya yang dijual

e) **Tolakan Zakat dan Keperluan Asasi (Had Kifayah)**

Mengikut Fatwa Negeri Selangor bahawa keperluan asasi yang sangat dihajari oleh manusia adalah terlepas daripada kewajipan zakat.

Asas had al-kifayah ialah segala keperluan asasi yang mesti ada pada diri seseorang dan tanggungannya seperti isteri, anak-anak, ibubapa, adik beradik dan sebagainya.

Keperluan asasi yang diambil kita dalam penentuan Had al-Kafayah adalah seperti berikut :

- 1) Perlindungan.
- 2) Makanan dan minuman.
- 3) Pakaian.
- 4) Perubatan.
- 5) Pendidikan.
- 6) Pengangkutan.

6.13.3 Zakat Perniagaan

6.13.3.1 Pengertian Zakat Perniagaan

Zakat perniagaan ialah zakat yang wajib dikeluarkan hasil daripada harta perniagaan sama ada berdasarkan pembuatan, perlombongan, perikanan, perkапалan, pembekalan, pertanian, perkhidmatan atau sebagainya dengan tujuan diperniagakan.



Gambar 115: Dikenakan Zakat bagi Harta Perniagaan yang Cukup Nisab

Sama ada dalam bentuk perniagaan persendirian, perniagaan perkongsian sesama Islam atau dengan bukan Islam, perniagaan semua jenis syarikat, koperasi atau perniagaan saham dan sebagainya.

6.13.3.2 Dalil Zakat Perniagaan

Firman Allah SWT Surah al-Baqarah (2) ayat 267:

يَأَيُّهَا الَّذِينَ ءَامَنُوا أَنْفَقُوا مِنْ طَيِّبَاتٍ
مَا كَسَبُتُمْ وَمِمَّا أَخْرَجْنَا لَكُمْ مِنَ
الْأَرْضِ وَلَا تَيَمَّمُوا الْحُبْيَثَ مِنْهُ
تُنْفِقُونَ وَلَسْتُمْ بِإِخْدِيَةٍ إِلَّا أَنْ تُعَصِّبُو
فِيهِ وَأَعْلَمُوا أَنَّ اللَّهَ عَفِيفٌ حَمِيدٌ

Maksudnya: Wahai orang-orang yang beriman! Belanjakanlah (pada jalan Allah) sebahagian dari hasil usaha kamu yang baik-baik, dan sebahagian dari apa yang Kami keluarkan dari bumi untuk kamu. Dan janganlah kamu sengaja memilih yang buruk daripadanya (lalu kamu dermakan atau kamu jadikan pemberian zakat), padahal kamu sendiri tidak sekali-kali akan mengambil yang buruk itu (kalau diberikan kepada kamu), kecuali dengan memejamkan mata padanya. Dan ketahuilah, sesungguhnya Allah Maha Kaya, lagi sentiasa Terpuji. (267)

Allah SWT menjelaskan bahawa segala ‘hasil usaha yang baik’ itu wajib dizakat. Oleh itu, bagi sesiapa yang menjadikan makan gaji itu sebagai satu profesion, maka itu juga termasuk dalam ‘hasil usaha’ yang wajib dizakat.

6.13.3.3 Kaedah Pengiraan Zakat Perniagaan

Ia mengambil kira ekuiti pemilik entiti perniagaan tersebut, sumber-sumber pembiayaan kewangan dan dibuat pelarasan sama ada dicampur atau sebaliknya. Dalam istilah yang lebih ringkas ialah Modal dicampur dengan Keuntungan.

- 1) *Ekuiti Pemilik + Liabiliti Jangka Panjang – Aset Tetap – Aset Bukan Semasa +/- Pelarasan = Harta Perniagaan Yang Tertakluk Kepada Pengiraan Zakat***

Ia mengambil kira kedudukan Harta Semasa perniagaan ditolak dengan tanggungan semasa perniagaan dan dibuat pelarasan dengan beberapa perkara yang berkaitan dengan zakat yang perlu diambil kira. Pelarasan ini dibuat samaada dengan mencampurkan item-item yang telah dikenalpasti perlu ditambah atau membuat tolakan.

- 2) *Aset Semasa – Liabiliti Semasa +/- Pelarasan = Harta Perniagaan Yang Tertakluk Kepada Pengiraan Zakat***

6.13.3.4 Pelarasan

Pelarasan yang terlibat dalam pengiraan di atas adalah bersumberkan hujah dan asas seperti berikut:

1) Ditolak daripada aset semasa.

Semasa mengambil kira harta semasa berikut adalah perkara yang perlu dibuat pelarasan:

2) Barang-barang tidak wajib zakat.

Hendaklah dikeluarkan seperti barang-barang dan hasil yang haram umpama riba, judi dan arak.

3) Bukan milik sempurna.

Bayaran deposit air, deposit telefon, elektrik dan lain-lain yang seumpamanya hendaklah ditolak kerana ia tidak memenuhi syarat-syarat milik sempurna.

4) Si penghutang kewangan.

Wang yang dipinjamkan akan dikenakan zakat atas si peminjam berdasarkan bahawa ciri-ciri milik sempurna aset tersebut berpindah ke si peminjam. Si peminjam berkuasa dan bebas untuk menguruskan wang itu untuk sebarang tujuan dan mendapat manfaat di atas pinjaman itu.

5) Tiada item yang dikenakan zakat dua kali.

Nilai dividen yang sudah dibayar zakat oleh syarikat yang dilaburkan akan ditolakkan.

- 6) **Aset semasa mestilah yang produktif.**
Hutang lapuk, stok lupsu, penurunan nilai yang ketara & kekal hendaklah ditolak.
- 7) **Tabung-tabung yang bersifat kebajikan.**
Tabung bagi tujuan kebajikan seumpama khairat, pendidikan yang terdapat dalam aset semasa akan dikecualikan dari zakat. Walaubagaimanapun, tabung kebajikan yang bersifat pusingan seperti pinjaman Qardhul Hassan, amaun yang dikecualikan zakat adalah nilai pokok yang dimanfaatkan manakala bagi tabung kebajikan yang bersifat ‘hangus’ melalui pemberian derma, khairat maka hanya nilai baki tabung yang dikecualikan.
- 8) **Bagi kategori inventori/stok.**
Barangan akhir siap sahaja diambil kira. Manakala stok bahan mentah serta kerja dalam proses tidak diambil kira.
- Semua sumbangan, derma dan sedekah yang dibuat oleh entiti perniagaan tersebut pada akhir haul (sukuan terakhir) perlu dicampurkan semula (dengan andai derma itu tidak menggugat kecairan syarikat) ke dalam harta semasa kerana harta semasa yang disalurkan untuk kebajikan masih dikenakan zakat kecuali kalau sumbernya adalah dari tabung kebajikan.
- 9) **Dicampur kepada tanggungan semasa.**
Menurut pendapat Imam Syafie – Tidak ada syarat hutang dalam menentukan sama ada harta tersebut layak nisab ataupun tidak. Menurut pendapat Syafie

hutang kewangan (bukan liabiliti perdagangan) tidak menghalang kewajipan zakat:

Bagi memenuhi nisab, liabiliti semasa yang boleh ditolak adalah yang ianya bersifat operasi sahaja termasuk:

- a) Pembiutang Perdagangan (*Trade Creditors*).
- b) Kos operasi (*Operation Payables*) seperti gaji, elektrik, telefon.
- c) Cukai.
- d) Oleh yang demikian pelarasan adalah melibatkan item-item yang tidak dibenarkan tolakan seperti berikut:
 - e) Bukan berbentuk operasi perniagaan iaitu '*financial loans*' dan pengkelasan semula pinjaman berjangka.
 - f) Dividen yang dicadangkan (*Dividend Payable*).
 - g) '*Overdraft*'.
 - h) Pajakan kewangan atau modal (*financial or capital lease*).

6.13.4 Zakat Wang Simpanan

6.13.4.1 Pengertian Zakat Wang Simpanan

Mata wang wajib dikenakan zakat kerana ia boleh digunakan untuk bermuamalah sama dengan emas dan perak.

Wang sama ada berbentuk kertas, syiling atau sebagainya setaraf dengan emas dan perak sebagai satu kuasa membeli. Nisab zakat wang simpanan adalah berdasarkan nilai semasa bagi nisab emas 20 mithqal (85 gram) atau perak (595 gram).

6.13.4.2 Dalil Wajib Zakat

Hadis riwayat Imam Abu Daud (1573), daripada Ali bin Abu Talib RA, Rasulullah SAW bersabda Rasulullah SAW bersabda:

إِذَا كَانَتْ لَكَ مِائَةً دِرْهَمٍ، وَحَالَ عَلَيْهَا الْحُولُ، فَفِيهَا حَمْسَةُ دَرَاهِمٍ، وَلَيْسَ عَلَيْكَ شَيْءٌ يَعْنِي فِي الدَّهْبِ حَتَّى يَكُونَ لَكَ عِشْرُونَ دِينَارًا فَإِذَا كَانَ لَكَ عِشْرُونَ دِينَارًا، وَحَالَ عَلَيْهَا الْحُولُ، فَفِيهَا نِصْفُ دِينَارٍ، فَمَا زَادَ فَبِحِسَابِ ذَلِكَ

Bermaksud: “Apabila kamu memiliki 200 dirham, dan telah

cukup setahun zakatnya sebanyak 5 dirham. Kamu tidak wajib berzakat emas sehingga masih memiliki 20 dinar. Apabila kamu memiliki 20 dinar, dan telah cukup setahun, maka zakatnya 1/2 dinar. Jika kamu memiliki lebih daripada itu, maka ikutilah cara pengiraan tersebut.”

6.13.4.3 Kaedah Kiraan Wang Simpanan Zakat

1) Simpanan tetap.

Apabila sesuatu simpanan tetap itu telah genap setahun dan jumlahnya melebihi daripada paras nisab (nilai 85 gram emas), maka wajib dikeluarkan zakat sebanyak 2.5% daripada jumlah wang simpanan tersebut.

2) Simpanan biasa.

Lainya adalah dikira berdasarkan kepada jumlah baki pada hujung haul.

3) Simpanan dalam satu akaun.

Jika sesuatu simpanan itu telah genap setahun dan pada hujung haul (setelah ditolak faedah yang ada dalam tempoh tersebut) adalah melebihi paras nisab, maka seseorang itu wajib untuk mengeluarkan zakat atas wang simpanan.

4) Simpanan dalam beberapa akaun.

Jika seseorang itu mempunyai beberapa akaun simpanan, maka baki pada hujung haul dari setiap akaun simpanan tersebut mestilah dicampurkan untuk mengira

zakat walaupun mungkin jika dikira satu-satu akaun, baki hujung haulnya tidak mencukupi nisab.

5) **Zakat hutang.**

Zakat ke atas hutang tiada nas yang jelas dan menjadi ikhtilaf dikalangan fuqaha. Perbezaan pandangan fuqaha ini adalah berdasarkan samada zakat perlu dibayar ke atas wang yang dijangka terima ataupun tidak.

Oleh itu, Majma Fiqh Islami OIC (*Organization of Islamic Cooperation*) memutuskan:

Pemberi hutang adalah wajib membayar zakat setiap tahun, jika penghutang itu mampu membayar (pada tarikh haul pemberi hutang)

Jika penghutang itu tidak mampu atau menangguhkan bayaran balik hutang, maka zakat wajib dibayar oleh pemberi hutang setahun selepas penerimaan/bayaran balik hutang tersebut.

Hutang yang boleh ditolak daripada harta wajib zakat adalah hutang yang perlu dibayar segera. Hutang yang pembayarannya bertangguh tidak mengurangkan zakat ke atas harta yang dimiliki tempoh semasa. Oleh itu hutang yang perlu dibayar pada tempoh datang daripada hasil atau harta akan datang tidak boleh ditolak.

Pemutang (Pemberi Hutang) — الْدَّائِنُ

WAJIB ZAKAT	TIDAK WAJIB ZAKAT
Hutang yang diyakini dapat diperolehi	Hutang yang tidak diyakini dapat diperolehi
Bayar Setiap Haul	Bayar selepas cukup haul diperolehi

Pengutang (Penerima Hutang) – الْمَدِينُ

BOLEH DITOLAK DARIPADA HARTA ZAKAT	TIDAK BOLEH DITOLAK DARIPADA HARTA ZAKAT
Sudah tertangguh / perlu dibayar	Hanya perlu bayar haul yang
segera untuk haul berkenaan	tertangguh/akan datang

6.13.5 Zakat Pelaburan (Saham)

6.13.5.1 Pengertian Zakat Pelaburan (Saham)

Menurut Bahasa: Kalimah ‘saham’ berasal dari perkataan Arab yang bermaksud bahagian yang dimiliki.

Menurut Istilah: Saham menurut *Kamus Dewan* bermaksud “Bahagian dalam modal sesuatu perniagaan.”

Menurut Kamus Ekonomi: Saham bermaksud modal sah syarikat yang dicarumkan oleh pemilik.

Saham adalah wang yang dilaburkan dalam syarikat atau perniagaan. Bagi sijil-sijil saham dalam sesebuah syarikat yang tersenarai di pasaran saham (Contoh Bursa Malaysia), ianya mudah untuk dijadikan wang tunai berbanding dengan saham dalam syarikat yang tidak tersenarai atau dalam koperasi.

Pemilik saham adalah pemilik syarikat and berkongsi keuntungan atau kerugian sesebuah syarikat. Prestasi sesebuah perniagaan biasanya boleh diukur melalui dividen yang diagihkan dan juga harga atau nilai saham seperti tersenanari di pasaran saham.

6.13.5.2 Dalil Wajib Zakat Pelaburan

Dalil dan hujah mengeluarkan zakat pelaburan adalah seperti berikut:

Firman Allah SWT Surah al-Baqarah (2) ayat 267:

يَأَيُّهَا الَّذِينَ ءَامَنُواْ أَنْفَقُواْ مِنْ
طِبَّتِ مَا كَسَبْتُمْ وَمِمَّا أَخْرَجْنَا
لَكُمْ مِنَ الْأَرْضِ ۚ وَلَا تَيَمِّمُواْ
الْحَبِيثَ مِنْهُ تُنْفِقُونَ وَلَا سُتُّمْ
إِلَّا خِدْيَهٖ فِيهِ
وَاعْلَمُواْ أَنَّ اللَّهَ غَنِيٌّ حَمِيدٌ

Maksudnya: Wahai orang-orang yang beriman! Belanjakanlah (pada jalan Allah) sebahagian dari hasil usaha kamu yang baik-baik, dan sebahagian dari apa yang Kami keluarkan dari bumi untuk kamu. Dan janganlah kamu sengaja memilih yang buruk daripadanya (lalu kamu dermakan atau kamu jadikan pemberian zakat), padahal kamu sendiri tidak sekali-kali akan mengambil yang buruk itu (kalau diberikan kepada kamu), kecuali dengan memejamkan mata padanya. Dan ketahuilah, sesungguhnya Allah Maha Kaya, lagi sentiasa Terpuji. (267)

6.13.5.3 Syarat Wajib Zakat Pelaburan

- 1) **Islam.**
Diwajibkan kepada pemilik Muslim sahaja.
- 2) **Milik sempurna.**
Mempunyai kuasa menjual dan memperoleh manfaat daripada portfolio saham atau pelaburan.
- 3) **Milik pihak tertentu.**
Saham atau pelaburan yang dimiliki masjid, surau, dan-dana untuk maslahah am dan seumpamanya, tidak wajib zakat.
- 4) **Cukup nisab.**
Nisab portfolio pelaburan ialah nilai yang sama dengan atau 85 gram emas (20 mithqal). Apabila nilai portfolio pelaburan bersamaan atau melebihi nisab maka ianya diwajibkan zakat.
- 5) **Cukup haul.**
Haul bagi saham dan pelaburan lain hendaklah genap tempoh satu tahun pemilikan portfolio pelaburan.
- 6) **Halal.**
Saham yang diterbitkan untuk operasi perniagaan teras yang halal.

6.13.5.4 Pelaburan Pasaran Modal (Bursa Malaysia)

Di Malaysia, Suruhanjaya Sekuriti (SC) adalah badan yang bertanggungjawab dalam mengawal dan menyelia pasaran modal atau saham. Pasaran modal merupakan rumah

utama yang menyediakan aktiviti untuk penghasilan dana dan pelaburan jangka masa panjang serta meningkatkan kecairan sistem kewangan. Di dalam pasaran modal ini segala jenis saham dan dana diurusniagakan.

Di antara contoh instrumen pelaburan di pasaran modal ini adalah:

- 1) Saham biasa & keutamaan (*ordinary & preference*)
- 2) Saham Amanah, samada melalui pengurus dana swasta atau kerajaan
- 3) Saham Amanah Hartanah (*REITs*)
- 4) Dana Dagangan Bursa (*ETFs*)
- 5) Lain-lain instrument pelaburan yang diniagakan di Bursa Malaysia atau pasaran modal di luar Negara
- 6) Secara umum, terdapat 4 kategori utama produk-produk dipasaran modal iaitu iaitu:
 - 7) Ekuiti (Saham / Unit Trust / *REITs/ Index Fund* / *ETF* dan sebagainya)
 - 8) Bon & Debentur
 - 9) Derivatif (*Option & Future*)
 - 10) Produk Berstruktur
 - 11) Kaedah Taksiran Zakat Pelaburan

- 12) Saham adalah wang yang dilaburkan dalam syarikat atau perniagaan. Ia adalah sebagai bukti pemilihan sesebuah perniagaan.
- 13) Bagi sijil-sijil saham dalam sesebuah syarikat yang tersenarai di Bursa Saham, ianya mudah untuk dijadikan wang tunai berbanding dengan saham dalam syarikat yang tidak tersenarai atau dalam koperasi.

Nilai zakat yang diwajibkan adalah 2.5% daripada nilai pelaburan di hujung Haul. Bagi pelaburan yang diniagakan, jumlah keuntungan yang ditunaikan sepanjang tahun hendaklah dicampurkan.

- $\text{Zakat} = (\text{nilai pelaburan di hujung Haul} + \text{keuntungan ditunaikan}) \times 2.5\%$

6.13.5.5 Contoh Cara Pengiraan

Contoh Taksiran	
Saham saham di Bursa Malaysia (<i>Shares</i>)	RM266,000
Untung yang ditunaikan daripada jual beli pelaburan (<i>realised profit from investment</i>)	RM80,000
Saham amanah (<i>Unit Trusts</i>)	RM50,000
Dana Dagangan Bursa (<i>Exchange Traded Funds</i>)	RM50,000
Pelaburan Amanah Hartanah (<i>Real Estate Investment Trusts</i>)	RM70,000
Lain-lain pelaburan di pasaran modal luar negara (<i>other investment in foreign capital market</i>)	RM30,000
Nota : Semua nilai saham & pelaburan di atas ialah nilai pasaran (<i>market value</i>) pada tarikh cukup haul.	
TOLAK (LESS)	
Kos Brokeraj (<i>Brokerage cost</i>)	RM1,500
Dividen daripada pelaburan tidak patuh shariah (<i>dividends from non-shariah compliant investments</i>)	RM30,000
Peningkatan modal pelaburan tidak patuh shariah (<i>capital appreciation of non-shariah compliant investment</i>)	RM50,000
Jumlah ansuran yang dibayar dalam tahun taksiran untuk bayaran balik pinjaman pembelian saham – jika ada (<i>Sum of installment in assessment year for loan taken to buy investment – if any</i>)	-
Nilai Saham & Pelaburan Wajib Zakat (Value of shares & investments that subject to zakat)	RM464,500
Zakat : RM464,500 x 2.5% =	RM11,612.50

6.13.5.6 Zakat Pelaburan tidak tersenarai dalam Syarikat Persendirian, Koperasi dan lain-lain.

Bagi zakat saham yang dimiliki oleh pihak syarikat persendirian atau Koperasi, Mesyuarat Jawatankuasa Fatwa Negeri Selangor memutuskan bahawa hukum zakat ke atasnya adalah sebagaimana berikut:

Zakat saham adalah wajib dikeluarkan oleh pihak syarikat berdasarkan hukum *khulتوh* (harta bercampur). Akan tetapi, jika pihak syarikat tidak membayar zakat, maka kewajipan zakat wajib ditunaikan oleh individu.

1) Senario 1: Syarikat Membayar Zakat

Seperti kaedah kiraan zakat perniagaan syarikat (persendirian dan awam) yang telah diluluskan dalam Mesyuarat Jawatankuasa Fatwa Negeri Selangor pada 26 Mac 2007 (rujuk Panduan Zakat Perniagaan terbitan LZS 2007).

Zakat perniagaan syarikat secara ringkas adalah mengikut dua kaedah berikut :-

- **Kaedah Modal Kerja** = (Aset semasa – Liabiliti Semasa) +/- Pelarasan
- **Kaedah Modal Berkembang** = (Ekuiti Pemilik + Liabiliti Jangka Panjang – Aset Tetap – Aset Bukan Semasa) +/- Pelarasan

2) **Senario 2: Syarikat Tidak Membayar Zakat**

Zakat dikenakan ke atas individu berdasarkan peratus nilai pegangan individu dalam syarikat tersebut.

Contoh Taksiran

Harta syarikat/koperasi yang diwajibkan zakat di hujung haul 2012 ialah RM10 juta.

- *Zakat perniagaan Syarikat ABC Sdn Bhd: RM10 juta x 2.5% = RM250,000*

Pegangan saham milik En.Ali didalam Syarikat ABC Sdn Bhd : 15%

Zakat Pelaburan En.Ali : 15% x 250,000 = RM37,500

6.13.6 Zakat KWSP (Kumpulan Wang Simpanan Pekerja)

6.13.6.1 Pengertian Zakat KWSP

KWSP ialah Kumpulan Wang Simpanan Pekerja iaitu wang daripada pendapatan seseorang hasil daripada pekerjaannya yang disimpan di dalam akaun simpanan pekerja kerana tertakluk di bawah akta KWSP. KWSP dikenakan zakat kerana konsepnya sama seperti wang simpanan, cuma perbezaannya simpanan di KWSP tidak boleh dikeluarkan sewenang-wenangnya seperti akaun simpanan biasa.

Wang ini hanya boleh dikeluarkan sebahagiannya oleh pencarum apabila ia mencapai umur tertentu dalam tempoh perkhidmatannya atau mengambil keseluruhannya apabila ia telah mencapai umur penceran atau bersara. Selain daripada pengeluaran berdasarkan faktor umur, ianya juga boleh dikeluarkan setelah memenuhi syarat –syarat dibawah pelbagai Skim Pengeluaran KWSP.

6.13.6.2 Dalil Wajib Zakat

Dalil Al-Quran dalam Surah at-Taubah (9) ayat 34-35:

٥٠ يَأَيُّهَا الَّذِينَ ءَامَنُوا إِنَّ كَثِيرًا مِّنَ
الْأَحْبَارِ وَالرُّهْبَانِ لَيَأْكُلُونَ أَمْوَالَ
النَّاسِ بِالْبَطْلِ وَيَصُدُّونَ عَنْ
سَبِيلِ اللَّهِ وَالَّذِينَ يَكْرِزُونَ أَلَّا يَهْبِطَ
وَالْفِضَّةَ وَلَا يُنْفِقُونَهَا فِي سَبِيلِ اللَّهِ
فَبَشِّرُهُمْ بِعَذَابٍ أَلِيمٍ ﴿٣٤﴾ يَوْمَ يُحْمَى
عَلَيْهَا فِي نَارِ جَهَنَّمَ فَتُكَوَى بِهَا
جِبَاهُهُمْ وَجُنُوبُهُمْ وَظُهُورُهُمْ هَذَا
مَا كَرِزْتُمْ لِأَنفُسِكُمْ فَدُولُّوْا مَا
كُنْتُمْ تَكْرِزُونَ ﴿٣٥﴾

Maksudnya: Wahai orang-orang yang beriman! Sesungguhnya banyak di antara pendita-pendita dan ahli-ahli ugama (Yahudi dan Nasrani) memakan harta orang ramai dengan cara yang salah, dan mereka menghalangi (manusia) dari jalan Allah (ugama Islam). Dan (ingatlah) orang-orang

yang menyimpan emas dan perak serta tidak membelanjakannya pada jalan Allah, maka khabarkanlah kepada mereka dengan (balasan) azab seksa yang tidak terperi sakitnya. (34) (laitu) pada hari dibakar emas perak (dan harta benda) itu dalam neraka jahanam, lalu diselar dengannya dahi mereka, dan rusuk mereka, serta belakang mereka (ambil dikatakan kepada mereka): "Inilah apa yang telah kamu simpan untuk diri kamu sendiri, oleh itu rasalah (azab dari) apa yang kamu simpan itu. (35)

Hadis riwayat Imam Abu Daud (1573), daripada Ali bin Abu Talib RA, Rasulullah SAW bersabda Rasulullah SAW bersabda:

إِذَا كَانَتْ لَكَ مِائَةً دِرْهَمٍ، وَحَالَ عَلَيْهَا الْحُولُ، فَفِيهَا حَمْسَةُ دَرَاهِمٍ، وَلَيْسَ عَلَيْكَ شَيْءٌ يَعْنِي فِي الدَّهْبِ حَتَّى يَكُونَ لَكَ عِشْرُونَ دِينَارًا فَإِذَا كَانَ لَكَ عِشْرُونَ دِينَارًا، وَحَالَ عَلَيْهَا الْحُولُ، فَفِيهَا نِصْفُ دِينَارٍ، فَمَا زَادَ فِي حِسَابِ ذَلِكَ

Bermaksud: “Apabila kamu memiliki 200 dirham, dan telah cukup setahun zakatnya sebanyak 5 dirham. Kamu tidak wajib berzakat emas sehinggalah memiliki 20 dinar. Apabila kamu memiliki 20 dinar, dan telah cukup setahun, maka zakatnya 1/2 dinar. Jika kamu memiliki lebih daripada itu, maka ikutilah cara pengiraan tersebut.”

6.13.6.3 Jenis Zakat KWSP

Terdapat dua pandangan berkenaan zakat bagi KWSP:

- 1) **Sebelum mencapai umur 55 tahun (pemilikan belum sempurna).**

2.5% dari jumlah pengeluaran KWSP adalah jumlah wajib zakat. Jumlah pengeluaran tidak mengira samada mencapai nisab. Jika jumlah pengeluaran KWSP dibawah nisab, hendaklah dicampurkan bersama pendapatan lain

- 2) **Setelah mencapai umur 55 tahun (pemilikan sempurna).**

2.5% atas keseluruhan wang KWSP dizakatkan seperti kaedah zakat simpanan. Dengan itu, tiada lagi tolakan caruman KWSP pada taksiran zakat pendapatan untuk yang masih bekerja dan membuat caruman KWSP

6.13.6.4 Contoh Pengiraan Zakat KWSP

- *Nisab Tahun 2012 : RM13 000.00*

Encik Ali berumur 35 tahun mengeluarkan wang caruman KWSP sebanyak RM20,000 daripada Skim Pengeluaran Pendidikan.

*Jumlah zakat yang dikenakan : RM20,000
X 2.5% = RM500.00*

6.13.7 Zakat Emas dan Perak

6.13.7.1 Pengenalan

Mata wang wajib dikenakan zakat kerana ia boleh digunakan untuk bermuamalah sama dengan emas dan perak. Wang sama ada berbentuk kertas, syiling atau sebagainya setaraf dengan emas dan perak sebagai satu kuasa membeli.

Nisab zakat emas adalah berdasarkan nilai semasa bagi nisab emas 20 mithqal (85 gram) atau perak (595 gram). Jumhur fuqaha telah menyandarkan nisab wang kepada nisab emas (85 gram).

6.13.7.2 Dalil Wajib Zakat

Dalil Al-Quran dalam Surah at-Taubah (9) ayat 34:

يَأَيُّهَا الَّذِينَ ءَامَنُوا إِنَّ كَثِيرًا مِنَ
الْأَحْبَارِ وَالرُّهْبَانِ لَيَأْكُلُونَ أَمْوَالَ
النَّاسِ بِالْبَطْلِ وَيَصُدُّونَ عَنِ
سَبِيلِ اللَّهِ وَالَّذِينَ يَكْنِزُونَ الْذَّهَبَ
وَالْفِضَّةَ وَلَا يُنْفِقُونَهَا فِي سَبِيلِ اللَّهِ
فَبَيْتَرُهُمْ بِعَذَابٍ أَلِيمٍ

Maksudnya: Wahai orang-orang yang beriman!

Sesungguhnya banyak di antara pendita-pendita dan ahli-ahli ugama (Yahudi dan Nasrani) memakan harta orang ramai dengan cara yang salah, dan mereka menghalangi (manusia) dari jalan Allah (ugama Islam). Dan (ingatlah) orang-orang yang menyimpan emas dan perak serta tidak membelanjakannya pada jalan Allah, maka khabarkanlah kepada mereka dengan (balasan) azab seksa yang tidak terperi sakinya. (34)

Hadis riwayat Imam Abu Daud (1573), daripada Ali bin Abu Talib RA, Rasulullah SAW bersabda Rasulullah SAW bersabda:

إِذَا كَانَتْ لَكَ مِائَةً دِرْهَمٍ، وَحَالَ عَلَيْهَا الْحُولُ، فَفِيهَا حَمْسَةُ دِرَاهِمٍ، وَلَيْسَ عَلَيْكَ شَيْءٌ يَعْنِي فِي الدَّهْبِ حَتَّى يَكُونَ لَكَ عِشْرُونَ دِينَارًا فَإِذَا كَانَ لَكَ عِشْرُونَ دِينَارًا، وَحَالَ عَلَيْهَا الْحُولُ، فَفِيهَا نِصْفُ دِينَارٍ، فَمَا زَادَ فِي حِسَابِ ذَلِكَ

Bermaksud: “Apabila kamu memiliki 200 dirham, dan telah cukup setahun zakatnya

sebanyak 5 dirham. Kamu tidak wajib berzakat emas sehingga masih memiliki 20 dinar. Apabila kamu memiliki 20 dinar, dan telah cukup setahun, maka zakatnya 1/2 dinar. Jika kamu memiliki lebih daripada itu, maka ikutilah cara pengiraan tersebut.”

Dalam hadis yang lain, riwayat Imam Muslim (987):

عَنْ أَبِي هُرَيْرَةَ رَضِيَ اللَّهُ عَنْهُ قَالَ: قَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ: مَا مِنْ صَاحِبٍ ذَهَبٍ وَلَا فِضَّةٍ لَا يُؤْدِي مِنْهَا حَقًّهَا إِلَّا إِذَا كَانَ يَوْمُ الْقِيَامَةِ، صُفِّحَتْ لَهُ صَفَائِحُ مِنْ نَارٍ، فَأُحْمِي عَلَيْهَا فِي نَارِ جَهَنَّمَ، فَيُكَوِّي بِهَا جَبْنُهُ وَجَبِينُهُ وَظَهُورُهُ، كَلَّمَا بَرَدَتْ أُعِيدَتْ لَهُ، فِي يَوْمٍ كَانَ مَقْدَارُهُ خَمْسِينَ أَلْفَ سَنَةً، حَتَّىٰ يُقْضَى بَيْنَ الْعَبَادِ؛ فَيُرْسَى سَبِيلَهُ؛ إِمَّا إِلَى الْجَنَّةِ وَإِمَّا إِلَى النَّارِ

Bermaksud: Daripada Abu Hurairah RA berkata: Rasulullah SAW bersabda: “Setiap pemilik emas dan perak yang tidak

menunaikan haknya maka pada hari kiamat dijadikan kepingan lalu dibakar dalam api neraka kemudian diselar rusuk dan belakang mereka; setiap kali kepingan itu menjadi sejuk ia kembali dibakar semula pada hari yang kadarnya bersamaan dengan lima puluh ribu (50,000) tahun sehingga ia dihukum di antara hamba-hamba Allah maka dilihat jalannya sama ada ke syurga atau ke neraka”.

6.13.7.3 Kaedah Kiraan Zakat Emas & Perak

1) Emas Perhiasan Wanita (الذهب)

laitu emas yang digunakan untuk perhiasan badan wanita, perkakasan atau perabot sama ada digunakan sekali-sekala atau berterusan. Emas perhiasan wanita wajib dizakat apabila jumlah beratnya melebihi ‘uruf(adat kebiasaan). Kadar uruf emas di negeri Selangor ialah sebanyak 800 gram (kadar uruf semasa).

Contoh:

$$[(\text{Berat emas} - \text{Uruf}) \times \text{harga emas semasa} \times 2.5\%]$$

$$(900 \text{ gram} - 800 \text{ gram}) \times \text{RM}144.38 = \\ \text{RM}14,438 \times 2.5\% = \text{RM}360.95$$

2) Emas Bukan Perhiasan (عِزْمَةُ الْجَمِيعِ)

ialitu emas yang dimiliki bukan untuk tujuan perhiasan sama ada dalam bentuk matawang, jongkong, tempa, barang kemas dan seumpamanya.

Ia dikenakan zakat sebanyak 2.5% daripada jumlah yang ada sekiranya kadar yang dimiliki itu sama atau melebihi nisabnya iaitu 85 gram. Ia tidak sama dengan emas perhiasan wanita. Nisab emas yang tidak dipakai ialah sebanyak 85 gram.

Contoh:

$$\begin{aligned} & \text{Timbangan emas} \times \text{harga semasa} \times 2.5\% \\ & = \text{Jumlah Zakat} \end{aligned}$$

$$\begin{aligned} & 100 \text{ gram} \times \text{RM}144.38 = \text{RM}14,438 \times 2.5\% \\ & = \text{RM}360.95 \end{aligned}$$

3) Emas Bercagar

Emas yang digadai adalah milikan sempurna dan wajib dizakatkan setelah ditolak nilai pinjaman dan upah simpan.

Contoh:

$$\begin{aligned} & [(Berat emas semasa \times \text{harga semasa}) - \\ & \quad \text{Nilai Pinjaman} - \text{Upah Simpan}] \times 2.5\% = \\ & \quad \text{Jumlah Zakat} \end{aligned}$$

$$\begin{aligned} & [(200 \text{ gram} \times \text{RM}144.38 = \text{RM}28,876) - \\ & \quad \text{RM}10,000 - \text{RM}76] \times 2.5\% = \text{RM}470 \end{aligned}$$

4) Perak

Bagi logam perak, samaada dipakai sebagai barang perhiasan ataupun tidak (disimpan sebagai perhiasan di rumah), maka pengiraannya adalah berdasarkan nilai barang perak tersebut. Nisab bagi perak adalah sebanyak **595 gram** atau lebih

Contoh:

$$600 \text{ gram perak} \times \text{RM}2.45(\text{segaram pada } 30 \text{ April 2014}) \times 2.5\% = \text{RM}36.75$$

6.13.7.4 Pelaburan Emas Tanpa Fizikal Tidak Patuh Syariah

Pelaburan emas tanpa fizikal tidak patuh Syariah (ditaksirkan zakat simpanan)

Pelaburan ini menggunakan nilai harga emas semasa sebagai sandaran pelaburan mereka kerana pihak institusi sebenarnya tidak memiliki emas secara fizikal.

Hukum pelaburan seumpama ini adalah tidak sah dan haram. Ia termasuk dalam kategori jual beli sesuatu yang tidak wujud secara fizikalnya dan juga jual beli sesuatu yang tidak dimiliki oleh pihak yang menjualnya. Akadnya batil kerana tidak mencukupi syarat termeterai akad dari sudut kelayakan bertransaksi dan subjek yang diakadkan.

Segala keuntungan yang diperolehi daripada pelaburan ini adalah haram. Jadi ianya tidak wajib dizakatkan. Walau bagaimanapun, modal atau pokok pelaburan adalah harta

yang halal. Oleh itu, jika ia melebihi Nisab, maka zakat wajib dikeluarkan sebanyak 2.5% daripada jumlah modal tersebut.

Manakala dalam keadaan Akad Fasid kerana tidak mencukupi syarat sah / rukun jual beli , tetapi diakhiri dengan berlaku proses *qabd* (pindah milik), maka diwajibkan zakat ke atasnya kerana status pemilikannya adalah sempurna. Iaitu wajib zakat (atas kedua – dua prinsipal dan keuntungan) untuk transaksi yg akadnya fasid tetapi disertai *qabd*.

- Status Zakat Terhadap Pelaburan Emas Tidak Patuh Syariah**

Jenis Akad	Keterangan	Status Pemilikan	Status Zakat
Akad Batil	Akad yang tidak mencukupi syarat termeterai akad dari sudut kelayakan bertransaksi dan subjek diakadkan	Tidak Sah	Tidak Wajib
Akad Fasid tanpa Berlaku Qabd	Akad yang tidak mencukupi syarat sah jual beli dan tidak diakhiri dengan <i>qabd</i>	Tidak Sah	Tidak Wajib
Akad Fasid dan Berlaku Qabd	Akad yang tidak mencukupi syarat sah jual beli, tetapi diakhiri dengan <i>qabd</i>	Sah	Wajib

6.13.8 Zakat Takaful

6.13.8.1 Pengenalan

Produk takaful merupakan salah satu bentuk simpanan/pelaburan yang mempunyai unsur harta zakawi dan tertakluk kepada kewajiban zakat jika ia telah memenuhi syarat-syaratnya. Wang ini hanya boleh dikeluarkan sebahagiannya oleh pencarum apabila ia mencapai umur tertentu dalam tempoh perkhidmatannya atau mengambil keseluruhannya apabila ia telah mencapai umur penced atau bersara.

Selain daripada pengeluaran berdasarkan faktor umur, ianya juga boleh dikeluarkan setelah memenuhi syarat-syarat dibawah pelbagai Skim Pengeluaran KWSP.

6.13.8.2 Dalil Wajib Zakat

Firman Allah SWT dalam Surah at-Taubah (9) ayat 34:

يَا أَيُّهَا الَّذِينَ ءَامَنُوا إِنَّ كَثِيرًا مِّنَ
الْأَحْبَارِ وَالرُّهْبَانِ لَيَأْكُلُونَ أَمْوَالَ
الْتَّائِسِ بِالْبَطْلِ وَيُصْدُونَ عَنْ سَبِيلِ
اللَّهِ وَاللَّذِينَ يَكُنُزُونَ الْذَّهَبَ
وَالْفِضَّةَ وَلَا يُنْفِقُونَهَا فِي سَبِيلِ اللَّهِ
فَبَشِّرُهُمْ بِعَذَابٍ أَلِيمٍ



Maksudnya: Wahai orang-orang yang beriman! Sesungguhnya banyak di antara pendita-pendita dan ahli-ahli ugama (Yahudi dan Nasrani) memakan harta orang ramai dengan cara yang salah, dan mereka menghalangi (manusia) dari jalan Allah (ugama Islam). Dan (ingatlah) orang-orang yang menyimpan emas dan perak serta tidak membelanjakannya pada jalan Allah, maka khabarkanlah kepada mereka dengan (balasan) azab seksa yang tidak terperi sakitnya. (34)

6.13.8.3 Implikasi Zakat ke Atas Produk Takaful Zakat Wang Simpanan/Pelaburan Takaful:

Zakat Wang Simpanan / Pelaburan Takaful: Pemegang takaful keluarga perlu membayar zakat setiap tahun ke atas nilai simpanan/pelaburan yang boleh dikeluarkan (*cash value*) sahaja dan bukannya surrender value (jumlah wang yang akan diperolehi jika membatalkan polisi).

Ini kerana, hukum zakat untuk simpanan/pelaburan dalam polisi takaful adalah sama hukum zakat untuk simpanan / wang di institusi kewangan. Ini adalah kerana cash value boleh dikeluarkan tanpa perlu menunggu tempoh tamat kontrak dengan pihak takaful.

6.13.8.4 Kaedah Taksiran

[Jumlah simpanan/pelaburan – nilai simpanan/pelaburan minimum perlu ada dalam polisi] = Cash value polisi takaful
Formula Asas: Zakat = Cash value polisi takaful x 2.5% Kaedah Taksiran Zakat Gabungan Nisab Emas: Zakat = x 2.5%

6.13.8.5 Zakat Ke Atas Polisi Takaful Yang Matang

Manakala selepas sijil takaful sudah matang, maka wajib zakat simpanan ke atas pemegang polisi yang mendapat pulangan tunai secara keseluruhannya iaitu pulangan wang tunai daripada Dana Risiko Peserta dan juga keuntungan pelaburan daripada Dana Pelaburan Peserta.

- *Zakat = Maturity value (nilai matang) polisi takaful x 2.5% Kaedah Taksiran Zakat Gabungan Nisab Emas : Zakat = x 2.5%*

1) Pampasan Takaful

Wajib Zakat Pendapatan ke atas waris simati. Ianya adalah selepas ditolak untuk penyelesaian hutang simati (hutang zakat/hutang sesama manusia dan lain – lain) dan upah haji sekiranya simati belum mengerjakan fardhu haji.

2) Wang Pulangan Tunai Dana Tabarruk

Wajib zakat pendapatan ke atas pemegang polisi takaful sekiranya mereka memperolehi wang pulangan tunai dari Dana Tabarruk; contohnya pulangan tunai setiap tahun jika tiada sebarang tuntutan tahunan (contohnya NCD yang diperolehi kerana tiada tuntutan tahunan).

3) **Manfaat keilatan kekal dan menyeluruh**
Wajib zakat pendapatan ke atas pemegang polisi yang menerima manfaat keilatan kekal dan menyeluruh akibat kemalangan atau sebab penyakit tertentu.

4) **Pampasan Polisi Insurans Konvensional**

Pampasan polisi insurans konvensional yang diterima oleh ahli waris tidak perlu dizakatkan kerana ia dikira sebagai harta yang tidak patuh syariah.

Hanya bayaran pokok pembeli polisi insurans konvensional (semasa hayat pembeli/pemegang polisi) sahaja yang dikenakan zakat.

Namun sekiranya ahli waris pembeli polisi tersebut merupakan golongan fakir miskin, mereka boleh mengambil sebahagian wang pampasan polisi insurans tersebut dengan jumlah sekadar keperluan sebagai fakir miskin yang ingin mencukupkan keperluan, dan jika jumlah yang diambil melebihi nisab zakat, maka wajib zakat pendapatan ke atas ahli waris.

Jika pampasan polisi Insurans konvensional tersebut diterima daripada caruman yang dibuat oleh majikan maka ahli waris boleh menggunakan wang tersebut keseluruhannya dan diwajibkan zakat pendapatan ke atasnya.

6.13.9 Zakat Pertanian

6.13.9.1 Pengenalan

Tanah adalah salah satu nikmat terbesar yang diciptakan oleh Allah SWT. Tanah diamanahkan kepada umat manusia untuk menjadikannya subur serta menghasilkan tanam-tanaman dan buah-buahan. Sesungguhnya semua tanaman dan buah-buahan yang tumbuh di atas muka bumi ini merupakan kurniaan Allah SWT, dan bukannya datang dari manusia. Maka apabila Allah mengarahkan manusia untuk menunjukkan rasa syukur atas nikmat yang telah diberikan, maka sudah tentulah umat Islam yang beriman menunaikannya dengan mengeluarkan zakat dari sebahagian dari hasil tanam-tanaman mereka.

6.13.9.2 Dalil Zakat Pertanian

Firman Allah SWT dalam Surah al-Baqarah (2) ayat 267:

يَأَيُّهَا الَّذِينَ ءَامَنُواْ أَنْفَقُواْ مِن
طَبِيبَتِ مَا كَسَبُتُمْ وَمِمَّا أَخْرَجَنَا
لَكُمْ مِنَ الْأَرْضِ ۚ وَلَا تَيْمِمُواْ
الْحَسِيبَ مِنْهُ تُنْفِقُونَ وَلَسْتُمْ
يَأْخِذُونَ إِلَّا أَنْ تُعْمِضُواْ فِيهِ
وَأَعْلَمُواْ أَنَّ اللَّهَ عَنِّي حَمِيدٌ

37

Maksudnya: Wahai orang-orang yang beriman! Belanjakanlah (pada jalan Allah) sebahagian dari hasil usaha kamu yang baik-baik, dan sebahagian dari apa yang Kami keluarkan dari bumi untuk kamu. Dan janganlah kamu sengaja memilih yang buruk daripadanya (lalu kamu dermakan atau kamu jadikan pemberian zakat), padahal kamu sendiri tidak sekali-kali akan mengambil yang buruk itu (kalau diberikan kepada kamu), kecuali dengan memejamkan mata padanya. Dan ketahuilah, sesungguhnya Allah Maha Kaya, lagi sentiasa Terpuji. (267)

Firman Allah SWT juga dalam Surah al-An'aam (6) ayat 141:

وَهُوَ الَّذِي أَنْشَأَ جَنَّتٍ مَّعْرُوشَاتٍ وَغَيْرَ
مَعْرُوشَاتٍ وَالثَّخْلَ وَالزَّرْعَ مُخْنَلِفًا
أُكْلُهُ وَالرَّيْسُونَ وَالرُّمَانَ مُتَشَبِّهًا
وَغَيْرَ مُتَشَبِّهٍ كُلُّوْ مِنْ شَمَرَةٍ إِذَا آتَمَرَ
وَعَاهُوا حَقْهُ وَيَوْمَ حَصَادِهِ وَلَا تُسْرِفُوا
إِنَّهُ وَلَا يُحِبُّ الْمُسْرِفِينَ



Maksudnya: *Dan Dia lah (Allah) yang menjadikan (untuk kamu) kebun-kebun yang menjalar tanamannya dan yang tidak menjalar; dan pohon-pohon tamar (kurma) dan tanaman-tanaman yang berlainan (bentuk, rupa dan) rasanya; dan buah zaiton dan delima, yang bersamaan (warnanya atau daunnya) dan tidak bersamaan (rasanya). Makanlah dari buahnya ketika ia berbuah, dan keluarkanlah haknya (zakatnya) pada hari memetik atau menuainya; dan janganlah kamu melampau (pada apa-apa jua yang kamu makan atau belanjakan); sesungguhnya Allah tidak suka kepada orang-orang yang melampau. (141)*

Hadis riwayat Imam al-Bukhari (1483), daripada Abdullah bin Umar RA bahawa Nabi SAW bersabda:

فِيمَا سَقَتِ السَّمَاءُ وَالْعُيُونُ أَوْ كَانَ عَرَيًّا الْعُشْرُ، وَمَا سُقِيَ بِالنَّصْحِ نِصْفُ الْعُشْرِ.

Bermaksud: “Pada tanaman yang diairi dengan air hujan, mata air, atau air tanah maka zakatnya sepersepuluh (10%), adapun yang diairi dengan

menggunakan tenaga maka zakatnya seperduapuluhan (5%)”.

6.13.9.3 Nisab Dan Haul Zakat Pertanian

Jumhur ulama berpendapat bahawa tanaman sama sekali tidak diwajibkan zakat sehingga sampai jumlah lima bebanan unta (5 wasaq). Berdasarkan hadis riwayat Imam al-Bukhari (1405), daripada Abu Said Al-Khudri. Rasulullah SAW bersabda:

وَلَيْسَ فِيمَا دُونَ حَمْسٍ أَوْ سُقِّ صَدَقَةٌ

Bermaksud: *Dan tidak ada zakat pada kurang daripada lima awsuq*

Berbanding jenis-jenis harta lain yang dikenakan zakat, zakat pertanian dikecualikan daripada ketetapan haul kerana hasil pertanian dikutip apabila tiba waktu menuainya sahaja, berdasarkan firman Allah SWT dalam Surah al-An'am (6) ayat 141:

وَهُوَ الَّذِي أَذْشَأَ جَنَّتِ مَعْرُوشَاتٍ وَغَيْرَ
مَعْرُوشَاتٍ وَالثُّخْلَ وَالزَّرْعُ مُخْتَلِفًا
أَكْلُهُ وَالزَّيْنُونَ وَالرُّمَانَ مُتَشَبِّهًا
وَغَيْرُ مُتَشَبِّهٍ كُلُّوا مِنْ شَمَرَةٍ إِذَا أَثْمَرَ
وَعَائُوا حَقَّهُ وَيَوْمَ حَصَادِهِ وَلَا تُسْرِفُوا

إِنَّهُ وَلَا يُحِبُّ الْمُسْرِفِينَ

Maksudnya: Dan Dia lah (Allah) yang menjadikan (untuk kamu) kebun-kebun yang menjalar tanamannya dan yang tidak menjalar; dan pohon-pohon tamar (kurma) dan tanaman-tanaman yang berlainan (bentuk, rupa dan) rasanya; dan buah zaiton dan delima, yang bersamaan (warnanya atau daunnya) dan tidak bersamaan (rasanya). Makanlah dari buahnya ketika ia berbuah, dan keluarkanlah haknya (zakatnya) pada hari memetik atau menuainya; dan janganlah kamu melampau (pada apa-apa jua yang kamu makan atau belanjakan); sesungguhnya Allah tidak suka kepada orang-orang yang melampau. (141)

Justeru Nisab Zakat Pertanian ialah 5 awsuq/wasaq (bersamaan 363 gantang Malaysia), dan kewajipannya tanpa perlu menunggu setahun (haul).

6.13.9.4 Kadar Dan Pengiraan Zakat Pertanian

Tanam-tanaman yang cukup nisabnya hendaklah dibayar zakatnya mengikut peratus penghasilan. Kadar peratus pembayarannya bergantung kepada cara-cara penghasilnya. Tanaman yang diusahakan dengan menggunakan tenaga manusia atau lainnya seperti binatang dan jentera atau dengan perbelanjaan yang banyak maka kadar zakatnya ialah 5% atau

1/20. Manakala tanaman yang hanya bergantung kepada jirusan air hujan atau hidup dengan aliran sungai atau parit maka kadar zakatnya ialah 10% atau 1/10.

Manakala bagi tanam-tanaman yang menggunakan kedua-dua cara di atas maka telah ditetapkan kadar alternatif sebanyak 7.5%

Pilihan diberikan kepada pengusaha untuk mengira sama ada menggunakan kaedah Zakat Pertanian ataupun kaedah Zakat Perniagaan. Kebiasaannya hanya makanan asasi sahaja yang dikira mengikut kaedah Zakat Pertanian.

Manakala bagi tanam-tanaman yang lain akan dikira mengikut kaedah Zakat Perniagaan. Hal ini kerana tanaman tersebut diusahakan dengan jumlah yang banyak serta dipelbagaikan dengan usaha yang lain dan selalunya diniagakan dalam pelbagai industri perniagaan.

6.13.10 Zakat Ternakan

6.13.10.1 Pengenalan

Semua binatang ternakan diciptakan Allah SWT untuk kepentingan manusia. Ia digunakan untuk ditungganginya sebagai kenderaan, dimakan dagingnya, diminum susunya dan diambil bulu serta kulitnya. Oleh kerana itu, Allah SWT meminta para pemilik binatang bersyukur atas nikmat yang telah dianugerahkan-Nya kepada mereka. Realisasi dari syukur tersebut adalah dengan tuntutan berzakat.

6.13.10.2 Dalil Zakat Ternakan

Dalam hadis riwayat Imam al-Bukhari (1460), daripada Abu Dzar al-Ghfari RA:

أَنْتَهِيْتُ إِلَى النَّبِيِّ صَلَّى اللَّهُ عَلَيْهِ وَسَلَّمَ قَالَ: وَالذِّي نَفْسِي بِيَدِهِ -أُوْ: وَالذِّي لَا إِلَهَ غَيْرُهُ، أُوْ كَمَا حَلَفَ-
مَا مِنْ رَجُلٍ تَكُونُ لَهُ إِيمَانٌ، أُوْ بَقْرٌ،
أُوْ غَنَمٌ، لَا يُؤْدِي حَقَّهَا؛ إِلَّا أُتَيْ بِهَا
بَوْمَ الْقِيَامَةِ أَعْظَمَ مَا تَكُونُ وَأَسْمَنَهُ،
تَطْرُهُ بِأَحْفَافِهَا، وَتَنْطَحُهُ بِثُرُونَهَا،
كُلَّمَا جَازَتْ أُخْرَاهَا رُدَّتْ عَلَيْهِ
أُولَاهَا، حَتَّى يُفْضِي بَيْنَ النَّاسِ.

Bermaksud: Apabila aku pergi kepadanya (Rasulullah) lalu Baginda berkata: Demi jiwaku yang berada di Tangan-Nya, tidaklah seorang lelaki pemilik unta, lembu atau kambing yang tidak menunaikan haknya (zakat) melainkan haiwan tersebut akan didatangkan pada hari kiamat dalam keadaan yang lebih besar dan lebih gemuk. Haiwan tersebut memijaknya dengan kaki-kakinya dan menyondol dengan tanduk-tanduknya. Tatkala haiwan terakhir telah melintas, maka haiwan yang pertama akan dikembalikan kepadanya, hingga pengadilan selesai dilakukan di antara manusia.

6.13.10.3 Syarat-syarat Wajib Zakat Ternakan

Islam tidak mewajibkan zakat ternakan pada setiap kuantiti ternakan, akan tetapi mewajibkannya bila memenuhi syarat-syarat tertentu, iaitu:

- 1) Islam**
- 2) Milik sempurna.**
- 3) Cukup nisab.**
Seseorang itu harus memiliki sejumlah minima yang memungkinkan dia diwajibkan zakat. Bagi ternakan unta, jumlah minima ialah 5 ekor. bagi kambing, tidaklah diwajibkan zakat apabila di

bawah 40 ekor. Manakala nisab lembu ialah 30 ekor. Perincian lanjut adalah seperti di bawah.

4) Cukup haul.

Cukup haul iaitu genap peredaran masa setahun binatang itu dimiliki atau dibelanya. Bagi anak binatang yang lahir dalam waktu (pertengahan) haul, tidak diwajibkan zakat, namun boleh dikira sekali bagi mencukupkan nisab binatang-binatang ternakan yang sudah matang. Perkara ini merupakan pandangan oleh Abu Hanifah, al Shafi'i, Ibn Hazm dan lain-lain sepiritama yang dinukilkan oleh Dr. Yusuf Al-Qaradawi dalam *Fiqh Zakat*.

5) Digembalakan.

Bermaksud ia diurus sepanjang tahun untuk memperoleh susu, dibiakkan atau diperoleh dagingnya. Binatang-binatang ternakan juga perlu *?saaimah?* ertinya binatang-binatang itu dipelihara di padang ternakan bebas bagi kebanyakan hari dalam tempoh setahun. Yang dimaksud padang rumput yang *mubah* adalah padang rumput yang tumbuh dengan sendirinya dan bukan dari hasil usaha manusia.

6) Tidak dipekerjakan.

Binatang ternakan yang digunakan untuk bekerja seperti membajak tanah ladang dan mengambil air untuk menyirami tanaman tidak ubah seperti alat-alat yang digunakan untuk mengerjakan tanah tersebut, dan hasilnya yang berupa tanaman dan buah-buahan lah yang sepatutnya wajib dikeluarkan zakatnya.

6.13.10.4 Nisab Dan Kadar Zakat Ternakan

Sesuai dengan ijmak ulama dan hadis-hadis sahih, maka nisab binatang ternakan dan kadar zakatnya adalah seperti berikut:

- Kadar Zakat Unta**

Kadar Nisab	Kadar Zakat		
	Bilangan	Jantina	Umur
5 hingga 9 ekor	1 ekor kambing biri-biri	–	1 tahun lebih
10 hingga 14 ekor	2 ekor kambing biri-biri	–	1 tahun lebih
15 hingga 19 ekor	3 ekor kambing biri-biri	–	1 tahun lebih
20 hingga 24 ekor	4 ekor kambing biri-biri	–	1 tahun lebih
25 hingga 35 ekor	1 ekor unta betina	Betina	1 tahun lebih
36 hingga 45 ekor	1 ekor unta betina	Betina	2 tahun lebih
46 hingga 60 ekor	1 ekor unta betina	Betina	3 tahun lebih
61 hingga 75 ekor	1 ekor unta betina	Betina	4 tahun lebih
76 hingga 90 ekor	2 ekor unta betina	Betina	2 tahun lebih
91 hingga 120 ekor	2 ekor unta betina	Betina	3 tahun lebih

Jika lebih dari bilangan unta seperti di atas, maka bagi tiap-tiap empat puluh (40) ekor unta wajib dikeluarkan zakatnya satu (1) ekor unta betina berumur 2 tahun lebih, dan bagi tiap-tiap lima puluh (50) ekor anak unta wajib dikeluarkan zakatnya satu (1) ekor unta betina berumur tiga (3) tahun lebih dan demikian seterusnya. Hal ini terpakai menurut kebanyakan para ulama.

- **Kadar Zakat Lembu/Kerbau**

Kadar Nisab	Kadar Dikeluarkan Zakat
30-39 ekor	1 ekor anak lembu jantan berumur 1 tahun
40-59 ekor	1 ekor anak lembu betina berumur 2 tahun
60-69 ekor	2 ekor anak lembu jantan berumur 1 tahun
70-79 ekor	2 ekor anak lembu (1 ekor lembu betina berumur 2 tahun dan 1 ekor jantan berumur 1 tahun)
80-89 ekor	2 ekor anak lembu betina berumur 2 tahun
90-99 ekor	3 ekor anak lembu jantan berumur 1 tahun
100-109 ekor	3 ekor anak lembu (1 ekor lembu betina berumur 2 tahun dan 2 ekor jantan berumur 1 tahun)

Apabila bilangan lembu atau kerbau lebih daripada yang dinyatakan di atas, maka bagi setiap 30 ekor lembu diwajibkan zakat 1 ekor anak lembu jantan yang berumur satu tahun. Bagi setiap 40 ekor lembu diwajibkan zakat satu ekor anak lembu betina yang berumur 2 tahun.

Sekiranya ternakan bercampur antara lembu dan kerbau, maka zakatnya terserah kepada pembayar sama ada boleh memberi lembu/kerbau yang lain atau daripada pemiliharaan itu. Pilihlah yang sederhana untuk keluarkan zakat.

- Kadar Zakat Kambing

Kadar Nisab	Kadar dikeluarkan zakat
40-20 ekor	1 ekor berumur 1 tahun
121-200 ekor	2 ekor berumur 1 tahun
201-299 ekor	3 ekor berumur 1 tahun
300-400 ekor	4 ekor berumur 1 tahun

Jika semua kambing sampai nisab itu jantan maka harus dikeluarkan yang jantan sebagai zakat, tetapi apabila ada antaranya yang betina hendaklah sebahagian dari zakat yang dikeluarkan itu betina.

Jika bercampur kambing biasa dan biri-biri serta beberapa jenisnya maka apabila cukup nisab, bolehlah dikeluarkan zakatnya mengikut pilihan tuannya samada kambing biasa atau biri-biri.

6.13.10.5 Pemilihan Binatang Zakat Ternakan

Pilihan diberikan kepada pengusaha untuk mengira sama ada menggunakan kaedah Zakat Ternakan atau Zakat Perniagaan. Pemilihan ini diberi kerana kebiasaan bintang-binatang ternakan dibela untuk tujuan perniagaan, apatah lagi jika jumlahnya yang sangat banyak.

Tambahan pula ternakan tersebut dipelbagai dengan usaha yang lain dan selalunya diniagakan dalam pelbagai industri perniagaan. Ada beberapa syarat dikehendaki kepada binatang yang ingin diserahkan sebagai zakat, iaitu:

- 1) Bebas dari kecacatan dan kerosakan.**
Binatang tersebut tidak sakit, luka, terlalu tua, pekak, tempang dan sebagainya dan kecacatan lain yang mengurangkan manfaatnya serta nilai harganya. Namun dikecualikan sekiranya semua binatang ternakan yang diternak mengalami kecacatan yang sama.
- 2) Betina.**
Terutamanya bagi Unta
- 3) Umur.**
Telah ditetapkan umur-umur tertentu bagi kadar binatang yang ingin dizakatkan. Keterikatan dengan umur kerana mengambil zakat di bawah umur akan mengurangkan manfaat kepada golongan asnaf, manakala mengambil zakat melebihi umur yang disyaratkan akan menzalimi pemilik binatang tersebut,

4) Pertengahan.

Para pengutip zakat (amil) tidak boleh mengambil zakat yang terlalu baik atau yang terlalu buruk, akan tetapi harus mengambil yang pertengahan kecuali pemilik tersebut rela menyerahkannya yang paling baik.

6.14 Institusi-institusi Zakat di Malaysia di Bawah Majlis Agama Islam Negeri-negeri

- 1) Majlis Agama Islam dan Adat Istiadat Melayu Perlis.
- 2) Lembaga Zakat Negeri Kedah.
- 3) Zakat Pulau Pinang.
- 4) Majlis Agama Islam dan Adat Melayu Perak.
- 5) Majlis Agama Islam Kelantan.
- 6) Majlis Agama Islam dan Adat Melayu Terengganu.
- 7) Pusat Kutipan Zakat Pahang.
- 8) Lembaga Zakat Selangor.
- 9) Pusat Pungutan Zakat Wilayah Persekutuan-Kutip.
Majlis Agama Islam Wilayah Persekutuan-Agih.
- 10) Perbadanan Baitulmal Negeri Sembilan MAINS.
- 11) Zakat Melaka-Kutip.
Majlis Agama Islam Melaka-Agih.
- 12) Majlis Agama Islam Johor.
- 13) Bahagian Zakat dan Fitrah Majlis Ugama Islam Sabah.
- 14) Tabung Baitulmal Majlis Islam Sarawak.

6.15 Hikmah Berzakat

- 1) Zakat merupakan ibadah yang terdapat dalam Rukun Islam dan amalan yang diwajibkan bagi setiap umat Islam sekiranya mereka mencukupi syarat-syarat memberi zakat.
- 2) Amalan zakat ini bertujuan untuk membentuk masyarakat saling bantu-membantu dan bersikap adil.
- 3) Golongan berada dan mewah membantu golongan yang miskin serta golongan yang daif mengasihai golongan yang berada.

BAHAGIAN 7

HAJI DAN UMRAH

BAB 1

HAJI

7.1 HAJI



Gambar 116: Baitullah (Kaabah)

7.1.1 Pendahuluan

Ibadah haji adalah puncak pengabdian orang Islam terhadap Allah SWT setelah ia memenuhi tuntutan syahadah, menunaikan ibadah anggota tubuh badan seperti solat dan puasa, menundukkan hawa nafsu serta menunaikan kewajipan ke atas hartanya menerusi amalan berzakat.

7.1.2 Pengertian Haji

Pengertian dari Segi Bahasa: menuju atau mengunjungi ke sesuatu tempat.

Pengertian dari Segi Istilah: mengunjungi Baitullah (Kaabah) di Mekah pada masa-masa tertentu (bulan haji, Zulhijah) serta melaksanakan perkara-perkara yang wajib bagi ibadah haji

7.1.3 Dalil dan Hukum Haji

Firman Allah SWT, dalam Surah Ali-Imran (3) ayat (96-97):

إِنَّ أَوَّلَ بَيْتٍ وُضِعَ لِلنَّاسِ لِلَّذِي يَبَكَّهُ مُبَارَّكًا
وَهُدًى لِلْعَالَمِينَ ﴿٩٦﴾ فِيهِ عَائِدَةٌ بَيْتَنَا مَقَامٌ
إِبْرَاهِيمَ وَمَن دَخَلَهُ وَكَانَ ءَامِنًا وَلَهُ عَلَى النَّاسِ
حِجُّ الْبَيْتِ مَنِ اسْتَطَاعَ إِلَيْهِ سَبِيلًا وَمَن كَفَرَ
فَإِنَّ اللَّهَ غَنِيٌّ عَنِ الْعَالَمِينَ ﴿٩٧﴾

Maksudnya: Sesungguhnya Rumah Ibadat yang mula-mula dibina untuk manusia (beribadat kepada Tuhan) ialah Baitullah yang di Makkah yang berkat dan (dihadikan) petunjuk hidayah bagi umat manusia. (96) Di situ ada tanda-tanda keterangan yang nyata (yang menunjukkan kemuliaannya; di antaranya ialah) Makam Nabi Ibrahim. Dan sesiapa yang masuk ke dalamnya aman tenteramlah dia. Dan Allah mewajibkan manusia mengerjakan ibadat Haji dengan

mengunjungi Baitullah iaitu sesiapa yang mampu sampai kepadanya. Dan sesiapa yang kufur (ingkarkan kewajipan ibadat Haji itu), maka sesungguhnya Allah Maha Kaya (tidak berhajatkan sesuatu pun) dari sekalian makhluk. (97)

Dalam Hadis riwayat Imam al-Bukhari (8) dan Imam Muslim (16):

عَنْ أَبِي عَبْدِ الرَّحْمَنِ عَبْدِ اللَّهِ بْنِ عُمَرَ بْنِ الْخَطَّابِ
رَضِيَ اللَّهُ عَنْهُمَا قَالَ: سَعَتْ رَسُولُ اللَّهِ يَقُولُ: "بُنْيَ
إِلْسَامٌ عَلَىٰ حَمْسٍ: شَهَادَةٌ أَنْ لَا إِلَهَ إِلَّا اللَّهُ وَأَنَّ
مُحَمَّداً رَسُولُ اللَّهِ، وَإِقَامُ الصَّلَاةِ، وَإِيتَاءُ الزَّكَاةِ، وَحَجَّ
الْبَيْتِ، وَصَوْمُمْ رَمَضَانَ".

Bermaksud: Dari Abu Abdurrahman Abdullah bin Umar bin Al-Khattab RA berkata: Aku mendengar Rasulullah SAW bersabda: "Islam dibina atas lima perkara: Penyaksian bahawa tiada Tuhan melainkan Allah dan sesungguhnya Muhammad adalah utusan Allah, melaksanakan solat, menunaikan zakat, menunaikan haji ke Baitullah, dan berpuasa pada Bulan Ramadan".

Para ulama Islam telah sepakat memutuskan bahawa haji adalah satu kefarduan. Oleh itu, mereka menghukumkan kafir kepada sesiapa yang mengingkari sesuatu yang telah ditetapkan al-Quran, as-Sunah dan Ijmak.

7.1.4 Jenis-jenis Haji

Haji terbahagi kepada tiga jenis. Jenis-jenis haji tersebut adalah seperti berikut:

1) Haji Ifrad

Dikerjakan dengan berniat mengerjakan haji dan umrah secara berasingan. Umrah tidak dikerjakan dalam Bulan syawal, Zulkaedah dan 10 hari terawal bulan zulhijjah atau tidak dikerjakan langsung. Mula-mula, dikerjakan ibadah haji hingga selesai dengan tahalul (melepaskan diri daripada pantang larang semasa berihram). Setelah membuka ihram dan bebas berbuat segala yang terlarang (semasa berihram), berpakaian ihram semula untuk mengerjakan umrah hingga selesai bertahalul.

2) Haji Tamatuk

Haji Tamatuk lebih dikenali sebagai mendahulukan ibadah umrah hingga bertahalul. Setelah membuka ihram, bebas membuat perkara yang disukai. Bila tiba masa untuk wukuf di Arafah pada 9 Zulhijah, ihram dipakai semula dan ibadah haji pula dikerjakan hingga selesai.

orang yang mengerjakan Haji Tamatuk dikenakan dam kerana dia mengerjakan umrah dan haji dalam bulan-bulan Haji pada tahun yang sama.

Dikatakan juga kerana ia bertamatuk (bersedap-sedap dengan menanggalkan Ihram setelah berihram) dalam bulan-bulan Haji dan tidak keluar ke Miqatnya atau ke suatu tempat yang jaraknya sekurang-kurangnya 2 marhalah dari Tanah Haram itu untuk berniat Ihram Haji.

3) Haji Qiran

Haji Qiran ialah mengerjakan haji bersama-sama dengan umrah. Sewaktu memakai ihram diniatkan serentak untuk haji dan umrah. Setelah memakai ihram lalu mengerjakan tawaf dan sai terus berwukuf di Arafah, melontar di tiga jamrah dan lain-lain. Setelah selesai semuanya, baharulah bertahalul dan dibolehkan menanggalkan ihram untuk memakai pakaian biasa dan bersenang-senang.

Ibadah haji Qiran selalunya dilakukan oleh mereka yang sampai ke Mekah pada 7 dan 8 Zulhijah dan mereka juga dikenakan dam.

7.1.5 Syarat-syarat Wajib Haji

Antara syarat wajib menunaikan haji bagi yang berkemampuan adalah seperti berikut:

- 1) Islam.
- 2) Berakal.
- 3) Baligh.
- 4) Merdeka.
- 5) Berkemampuan (*istito'ah*).

7.1.5.1 Islam

Haji dan umrah tidak wajib ke atas orang yang bukan Islam. Ini adalah kerana kedua-duanya merupakan ‘ibadat’ yang tidak dituntut atas mereka di dunia ini, malah tidak sah jika mereka melakukannya kerana Islam merupakan satu daripada syarat sah ibadat.

7.1.5.2 Baligh

Ibadat haji dan umrah tidak wajib atas orang yang belum baligh. Hal ini disebabkan dia tidak

dianggap mukalaf dan tuntutan syarak hanya berlaku atas orang yang baligh. Dalam hadis riwayat Imam al-Hakim (1769), daripada Ibn Abbas RA, Nabi SAW bersabda:

إِذَا حَجَّ الصَّيْمَ فَهِيَ لَهُ حَجَّةٌ حَتَّى يَعْقُلَ،
وَإِذَا عَقَلَ فَعَلَيْهِ حَجَّةٌ أُخْرَى

Bermaksud: “Apabila seorang kanak-kanak menunaikan haji maka baginya haji sampai dia berakal (baligh), maka apabila dia sudah berakal maka baginya haji yang lain (mengulangi haji)”.

7.1.5.3 Berakal

Tidak wajib atas orang gila disebabkan dia tidak mampu membezakan perintah dengan larangan. Dalam hadis riwayat Imam Abu Daud (4403), daripada Ali bin Abi Talib RA, Nabi SAW bersabda:

رُفِعَ الْقَلْمَنْ عَنْ ثَلَاثَةِ: عَنِ النَّائِمِ حَتَّى
يَسْتَيْقِظَ، وَعَنِ الصَّيْمَ حَتَّى يَحْتَلِمَ، وَعَنِ
الْمَجْنُونِ حَتَّى يَعْقُلَ

Bermaksud: “Diangkat pena daripada tiga golongan, iaitu orang yang tidur sehingga dia terjaga, kanak-kanak sehingga dia bermimpi, dan orang yang gila sehingga dia berakal”.

7.1.5.4 Merdeka

Haji dan umrah tidak wajib atas hamba disebabkan dia tidak memiliki sebarang harta. Malah dirinya sendiri, dan apa-apa perkara yang didapati dan dimilikinya ialah milik tuannya.

7.1.5.5 Berkemampuan (*Istito'ah*)

Ibadat haji dan umrah hanya wajib atas orang berupaya dan berkemampuan, sebagaimana firman Allah SWT dalam Surah Ali-'Imran (3) ayat 97:

فِيهِ ءَايَتُ بَيْنَدُّ مَقَامُ إِبْرَاهِيمَ وَمَنْ
ذَخَلَهُ وَكَانَ ءَامِنًا وَلِلَّهِ عَلَى النَّاسِ حُجُّ
الْبَيْتِ مَنِ اسْتَطَاعَ إِلَيْهِ سَبِيلًا وَمَنْ
كَفَرَ فَإِنَّ اللَّهَ غَنِيٌّ عَنِ الْعَذَابِينَ
٦٧

Maksudnya: "dan Allah mewajibkan manusia mengerjakan 'ibadat haji dan mengunjungi Batullah, iaitu sesiapa yang mempu sampai kepadanya."

a) Ciri-ciri berkemampuan (*istito'ah*)

- (i) Memiliki harta yang mencukupi untuk mengerjakan haji. Harta yang dimaksudkan adalah seperti berikut:

- Kos pengangkutan.
 - Perbelanjaan pergi dan balik, di samping bayaran untuk passport perjalanan.
 - Upah pemandu haji sebagaimana yang dikehendaki oleh pemerintah.
 - Semua harta tersebut mestilah lebih daripada jumlah hutangnya dan perbelanjaan ahli keluarga semasa ketiadaannya.
- (ii) Sihat tubuh badan jasmani dan rohani.
- (iii) Khusus bagi wanita, hendaklah wujud (ada) bersamanya mahram atau wanita yang *tsiqah* (yang boleh dipercayainya) dalam perjalanan pergi dan balik bagi menunaikan ibadat haji.
- (iv) Aman dalam perjalanan.
Tidak wajib haji atas orang yang bimbang akan ancaman musuh terhadap diri atau hartanya disebabkan ada kemudaratian. Antara ancaman yang dibimbangi terhadap diri dan hartanya adalah seperti:
- Penyamun.
 - Perompak atau lanun.
 - Wabak penyakit. Seperti Corona Virus (contoh:Covid-19), taun, selsema burung dan lain-lain.
 - Harta yang dibimbangi dirampas.

Begitu juga, sekiranya dikhawatir terdapat bahaya dalam perjalanan seperti berlaku peperangan.

Firman Allah SWT dalam Surah al-Baqarah (2) ayat 195:

وَأَنفَقُواْ فِي سَبِيلِ اللّٰهِ وَلَا تُنْقُواْ
بِأَيْدِيهِكُمْ إِلَى الْتَّهْلُكَةِ وَأَحَسِنُواْ إِنَّ
اللّٰهَ يُحِبُّ الْمُحْسِنِينَ

195

Maksudnya: *Dan belanjakanlah (apa yang ada pada kamu) kerana (menegakkan) ugama Allah, dan janganlah kamu sengaja mencampakkan diri kamu ke dalam bahaya kebinasaan (dengan bersikap bakhil); dan baikilah (dengan sebaik-baiknya segala usaha dan) perbuatan kamu; kerana sesungguhnya Allah mengasihi orang-orang yang berusaha memperbaiki amalannya.* (195)

b) Jenis berkemampuan (*istito'ah*)

- 1) Berkemampuan (*Istito'ah*) secara langsung.

Sesorang itu mampu melakukan sendiri ibadat haji atau umrah. Disebabkan masih berupaya, iaitu badan yang sihat, sanggup dan mampu menempuh perjalanan dan melaksanakan ibadat haji tersebut tanpa mengalami kemudaratian yang berat dan kesulitan yang tidak mampu ditanggungnya.

2) Berkemampuan (*Istito'ah*) secara tidak langsung.

Seorang mukalaf yang memiliki harta yang mencukupi untuk mengupah orang lain mengerjakan haji bagi pihaknya, sama ada semasa dia masih hidup atau selepas dia meninggal dunia. Hal ini disebabkan tua, berpenyakit dan seumpamanya.

7.1.6 Rukun Haji

Rukun haji ada enam. Antara enam rukun tersebut adalah seperti berikut:

- 1) Ihram.
- 2) Wukuf di Arafah.
- 3) Tawaf.
- 4) Sai.
- 5) Tahalul.
- 6) Tertib.

Rukun Haji Secara Ringkas:

Rukun Haji	Huraian
1) Ihram	Ihram ialah permulaan amalan haji. Ia juga merupakan laluan masuk segala ibadat tersebut serta berbagai-bagai rukun dan wajibnya.
2) Wukuf	Wukuf ertiinya berhenti atau berdiri. Maksudnya ialah menghadirkan diri di padang Arafah antara zuhur hari 9 Zulhijah hingga sejurus sebelum terbit fajar 10 Zulhijah.
3) Tawaf	Tawaf ialah mengelilingi Kaabah sebanyak tujuh kali pusingan. Tawaf ini hendaklah dilakukan atau dilaksanakan selepas melontar Jamratul Aqabah, bercukur atau menggunting rambut dan berkurban pada 10 Zulhijah atau selepas melontar kesemua jamrah dari 11 Zulhijah hingga 13 Zulhijah.
4) Sai	Safa dan Marwah merupakan dua buah bukit yang berhampiran dengan Kaabah, manakala sai diantara kedua-duanya bermaksud berjalan dari Safa ke Marwah dan sebaliknya sebanyak 7 kali, iaitu dari Safa ke Marwah dikira sekali dan dari Marwa ke Safa dikira sekali. Begitulah seterusnya.
5) Tahalul	Tahalul dari segi bahasa ialah menjadi boleh atau dihalalkan. Menurut syarak pula perkataan tahalul bermaksud membebaskan diri daripada larangan yang terdapat semasa dalam waktu ihram.
6) Tertib	Melakukan rukun-rukun haji mengikut turutan.

7.1.6.1 Ihram

a) Pengertian Ihram:

Ihram adalah niat masuk (mengerjakan) ibadah haji dan umrah dengan menghindari hal-hal yang dilarang selama berihram.

Ihram ditandai dengan mengambil miqat di lokasi yang telah ditentukan, berpakaian ihram, dan membaca niat haji atau umrah.

b) Perkara yang Berkaitan dengan Ihram

Perkara yang berkaitan dengan ihram adalah miqat. Miqat terbahagi kepada dua iaitu Miqat Zamani dan Miqat Makani.

1) Miqat Zamani

Tempoh sah berihram haji dilakukan pada bulan Syawal, Zulkaedah dan 10 hari yang pertama bulan Zulhijah. Tempoh ini merupakan jangka masa yang boleh melakukan ihram haji. Ini bererti seseorang yang berniat haji sebelum tempoh tersebut tidak sah niat dan ihramnya.

2) Miqat Makani

Beberapa sempadan tertentu yang melingungi kawasan tanah haram Mekah dari berbagai-bagai arah.

c) Cara Berihram Haji dan Umrah

Ihram adalah dengan berniat memulakan ibadat haji atau umrah atau kedua-duanya

sekali, berserta amalan dan adab-adab bagi menyempurnakannya.

Sesiapa yang ingin mengerjakan ibadat haji atau umrah hendaklah memulakannya dengan perkara-perkara yang berikut:

1) Mandi.

Sunat mandi dengan niat mandi ihram. Sekiranya tidak dapat mandi dia hendaklah bertayamum.

2) Mengharumkan tubuh.

Sunat mengenakan wangi-wangian pada tubuh badan. Tidak mengapa haruman yang masih berbau semasa memulakan ihram dan semasa mengerjakan ibadat tersebut.

3) Menukar Pakaian.

(i) Wajib bagi lelaki:

Menggantikan pakaianya dengan dua helai kain yang tidak berjahit dan kedua-dua helai kain tersebut disunatkan berwarna putih.

(ii) Wajib bagi perempuan:

Wajib menutup seluruh tubuhnya kecuali muka dan dua tapak tangan yang wajib dedahkan.

d) Cara-cara Pemakaian Pakaian Ihram

1) Cara pemakaian bagi jemaah lelaki.


Bagi jemaah lelaki, pakaian ihram yang diperlukan sebanyak dua helai kain putih yang tidak berjahit. Ianya dinamakan *Izaar* dan *Ridaa'*. *Izaar* merupakan kain yang menutup bahagian bawah dengan cara sarung manakala *Ridaa'* merupakan kain yang digunakan untuk diselempangkan di bahagian atas tubuh.

Pertama: Pilih satu helai kain yang lebih panjang dan tebal untuk dipakai di bahagian bawah badan. Bentangkan posisi kedua kaki, lalu sarungkan kain ke badan tangan kanan di bentangkan sambil menggenggam dua hujung kain ihram yang disatukan, dengan tangan kiri diletakan dibawah ketiak untuk menahan lipatan.



Gambar 117: Tangan Kiri Diletakan
Dibawah Ketiak untuk Menahan Lipatan.

Kedua: Hujung kain ihram yang disatukan ditarik ke arah kanan, sedangkan tangan kanan menahan lipatan di bawah ketiak kiri.



Gambar 118: Hujung Kain Ihram yang Disatukan Ditarik ke Arah Kanan

Ketiga: Hujung kain ihram yang disatukan dilipat ke dalam seperti memakai sarung untuk solat, sehingga tidak kelihatan dari depan dan nampak rapi. Kemudian, pakai tali pinggang khas haji agar ikatan lebih kemas dan kuat.



Gambar 119: Pakai Tali Pinggang Khas Haji Agar Ikatannya Lebih Kemas dan Kuat

Keempat: Ambil kain ihram potongan yang kedua dan bentangkan dengan tangan memegang hujung kain ihram tersebut. Posisi tangan kiri agak ke atas dan tangan kanan ke bawah.




Gambar 120: Posisi Tangan Kiri Agak ke Atas dan Tangan Kanan ke Bawah

Kelima: Selitkan hujung kain ihram sebelah kiri pada gulungan kain ihram di pinggang sebelah kanan.



Gambar 121: Hujung Kain Ihram Diselitkan Sebelah Kiri pada Gulungan Kain Ihram di Pinggang Sebelah Kanan

Keenam: Kain ihram sebelah kanan diselendangkan menutupi bahagian atas badan kiri.



Gambar 122: Kain Ihram Menutupi
Bahagian Atas Badan Kiri

2) Cara pemakaian bagi jemaah perempuan:

Cara pemakaian ihram bagi wanita sangat mudah. Ia sama seperti cara pemakaian bagi wanita ketika menunaikan solat.

Pertama: Bagi jemaah wanita, pakaian ihram tersebut haruslah menutup aurat. Seperti yang kita sedia maklum, aurat wanita adalah seluruh tubuh kecuali muka dan tapak tangan.

Kedua: Pakaian ihram tersebut juga disunatkan berwarna putih serta disunatkan kepada jemaah wanita untuk memakai sarung tangan dan sarung kaki.

Hal ini disunatkan bagi menghindari terbukanya aurat di bahagian kaki dan tangan.

e) Perkara Sunat Ketika Ihram

1) Solat dua rakaat.

Sunat melakukan solat sebanyak dua rakaat dengan berniat sunat ihram.

2) Mengucapkan lafaz niat Ihram Haji atau Ihram Umrah.

Setelah melakukan semua perkara wajib atau adab-adab yang sunat, berniatlah ihram haji atau umrah dalam hati sebelum memulakan perjalanan dengan apa-apa cara sekalipun. Niat tersebut sunat dilafazkan.

- 3) **Wajib untuk berniat dalam hati** .
Manakala melafazkannya dan mengucap talbiah adalah sunat sahaja.

f) **Cara berniat Ihram Haji**

نَوَيْتُ الْحَجَّ وَأَخْرَمْتُ بِهِ اللَّهَ تَعَالَى

*Nawaitul hajja wa ahromtu bihi
Lillaahi Ta'aalaa*

Bermaksud: “Sahaja aku berniat ihram haji kerana Allah Taala”.

g) **Perkara yang Diharamkan Ketika Ihram**

- 1) Memotong rambut atau menghilangkan mana-mana bulu pada anggota badan.
- 2) Memotong kuku.
- 3) Memotong, menebang, mencabut dan mematahkan tumbuh-tumbuhan termasuk rumput di Tanah Haram.
- 4) Memburu atau membunuh haiwan di Tanah Suci.
- 5) Bersetubuh.
- 6) Melakukan mukadimah jimak seperti bercium, bercumbu-cumbuan atau berpeluk yang menaikkan nafsu syahwat.
- 7) Akad nikah sama ada ijab atau kabul untuk diri sendiri atau mewakili orang lain.

7.1.6.2 Wukuf

a) Pengertian Wukuf

Pengertian dari Segi Bahasa: Berhenti atau berdiri.

Pengertian dari Segi Istilah: Wukuf ialah berhenti di Arafah di antara waktu Zuhur hari ke 9 Zulhijah hingga sebelum fajar 10 Zulhijah.

Memadai wukuf walau seketika atau lalu sahaja dengan syarat pelaksananya sedar dan sempurna akal. Kawasan untuk berwukuf adalah seluruh kawasan Arafah dan tidak pula disyaratkan pelaksananya itu mesti memijak bumi Arafah.

Andainya ia hanya berada di dalam kereta atau bas dan tidak turun menjajakan kakinya di bumi itu juga sah wukufnya. Seandainya seseorang itu tidak berwukuf, maka tidaklah sah hajinya dan hendaklah dia meneruskan ibadahnya dengan bertahalul umrah. Wajib baginya membayar dam dan perlu mengqadakan (menggantikan) hajinya pada tahun hadapan.

Wukuf di Arafah merupakan teras utama bagi seluruh amalan haji, seolah-olah ibadah haji itu hanya semata-mata berwukuf di Arafah. Arafah ialah nama bukit yang berbanjar (berjajaran, berbaris atau berderet) ke Mina, kira-kira 25 kilometer ke tenggara Mekah.

Berdasarkan hadis riwayat Imam at-Tirmizi (889):

الْحَجُّ عَرَفَةُ، مَنْ جَاءَ لِيَلَّةَ جَمْعٍ قَبْلَ
طُلُوعِ الْفَجْرِ فَقَدْ أَذْرَكَ الْحَجَّ

Bermaksud: “Haji itu ialah Arafah, sesiapa yang datang ke Arafah pada malam perhimpunan sebelum fajar terbit bererti dia dapat ibadat haji tersebut”.

f) **Syarat-syarat Wukuf di Arafah**

- 1) Wukuf hendaklah dalam tempoh waktu Zuhur hari yang kesembilan Zulhijah hingga terbit fajar pada hari Raya Aidiladha. Ini bererti seseorang yang wukuf di Arafah sebelum atau selepas tempoh tersebut hajinya tidak sah.
- 2) Wukuf di tempat yang dikehendaki di kawasan Arafah.



Gambar 123: Wukuf di Arafah

g) Perkara-perkara yang Sunat Dilakukan Ketika Wukuf di Arafah

- 1) Melaksanakan solat Zuhur dan Asar secara jamak takdim dan qasar iaitu solat Asar dua rakaat dan Zuhur dua rakaat di dalam waktu Zuhur.
- 2) Mendengar khutbah Arafah sebelum melaksanakan solat Zuhur dan Asar.
- 3) Menghadap kiblat ketika berdoa.
- 4) Melaksanakan wukuf hingga matahari terbenam
- 5) Memperbanyak amalan sunah (seperti zikir, baca al-Quran, baca selawat, berdoa, bertaubat dan lain-lain perkara yang baik)
- 6) Menjaga lisan daripada perkataan yang keji dan haram.

7.1.6.3 Tawaf

a) Pengertian Tawaf

Tawaf ialah mengelilingi Kaabah sebanyak tujuh kali pusingan.

Berdasarkan firman Allah SWT dalam Surah al-Hajj (22) ayat (29):

شَّمَّ لِيَقْضُوا تَفَثِّهُمْ وَلَيُوفُوا نُذُورَهُمْ
وَلَيُطَوَّفُوا بِالْبَيْتِ الْعَتِيقِ



Maksudnya: "Dan hendaklah mereka tawaf akan Baitullah (Kaabah) yang tua sejarahnya itu."

b) Syarat Sah Tawaf

- 1) Hendaklah mempunyai semua syarat sebagaimana syarat sah solat, iaitu niat, suci daripada hadas besar dan kecil, suci daripada najis sama ada pada badan, pakaian atau tempat tawaf dan menutup aurat.
- 2) Semasa tawaf, mana-mana bahagian badan janganlah termasuk ke dalam sempadan Kaabah. Justeru hendaklah tawaf di luar kawasan *Hijr Ismail* kerana ia juga termasuk di dalam kawasan Kaabah dan tidak harus tawaf di dalamnya. *Hijr Ismail* ialah dinding yang rendah dalam bentuk setengah bulatan yang terletak di kawasan sebelah utara Kaabah.
- 3) Tawaf hendaklah dimulakan dari Hajar Aswad dengan Kaabah berada di sebelah kiri badan. Sesiapa yang memulakan tawaf di belakang garisan Hajar Aswad ia belum dikira tawaf sehingga dia sampai ke garisan tersebut semula.
- 4) Hendaklah menyempurnakan tawafnya sebanyak tujuh kali pusingan.

c) Jenis-jenis Tawaf

1) Tawaf Qudum

Tawaf Qudum ialah Tawaf Selamat Datang yang disunatkan bagi mereka yang

mengerjakan Haji Ifrad dan Haji Qiran atau sekadar menziarahi Mekah. Sunat dilakukan Tawaf Qudum setibanya di Mekah dan harus dilewatkan sehingga sebelum berwukuf.

2) Tawaf Umrah

Tawaf Umrah merupakan tawaf rukun yang mesti dilakukan oleh orang yang mengerjakan umrah. Sekiranya tidak dilakukan maka tidak sah umrahnya.

3) Tawaf Haji

Tawaf Haji ialah Tawaf Rukun yang mesti dilakukan oleh jemaah haji setelah masuk waktunya (bermula selepas separuh malam 10 Zulhijah). Sekiranya tidak dilakukan sama ada sengaja atau tidak, maka tidak sempurnalah hajinya. Ia juga dikenali dengan Tawaf Ifadah.

4) Tawaf Tahiyatal-Bait

Tawaf yang sunat dilakukan bagi menghormati Kaabah sewaktu memasuki Masjidil Haram.

5) Tawaf Sunat

Tawaf Sunat ialah tawaf yang sunat dilakukan pada bila-bila masa.

6) Tawaf Nazar

Tawaf Nazar ialah tawaf yang mesti ditunaikan oleh seseorang apabila dia berniat nazar pada sesuatu yang dihajatinya.

7) Tawaf Wada'

Tawaf Wada' ialah tawaf selamat tinggal yang wajib dilakukan bagi mereka yang

hendak meninggalkan Mekah lebih dari 2 marhalah (lebih kurang 56 batu atau 91 kilometer) atau lebih.

Ia juga wajib bagi orang yang akan meninggalkan Mekah dan akan bermukim di luar Tanah Haram selama empat hari atau lebih walaupun jaraknya kurang dari dua marhalah sama ada dia adalah penduduk Mekah atau bukan.



Gambar 124: Tawaf Mengelilingi Kaabah

7.1.6.4 Sai

a) Pengertian Sai

Safa dan Marwah merupakan dua buah bukit yang berhampiran dengan Kaabah manakala sai di antara kedua-duanya bermaksud berjalan dari Safa ke Marwah dan sebaliknya sebanyak 7 kali perjalanan, ia dikira dari Safa ke Marwah sebagai sekali perjalanan dan dari Marwah ke Safa juga sebagai sekali

perjalanan. Sebagaimana dalam Surah al-Baqarah (2) ayat 158:

إِنَّ الصَّفَا وَالْمَرْوَةَ مِنْ شَعَابِ اللَّهِ



...

Maksudnya: Sesungguhnya "Safa" dan "Marwah" itu ialah sebahagian daripada syiar (lambang) agama Allah; ... (158)

b) Sejarah Sai

Dua bukit Safa dan Marwah mengingatkan kisah bagaimana Saidatina Hajar iaitu ibu Ismail AS sedang berulang alik antara keduanya mencari air untuk anaknya selepas ditinggalkan kedua-duanya oleh Nabi Ibrahim AS di sisi Baitullah al-Haram.

Setelah turun wahyu kepada Nabi Ibrahim AS memerintahkan supaya baginda bersama-sama dengan anak dan isterinya (Nabi Ismail AS dan Siti Hajar) pergi ke Mekah yang ketika itu belum didiami oleh manusia, malah hanya berupa lembah pasir, bukit-bukau yang tandus dan tiada air.

Di tempat inilah, kedua-duanya ditinggalkan. Nabi Ismail AS dan Siti Hajar merasa sedih saat ditinggalkan begitu saja di tempat yang tak berpenghuni lalu bertanya kepada Nabi Ibrahim AS. Di sinilah ucapan Siti Hajar yang masyhur: Kepada siapa kamu serahkan kami, adakah Allah yang perintahkan kamu demikian itu? Lantas jawab Nabi Ibrahim AS: Ya.

Dengan penuh yakin, isteri solehah itu berkata: Kalau begitu Allah SWT tidak akan mengabaikan kami.

Ia percaya bahawa hidupnya tentu terjamin walaupun di tempat yang sunyi, tiada manusia dan segala kemudahan. Sedangkan waktu itu, Nabi Ismail AS masih menyusu. Kecintaan Nabi Ibrahim AS kepada Allah SWT dan menuruti perintah-Nya, melebihi segalanya. Ia pun menyerahkan semuanya kepada Allah SWT dan berdoa, sebagaimana dalam Surah Ibrahim (14) ayat (37):

رَبَّنَا إِنِّي أَسْكَنْتُ مِنْ ذُرِّيَّتِي بِوَادٍ غَيْرِ
ذِي رَزْعٍ عِنْدَ بَيْتِكَ الْمُحَرَّمِ رَبَّنَا
لِيُقِيمُوا الصَّلَاةَ فَاجْعَلْ أَفْءَادَهُ مِنَ
النَّاسِ تَهْوِي إِلَيْهِمْ وَأَرْزُقْهُمْ مِنَ
الثَّمَرَاتِ لَعَلَّهُمْ يَشْكُرُونَ ﴿٣٧﴾

Maksudnya: "Wahai Tuhan kami! Sesungguhnya aku telah menempatkan sebahagian dari zuriat keturunanku di sebuah lembah (Tanah Suci Makkah) yang tidak tanaman padanya, di sisi rumahMu yang diharamkan mencerobohnya. Wahai Tuhan kami, (mereka ditempatkan di situ) supaya mereka mendirikan sembahyang (dan memakmurkannya dengan

ibadat). Oleh itu, jadikanlah hati sebahagian dari manusia tertarik gemar kepada mereka, (supaya datang beramai-ramai ke situ), dan kurniakanlah rezeki kepada mereka dari berbagai jenis buah-buahan dan hasil tanaman, semoga mereka bersyukur. (37)

Sewaktu Nabi Ismail AS dan ibunya hanya berdua dan kehabisan air untuk minum di lembah pasir dan bukit yang tandus, Siti Hajar pergi mencari air dengan berulang-alik dari Bukit Safa ke Bukit Marwah sebanyak tujuh kali.

Saat kali ketujuh (terakhir), ketika sampai di Marwah, tiba-tiba terdengar oleh Siti Hajar bunyi yang mengejutkan, lalu ia menuju ke arah bunyi itu lalu mendapati bahawa bunyi itu ialah bunyi air yang memancar dari dalam tanah dengan derasnya di bawah telapak kaki Nabi Ismail AS.

Air itu adalah Air Zamzam Siti Hajar kemudian mendengar suara malaikat Jibril AS dan berkata kepadanya: “*Jangan khuatir, di sini Baitullah (rumah Allah) dan anak ini (Nabi Ismail AS) serta ayahnya akan mendirikan rumah itu nanti. Allah SWT tidak akan mensiasakan hamba-Nya.*”

c) Syarat Sai

- 1) Sai dilakukan selepas tawaf sebanyak tujuh kali perjalanan yang bermula dari bukit Safa dan berakhir di Bukit Marwah. Setiap perjalanan di antara kedua-duanya dikira sekali.

- 2) Hendaklah melalui laluan di antara Safa ke Marwah. Sekiranya tertinggal atau terkurang, maka perjalanan tersebut tidak sah.

Oleh itu, orang yang bersai wajib merapatkan tumitnya ke kaki Bukit Safa dan berjalan dari situ menuju ke Bukit Marwah. Sebaik sampai di situ wajib pula menemukan jari-jari kakinya di tebing bukit tersebut dan begitulah seterusnya.

- 3) Ketujuh-tujuh kali perjalanan hendaklah dilakukan secara berturut-turut. Sekiranya terpisah agak lama pada tanggapan umum sai hendaklah dilakukan semula.



Gambar 125: Sai Bermula dari Bukit Safa
dan Berakhir di Bukit Marwah

7.1.6.5 Tahalul

a) Pengertian Tahalul

Pengertian dari Segi Bahasa: Menjadi boleh atau dihalalkan.

Pengertian dari Segi Istilah: Tahalul ialah membebaskan diri daripada larangan yang terdapat semasa dalam waktu ihram.

Dalam ibadah haji dan umrah, perbuatan tahalul dijadikan salah satu dari rukun dalam kedua-dua ibadah tersebut. Dengan erti kata lain, tidak sempurnalah ibadah haji atau umrah seorang itu jika tidak melaksanakan rukun tahalul ini.

Tahalul bagi ibadah umrah ialah di mana para jemaah melakukan cukur atau bergunting selepas selesainya melaksanakan rukun sai di dalam Masjid al-Haram itu sendiri. Justeru selepas selesainya bergunting atau bercukur ini, para jemaah bebas daripada larangan yang terdapat sepanjang tempoh berihram.

Berdasarkan firman Allah SWT, dalam Surah al-Fath (48) ayat (27):

لَقَدْ صَدَقَ اللَّهُ رَسُولُهُ أَرْعِيَا بِالْحَقِّ
لَتَدْخُلُنَّ الْمَسْجِدَ الْحَرَامَ إِنْ شَاءَ اللَّهُ
عَامِنِينَ مُحْلِقِينَ رُؤُوسَكُمْ وَمُّقَصِّرِينَ

Maksudnya: Demi sesungguhnya! Allah tetap menyatakan benar RasulNya dalam perkara mimpi itu dengan kenyataan yang sebenar; iaitu sesungguhnya kamu tetap akan memasuki Masjid Al-Haraam - insya Allah (pada masa yang ditentukanNya) - dalam keadaan aman (menyempurnakan ibadat umrah kamu) dengan mencukur kepala kamu, dan kalau (tidak pun) menggunting sedikit rambutnya, ... (27)

Waktu tahalul bermula dari selepas tengah malam Raya Aidiladha. Ketika itu, jamaah haji telah pun bertolak meninggalkan Arafah menuju ke Mina setelah bermalam yang wajib di Muzdalifah. Kemudian, terdapat tiga ibadat haji yang penting dilakukan iaitu melontar Jamratul Aqabah, bercukur dan tawaf. Sesiapa yang menyempurnakan dua daripada amalan tersebut bermakna dia telah keluar daripada ihram hajinya sebagai tahalul yang pertama dan dinamakan sebagai tahalul kecil. Mereka bebas melakukan kesemua sepuluh perkara yang dilarang ketika ihram kecuali berkaitan perempuan, sama ada persetubuhan, bercumbu-cumbuan atau akad nikah. Ini bererti dia bebas memakai baju, menggunakan bau-bauan dan sebagainya.

Seterusnya apabila dia menyempurnakan amalan yang ketiga daripada amalan tersebut baru dia terkeluar sepenuhnya daripada ihram haji sebagai tahalul penuh atau tahalul besar atau dikenali juga sebagai tahalul *tsani*.



Gambar 126: Mencukur atau Menggunting Rambut

7.1.7 Wajib Haji

7.1.7.1 Pengertian Wajib Haji

Wajib Haji ialah perkara yang wajib dilakukan ketika mengerjakan haji. Jika tidak melakukan salah satu daripadanya, haji tersebut tetap sah tetapi akan dikenakan Dam.

7.1.7.2 Wajib Haji

1) Berihram di miqat

Pengertian dari Segi Bahasa: Waktu

Pengertian dari Segi Istilah: Ketentuan tempat atau masa untuk berniat ihram haji atau umrah.

Seseorang yang mengerjakan haji hendaklah berihram di miqatnya, sama ada miqat zamani (ketentuan masa) atau miqat makani (ketentuan tempat). Apabila melalui miqat makani tanpa berihram, sehingga masuk ke Tanah Haram, bererti dia telah meninggalkan satu daripada wajib haji.

2) Bermalam di Muzdalifah

Seseorang jemaah haji yang meninggalkan Arafah menuju ke Mina selepas matahari terbenam, wajib bermalam di Muzdalifah, dengan berada di sana sehingga selepas tengah malam. Walau bagaimanapun, tidak wajib menunggu hingga fajar terbit.

3) Melontar Jamrah

Setelah meninggalkan Arafah dan bermalam di Muzdalifah, jemaah haji hendaklah menuju ke

Jamrah al-Aqabah yang terletak di hujung perjalanan dari Mina ke Mekah. Di sana, jemaah haji wajib melontar jamrah tersebut dengan tujuh biji anak batu dan setiap biji hendaklah jatuh di tempat yang ditetapkan.

Waktu melontar jamrah ini bermula selepas tengah malam raya Aidiladha dan berakhir apabila matahari terbenam pada hari raya korban tersebut. Seterusnya, pada setiap hari Tasyrik selepas hari raya tersebut, jemaah haji wajib melontar tujuh biji anak batu di setiap jamrah mengikut turutannya, iaitu Jamrah al-Ula yang berhampiran masjid al-Khaif, diikuti Jamrah al-Wusta, dan akhirnya Jamrah al-Aqabah yang kesemuanya terletak di Mina.

Hari Tasyrik ialah hari yang mana umat Islam dilarang berpuasa ketika itu. Hari Tasyrik terjadi selama 3 hari dalam bulan Zulhijah iaitu pada 11, 12 dan 13 Zulhijah.

Waktu melontar ketiga-tiga jamrah tersebut bermula selepas matahari gelincir dan berakhir apabila ia terbenam. Walau bagaimanapun, jika tidak dapat melontar pada waktu tersebut bolehlah melontar selepas matahari terbenam, malah boleh juga menangguhkannya pada hari yang kedua, tanpa dikenakan fidyah.

4) **Bermalam di Mina**

Di samping melontar tiga jamrah pada hari Tasyrik, Jemaah haji juga wajib bermalam di Mina pada malam yang pertama dan yang kedua hari Tasyrik.

5) **Tawaf Wadak**

Menurut pendapat yang sahih, seseorang yang hendak meninggalkan Mekah selepas

selesai mengerjakan semua ibadat dan amalan haji, maka wajib melakukan tawaf Wadak.

Dalam hadis riwayat Imam Muslim (1327), daripada Ibn Abbas RA berkata:

كَانَ النَّاسُ يَصْرِفُونَ فِي كُلِّ وَجْهٍ
فَقَالَ رَسُولُ اللَّهِ صَلَّى اللَّهُ عَلَيْهِ وَسَلَّمَ
لَا يَنْفَرِنَّ أَحَدٌ حَتَّى يَكُونَ آخِرُ عَهْدِهِ
بِالْبَيْتِ

Bermaksud: “Dahulunya orang ramai beredar mengikut haluan masing-masing (untuk meninggalkan Mekah). Lalu Rasulullah SAW bersabda: Jangan sekali-kali seseorang daripada kamu meninggalkan Mekah sehingga akhir keberadaannya (di Mekah) al-Bait (Tawaf al-Wada’).”

Walau bagaimanapun, perempuan haid tidak dituntut melakukan tawaf wadak ini. Setelah melakukan tawaf Wadak, seseorang itu hendaklah segera meninggalkan Mekah. Jika tinggal lama dan tanpa keperluan, atau tiada kaitan dengan perjalanan, seperti menziarahi orang sakit atau membeli belah dia wajib mengulangi tawaf tersebut.

7.1.8 Perbezaan Rukun Dan Wajib Haji

Rukun Haji adalah aktiviti yang mesti dilakukan oleh jemaah haji ketika mengerjakan haji. Jika tidak ditunaikan, haji seseorang itu tidak sah/tidak sempurna dan masih tertakluk dengan larangan ihram.

Wajib Haji adalah aktiviti yang wajib dilakukan ketika mengerjakan haji. Jika tidak mengerjakan salah satu daripadanya haji tersebut tetap sah tetapi dikenakan dam/denda mengikut syarat-syaratnya dan menanggung dosa jika meninggalkan perkara tersebut dengan sengaja.

7.1.9 Perkara-perkara Sunat Haji

Berikut merupakan sunat haji yang boleh diikuti oleh setiap jemaah haji:

7.1.9.1 Perkara Sunat Ketika Ihram

- 1) Mandi Sunat Ihram sebelum melakukan ihram, atau bertayammum sekiranya tidak boleh mandi, diikuti semua perkara membersihkan diri, seperti mencabut atau mencukur bulu ketiak, mencukur bulu ari-ari, memotong kuku dan membuang segala kotoran.

Mandi tersebut sunat bagi setiap orang yang mengerjakan haji, sama ada lelaki atau perempuan termasuk perempuan yang suci haid atau nifas.

- 2) Melafazkan niat, diikuti mengucapkan talbiah dengan suara yang kuat bagi orang lelaki, sama ada ketika berdiri, duduk, berjalan atau dalam apa-apa keadaan sekalipun.

Sementara kaum wanita pula sunat mengucap talbiah dengan suara perlahan yang

didengarinya sendiri sahaja. Seboleh-bolehnya menjauhi perbualan tentang perkara keduniaan dan bersuka ria yang harus, lebih-lebih lagi yang makruh dan haram.

Talbiah ialah bacaan yang dibaca Jemaah haji dan umrah Ketika dalam ihram. Lafaz talbiah adalah seperti berikut:

لَبَّيْكَ اللَّهُمَّ لَبَّيْكَ. لَبَّيْكَ لَا شَرِيكَ لَكَ
لَبَّيْكَ. إِنَّ الْحَمْدَ وَالنِّعْمَةَ لَكَ وَلَمْلُوكَ
لَا شَرِيكَ لَكَ.

*Labbaikallaahumma labbaik.
Labbaika laa syariika laka labbaik.
Innal hamda wann'i'mata laka wal
mulka laa syariika lak.*

Bermaksud: “Aku menyahut seruan-Mu dan panggilan-Mu, aku lakukannya. Tidak ada sekutu bagi Engkau wahai Tuhan. Semua kerajaan adalah milik Engkau wahai Tuhan. Bahawasanya segala puji dan segala nikmat dan segala kerajaan adalah milik Engkau wahai Tuhan. Aku penuhi wahai Tuhan”.

- 3) Sunat diteruskan ucapan talbiah sehingga melontar Jamrah al-Aqabah pada pagi Aidiladha (Hari Raya Korban).

7.1.9.2 Sunat Ketika Memasuki Mekah

- 1) Masuk ke Mekah terlebih dahulu sebelum wuquf, kemudian dari sana menuju Arafah.
- 2) Mandi untuk masuk ke Mekah di tempat yang dikenali dengan “*Biru Zi Tuwa*”, iaitu sebuah telaga yang terkenal dan tempat Nabi Muhammad SAW selalu mandi sebelum Baginda masuk ke Makkah.
- 3) Masuk ke Mekah melalui jalan celah-celah bukit.
- 4) Terus melakukan tawaf Qudum setibanya di Mekah bagi menghormati Kaabah seperti yang sentiasa dilakukan oleh Nabi SAW.
- 5) Masuk ke dalam Masjid al-Haram di Pintu Babul Salam menuju ke dataran Kaabah melalui Bab Bani Syaibah. Apabila melihat Kaabah, maka angkatlah tangan dan berdoalah dengan doa yang berikut:

اللَّهُمَّ زِدْ هَذَا الْبَيْتَ تَشْرِيفًا وَتَعْظِيمًا
وَتَكْرِيمًا وَمَهَابَةً وَزِدْ مَنْ شَرَفَهُ وَكَرَمَهُ مِنْ
حَجَّةٍ وَاعْتَمَرَهُ تَشْرِيفًا وَتَكْرِيمًا وَتَعْظِيمًا
وَبِرًا

Allaahumma zid haadzal baita tasyriifan wa ta'dziiman wa takriiman wa mahaabatan wa zid man syarafahu wa karamahu mimman hajjahu wa'tamarahu

*tasyriifan watakriiman
wata'dziiman wabirran.*

Bermaksud: “Ya Allah, tambahkanlah kehormatan, keagungan, kemuliaan dan kehebatan, Kaabah ini dan tambahkanlah kehormatan, kebesaran, kemuliaan dan kebaikan kepada mereka yang memulia dan mengagungkannya dalam kalangan orang mengerjakan haji atau umrah. Ya Allah, Engkaulah Tuhan yang bersifat sejahtera, hanya daripada-Mu segala kesejahteraan.”

7.1.9.3 Sunat Ketika Tawaf

- 1) Melakukan tawaf dengan berjalan, sama ada lelaki atau perempuan kecuali yang uzur disebabkan sakit dan seumpamanya. Dibolehkan bertawaf bagi mereka yang uzur itu menggunakan kenderaan.
- 2) Mengusap, mengucup dan meletakkan dahi di Hajar Aswad ketika memulakan tawaf

Jika tidak dapat berbuat demikian disebabkan orang ramai yang berasak-asak dan sebagainya, memadailah Istilam (kedua tangan melambai Kaabah sebagai isyarat mengucup Hajar Aswad) sambil mengucapkan “*Bismillahi Allahuakbar*”.

Kaum Wanita tidak disunatkan mengusap dan mengucup Hajar Aswad kecuali laluan tawaf di hadapannya lapang.

- 3) Meletakkan pertengahan kain selendang di bawah keyiak kanan dan kedua-dua hujungnya di atas kiri dengan menjadikan bahu kanan terbuka bagi lelaki. Istilah bagi perbuatan ini dinamakan Ittibak.
- 4) Mengulangi perbuatan mengusap dan mengucup Hajar Aswad pada setiap kali pusingan dengan syarat-syarat yang telah disebutkan. Begitu juga sunat melakukannya setelah selesai tawaf dan solat sunat.
- 5) Berdoa ketika memulakan tawaf.
- 6) Berlari-lari anak, iaitu berjalan cepat dengan langkah yang pendek pada tiga pusingan yang pertama. Kemudian berjalan seperti biasa pada empat pusingan yang lain. Seseorang yang melakukan tawaf sunat tidak disunatkan berlari-lari anak.
- 7) Solat sunat dua rakaat kawasan belakang makam Nabi Ibrahim AS selepas selesai tawaf. Pada rakaat yang pertama bacalah Surah al-Kafirun, dan pada rakaat yang kedua Surah al-Ikhlas selepas membaca Surah al-Fatihah.

7.1.9.4 Sunat Ketika Sai

- 1) Jika telah melakukan Sai selepas tawaf, sunat tidak mengulanginya selepas tawaf yang lain. Ini bererti, seseorang yang telah mengerjakan Sai selepas Tawaf Qudum makruh mengulanginya selepas Tawaf Ifadah. Tawaf Qudum ialah tawaf sunat yang dilakukan sebaik-baik sahaja sampai di Mekah manakala Tawaf Ifadah ialah tawaf rukun bagi ibadat haji.

- 2) Sunat naik ke atas Bukit Safa pada permulaan Sai hingga boleh melihat Kaabah sekiranya tidak ada apa-apa melindunginya.
- 3) Mengerjakan Sai dengan berjalan selagi mampu melakukan demikian. Sunat berlari-lari anak di antara kedua-dua tanda yang ditetapkan, dan sunat berdoa ketika itu, dan pada setiap kali mendaki Bukit Safa dan Bukit Marwah dengan sebarang doa yang dikehendaki untuk diri sendiri, saudara mara dan seluruh orang Mukmin.

7.1.9.5 Sunat Ketika Pergi ke Arafah

Wukud di Arafah merupakan rukun yang terpenting diantara rukun-rukun haji. Akan tetapi, sekiranya hendak mengikuti sunah dan perjalanan Nabi Muhammad SAW ketika Baginda ke Arafah maka perlulah langkah-langkah yang berikut diikuti:

- 1) Pergi ke Arafah selepas memasuki Mekah dan melakukan Tawaf Qudum.
- 2) Imam atau pemimpin dalam kalangan orang Islam berucap di Mekah selepas solat Zuhur pada 7 Zulhijah, bagi memberi panduan kepada mereka untuk pergi ke Mina pada hari yang berikutnya serta menerangkan langkah-langkah ibadat haji yang seterusnya supaya mereka benar-benar jelas tentang amalan-amalan yang dilakukan.
- 3) Pergi ke Mina pada hari yang kelapan, dan tinggal di sana sehingga pagi hari kesembilan. Begitu juga mengerjakan solat fardu lima

waktu di masjid al-Khaif iaitu masjid yang Rasulullah SAW pernah bersolat di situ.

- 4) Menuju ke Arafah selepas matahari terbit pada pagi hari yang kesembilan. Sunat tidak terus masuk ke Arafah apabila menghampiri sempadannya,
- 5) Sunat berhenti di Namirah hingga matahari gelincir dan menunaikan solat Zuhur serta Asar secara jamak takdim.
- 6) Memperbanyakkan berdoa, berzikir dan bertahlil serta merendah diri kepada Allah SWT Ketika berwukuf di Arafah.

7.1.9.6 Sunat Ketika Bermalam di Muzdalifah

- 1) Bermalam di Muzdalifah sehingga Azan Subuh dan menunaikan Solat Subuh pada awal waktunya. Bertolak ke Mina selepas mengutip tujuh anak batu di Muzdalifah untuk melontar jamrah.
- 2) Berhenti apabila sampai di al-Masyar al-Haram dan berdoa hingga pagi menjelang dengan memperbanyakkan menyebut selawat.
- 3) Kemudian teruskan perjalanan ke Mina sambil mengucap talbiah dan zikir sehingga sampai di sana selepas matahari terbit. Al-Masyar al-Haram ialah sebuah bukit yang kecil terletak di hujung kawasan Muzdalifah.

7.1.9.7 Sunat Ketika Melontar Jamrah

- 1) Tidak memulakan sebarang ibadat selain melontar jamrah apabila tiba di Mina. Hal ini adalah kerana melontar jamrah merupakan amalan menghormati Mina pada hari tersebut.
- 2) Berhenti mengucap talbiah ketika mula melontar jamrah. Hal ini adalah kerana Rasulullah SAW sentiasa mengucap talbiah sehingga Baginda SAW pula melontar jamrah dan menggantikannya dengan zikir.
- 3) Melontar setiap biji anak batu dengan tangan kanan sambil bertakbir. Bagi lelaki, hendaklah mengangkat tangan hingga kelihatan bahagian ketiak yang putih manakala wanita pula tidak perlu mengangkat tangan secara demikian. Anak-anak batu yang dibaling adalah sebesar biji kacang pul.

7.1.10 Perkara yang Membatalkan Haji

- 1) **Jimak (Persetubuhan)**
Memasukkan hasyafah (kepala zakar) ke dalam qubul atau dubur manusia atau binatang (sememangnya diharamkan walaupun bukan dalam ibadah haji) sekali pun berlapik dan dilakukan secara sedar dan tidak dipaksa. Terjadinya jimak ini sebelum tahalul awal (dua perkara daripada melontar di Jamratul Aqabah bercukur dan tawaf diiringi sai).
- 2) **Luput Waktu Arafah**
Melepasi waktu yang telah ditetapkan (iaitu selepas terbit fajar 10 Zulhijah).
- 3) **Murtad (Keluar Daripada Islam)**
Semoga Allah SWT melindungi kita daripadanya.

7.1.11 Hukum Haji bagi Wanita

Seperti lelaki, wanita juga wajib menunaikan fardu Haji jika cukup syarat-syarat wajibnya seperti yang telah disebutkan dahulu. Tetapi ada syarat tambahan bagi wanita yang hendak menunaikan fardu haji iaitu:

- 1) Hendaklah ditemani oleh suaminya atau mahramnya (iaitu orang yang haram dinikahi atau dengan sekurang-kurangnya tiga orang perempuan yang boleh dipercayai).
- 2) Dengan izin suami atau walinya. Berhubung dengan larangan pergi Haji bagi wanita tanpa mahram ini.

Rasulullah SAW bersabda dalam hadis riwayat Imam al-Bukhari (1862), daripada Abdullah bin Abbas RA bahawa Nabi SAW bersabda:

لَا تُسَافِرْ الْمَرْأَةُ إِلَّا مَعَ ذِي حُرْمَةٍ

Bermaksud: “Seorang wanita tidak boleh bermusafir melainkan bersama mahram.”

Rasulullah SAW juga bersabda dalam hadis riwayat Imam al-Bukhari (1088):

لَا يَجْلِلُ لِامْرَأَةٍ تُؤْمِنُ بِاللَّهِ وَالْيَوْمِ الْآخِرِ أَنْ تُسَافِرْ
مَسِيرَةً يَوْمٍ وَلَيْلَةً لِيَسَّرَ مَعَهَا حُرْمَةً.

Bermaksud: “Tidak boleh bagi seorang perempuan yang beriman dengan Allah dan Hari akhirat untuk bermusafir sejauh seharian semalam perjalanan kecuali bersamanya ada mahram”.

Disyaratkan bagi lelaki yang menemani wanita itu agar tidak berada jauh daripadanya supaya diketahui bahawa wanita itu sedang ditemani dan dijaga.

Jika tidak ada lelaki menemani wanita itu, maka memadai juga ditemani oleh tiga orang wanita yang boleh dipercayai.

7.1.12 Hukum Menyegearkan Haji

Mengenai hukum segera menunaikan fardu haji setelah cukup syarat-syarat wajib haji, menurut Imam Syafie adalah sunat iaitu tidaklah berdosa menangguhkannya asalkan sahaja ditunaikan pada sebarang waktu sebelum meninggal dunia.

Dalil atau alasan yang diberikan ialah fardu haji itu telah diwajibkan pada tahun keenam selepas hijrah, tetapi Nabi SAW menangguhkan pelaksanaan haji hingga pada tahun ke-10, baru Nabi SAW bersama-sama para sahabat menunaikan fardu haji, walaupun mereka telah berkuasa pergi pada tahun ketujuh, kelapan atau kesembilan. Sekiranya wajib dikerjakan segera sudah tentulah Nabi Muhammad SAW tidak akan menangguhkannya.

7.1.13 Haji Mabrur

7.1.13.1 Pengertian Haji Mabrur

Pengetian dari Segi Bahasa: Haji Mabrur bermaksud haji yang benar atau yang diterima.

Pengertian dari Segi Istilah: Haji yang mabrur adalah haji yang sempurna hukum-hukumnya sehingga terlaksana secara sempurna sebagaimana yang dituntut.

Di antara tanda-tanda haji mabrur adalah sekembalinya dari ibadah haji, seseorang itu sentiasa dalam keadaan zuhud dan merendah diri dalam hal dunia serta sentiasa bersemangat dalam mengejar akhirat.

7.1.13.2 Dalil Haji Mabrur

Dalam hadis riwayat Imam al-Bukhari (1773) dan Imam Muslim (1349), daripada Abu Hurairah RA bahawa Rasulullah SAW bersabda:

الْعُمْرَةُ إِلَى الْعُمْرَةِ كَفَّارَةٌ لِمَا بَيْنَهُما
وَالْحَجَّ الْمَبِرُورُ لَيْسَ لَهُ جَزَاءٌ إِلَّا الْجَنَّةُ

Bermaksud: “Umrah kepada umrah yang seterusnya dapat mengifaratkan dosa antara keduanya dan haji mabrur[3] tiada balasan kecuali syurga”.

7.1.14 Proses pelaksanaan Ibadah Haji (*Manasik Haji*)

1) Melakukan ihram dari miqat yang ditentukan.

Ihram dapat dimulakan sejak awal bulan Syawal dengan melakukan mandi sunat, berwuduk, memakai pakaian ihram, dan berniat haji dengan mengucapkan:

Labbaik Allahumma hajjan,

Bermaksud: “aku datang memenuhi panggilan-Mu ya Allah, untuk berhaji.”

Kemudian berangkat menuju Arafah dengan membaca talbiyah untuk menyatakan niat:

لَبَيْكَ اللَّهُمَّ لَبَيْكَ لَبَيْكَ لَبَيْكَ لَكَ لَبَيْكَ إِنَّ

الْحَمْدَ وَالنِّعْمَةَ لَكَ وَالْمُلْكَ لَا شَرِيكَ لَكَ.

Labbaikallaahumma labbaik. Labbaika laa syariika laka labbaik. Innal hamda wanni'mata laka wal mulka laa syariika lak.

Bermaksud: “Aku menyahut seruan-Mu dan panggilan-Mu, aku lakukannya. Tidak ada sekutu bagi Engkau wahai Tuhan. Semua kerajaan adalah milik Engkau wahai Tuhan. Bahwasanya segala puji dan segala nikmat dan segala kerajaan adalah milik Engkau wahai Tuhan. Aku penuhi wahai Tuhan”.

2) Wukuf di Arafah

Dilaksanakan pada tanggal 9 Zulhijah, waktunya dimulakan setelah matahari tergelincir sampai terbit

fajar pada hari nahar (hari menyembelih kurban) tanggal 10 Zulhijjah.

Saat wukuf, ada beberapa hal yang harus dilakukan, iaitu: Solat Jamak Takdim dan Qasar Zuhur-Asar, berdoa, berzikir bersama, membaca Al-Quran, Solat Jamak Takdim dan Qasar Maghrib-Isya.

3) **Mabit di Muzdalifah, Mekkah**

Waktunya bermula tengah malam hingga sebelum terbit fajar. Di sini tempat mengambil batu kerikil sejumlah 49 butir atau 70 butir untuk melempar jamrah di Mina, dan melakukan Solat Subuh di awal waktu. Setelah berangkat menuju ke Mina. Kemudian berhenti sebentar di *Masy'aral Haram* (monumen suci) atau Muzdalifah untuk berzikir kepada Allah SWT dan mengerjakan Solat Subuh selepas masuk waktu.

4) **Melontar Jamrah Aqobah**

Dilakukan di bukit Aqobah pada tanggal 10 Dzulhijjah dengan 7 butir kerikil, kemudian menyembelih haiwan kurban.

5) **Tahalul**

Tahalul awal dilaksanakan setelah selesai melontar jamrah aqobah, dengan cara mencukur/memotong rambut sekurang-kurangnya 3 helai. Setelah tahalul boleh memakai pakaian biasa dan melakukan semua perbuatan yang dilarang selama ihram, kecuali berhubungan seks.

Bagi yang ingin melaksanakan Tawaf Ifadah pada hari itu dapat langsung pergi ke Mekah untuk tawaf. Dengan membaca talbiyah masuk ke Masjidil Haram melalui '*Baabus salam*' (pintu salam) dan melakukan tawaf. Selesai tawaf disunahkan mencium Hajar Aswad (batu hitam), lalu solat sunat dua rakaat di makam Ibrahim, berdoa di Multazam, dan solat dua

rakaat di Hijr Ismail (semuanya ada di kompleks Masjidil Haram).

Kemudian melakukan sai antara bukit Safa dan Marwa, dimulai dari bukit Safa dan berakhir di bukit Marwa. Lalu diteruskan dengan tahalul kedua, iaitu mencukur/memotong rambut sekurang-kurangnya 3 helai. Dengan demikian, seluruh perbuatan yang dilarang selama ihram telah dihapuskan (dibenarkan), sehingga semuanya kembali ke Mina sebelum matahari terbenam untuk mabit di sana.

6) Mabit di Mina

Dilaksanakan pada hari tasyrik (hari yang diharamkan untuk berpuasa), iaitu pada tanggal 11, 12 dan 13 Zulhijah. Setiap waktu siang pada hari-hari tasyrik itu melontar Jumroh Ula, Wusto dan Aqobah, masing-masing 7 kali.

Bagi yang menghendaki *Nafar Awal* (meninggalkan Mina tanggal 12 Zulhijah selepas jamrah petang hari), melontar jamrah dilakukan pada 11 dan 12 Zulhijah saja. Tetapi bagi yang menghendaki *Nafar Sani* atau *Nafar Akhir* (meninggalkan Mina pada 13 Zulhijah selepas jamrah petang hari), melontar jamrah dilakukan selama tiga hari (11, 12 dan 13 Zulhijah)

Dengan selesainya melontar jamrah maka selesailah seluruh ibadah haji dan kembali ke Mekah.

7) Tawaf Ifadah

Bagi yang belum melaksanakan Tawaf Ifadah ketika berada di Mekah, maka harus melakukan Tawaf Ifadah dan Sai . Lalu melakukan Tawaf Wada' sebelum meninggalkan Mekah untuk kembali pulang ke daerah asal.

Bersungguh-sungguh serta berdoalah agar Allah SWT menerima segala amalan ibadat haji yang telah dilaksanakan sebagaimana doa berikut:

اللَّهُمَّ اجْعِلْنَا حَاجًا مَبْرُورًا وَسَعِيًّا مَشْكُورًا
وَذَنْبِنَا مَغْفُورًا وَعَمَلًا صَالِحًا مُقْبُلًا وَتَحْمِارَةً
لَنْ تَبُورَ. يَا عَزِيزُ يَا غَفُورُ يَا رَبَّ
الْعَالَمِينَ

Allaahummaj 'alhu hajjan
mabruuran wa sa'yan masykuuran
wa zanban maghfuruan wa 'amalan
soolihan maqbuulan wa tijaarotan
lan tabuur. Ya 'aziizu ya ghafuuru
ya robbal 'aalamiin.

Bermaksud: “Ya Allah, jadikanlah hajiku ini haji yang mabrur, sa'i yang diterima, dosa yang diampuni dan amal shaleh yang dikabulkan dan perdagangan yang tidak akan mengalami rugi selamanya.wahai Tuhan yang maha pengampun, Tuhan sekalian alam.”

Ringkasan Proses Ibadah Haji Adalah Seperti Berikut:

Bil	PERKARA	WAKTU
1.	Melakukan ihram dari miqat yang telah ditentukan.	Boleh dimulakan sejak awal bulan Syawal
2.	Wukuf di Arafah.	9 Zulhijah, waktunya dimulakan setelah matahari tergelincir sampai terbit fajar pada hari nahar (hari menyembelih kurban) tanggal 10 Zulhijah.
3.	Melontar Jamrah Aqobah.	Dilakukan pada tanggal 10 Zulhijah
4.	Tahalul.	Dilakukan setelah selesai melontar Jamrah Aqobah.
5.	Mabit di Mina.	Dilakukan pada tanggal 11, 12 dan 13 Zulhijah
6.	Tawaf Ifadah.	Bagi yang belum melaksanakan Tawaf Ifadah ketika berada di Mekah, maka harus melakukan Tawaf Ifadah dan Sai . Lalu melakukan Tawaf Wada' sebelum meninggalkan Mekah untuk kembali pulang ke daerah asal.

BAB 2

UMRAH

7.2 UMRAH

7.2.1 Pengertian Umrah

Pengertian dari Segi Bahasa: Ziarah.

Pengertian dari Segi Istilah: Umrah ialah tawaf di baitullah, dan saie di antara Bukit Safa dan Bukit Marwah dengan ihram.

7.2.2 Dalil dan Hukum Umrah

Firman Allah SWT dalam Surah al-Baqarah (2) ayat 196:

وَأَتِمُوا الْحَجَّ وَالْعُمْرَةَ لِلَّهِ ...
١٩٦

Maksudnya: "Dan sempurnakanlah ibadah Haji dan Umrah kerana Allah; ..." (196)

Dalam hadis riwayat Imam al-Bukhari (2876) dan Imam Ibnu Majah (2901), daripada Aishah RA berkata:

هَلْ عَلَى النِّسَاءِ جِهَادٌ؟ قَالَ: نَعَمْ جِهَادٌ لَا قِتَالَ
فِيهِ الْحُجَّ وَالْعُمْرَةُ

Bermaksud: Adakah jihad bagi kaum wanita? Baginda bersabda: "Ya jihad tanpa perang iaitu haji dan umrah".

Sebahagian ulama berpendapat bahawa hukum melaksanakan umrah adalah wajib atau fardu bagi orang

yang belum melaksanakan sementara dia mampu untuk melaksanakannya.

7.2.3 Syarat-syarat Wajib Umrah

Syarat-syarat wajib umrah adalah sama seperti syarat-syarat wajib haji. Antara syarat wajib menunaikan umrah bagi yang berkemampuan adalah seperti berikut:

- 1) Islam
- 2) Baligh
- 3) Berakal
- 4) Merdeka
- 5) Berkemampuan (*Istito'ah*)

a) Ciri-ciri berkemampuan (*istito'ah*)

(i) Memiliki harta yang mencukupi untuk mengerjakan umrah. Harta yang dimaksudkan adalah seperti berikut:

- Kos pengangkutan.
- Perbelanjaan pergi dan balik, di samping bayaran untuk passport perjalanan.
- Upah pemandu umrah sebagaimana yang dikehendaki oleh pemerintah.
- Semua harta tersebut mestilah lebih dari jumlah hutangnya dan perbelanjaan ahli keluarga semasa ketiadaannya.

(ii) Sihat tubuh badan jasmani dan rohani.

(iii) Khusus bagi wanita, hendaklah wujud (ada) bersamanya mahram atau wanita yang *tsiqah*

(yang boleh dipercayainya) dalam perjalanan pergi dan balik bagi menunaikan ibadat umrah.

- 1) Hendaklah ditemani oleh suaminya atau mahramnya (iaitu orang yang haram dinikahi atau dengan sekurang-kurangnya tiga orang perempuan yang boleh dipercaya).
- 2) Dengan izin suami atau walinya. Berhubung dengan larangan pergi Haji bagi wanita tanpa mahram ini.

Rasulullah SAW bersabda dalam hadis riwayat Imam al-Bukhari (1862), daripada Abdullah bin Abbas RA bahawa Nabi SAW bersabda:

لَا تُسَافِرْ الْمَرْأَةُ إِلَّا مَعَ ذِي حُرْمَةٍ

Bermaksud: “Seorang wanita tidak boleh bermusafir melainkan bersama mahram.”

Rasulullah SAW juga bersabda dalam hadis riwayat Imam al-Bukhari (1088):

لَا يَحِلُّ لِإِمْرَأَةٍ تُؤْمِنُ بِاللهِ وَالْيَوْمِ الْآخِرِ
أَنْ تُسَافِرْ مَسِيرَةَ يَوْمٍ وَلَيْلَةً لِيَسَّرَ مَعَهَا
حُرْمَةً.

Bermaksud: “Tidak boleh bagi seorang perempuan yang beriman dengan Allah dan Hari akhirat untuk bermusafir sejauh

*sehari semalam perjalanan
kecuali bersamanya ada
mahram”.*

Disyaratkan bagi lelaki yang menemani wanita itu agar tidak berada jauh daripadanya supaya diketahui bahawa wanita itu sedang ditemani dan dijaga.

Jika tidak ada lelaki menemani wanita itu, maka memadai juga ditemani oleh tiga orang wanita yang boleh dipercayai.

(iv) Aman dalam perjalanan.

Tidak wajib haji atas orang yang bimbang akan ancaman musuh terhadap diri atau hartanya disebabkan ada kemudaratan. Antara ancaman yang dibimbangi terhadap diri dan hartanya adalah seperti:

- Penyamun.
- Perompak atau lanun.
- Wabak penyakit. Seperti Corona Virus (Covid-19), taun, selsema burung dan lain-lain.
- Harta yang dibimbangi dirampas.

Begitu juga, sekiranya dikhawatir terdapat bahaya dalam perjalanan seperti berlaku peperangan.

7.2.4 Rukun Umrah

- 1) **Niat ihram umrah.** Lafaz niat adalah seperti berikut:

نَوَّيْتُ الْعُمْرَةَ وَأَخْرَمْتُ بِهَا لِلَّهِ تَعَالَى

Nawaitul 'umrata wa ahramtu biha Lillaahi Ta'aalaa

Bermaksud: “Sahaja aku menunaikan umrah dan berihram dengannya kerana Allah Taala”.

- 2) **Tawaf umrah.** Tawaf bermaksud mengelilingi Kaabah sebanyak tujuh kali pusingan bermula dari sudut Hajarul Aswad.

Terdapat beberapa syarat sah tawaf seperti menutup aurat, suci daripada hadas besar dan kecil, mengekalkan niat tawaf, cukup tujuh pusingan dengan yakin dan sebagainya.

- 3) **Sai umrah.** Sai memberi maksud berjalan ulang-alik atau berlari-lari anak di antara Bukit Safa dan Bukit Marwah sebanyak tujuh kali.

Perbuatan sai juga mempunyai syarat sah seperti bermula dari Bukit Safa dan berakhir di Bukit Marwah, cukup tujuh kali ulang-alik dengan yakin, hendaklah dilakukan ditempat yang disediakan dan lain-lain lagi.

- 4) **Bergunting atau bercukur.** Dalam rukun ini, hendaklah kita menanggalkan sekurang-kurangnya tiga helai rambut. Disunatkan kepada jemaah lelaki untuk bercukur.

Perbuatan ini hendaklah dilakukan setelah selesai tawaf dan sai umrah.

- 5) **Tertib.** Iaitu mengerjakan rukun-rukun umrah mengikut susunan bermula daripada niat, tawaf, sa'ie, bercukur atau bergunting.

7.2.5 Wajib Umrah

- 1) Berniat ihram di Miqat.
- 2) Meninggalkan perkara-perkara yang dilarang semasa ihram.

BAB3

JENIS DAM DAN KESALAHANNYA

7.3 DAM HAJI DAN UMRAH

7.3.1 Pengertian Dam

Pengertian dari Segi Bahasa: Darah.

Pengertian dari Segi Istilah: Dam ialah denda yang dikenakan pada jemaah yang mengerjakan haji atau umrah kerana melakukan kesalahan semasa mengerjakan haji atau umrah, atau melakukan perkara-perkara yang dilarang semasa ihram, atau meninggalkan perkara-perkara wajib haji atau wajib umrah, sama ada dilakukan dengan sengaja atau tidak sengaja atau tidak tahu.



Gambar 127: Sekiranya Berkemampuan Dam Perlu Dibayar Melalui Penyembelihan Binatang Seperti Kambing, Lembu atau Unta.

7.3.2 Dalil Pensyariatan Dam

Firman Allah SWT dalam Surah al-Baqarah (2) ayat 196:

وَأَتَمُوا الْحُجَّةَ وَالْعُمْرَةَ لِلَّهِ فَإِنَّ أَحْصَرُكُمْ فَمَا أُسْتَيْسَرَ
مِنَ الْهُدَىٰ وَلَا تَحْلِفُوا رُؤُوسَكُمْ حَتَّىٰ يَبْلُغَ الْهُدَىٰ
مَحَلَّهُ وَفَمَنْ كَانَ مِنْكُمْ مَرِيضًا أَوْ يَهْرُبُ أَذَىٰ مِنْ
رَّأْسِهِ فَقِدْيَةٌ مِنْ صِيَامٍ أَوْ صَدَقَةٍ أَوْ نُسُكٍ فَإِذَا
أَمِنْتُمْ فَمَنْ تَمَّتَّعَ بِالْعُمْرَةِ إِلَى الْحُجَّةِ فَمَا أُسْتَيْسَرَ مِنَ
الْهُدَىٰ فَقَنَ لَمْ يَجِدْ فَصِيَامُ ثَلَاثَةِ أَيَّامٍ فِي الْحُجَّةِ
وَسَبْعَةٌ إِذَا رَجَعْتُمْ تِلْكَ عَشَرَةُ كَامِلَةٌ ذَلِكَ لِمَنْ لَمْ
يَكُنْ أَهْلُهُ وَحَاضِرِي الْمَسْجِدِ الْحَرَامَ وَأَتَقُوا اللَّهَ
وَأَعْلَمُوا أَنَّ اللَّهَ شَدِيدُ الْعِقَابِ ١٩٦

Maksudnya: Dan sempurnakanlah ibadat Haji dan Umrah kerana Allah; maka sekiranya kamu dikepong (dan dihalang daripada menyempurnakannya ketika kamu sudah berihram, maka kamu bolehlah bertahallul serta) sembelihlah Dam yang mudah didapati; dan janganlah kamu mencukur kepala kamu (untuk bertahallul), sebelum binatang Dam itu sampai (dan disembelih) di tempatnya. Maka sesiapa di antara kamu sakit atau terdapat sesuatu yang menyakiti di kepalanya (lalu ia mencukur rambutnya), hendaklah ia membayar fidyah. Iaitu berpuasa, atau

bersedekah, atau menyembelih Dam. Kemudian apabila kamu berada kembali dalam keadaan aman, maka sesiapa yang mahu menikmati kemudahan dengan mengerjakan Umrah, (dan terus menikmati kemudahan itu) hingga masa (mengerjakan) ibadat Haji, (bolehlah ia melakukannya kemudian wajiblah ia) menyembelih Dam yang mudah didapati. Kalau ia tidak dapat (mengadakan Dam), maka hendaklah ia berpuasa tiga hari dalam masa mengerjakan Haji dan tujuh hari lagi apabila kamu kembali (ke tempat masing-masing); semuanya itu sepuluh (hari) cukup sempurna. Hukum ini ialah bagi orang yang tidak tinggal menetap (di sekitar) masjid Al-Haraam (Makkah). Dan hendaklah kamu bertaqwa kepada Allah; dan ketahuilah bahwasanya Allah Maha berat balasan seksaNya (terhadap orang-orang yang melanggar perintahNya). (196)

Allah SWT juga berfirman dalam Surah al-Maa'idah (5) ayat 95:

يَأَيُّهَا الَّذِينَ ءَامَنُوا لَا تَقْتُلُوا الْصَّيْدَ وَإِنْتُمْ حُرُومٌ وَمَنْ قَتَلَهُ وَمِنْكُمْ مُّتَعَمِّدًا فَجَزَاءُهُ مِثْلُ مَا قَتَلَ مِنَ النَّعْمَ يَحْكُمُ بِهِ دُوَا عَدْلٍ مِّنْكُمْ هَدِيًّا بَلَغَ الْكَعْبَةَ أَوْ كَفَرَةُ طَعَامُ مَسَكِينٍ أَوْ عَدْلُ ذَلِكَ صِيَامًا لِيَذُوقَ وَبَالْ أَمْرِهِ عَفَا اللَّهُ عَمَّا سَلَفَ وَمَنْ عَادَ فَيَنْقَمِ ۝
اللَّهُ مِنْهُ وَاللَّهُ عَزِيزٌ ذُو اُنتِقَامٍ

Maksudnya: Wahai orang-orang yang beriman! Janganlah kamu membunuh binatang-binatang buruan ketika kamu sedang berihram. Dan sesiapa di antara kamu yang membunuhnya dengan sengaja, maka dendanya (menggantinya) dengan binatang ternak yang sama dengan binatang buruan yang dibunuh itu, yang ditetapkan hukumnya oleh dua orang yang adil di antara kamu, sebagai hadiah yang disampaikan ke Kaabah (untuk disembelih dan dibahagikan kepada fakir miskin di Tanah Suci), atau bayaran kafarah, iaitu memberi makan orang-orang miskin, atau berpuasa sebanyak bilangan cupak yang diberikan kepada orang miskin; supaya dapat ia merasai kesan yang buruk dari perbuatannya. Allah maafkan apa yang telah lalu; dan sesiapa yang mengulangi (kesalahan itu) maka Allah akan menyeeksanya; dan (ingatlah) Allah Maha Kuasa, lagi Berkusa membalas dengan azab seksa. (95)

7.3.3 Perkara-perkara yang Menyebabkan Seseorang yang Menunaikan Haji atau Umrah Dikenakan Dam

- 1) Dam kerana meninggalkan Wajib Haji. Ia dilaksanakan mengikut urutan dan kadar yang ditetapkan.

Seseorang yang meninggalkan satu daripada Wajib Haji dia wajib menyembelih seekor kambing yang layak untuk korban sama ada 1/7 lembu atau unta. Jika tidak mampu untuk melaksanakannya, maka wajib menggantikannya dengan berpuasa selama 10 hari, iaitu 3 hari semasa haji, dan tujuh hari setelah berada di tanah air.

- 2) Dam kerana melakukan larangan semasa berihram. Ia boleh dilaksanakan mengikut pilihan manakala kadarnya ditetapkan.

Sesiapa melakukan larangan tersebut seperti bercukur atau menggunting bulu, memotong kuku dan sebagainya dia wajib sama ada menyembelih seekor kambing, berpuasa selama tiga hari atau memberi makanan kepada enam orang miskin di Tanah Haram Mekah sebanyak 1/2 gantang gandum, setiap seorang.

- 3) Dam kerana memotong tumbuh-tumbuhan atau membunuh binatang perburuan. Ia boleh dilaksanakan mengikut pilihan manakala gantinya mengikut persamaan.

Sesiapa yang melakukan larangan tersebut, maka pelakunya perlu menyembelih binatang ternakan yang setara dengan binatang perburuannya di Tanah Haram Mekah, atau membeli makanan yang setara harganya dan disedekahkan kepada penduduk Tanah Haram Mekah atau berpuasa sehari bagi setiap cupak makanan yang senilai dengan haiwan tersebut.

- 4) Dam disebabkan halangan. Ia dilaksanakan mengikut turutan manakala gantinya mengikut persamaan nilai.

Sesiapa yang terhalang mengerjakan haji setelah berihram, dia wajib menyembelih seekor kambing, di tempat dia tersekat. Jika tidak mampu dia hendaklah bersedekah makanan yang setara dengan harga kambing tersebut kepada fakir miskin. Dan jika tidak mampu juga dia hendaklah berpuasa sehari bagi setiap cupak makanan berkenaan.

- 5) Dam kerana persetubuhan. Ia juga dilaksanakan mengikut turutan dan gantinya mengikut persamaan.

Sesiapa yang bersetubuh sebelum tahallul yang pertama, dia wajib menyembelih seekor unta. Jika tidak mampu dia hendaklah menyembelih tujuh ekor kambing. Seterusnya, jika tidak mampu dia hendaklah bersedekah makanan yang setara dengan harga unta tersebut kepada penduduk tanah haram mekah. Dan sekiranya tidak mampu juga dia hendaklah berpuasa sehari bagi setiap cupak makanan berkenaan.

7.3.4 Jenis-jenis Dam

Dam terbahagi kepada empat jenis dam, iaitu:

- 1) **Dam *Tertib*.**
Dam dibayar ikut susunan.
- 2) **Dam *Takdil*.**
Dam dibayar ikut nilai harga dam.
- 3) **Dam *Takdir*.**
Dam dibayar ikut kadar yang ditentukan ikut kemampuan.
- 4) **Dam *Takhayir Takdil*.**
Dibolehkan memilih mana-mana jenis dam yang ditetapkan oleh syarak.

Penerangan dan perincian kesalahan dan jenis dam tersebut adalah seperti berikut:

Jenis Dam	Kesalahan	Bayaran
1) Dam Tertib Takdir Dam dibayar mengikut susunan (tertib). Kemampuan dam perlu mengikut ketetapan syarak (takdir) Dam ini tidak boleh dipilih atau diganti.	1) Tidak berihram di miqat. 2) Mengerjakan haji secara qiran atau tamatuk. 3) Luput waktu di Arafah. 4) Tidak bermalam di Mina. 5) Tidak melontar jamrah. 6) Tidak menepati nazar yang berkaitan ibadat haji. 7) Tidak melakukan tawaf widak	<ul style="list-style-type: none"> Menyembelih seekor kambing. <p>Sekira tidak mampu,</p> <ul style="list-style-type: none"> Berpuasa 10 hari, 3 hari di Mekah dan 7 hari apabila pulang ke tempat masing-masing.
2) Dam Tertib Takdil Dam yang boleh ditaksirkan (harganya) dan boleh ditukar kepada benda lain mengikut	1) Melakukan persetubuhan sebelum tahalul pertama (membatalkan haji).	<ul style="list-style-type: none"> Bagi jemaah haji yang meninggalkan tawaf widak hendaklah berpuasa 3 hari setelah berlepas dari Mekah dan 7 hari.

kemampuan masing-masing.		<p>Sekira tidak mampu,</p> <ul style="list-style-type: none"> • Membeli makanan dengan nilai harga unta dan disedekahkan kepada fakir miskin. <p>Sekira tidak mampu,</p> <ul style="list-style-type: none"> • Berpuasa beberapa hari mengikut bilangan cupak makanan yang boleh dibeli dengan seekor unta.
	2) Terhalang daripada memasuki Mekah setelah berniat ihram.	<ul style="list-style-type: none"> • Menyembelih seekor kambing dan bercukur. <p>Sekira tidak mampu,</p> <ul style="list-style-type: none"> • Membeli makanan dengan nilai harga kambing dan bercukur <p>Sekira tidak mampu,</p> <ul style="list-style-type: none"> • Membeli makanan dengan harga kambing disedekahkan kepada akir miskin <p>Sekira tidak mampu,</p> <ul style="list-style-type: none"> • Berpuasa beberapa hari mengikut bilangan cupak makanan yang boleh dibeli dengan nilai harga kambing.

<p>3) Dam <i>Takhyir Taqdir</i></p> <p>Boleh ditunaikan mengikut pilihan sendiri (takhyir)</p>	<ol style="list-style-type: none"> 1) Memakai pakaian yang bersarung atau berjahit bagi lelaki. 2) Memakai bau-bauan. 3) Memotong kuku. 4) Bersetubuh kali kedua sebelum tahalul awal. 	<ul style="list-style-type: none"> • Menyembelih seekor kambing dan disedekahkan kepada fakir miskin. <p>Atau,</p> <ul style="list-style-type: none"> • Bersedekah 2 cupak makanan kepada enam orang fakir miskin. <p>Atau,</p> <ul style="list-style-type: none"> • Berpuasa selama 3 hari.
<p>4) Dam <i>Takhyir Takdil</i></p> <p>Pembayarannya bergantung kepada pilihan sendiri dan tidak ditetapkan tetapi berdasarkan harga sebanding.</p>	<ol style="list-style-type: none"> 1) Berburu binatang ternakan yang sebanding dengan binatang buruan itu. 2) Menebang, memotong, atau mencabut pohon di Tanah Haram. 	<ul style="list-style-type: none"> • Menyembelih binatang ternakan yang sebanding dengan binatang buruan itu. <p>Atau,</p> <ul style="list-style-type: none"> • Membeli makanan dengan nilai harga binatang buruan itu. <p>Atau,</p> <ul style="list-style-type: none"> • Berpuasa mengikut bilangan cupak makanan yang dibeli dengan harga binatang buruan itu.

7.3.5 HIKMAH DAM

- 1) Menampung kekurangan dalam ibadat haji atau umrah.
- 2) Jemaah dapat menunaikan haji atau umrah dengan teratur dan berdisiplin.
- 3) Berhati-hati dan bersungguh-sungguh dalam menumpukan perhatian semasa melaksanakan ibadat haji atau umrah.
- 4) Jemaah yang melakukan kesalahan semasa mengerjakan haji atau umrah, atau melakukan perkara-perkara yang dilarang semasa ihram, atau meninggalkan perkara-perkara wajib haji atau wajib umrah bertanggungjawab keatas kesalahan yang dilakukannya.

BAB 4

RUMUSAN HAJI DAN UMRAH SERTA PERBEZAANNYA

7.4 HAJI DAN UMRAH

Ibadah haji dan umrah merupakan ibadat yang sangat dituntut oleh Allah SWT. Setiap tempat yang dikunjungi memberi peluang kepada umat keseluruhannya dalam menghayati dan memahami segenap peristiwa dan sejarah para Nabi dan Rasul serta para sahabatnya. Ibadah haji dan umrah juga memberi kesedaran kepada kita akan tanggungjawab sebagai seorang hamba agar terus patuh dan taat kepada perintah Allah SWT dan menjauhi segala larangan-Nya.

7.4.1 Fadilat dan Hikmah Haji dan Umrah

1) Perhimpunan Orang Islam

Haji dan umrah adalah simbol perhimpunan orang Islam sebagai satu ijtimak tahunan.

2) Persaudaran Sesama Islam

Memberi peluang kepada setiap jemaah haji dan umrah mengeratkan ukhuwah Islamiah dan menzhirkannya secara terbuka tanpa dipengaruhi halangan bahasa dan negara. Ini adalah cara terbaik untuk menghidupkan suasana ukhuwah tersebut dengan pertemuan di sekeliling Baitullah sambil berdoa kepada Tuhan yang sama.

3) Kesatuan Umat Islam

Haji dan umrah menghimpun dan menyatukan seluruh umat Islam dari serata dunia. Menarik seluruh umat

Islam walau sejauh mana sekalipun negara mereka, untuk bertemu di Makkah al-Mukarramah, iaitu tempat Islam mula tersebar di bumi yang memancarkan cahaya tauhid ke seluruh pelusuk alam, sebagai tanda kesatuan.

4) Persamaan dalam kalangan umat Islam

Ibadat haji dan umrah merupakan satu daripada ciri persamaan dikalangan orang Islam. Semasa di Arafah, di Mina, melontar jamrah dan tawaf hampir tiada perbezaan antara orang kaya dengan yang miskin, pemimpin dengan rakyat, dan antara pekerja dengan majikan.

2) Mengimbau peristiwa lampau

Ibadat haji dan umrah mengingat dan menghayati peristiwa penting dan sejarah para nabi serta rasul. Contohnya peristiwa Siti Hajar yang berulang alik antara bukit Safa dan Bukit Marwah kerana mencari air untuk anaknya Nabi Ismail AS.

3) Pendidikan Jasmani dan Rohani

Mengerjakan haji dan umrah secara tida langsung memberi pendidikan jasmani dan rohani dimana jemaah akan menghadapi keadaan yang sukar, menempuh pelbagai kesulitan dan tabah menghadapi cabaran.

7.4.2 Pengertian Haji dan Umrah

Pengertian	Haji	Umrah
Pengertian dari Segi Bahasa	Menuju atau mengunjungi sesuatu tempat.	Ziarah.
Pengertian dari Segi Istilah	Mengunjungi Baitullah (Kaabah) pada masa tertentu (Bulan Haji, Zulhijah) serta melaksanakan perkara-perkara yang wajib bagi ibadah haji.	Tawaf di Baitullah (Kaabah), dan Sai di antara safa dan marwah dengan ihram.

7.4.3 Rukun Haji dan Umrah Secara Ringkas

Bil	Rukun Haji	Rukun Umrah
1.	Ihram	Ihram
2.	Wukuf di Arafah	Tawaf
3.	Tawaf	Sai
4.	Sai	Tahalul
5.	Tahalul	Tertib
6.	Tertib	-

7.4.4 Wajib Haji dan Umrah

Bil	Wajib Haji	Wajib Umrah
1.	Berniat ihram di Miqat.	Berniat ihram di Miqat
2.	Bermalam di Muzdalifah.	Meninggalkan perkara-perkara larangan umrah.
3.	Melontar Jamratul Aqabah.	-
4.	Bermalam di Mina.	-
5.	Melontar di tiga-tiga Jamrah.	-
6.	Meninggalkan perkara-perkara larangan haji.	-

7.4.5 Perbezaan Haji dan Umrah Secara Umum

Dapat diringkaskan di sini perbezaan di antara ibadah haji dan umrah secara umum adalah seperti berikut:

- 1) Haji hanya dikerjakan pada bulan haji sahaja, iaitu bermula 1 Syawal sehingga terbit fajar 10 Zulhijah. Manakala waktu umrah pula adalah pada bila-bila masa sepanjang tahun.
- 2) Haji adalah wajib bagi setiap individu dan ia juga merupakan Rukun Islam, manakala umrah pula adalah sunat dilakukan jika berkemampuan.
- 3) Haji memerlukan wukuf di Arafah pada hari kesembilan Zulhijah, bermalam di Muzdalifah dan di Mina serta melontar jamrah, manakala umrah tiada wukuf serta perkara-perkara yang disebutkan tadi.
- 4) Rukun haji ada enam iaitu ihram, wukuf di Arafah, tawaf, sai, tahalul dan tertib manakala umrah hanya lima iaitu ihram, tawaf, sai, tahallul dan tertib.

BAHAGIAN 8

PENUTUP

8. PENUTUP

Selepas memeluk Islam, banyak perkara yang perlu diketahui dan dipelajari oleh mualaf mengenai ajaran Islam. Namun kesemua perkara tersebut tidak boleh difahami dalam masa yang singkat.

Justeru proses pembelajaran perlu dilakukan secara berperingkat-peringkat. Sebagaimana ilmu fekah adalah ilmu berkaitan dengan hukum dan peraturan yang dianjurkan dalam syariat Islam. Ia menjadi asas bagi melaksanakan ibadat sepetimana yang dijelaskan dalam al-Quran dan Sunah.

Ilmu fekah mengubah seluruh kehidupan seseorang mualaf dari kehidupan sebelum Islam kepada kehidupan selepas Islam yang memahami sebab-sebab tertentu mengapa sesuatu hukum atau peraturan itu ditetapkan dalam Islam.

RUJUKAN

- Al-Quran dan Hadis.
- Anwar, Syahrul. *Ilmu Fekah dan Ushul Fekah*. 2010. Bogor : Ghalia Indonesia.
- Abu al-Husain Ahmad ibnu Faris ibn Zakariya, Mu'jam maqayis al-lughah, (beirut: Dar Ihya al-turats al-'Arabi, 2001 M/1422H), hlm. 442.
- Abdul Hamid Hakim, As-Sulam:Ushul Fiqih(Jakarta: Maktabah sa'diyah Putra, 1998),hlm. 5.
- Kitab l'anah at-Thalibin (1/100)
- Al-Fairuzabādī (817H), al-Qāmūs al-Muḥīṭ, Juz. 4, (al-Hai'ah al-Miṣriyyah al-'Āmmah lil Kitāb), 284.
- Ahmad Mohd Salleh, Kurikulum, Metodologi Dan Pedagogi Pendidikan Islam: KPLI Pengajian Islam & j-Qaf (Siri Pendidikan Guru), (Shah Alam: Oxford Fajar Sdn Bhd., 2011), 363-367
- Anwar, Syahrul. *Ilmu Fekah dan Ushul Fekah* (Bogor: Ghalia Indonesia, 2010). hlm. 23-25.
- Dr. Wahbah al-Zuhaylī, al-Fekah al-`Islāmī wa Adillatuh, Juz. 1 (Damsyik: Dār al-Fikr, 1985),16.
- Dr. Muṣṭafā al-Khin, Dr. Muṣṭafā al-Bughā dan `Alī al-Sharbājī, al-Fekah al-Manhajī `alā Mazhab al-Imām al-Shāfi`ī, Jil. 1, hlm.7-8.
- Dr. Qutb Muṣṭafā Sanu, Mu`jam Muṣṭalahāt 'Usūl al-Fekah, (Damshiq: Dūr al-Fikr, 2000), 9
- Dr. `Abd al-Karīm Zaidān, al-Wajīz fī 'Usūl al-Fekah, Cet. 5, (Beirut: Mu'assasah al-Risālah, 1996), 8.
- Mannā` Khalīl al-Qattān, Tārīkh al-Tashrī` al-`Islāmī; al-Tashrī` wa al-Fekah, (Riyadh: Maktabah al-Ma`ārif li al-Nashr wa al-Tauzī` , 1996), hlm.183.
- Nata, Abuddin. *Masail Fekahiyah*. 2006. Jakarta : Kencana Prenada Media Group
- Zaidan, Abdul Karim. *Pengantar Studi Syari'ah*. (Jakarta : Robbani Press,2008) hlm.44-48.
- Koto, Alauddin. *Ilmu Fiqih dan Ushul Fiqih*. (Jakarta : Fajar Interpratama Offset, 2004)) hlm. 59-84.
- Sulaiman Rasyid, Fiqih Islam (Hukum Fiqih Lengkap), (Bandung, Sinar Baru, 1982), hal. 419
- Mahmood Zuhdi Hj. Ab. Majid, Dinamisme Pengajian Syariah (Kuala Lumpur: Berita Publishing Sdn. Bhd, 1997), 2
- Fātiḥ Muḥammad Sulaymān Seh Nakāwā, Muṣṭalahāt al-Fikr al-`Islāmī al-Mu`āsir, (Beirūt: Dār al-Kutub al-`Ilmiyyah, 2012), 94
- Indahnya Hidup Bersyariat, Modul Fardu Ain Diri, Keluarga dan Masyarakat Sepanjang Hayat, *Dato' Ismail Kamus dan Mhd Azrul Azlen Ab. Hamid*.
- JABATAN KEMAJUAN ISLAM MALAYSIA (JAKIM)
- Laman web fatwa <http://www.myhealth.gov.my/sembahyang-untuk-orang-sakitorang-kurang-upaya-oku/>

Ensiklopedia A-Z tentang solat, Dr. Nik Yusri Musa
Jabatan Kemajuan Islam Malaysia (JAKIM)
Laman web fatwa <http://www.myhealth.gov.my/sembahyang-untuk-orang-sakitorang-kurang-upaya-oku/>
<http://ibadahpuasa-ting2.blogspot.com/2008/10/qada-fidayah-dan-kifaratpuasa.html?m=1>
Rujuk al-Tanbih hal. 38, al-Umm 1/244 dan Mughni al-Muhtaj, 1/346)
Rujuk al-Taqrirat al-Sadidah, hlm 385 dan al-Fiqh al-Manhaji, 1/600)
Kaifiyah Solat Jenazah Ghaib

BUKU TEKS KELAS PENGAJIAN ISLAM PERKIM

FEKAH
TAHAP ASAS

ISBN 978-967-26038-1-8



9 7 8 9 6 7 2 6 0 3 8 1 8



PERTUBUHAN KEBAJIKAN ISLAM MALAYSIA (PERKIM) 2021